



CATECHISMUS  
EX DECRETO  
CONCILII TRIDENTINI  
AD PAROCHOS  
PII V. ET CLEMENTIS XIII. PONT. MAX.

JUSSU EDITUS

AD

EDITIONEM ROMAE A D. MDCCXLV. PUBLICI JURIS  
FACTAM ACCURATISSIME EXPRESSUS.

---


CUM APPROBATIONE ORDINARIATUS RATISBONENSIS.

EDITIO STEREOTYPA SEXTA.

---

RATISBONAE.

INSTITUTUM LIBRARII PRIDEM G. J. MANZ.



# CATECHISMUS EX DECRETO CONCILII TRIDENTINI

AD PAROCHOS

PII V. ET CLEMENTIS XIII. PONT. MAX.

JUSSU EDITUS

AD

EDITIONEM ROMAE A. D. MDCCCXLV. PUBLICI IURIS  
FACTAM ACCURATISSIME EXPRESSUS.

---

CUM APPROBATIONE ORDINARIATUS RATISBONENSIS.

---

EDITIO STEREOTYPA SEXTA.

---

RATISBONAE.

INSTIT. LIBRAR. PRIDEM G. J. MANZ.

1905.

**Imprimatur.**

Ratisbonae, die 26. Nov. 1904.

**Dr. Fr. Leitner,**

Vic. Gen.

**Th. Braun.**

# INDEX CAPITUM.

---

	Pag.
Clemens Papa XIII. Episcopis . . . . .	1
Prooemium, agens de Pastorum in Ecclesia necessitate, auctoritate, officio et praecipuis Doctrinae Christianae capitibus . . . . .	6

### Pars Prima.

Cap. I. De fide et Symbolo fidei . . . . .	13
Cap. II. De primo Symboli Articulo . . . . .	15
Cap. III. De secundo Articulo . . . . .	27
Cap. IV. De tertio Articulo . . . . .	34
Cap. V. De quarto Articulo . . . . .	40
Cap. VI. De quinto Articulo . . . . .	49
Cap. VII. De sexto Articulo . . . . .	57
Cap. VIII. De septimo Articulo . . . . .	62
Cap. IX. De octavo Articulo . . . . .	67
Cap. X. De nono Articulo . . . . .	73
Cap. XI. De decimo Articulo . . . . .	86
Cap. XII. De undecimo Articulo . . . . .	91
Cap. XIII. De duodecimo Articulo . . . . .	99

### Pars Secunda.

Cap. I. De Sacramentis in genere . . . . .	106
Cap. II. De Baptismi Sacramento . . . . .	121
Cap. III. De Sacramento Confirmationis . . . . .	150
Cap. IV. De Sacramento Eucharistiae . . . . .	160
Cap. V. De Poenitentiae Sacramento . . . . .	194
Cap. VI. De Sacramento extremae Unctionis . . . . .	229
Cap. VII. De Sacramento Ordinis . . . . .	236
Cap. VIII. De Sacramento matrimonii . . . . .	251

### Pars Tertia.

Cap. I. De Dei praeceptis in Decalogo contentis . . . . .	264
Cap. II. De primo Praecepto . . . . .	271
Cap. III. De secundo Praecepto . . . . .	282
Cap. IV. De tertio Praecepto . . . . .	292

		Pag.	
Cap.	V.	De quarto Praecepto . . . . .	301
Cap.	VI.	De quinto Praecepto . . . . .	311
Cap.	VII.	De sexto Praecepto . . . . .	319
Cap.	VIII.	De septimo Praecepto . . . . .	325
Cap.	IX.	De octavo Praecepto . . . . .	335
Cap.	X.	De nono et decimo Praecepto . . . . .	344

**Pars Quarta.**

Cap.	I.	De oratione, eiusque in primis necessitate . . . . .	352
Cap.	II.	De utilitate Orationis . . . . .	354
Cap.	III.	De partibus et gradibus Orationis . . . . .	357
Cap.	IV.	De iis, quae petenda sunt . . . . .	360
Cap.	V.	Pro quibus orandum sit . . . . .	361
Cap.	VI.	Quis orandus sit . . . . .	363
Cap.	VII.	De praeparatione adhibenda . . . . .	364
Cap.	VIII.	Quae ratio in orando requiratur . . . . .	367
Cap.	IX.	De Orationis Dominicæ proemio . . . . .	370
Cap.	X.	De prima petitione Orationis Dom. . . . .	379
Cap.	XI.	De secunda Petitione . . . . .	383
Cap.	XII.	De tertia Petitione . . . . .	391
Cap.	XIII.	De quarta Petitione . . . . .	399
Cap.	XIV.	De quinta Petitione . . . . .	408
Cap.	XV.	De sexta Petitione . . . . .	418
Cap.	XVI.	De septima Petitione . . . . .	427
Cap.	XVII.	De extrema Orationis Dominicæ clausula . . . . .	433
Praxis Concionatoria . . . . .			437
Index Catechismi . . . . .			455

# Clemens Papa XIII.

## Venerabilibus fratribus Patriarchis, Primatibus, Archiepiscopis et Episcopis.

Venerabiles fratres, salutem et apostolicam benedictionem.

In dominico agro, cui excolendo divina disponente providentia praesumus, nihil tam vigilantem curam et perseverantem requirit industriam, quam iacti boni seminis, catholicae nimirum doctrinae a Christo Iesu et ab apostolis acceptae, nobisque traditae custodia; ne si pigro otio et incerti desidia negligatur, dormientibus operariis, inimicus humani generis superseminet zizania; ex quo fiat, ut in die messis potius quam condenda in horreis, inveniantur ea quae urenda sint flammis. Atque ad tuendam quidem semel traditam<sup>1)</sup> sanctis fidem nos vehementer excitat beatissimus Paulus, qui Timotheo scribit, ut bonum<sup>2)</sup> custodiat depositum, quod periculosa<sup>3)</sup> tempora instarent, cum in ecclesia Dei homines mali<sup>4)</sup> et seductores exsisterent, quorum opera adhibita insidiosus ille tentator his erroribus incautas mentes conaretur inficere, qui sint evangeliae veritatis inimici. Verum si, quod saepe accidit, quaedam in ecclesia Dei sese extulerint pravae sententiae, quae adversis quidem sibi frontibus pugnantes, in eo tamen conspirent, ut catholicae fidei puritatem quoquo modo labefactent; tum vero difficillimum est, ea cautione inter utrumque hostem ita nostrum librare sermonem, ut nulli eorum terga vertisse, sed utrosque Christi hostes aequa vitavisse, et condemnasse videamur. Atque interdum res est eiusmodi, ut facile diabolica falsitas veri quadam similitudine coloratis se tegat mendaciis, dum vis sententiatarum brevissima adiectione aut commutatione corrumpitur, et confessio, quae operabatur salutem, subtili nonnumquam transitu vergat in mortem.

Ab his propterea lubricis angustisque semitis, quibus insistere aut ingredi sine prolapsione vix possis, avertendi sunt fideles, ac praesertim qui rudiore sint ac simpliciore ingenio;

<sup>1)</sup> Iudae 3. <sup>2)</sup> II Tim. 1, 14. <sup>3)</sup> ib. 3, 1. <sup>4)</sup> id. v. 18.

nec per invia loca ducendae sunt oves ad pascua, nec singularia quaedam, etiam catholicorum doctorum, placita iis sunt proponenda, sed illa certissima catholicae veritatis nota tradenda est, doctrinae universitas, antiquitas et consensio. Praeterea cum non possit vulgus ascendere in montem<sup>1)</sup>, in quem gloria Domini descendit, et transcendens terminos ad videndum peribit; termini figendi sunt populo ab eius doctoribus per circuitum, ut ultra ea, quae sunt ad salutem necessaria, aut summopere utilia, sermo non divagetur, et fideles apostolico dicto pareant:<sup>2)</sup> „Non plus sapere quam oportet sapere, sed sapere ad sobrietatem.“

Haec cum probe intellexissent romani pontifices praedecessores nostri, in id omnem suam operam contulerunt, ut non modo venenata germina subnascentium errorum anathematis gladio praeciderent, sed etiam subcrescentes opiniones quasdam amputarent, quae vel redundantia in christiano populo fidei uberiorem fructum impedirent, vel fidelium animis proximitate nocere possent erroris. Postquam igitur tridentina synodus eas, quae tum temporis ecclesiae lucem obfuscare tentaverant, haereses condemnavit, et catholicam veritatem, quasi discussa errorum nebula, in clariorem lucem eduxit; cum iidem praedecessores nostri intelligerent, sacrum illum universalis ecclesiae conventum tam prudenti consilio, tantaque usum esse temperantia, ut ab opinionibus reprobandis abstineret, quae doctorum ecclesiasticorum auctoritatibus fulcirentur; ex eiusdem sacri concilii mente aliud opus confici voluerunt, quod omnem doctrinam complecteretur, qua fideles informari oporteret, et quae ab omni errore quam longissime abasset. Quem librum „Catechismi romani“ nomine typis impressum evulgarunt, dupl毅力 in ea re laudandi. Nam et illuc eam doctrinam contulerunt, quae communis est in ecclesia, et procul abest, ab omni periculo erroris; et hanc palam populo tradendam disertissimis verbis proposuerunt, ita Christi domini praecepto obtemperantes, qui Apostolos<sup>3)</sup> dicere in lumine iussit, quod in tenebris ipse dixisset, et quod in aure audierant, super tecta praedicare ecclesiaeque sponsae obsecuti, cuius illae voces: „Indica mihi ubi cubes in meridie;“<sup>4)</sup> ubi enim non sit meridies, atque ita perspicua lux, ut liquido veritas cognoscatur, facile pro ea recipitur falsitas propter veri similitudinem, quae in obscuro difficulter a vero discernitur. Noverant enim fuisse antea et deinceps futuros, qui pascentes invitarent, et sapientiae

<sup>1)</sup> Ex. 19, 12. <sup>2)</sup> Rom. 12, 3. <sup>3)</sup> Mat. 10, 27. <sup>4)</sup> Cant. 1, 6.

scientiaeque uberiora promitterent pascua, ad quos multi confluenter, quia aquae furtivae<sup>1)</sup> dulciores sunt, et suavior panis absconditus. Ne igitur seducta vagaretur ecclesia post greges sodalium, qui et ipsi sint vagi, nulla stabiles certitudine veritatis, semper discentes<sup>2)</sup> et numquam ad scientiam veritatis pervenientes; idcirco quae ad salutem tantummodo essent necessaria et maxime utilia, clare in romano catechismo, et dilucide explanata, christiano populo tradenda proposuerunt.

Verum hunc librum non mediocri labore et studio compositum, omnium consensione probatum et summis laudibus exceptum, his temporibus e pastorum manibus propemodum novitatis amor excussum, cum alios atque alios catechismos extulerit nullo modo cum romano comparandos; unde duo mala extiterunt: alterum, quod illa fuerit in eadem docendi ratione prope sublata consensio, oblatumque pusillis quoddam scandali genus, quibus sibi ipsi iam non amplius esse videantur in terra labii unius<sup>3)</sup> et sermonum eorundem; alterum, quod ex diversis variisque tradendae catholicae veritatis rationibus ortae sunt contentiones, et ex aemulatione, dum alius se Apollo, alius Cephae, alias Pauli se dictat sectatorem, disiunctiones animorum et magna dissidia; quorum dissensionum acerbitate nihil ad Dei gloriam minuendam exitialius putamus, nihil ad extinguendos fructus, quos e christiana disciplina aequum est fideles percipere, calamitosius. Itaque duplex hoc malum ut ab ecclesia tandem amoliremur, illuc duximus redeundum, unde quidam parum prudenti consilio, nonnulli etiam superbia ducti, ut sese in ecclesia iactent sapientiores, iamdudum fidelium populum avocaverant; et eundem catechismum romanum pastoribus animarum iterum porrigidum existimavimus; ut qua ratione confirmata olim fuit catholica fides, et in doctrina ecclesiae, quae est columna veritatis,<sup>4)</sup> fidelium mentes corroboratae, eadem nunc a novis quoque opinionibus, quibus nec consensio, nec antiquitas suffragatur, quam longissime avertantur. Atque probabilior ut fieret liber, et maculis, quas operarum vitio contraxerat, emendatior, illum ad eius exemplum, quem S. Pius V. praedecessor noster ex tridentinae synodi decreto vulgavit, iterum omni adhibita diligentia excludendum in alma urbe curavimus, qui in popularem sermonem eiusdem S. Pii iussu conversus et editus, propediem mandato itidem nostro typis impressus denuo prodibit in lucem.

Quod igitur hoc christiana reipublicae difficillimo tempore

<sup>1)</sup> Prov. 9, 17. <sup>2)</sup> II. Tim. 3, 7. <sup>3)</sup> Gen. 11, 1. <sup>4)</sup> I. Tim. 3, 15.

ad pravarum opinionum fraudes removendas, et veram sanamque doctrinam propagandam stabiliendamque opportunissimum subsidium cura nostra praebet et diligentia, vestrum est, venerabiles fratres, operam dare, ut a fidelibus recipiatur. Ac propterea hunc librum, quem veluti catholicae fidei et christiana disciplinae normam, ut etiam in tradendae doctrinae ratione constaret omnium consensio, romani pontifices pastoribus propositum voluerunt, vobis, venerabiles fratres, nunc maxime commendamus, vosque etiam enixe in Domino cohortamur, ut iubeatis ab omnibus, qui animarum curam gerunt, in informandis catholica veritate populis adhiberi, quo tum eruditionis unitas, tum charitas animorumque servetur concordia. Vestrum enim est tranquillitati omnium studere, quae denique sunt partes episcopi; qui propterea illuc intentos oculos habere debet, ne quisquam propter suos honores superbe agendo schismata faciat, unitatis compage disrupta.

Nullum tamen aut certe exiguum hi libri fructum praebent utilitatis, si qui eos proponere et explanare audientibus debent, minus docendo sint ipsi idonei. Itaque permagni interest, ut ad hoc munus christiana doctrinae populo tradendae homines eligatis, non modo sacrarum rerum scientia praeditos, sed multo magis et humilitate, et sanctificandarum animarum studio, charitate flagrantes. Tota enim christiana disciplina non in abundantia verbi, non in astutia disputandi, neque in appetitu laudis et gloriae, sed in vera et voluntaria humilitate consistit. Sunt enim, quos maior quidem scientia erigit, sed a ceterorum societate disiungit, et quo plus sapiunt, eo a concordiae virtute desipiunt, qui sapientia ipsa Dei verbo admonentur: „Habete sal in nobis, et pacem habete inter vos<sup>1)</sup>;“ ita enim sapientiae sal habendum, ut eo proximi amor custodiatur et infirmitates condiantur. Quod si a sapientiae studio, a cura etiam proximi ad discordias vertantur, sal sine pace habent, non virtutis donum, sed damnationis argumentum; et quo melius sapiunt, eo deterius delinquent; quos quidem damnat Iacobi apostoli sententia illis verbis: „Quod si zelum amarum habetis<sup>2)</sup>, et contentiones sint in cordibus vestris, nolite gloriarci, et mendaces esse adversus veritatem;“ non est enim ista sapientia desursum descendens, sed terrena, animalis, diabolica; ubi enim zelus est et contentio, ibi inconstantia et omne opus pravum; quae autem desursum est sapientia, primum quidem pudica est, deinde pacifica, modesta, suadibilis, bonis consen-

<sup>1)</sup> Marc. 9, 49. <sup>2)</sup> Iac. 3, 14.

tiens, plena misericordia et fructibus bonis, non iudicans, sine  
aemulatione.

Dum ergo Deum in humilitate cordis et afflictione animae  
deprecamur, ut diligentiae atque industriae nostrae conatibus  
suam impertiat indulgentiae et misericordiae largitatem, ne  
dissensio populum fidelem disturbet, utque in vinculo pacis et  
in charitate spiritus unum sapiamus omnes, unum laudemus et  
glorificemus Deum et Dominum nostrum Iesum Christum, vos,  
venerabiles fratres, salutamus in osculo sancto; vobisque omni-  
bus itidemque cunctis ecclesiarum vestrarum fidelibus aposto-  
licam benedictionem amantissime impertimur.

Datum in arce Castri Gandulphi die XIV. Iunii MDCCCLXI.  
pontificatus nostri anno III.

## PROOEMIUM

agens de pastorum in ecclesia necessitate, auctoritate, officio  
et praecipuis doctrinae Christianae capitibus.

### I. Homo non potest, suis relictus viribus, veram sapientiam et obtinendae beatitudinis certas rationes consequi.

Ea est humanae mentis et intelligentiae ratio, ut, quum  
alia multa, quae ad divinarum rerum cognitionem pertinent,  
ipsa per se magno adhibito labore et diligentia investigaverit  
ac cognoverit, maximam tamen illorum partem, quibus aeterna  
salus comparatur, cuius rei in primis causa homo conditus  
atque ad imaginem et similitudinem Dei creatus est, naturae  
lumine illustrata cognoscere aut cernere nunquam potuerit.  
„Invisibilia<sup>1)</sup> quidem Dei, ut docet Apostolus, a creatura  
mundi per ea, quae facta sunt, intellecta conspiuntur; sem-  
piterna quoque eius virtus et divinitas: „Verum „mysterium  
illud<sup>2)</sup>, quod absconditum est a saeculis et generationibus,“  
ita humanam intelligentiam superat, ut, nisi manifestatum  
fuisset sanctis, quibus voluit Deus fidei munere notas facere  
divitias gloriae sacramenti huius in gentibus, quod est Christus,  
nullo studio homini ad eam sapientiam adspirare li-  
cuisse.

### II. Unde tam praeclarum fidei munus concipiatur.

Cum autem „fides ex auditu<sup>3)</sup>“ concipiatur, perspicuum  
est, quam necessaria semper fuerit ad aeternam salutem con-  
sequendam doctoris legitimi fidelis opera ac ministerium; si-  
quidem dictum est<sup>4)</sup>: „Quomodo audient sine praedicante?  
quomodo vero praedicabunt, nisi mittantur?“ Et quidem ab  
ipsius mundi origine clementissimus ac benignissimus Deus  
suis nunquam defuit, sed multifarie multisque modis locutus<sup>5)</sup>  
est patribus in Prophetis, eisque pro temporum conditione ad  
coelestem beatitudinem certum ac directum iter monstravit.

### III. Christus in hunc mundum venit ad docendam fidem, quam postea Apostoli et successores eorum propagarunt.

Sed quoniam praedixerat, daturum se doctorem iustitiae  
in lucem gentium<sup>6)</sup>, ut esset salus eius usque ad extremum  
terrae, novissime locutus est nobis in Filio<sup>7)</sup>, quem etiam,  
voce e coelo delapsa<sup>8)</sup> a magnifica gloria, iussit ut omnes  
audirent, eisque praeceptis obtemperarent. Deinde vero Fi-

<sup>1)</sup> Rom. 1, 20. <sup>2)</sup> Col. 1, 26. <sup>3)</sup> Rom. 10, 17. <sup>4)</sup> Rom. 10, 14. 15. <sup>5)</sup> Hebr. 1, 1.  
<sup>6)</sup> Isa. 49, 6. <sup>7)</sup> Hebr. 1, 2. <sup>8)</sup> II. Petr. 1, 17.

lius alios dedit Apostolos, alios Prophetas, alios pastores et doctores, qui verbum vitae annunciant<sup>1)</sup>, ne circumferremur tanquam parvuli, fluctuantes omni vento doctrinae, sed firmo fidei fundamento adhaerentes, coaedificaremur<sup>2)</sup> in habitaculum Dei in Spiritu sancto.

*IV. Quomodo verba pastorum ecclesiae sint recipienda.*

Ac ne quis verbum auditus<sup>3)</sup> Dei ab ecclesiae ministris, tanquam verbum hominum, sed, sicut vere est, verbum Christi acciperet, ille ipse Salvator noster tantam auctoritatem eorum magisterio tribuendam esse statuit, ut diceret<sup>4)</sup>: „Qui vos audit, me audit; et qui vos spernit, me spernit;“ quod quidem non de iis tantum, quibuscum sermo habebatur, intelligi voluit, verum de omnibus etiam, qui legitima successione docendi munus obirent, quibus se omnibus diebus usque ad consummationem saeculi affuturum esse pollicitus est<sup>5)</sup>.

*V. Veritate iam manifestata hodie etiam necessarium est, pastores verbum Dei praedicare.*

At vero, quum haec divini verbi praedicatio nunquam intermitti in ecclesia debeat, tum certe hoc tempore maiori studio et pietate elaborandum est, ut sana et incorrupta doctrina tanquam pabulo vitae fideles nutriantur et confirmentur; exierunt enim falsi prophetae<sup>6)</sup> in mundum, de quibus dixit Dominus<sup>7)</sup>: „Non mittebam prophetas, et ipsi currebant; non loquebar ad eos, et ipsi prophetabant,“ ut variis<sup>8)</sup> doctrinis et peregrinis Christianorum animos depravarent. Quia in re illorum impietas, omnibus satanae artibus instructa, tam longe progressa est, ut nullis fere certis finibus contineri posse videatur; ac nisi Salvatoris nostri praeclera illa promissione niteremur<sup>9)</sup>, qui se adeo stabile ecclesiae suae fundamentum posuisse affirmavit, ut portae inferi adversus eam praevalere nunquam possint: maxime verendum esset, ne hoc tempore tot undique hostibus obsessa, tot machinis tentata et oppugnata concideret. Nam, ut omittamus nobilissimas provincias, quae olim veram et catholicam religionem, quam a maioribus acceperant, pie et sancte retinebant, nunc autem derelinquentes viam rectam erraverunt, atque in eo se maxime pietatem colere palam profitentur, quod a patrum suorum doctrina quam longissime recesserunt: nulla tam remota regio aut tam munitus locus, nullus Christianae reipublicae angulus inveniri potest, quo haec pestis occulte irrepere non tentarit.

<sup>1)</sup> Eph. 4, 11. 14. <sup>2)</sup> Eph. 2, 22. <sup>3)</sup> I. Thes. 2, 13. <sup>4)</sup> Lnc. 10, 16. <sup>5)</sup> Mat. 28, 20.  
<sup>6)</sup> I. Io. 4, 1. <sup>7)</sup> Ier. 23, 21. <sup>8)</sup> Hebr. 13, 9. <sup>9)</sup> Mat. 16, 18.

*VI. Catechismis potissimum haeretici Christianorum animos depravare studuerunt.*

Qui enim fidelium mentes corrumpere sibi proposuerunt, quum fieri nullo modo posse intelligerent, ut cum omnibus coram colloquerentur, et in eorum aures venenatas voces infunderent: idem alia ratione aggressi, multo facilius ac latius impietatis errores disseminarunt. Nam praeter illa ingentia volumina, quibus catholicam fidem evertere conati sunt, (a quibus tamen cavere, quum apertam haeresim continerent, non magni fortasse laboris ac diligentiae fuit), infinitos etiam libellos conscripserunt, qui, quum pietatis speciem prae se ferrent, incredibile est quam facile incautos simplicium animos deceperint.

*VII. Pestilentibus pseudoprophetarum vocibus et scriptis occurrendum s. synodus recte statuit.*

Quamobrem patres occumenicae Tridentinae synodi, quum tanto et tam perniciose huic malo salutarem aliquam medicinam adhibere maxime cuperent, non satis esse putarunt, graviora catholicae doctrinae capita contra nostri temporis haereses decernere, sed illud praeterea sibi faciendum censuerunt, ut certam aliquam formulam et rationem Christiani populi ab ipsis fidei rudimentis instituendi traderent, quam in omnibus ecclesiis illi sequerentur, quibus legitimi pastoris et doctoris munus obeundum esset.

*VIII. Necessae fuit, etiam oecumenici concilii studio summique Pontificis auctoritate, post tot doctrinae Christianae conscriptas institutiones, novum catechismum pastoribus proponere.*

Multi quidem adhuc in hoc scriptiorum genere cum magna pietatis et doctrinae laude versati sunt, sed tamen patribus visum est maxime referre, si liber sanctae synodi auctoritate ederetur, ex quo parochi, vel omnes alii, quibus docendi munus impositum est, certa pracepta petere atque de promere ad fidelium aedificationem possint, ut, quemadmodum unus est Dominus, una fides, ita etiam una sit tradendae fidei, ad omniaque pietatis officia populum Christianum erudiendi communis regula atque praescriptio.

*IX. Non sunt exacte universa nostrae religionis dogmata hic discussa.*

Ergo, quum multa sint, quae ad hanc rationem pertinere videantur, nemo existimet, illud sanctae synodo propositum fuisse, ut omnia Christianae fidei dogmata uno libro comprehensa subtiliter explicarentur, quod ab iis fieri solet, qui se profitentur universae religionis institutionem et doctrinam tra-

dere. Id enim et infiniti pene operis fuisset, et instituto minus convenire perspicuum est. Sed quoniam parochos sacerdotesque, animarum curatores, earum rerum cognitione instruendos suscepit, quae pastoralis munera maxime propriae sunt, et ad fidelium captum accommodatae: ea tantum in medium afferri voluit, quae hac in re pium pastorum studium, si in difficultioribus divinarum rerum disputationibus non ita versati fuerint, adiuvare possent. Quae quum ita sint, antequam ad ea singillatim tractanda accedamus, quibus huius doctrinae summa continetur: institutae rei ordo postulat, ut pauca quaedam exponantur, quae pastores considerare, sibique ante oculos proponere in primis debent, ut sciant, quoniam, veluti ad finem, omnia eorum consilia, labores, studia referenda sint, quove pacto id, quod volunt, facilius consequi et efficere possint.

*X. Quum pastores animarum hic instituendi suscipiantur, quid illis potissimum, ut rite suo fungantur munere, sit considerandum.*

Illud igitur primum videtur esse, ut semper meminerint, omnem Christiani hominis scientiam hoc capite comprehendi, vel potius, quemadmodum Salvator noster ait<sup>1)</sup>: „Haec est vita aeterna, ut cognoscant te solum verum Deum, et quem misisti Iesum Christum.“ Quamobrem in eo praecipue ecclesiastici doctoris opera versabitur, ut fideles scire ex animo cupiant Iesum Christum, et hunc crucifixum<sup>2)</sup>; sibique certo persuadeant, atque intima cordis pietate et religione credant aliud<sup>3)</sup> nomen non esse datum hominibus sub coelo, in quo oporteat nos salvos fieri; siquidem ipse propitiatio est pro peccatis nostris. At<sup>4)</sup> vero quia in hoc scimus, quoniam cognovimus cum, si mandata eius observemus, proximum est et cum eo, quod diximus, maxime coniunctum, ut simul etiam ostendat, vitam a fidelibus non in otio et desidia degendam esse, verum oportere, ut quemadmodum ipse ambulavit<sup>5)</sup>, ita et nos ambulemus, sectemurque<sup>6)</sup> omni studio iustitiam, pietatem, fidem, caritatem, mansuetudinem; dedit enim<sup>7)</sup> semet ipsum pro nobis, ut nos redimeret ab omni iniquitate, et mundaret sibi populum acceptabilem, sectatorem bonorum operum, quae Apostolus pastoribus praecipit, ut loquantur et exhortentur. Cum autem Dominus ac Salvator noster non solum dixerit, sed etiam exemplo suo demonstrarit, legem et Prophetas ex dilectione pendere, Apostolus deinde confirmarit<sup>8)</sup>, caritatem esse finem praecepsi ac legis plenitudinem<sup>9)</sup>: dubi-

<sup>1)</sup> Io. 17, 3. <sup>2)</sup> I. Cor. 2, 2. <sup>3)</sup> Act. 4, 12. <sup>4)</sup> I. Io. 2, 3. <sup>5)</sup> I. Io. 2, 6.  
<sup>6)</sup> II Tim. 2, 22. <sup>7)</sup> Tit. 2, 14. 15. <sup>8)</sup> Mat. 22, 40. I. Tim. 1, 5. <sup>9)</sup> Rom. 13, 8. 10.

tare nemo potest, hoc tanquam praecipuum munus omni dili-  
gentia curandum esse, ut fidelis populus ad immensam Dei  
erga nos bonitatem amandam excitetur, ac divino quodam ar-  
dore incensus ad summum illud et perfectissimum bonum ra-  
piatur, cui adhaerere, solidam et veram felicitatem esse, is  
plane sentiet, qui illud Prophetae dicere poterit<sup>1)</sup>: „Quid  
enim mihi est in coelo, et a te quid volui super terram?“  
Haec nimurum est via illa excellentior, quam idem Apostolus  
demonstravit<sup>2)</sup>, cum omnem doctrinæ et institutionis suaे  
rationem ad caritatem, quae nunquam excidit, dirigeret. Sive  
enim credendum, sive sperandum, sive agendum aliud pro-  
ponatur, ita in eo semper caritas Domini nostri commendari  
debet, ut quivis perspiciat, omnia perfectæ Christianæ virtutis  
opera non aliunde, quam a dilectione, ortum habere, neque ad  
alium finem, quam ad dilectionem, referenda esse.

*XI. Non satis est, pastores ad duos illos fines inter docendum  
respicere, sed se ad captum cuiusque debent accommodare.*

Cum autem in omni re tradenda plurimum intersit, utrum  
hoc an illo modo aliiquid doceas, tum vero hoc in Christiani  
populi institutione, maximi momenti existimandum est. Obser-  
vanda est enim audientium aetas, ingenium, mores, conditio,  
ut qui docendi munus exercet, omnia<sup>3)</sup> omnibus efficiatur; ut  
et omnes Christo lucrifaciāt, et se ipsum fidelem<sup>4)</sup> ministrum  
et dispensatorem probare possit, ac veluti<sup>5)</sup> servus bonus et  
fidelis dignus sit, qui super multa constituatur a Domino. Ne-  
que vero unius tantum generis homines fidei suae commissos  
esse arbitretur, ut praescripta quadam et certa docendi for-  
mula erudire, atque ad veram pietatem instituere aequē omnes  
fideles possit: sed quum alii, veluti<sup>6)</sup> modo geniti infantes  
sint, alii in Christo adolescere incipient, nonnulli vero quo-  
dam modo confirmata sint aetate: necesse est diligenter con-  
siderare<sup>7)</sup>, quibus lacte, quibus solidiore cibo opus sit, ac  
singulis ea doctrinae alimenta præbere, quae spiritum auge-  
ant<sup>8)</sup>, „donec occurramus omnes in unitatem fidei, et agnitionis Filii Dei, in virum perfectum, in mensuram aetatis plenitudinis Christi.“ Id vero Apostolus in se ipso omnibus ob-  
servandum indicavit, cum dixit<sup>9)</sup>, se Graecis et barbaris,  
sapientibus et insipientibus debitorem esse; ut videlicet intel-  
ligerent qui ad hoc ministerium vocati sunt, ita in tradendis  
fidei mysteriis ac vitae præceptis doctrinam ad audientium  
sensem atque intelligentiam accommodari oportere, ut, cum

<sup>1)</sup> Ps. 72, 25. <sup>2)</sup> I. Cor. 12, 31. <sup>3)</sup> I. Cor. 9, 19. 22. <sup>4)</sup> I. Cor. 4, 1. 2. <sup>5)</sup> Mat.  
25, 23. <sup>6)</sup> I. Petr. 2, 2. <sup>7)</sup> Hebr. 5, 12. I. Cor. 3, 2. <sup>8)</sup> Eph. 4, 13. <sup>9)</sup> Rom. 1, 14.

eorum animos, qui exercitatos sensus habent, spirituali cibo expleverint, ne interim parvulos fame perire patientur, ut<sup>1)</sup> qui panem petant, et non sit qui frangat eis. Neque vero cuiusquam studium in docendo retardari debet, propterea quod interdum necesse sit, auditorem earum rerum paeceptis instrui, quae leviores et humiliores videntur nec sine molestia ab iis potissimum tractari solent, quorum animus in sublimium rerum contemplatione versatur ac conquiescit. Nam si ipsa aeterni Patris sapientia in terras descendit, ut in carnis nostrae humilitate coelestis vitae paecepta nobis traderet: quem non compellat caritas Christi, ut parvulus<sup>2)</sup> fiat in medio fratrum suorum, et tanquam nutrix, fovens filios suos, ita cupide proximorum salutem desideret, ut, quod de se ipso Apostolus testatur<sup>3)</sup>, eis velit non solum evangelium Dei, sed etiam animam tradere?

*XII. Cum Deus visibilem sui paesentiam nobis subduxerit, pastores eius verbum haurient ex scriptura et traditionibus.*

Omnis autem doctrinae ratio, quae fidelibus tradenda sit, verbo Dei continetur, quod in scripturam traditionesque distributum est; itaque in harum rerum meditatione pastores dies noctesque versabuntur, memores illius divi Pauli admonitionis, quam ad Timotheum scriptam omnes, quicunque animalium curae paepositi sunt, ad se pertinere existimabunt. Est autem haec admonitio in hunc modum<sup>4)</sup>: „Attende lectio, exhortationi et doctrinae;“ „est“ enim<sup>5)</sup> „omnis Scriptura divinitus inspirata, utilis ad docendum, ad arguendum, ad corripiendum, ad erudiendum in iustitia, ut perfectus sit homo Dei, ad omne opus bonum instructus.“ Sed quoniam quae divinitus tradita fuerunt multa sunt et varia, ut nec ita facile aut animo comprehendi, aut etiam mente comprehensa memoria teneri possint, ut, quum se obtulerit docendi occasio, eorum parata sit et prompta explicatio: sapientissime maiores nostri totam hanc vim et rationem salutaris doctrinae in quatuor haec capita redactam, distribuerunt: Apostolorum symbolum, sacramenta, decalogum, dominicam orationem; nam omnia, quae Christianae fidei disciplina tenenda sunt, sive ad Dei cognitionem, sive ad mundi creationem et gubernationem, sive ad humani generis redemptionem spectent, sive ad bonorum praemia, et malorum poenas pertineant, Symboli doctrina continentur. Quae autem signa sunt et tanquam instrumenta ad divinam gratiam consequendam, haec septem sa-

<sup>1)</sup> Thren. 4, 4. <sup>2)</sup> 1. Thes. 2, 7. <sup>3)</sup> 1. Thes. 2, 8. <sup>4)</sup> 1. Tim. 4, 13. <sup>5)</sup> II. Tim. 3, 16. 17.

cramentorum doctrina complectitur. Iam vero quae ad leges referuntur, quorum finis est caritas, decalogo descripta sunt. Quidquid denique ab hominibus optari, sperari ac salutariter peti possit, id dominica precatione comprehenditur. Quare sequitur, ut, explanatis quatuor his quasi communibus sacrae scripturae locis, nihil fere ad eorum intelligentiam, quae Christiano homini discenda sunt, desiderari possit.

*XIII. Qua methodo parochi explicationem evangelii cum catechismi explicatione coniungent.*

Itaque visum est, monere parochos, ut quoties usu venirerit, ut aliquem interpretentur evangelii vel quemvis alium divinae scripturae locum, intelligent, eius loci, quicunque is fuerit, sententiam cadere sub unum aliquod quatuor illorum capitum, quae diximus, quo, tanquam ad eius doctrinae fontem, quod explicandum sit, configuent. Exempli causa, si explanandum sit illud evangelium primae dominicae Adventus: „Erunt signa in sole et luna etc.,“ quae ad eam rationem pertinent, tradita sunt illo symboli articulo: „Venturus est iudicare vivos et mortuos;“ quibus inde assumptis pastor una eademque opera fidelem populum et symbolum evangelicum docebit. Quare in omni docendi et interpretandi munere hanc consuetudinem tenebit dirigendi omnia ad prima illa quatuor genera, ad quae referri universam divinae scripturae vim atque doctrinam diximus. Docendi autem ordinem eum adhibebit, qui et personis et tempori accommodatus videbitur; nos Patrum auctoritatem secuti, qui initiandis Christo Domino, et in eius disciplina instituendis hominibus, a fidei doctrina initium fecerunt, operae pretium duximus, quae ad fidem pertinent, prius explicare.

**CATECHISMI**  
EX DECRETO  
**CONCILII TRIDENTINI**  
**PARS PRIMA.**

**CAPUT I.**

**De fide et symbolo fidel.**

*I. Quid sit fides hoc loco, et quae eius ad salutem necessitas.*

Sed quoniam in divinis literis multiplex est fidei significatio, hic de ea loquimur, cuius vi omnino assentimur iis, quae tradita sunt divinitus. Hanc autem ad salutem consequam esse necessariam, nemo iure dubitabit, praesertim cum scriptum sit<sup>1)</sup>: „Sine fide impossibile est placere Deo.“ Cum enim finis, qui ad beatitudinem homini propositus est, altior sit, quam ut humanae mentis acie perspici possit: necesse ei erat, ipsius a Deo cognitionem accipere. Haec vero cognitio nihil aliud est, nisi fides, cuius virtus efficit, ut id ratum habeamus, quod a Deo traditum esse sanctissimae matris ecclesiae auctoritas comprobarit. Nulla enim fidelibus potest accidere dubitatio in iis, quorum Deus auctor est, qui est ipsa veritas<sup>2)</sup>. Ex quo intelligimus, quantum inter hanc fidem, quam Deo habemus, intersit et illam, quam humanae historiae scriptoribus adhibemus. Fides autem, quamquam late pateat, et magnitudine ac dignitate differat [est enim sic in sacris literis<sup>3)</sup>: „Modicae fidei, quare dubitasti?“ et, „Magna est fides tua,“ et<sup>4)</sup>, „Adauge nobis fidem,“ item<sup>5)</sup>, „Fides sine operibus mortua,“ et<sup>6)</sup>, „Fides quae per charitatem operatur“]: tamen est idem genere, et diversis fidei gradibus eadem definitionis vis et ratio convenit. Quam vero fructuosa sit, et quantam ex ea utilitatem capiamus, in articulorum explicatione dicetur.

*II. Quando et qua de causa duodecim capita ab Apostolis sint tradita.*

Quae igitur primum Christiani homines tenere debent, illa sunt, quae fidei duces doctoresque sancti Apostoli, divino Spi-

---

<sup>1)</sup> Hebr. 11, 6. <sup>2)</sup> Jo. 14, 6. <sup>3)</sup> Mat. 14, 31. 15, 28. <sup>4)</sup> Luc. 17, 5. <sup>5)</sup> Jac. 2, 20.  
<sup>6)</sup> Gal. 5, 6.

ritu afflati, duodecim symboli articulis distinxerunt. Nam cum mandatum<sup>1)</sup> a Domino accepissent, ut, pro ipso legatione fungentes, in universum mundum proficiscerentur, atque omni creaturae evangelium praedicarent: Christianae fidei formulam componendam censuerunt, ut scilicet id ipsum omnes sentirent ac dicerent<sup>2)</sup>), neque ulla essent inter eos schismata, quos ad fidei unitatem vocassent, sed essent perfecti in eodem sensu et in eadem sententia.

*III. Symbolum unde sit dictum.*

Hanc autem Christianae fidei et spei professionem a se compositam Apostoli symbolum appellarunt, sive quia ex variis sententiis, quas singuli in commune contulerunt, conflata est, sive quia ea veluti nota et tessera quadam uterentur, qua desertores et subintroductos falsos fratres, qui evangelium adulterabant, ab iis, qui vere Christi militiae sacramento se obligarent, facile possent internoscere.

*IV. Quae symboli huius necessitas, et quot in partes dividatur.*

*Credo in Deum.* Cum multa in Christiana religione fidelibus proponantur, quorum singulatim vel universe certam et firmam fidem habere oportet, tum vero illud primo ac necessario omnibus credendum est, quod veluti veritatis fundamentum ac summam de divinae essentiae unitate et trium personarum distinctione, earumque actionibus, quae praecipua quadam ratione illis attribuuntur, Deus ipse nos docuit, huius mysterii doctrinam breviter in Symbolo Apostolorum comprehensam esse, parochus docebit. Nam, ut maiores nostri, qui in hoc arguento pie et accurate versati sunt, observaverunt, in tres potissimum partes ita distributum videtur, ut in una divinae naturae prima persona et mirum creationis opus describatur; in altera, secunda persona, et humanae redemptionis mysterium; in tertia, tertia item persona, caput et fons sanctitatis nostrae, variis et aptissimis sententiis concludatur. Eas autem sententias, similitudine quadam a Patribus nostris frequenter usurpata, articulos appellamus. Ut enim corporis membra articulis distinguuntur, ita etiam in hac fidei confessione, quidquid distincte et separatim ab alio nobis credendum est, recte et apposite articulum dicimus.

---

<sup>1)</sup> Mat. 28, 19. Marc. 16, 15. <sup>2)</sup> I. Cor. 1, 10.

---

## C A P U T II.

## De primo symboli articulo.

Credo in Deum Patrem omnipotentem, creatorem coeli et terrae.

*I. Explicatur breviter primus articulus.*

His verbis ea sententia subiecta est: certo credo ac sine  
ulla dubitatione profiteor Deum Patrem, primam scilicet Tri-  
nitatis personam, qui sua omnipotenti virtute coelum ipsum  
et terram, et omnia, quae coeli et terrae ambitu continentur,  
ex nihilo condidit, et condita tuetur ac regit; neque solum  
eum corde credo et ore confiteor, verum summo studio ac  
pietate ad illum, veluti summum et perfectissimum bonum,  
contendo. Haec igitur sit brevis quaedam primi huius articuli  
comprehensio. Sed quoniam magna mysteria in singulis fere  
verbis latent, ea nunc diligentius parocho perpendenda sunt,  
ut, quantum Dominus permiserit, ad eius maiestatis gloriam  
contemplandam cum timore et tremore fidelis populus accedat.

*II. Credendi verbum quid significet.*

Igitur credendi vox hoc loco putare, existimare, opinari  
non significat, sed, ut docent sacrae literae, certissimae as-  
sensionis vim habet, qua mens Deo, sua mysteria aperienti,  
firme constanterque assentitur. Quamobrem is credit (quod  
ad huius loci explicationem attinet), cui aliquid sine ulla haes-  
itatione certum et persuasum est. Neque vero existimare  
quisquam debet, fidei notitiam minus certam esse, quod ea  
non cernantur, quae nobis credenda fides proponit; etenim  
divinum lumen, quo ea percipimus, tametsi rebus perspicua-  
tem non afferat, nos tamen de his dubitare non sinit. „Deus“  
enim<sup>1)</sup>, „qui dixit de tenebris lucem splendescere, ipse illuxit  
in cordibus nostris,“ ut non sit nobis opertum evangelium,  
sicut iis, qui pereunt.

*III. Quae in symbolo proponuntur non curiose scrutanda, sed  
simpliciter asserenda sunt.*

Iam vero ex iis, quae dicta sunt, consequitur, eum qui  
coelesti hac fidei cognitione praeditus est, inquirendi curiositate  
liberum esse. Deus enim, cum iussit nos credere, non divina  
iudicia scrutanda, eorumque rationem et causam perquirendam  
nobis proposuit, sed immutabilem fidem praecepit, quae efficit,  
ut animus in aeternae veritatis notitia conquiescat. Ac pro-  
fecto quum Apostolus testetur<sup>2)</sup>: „Deus verax est, omnis

<sup>1)</sup> II. Cor. 4, 6. 3. <sup>2)</sup> Rom. 3, 4.

autem homo mendax<sup>1</sup>),<sup>4</sup> si arrogantis et impudentis hominis est, gravi ac sapienti viro aliquid affirmanti fidem non habere, sed praeterea urgere, ut, quod dixerit, rationibus aut testibus probetur: cuius temeritatis, atque adeo stultitiae fuerit, Dei voces audientem, coelestis ac salutaris doctrinae rationes requirere? Fides itaque, seclusa omni non solum ambiguitate, sed etiam demonstrandi studio, tenenda est.

*IV. Non sufficit ad salutem credere, sed etiam fidem profiteri necessarium est.*

Verum illud praeterea doceat parochus, eum, qui dicit, „Credo,” praeterquam quod intimum mentis suae assensum declarat, qui interior fidei actus est, debere id, quod animo inclusum habet, aperta fidei professione p[ro]se ferre, summaque alacritate palam fateri ac praedicare. Oportet enim fideles eum spiritum habere, quo fretus Propheta dixit<sup>2</sup>): „Credidi, propter quod locutus sum;” imitari Apostolos, qui ad principes populi responderunt<sup>3</sup>): „Non possumus, quae vidi mus et audivimus, non loqui;” divi Pauli praecolla illa voce excitari<sup>4</sup>): „Non erubesco evangelium; virtus enim Dei est in salutem omni credenti;” item, quo maxime huius sententiae veritas confirmatur<sup>5</sup>): „Corde creditur ad iustitiam, ore autem confessio fit ad salutem.”

*V. Fidei Christianae excellentia.*

*In Deum.* Hinc Christianae sapientiae dignitatem et praestantiam, ex eaque, quantum divinae bonitati debeamus, cognoscere licet, quibus datum est, statim ad rei praestantissimae maximeque expetendae cognitionem quasi fidei gradibus ascendere.

*VI. Quantum differat Christiana de Deo sapientia a philosophica rerum divinarum notitia.*

In hoc enim multum inter se differunt Christiana philosophia et huius saeculi sapientia, quod haec quidem naturalis tantum luminis ductu ab effectibus et ab iis, quae sensibus percipiuntur, paulatim progressa, non nisi post longos labores vix tandem invisibilia Dei contemplatur, primamque omnium rerum causam, et auctorem agnoscit atque intelligit; contra vero illa humanae mentis aciem ita exacuit, ut in coelum nullo labore penetrare possit, atque divino splendore collustrata, primum quidem aeternum ipsum luminis fontem, deinde, quae infra ipsum posita sunt, intueri. ut nos vocatos esse de tene-

<sup>1</sup>) Ps. 115, 11. <sup>2</sup>) Ps. 115, 10. <sup>3</sup>) Act. 4, 20. <sup>4</sup>) Rom. 1, 16. <sup>5</sup>) Rom. 10, 10.

bris „in<sup>1)</sup> admirabile lumen,“ quod est apud Apostolorum principem, cum summa animi iucunditate experiamur, et „cre-dentes<sup>2)</sup> exsultemus laetitia inenarrabili.“ Recte igitur fideles primo se in Deum credere profitentur, cuius maiestatem, ex Ieremiae<sup>3)</sup> sententia, „incomprehensibilem“ esse dicimus. „Lu-cem enim, ut ait Apostolus<sup>4)</sup>, „inhabitat inaccessibilem, quem nullus hominum vedit, sed nec videre potest;“ cum enim ad Moysen loqueretur<sup>5)</sup>: „Non videbit me, inquit, homo et vivet.“ Nam ut mens nostra ad Deum, quo nihil est subli-mius, perveniat, necesse est, eam omnino a sensibus abstractam esse, cuius rei facultatem in hac vita naturaliter non habemus. Sed quamvis haec ita sint, „non reliquit tamen Deus, ut in-quiet Apostolus<sup>6)</sup>, semetipsum sine testimonio, benefaciens, de coelo dans pluvias et tempora fructifera, implens cibo et lae-titia corda hominum.“ Quae causa fuit philosophis, nihil abiectum de Deo sentiendi, et quidquid corporeum, quidquid concretum et admistum est, ab eo longissime removendi; cui etiam bonorum omnium perfectam vim et copiam tribuerunt, ut ab eo, tanquam a perpetuo quodam et inexhausto fonte bonitatis ac benignitatis, omnia ad omnes creatas res atque naturas perfecta bona dimanent; quem sapientem, veritatis auctorem et amantem, iustum, beneficentissimum, et aliis no-minibus appellaverunt, quibus summa et absoluta perfectio continetur; cuius immensam et infinitam virtutem, omnem complentem locum, et per omnia pertinentem, esse dixerunt. Hoc ex divinis literis longe melius constat et illustrius, ut illo loco<sup>7)</sup>: „Spiritus est Deus;“ item<sup>8)</sup>: „Estote vos perfecti, sicut et Pater vester coelestis perfectus est;“ tum<sup>9)</sup>: „Omnia nuda et aperta sunt oculis eius;“ et illud<sup>10)</sup>: „O altitudo divitiarum sapientiae et scientiae Dei;“ deinde<sup>11)</sup>: „Deus verax est;“ et<sup>12)</sup>: „Ego sum via et veritas et vita;“ praeterea<sup>13)</sup>: „Iustitia plena est dextera tua;“ denique<sup>14)</sup>: „Aperis tu manum tuam, et imples omne animal benedictione;“ postremo<sup>15)</sup>: „Quo ibo a spiritu tuo, et quo a facie tua fugiam?“ et: „Si ascendero in coelum, tu illic es; si descendero in infernum, ades. Si sumpsero pennas meas diluculo, et habitavero in extremis maris etc.;“ et<sup>16)</sup>: „Numquid non coelum et terram ego im-pleo, dicit Dominus?“ Magna et praeclara haec sunt, quae de Dei natura sacrorum librorum auctoritati consentanea et consequentia ex rerum effectarum investigatione philosophi

<sup>1)</sup> I. Petr. 2, 9. <sup>2)</sup> I. Petr. 1, 8. <sup>3)</sup> Ier. 32, 12. <sup>4)</sup> I. Tim. 6, 16. <sup>5)</sup> Exod. 33, 20.  
<sup>6)</sup> Act. 14, 16. <sup>7)</sup> Io. 4, 24. <sup>8)</sup> Mat. 5, 48. <sup>9)</sup> Hebr. 4, 13. <sup>10)</sup> Rom. 11, 33. <sup>11)</sup> Rom.  
 3, 4. <sup>12)</sup> Io. 14, 6. <sup>13)</sup> Ps. 47, 11. <sup>14)</sup> Ps. 144, 16. <sup>15)</sup> Ps. 138, 7. 8. 9. <sup>16)</sup> Ier. 23, 24.

cognoverunt; quamquam in eo etiam coelestis doctrinae necessitatem cognoscimus, si animadvertissemus, fidem non solum hoc praestare, quemadmodum supra dictum est, ut quae viri tantum sapientes longo studio consecuti sunt, ea rudiibus quoque et imperitis hominibus statim pateant atque in promptu sint; verum ut rerum notitia, quae fidei disciplina comparatur, multo certior, atque ab omni errore purior in mentibus nostris insidiat, quam si eas ipsas res, humanae scientiae rationibus comprehensas, animus intelligeret. Sed quanto praestantior divini numinis cognitio censenda est, ad quam non communiter omnibus naturae contemplatio, sed proprie credentibus fidei lumen aditum patefecit? Haec autem symboli articulis continetur, qui nobis divinae essentiae unitatem et trium personarum distinctionem, tum vero ipsum Deum esse ultimum hominis finem aperiunt, a quo coelestis aeternaeque beatitudinis possessio expectanda sit; si quidem a divo Paulo didicimus, Deum<sup>1)</sup> inquirentibus se remuneratorem esse. Haec quanta sint, et an eius generis sint bona, ad quae humana cognitio adspirare potuerit, multo ante eundem Apostolum<sup>2)</sup> Isaia Propheta his verbis ostendit<sup>3)</sup>: „A saeculo non audierunt, neque auribus perceperunt; oculus non vidit, Deus, absque te, quae praeparasti exspectantibus te.“

#### *VII. Unum Deum esse, non plures Deos, confitendum est.*

Sed ex iis, quae diximus, unum etiam Deum esse, non plures deos, confitendum est. Nam cum Deo summam beatitudinem et perfectionem triguamus, fieri non potest, ut id, quod summum atque absolutissimum est, inveniatur in pluribus. Quod si cui aliquid ad summum deest, eo ipso imperfectus est; quare nec Dei natura illi convenit. Hoc autem multis sacrarum literarum locis comprobatur, scriptum est enim<sup>4)</sup>: „Audi Israel, Dominus Deus noster, Deus unus est;“ praeterea est Domini iussum<sup>5)</sup>: „Non habebis Deos alienos coram me;“ deinde per Prophetam saepe admonet<sup>6)</sup>: „Ego primus, et ego novissimus, et absque me non est Deus.“ Apostolus etiam palam testatur<sup>7)</sup>: Unus Dominus, una fides, unum baptisma.“

#### *VIII. Creatis naturis Dei nomen interdum tribuitur, sed impudie.*

Neque vero nos moveat, quod interdum sacrae literae Dei nomen creatis naturis imponunt. Nam quod pro-

<sup>1)</sup> Hebr. 11, 6. <sup>2)</sup> I. Cor. 2, 9. <sup>3)</sup> Isa. 64, 4. <sup>4)</sup> Deut 6, 4. <sup>5)</sup> Ex 20, 4. <sup>6)</sup> Isa. 44, 6. <sup>7)</sup> Eph. 4, 5.

phetas et iudices deos appellarunt, non gentium more factum est, quae sibi plures Deos stulte et impie finxerunt; sed quadam loquendi consuetudine significare voluerunt excellentem aliquam virtutem vel functionem, quae Dei munere illis concessa sit. Deum igitur natura, substantia, essentia unum, quemadmodum ad confirmandam veritatem in symbolo Nicaeni concilii dictum est, Christiana fides credit et profitetur; sed altius etiam ascendens ita unum intelligit, ut unitatem in Trinitate, et Trinitatem in unitate veneretur, de quo nobis mysterio nunc dicere incipiendum est.

*IX. Deus generali ratione omnium hominum, peculiari autem Christianorum Pater dicitur.*

Sequitur enim in symbolo: „Patrem;“ sed quoniam Patris vox non una ratione Deo tribuitur, illud prius declarandum erit, quae sit magis propria huius loci significatio. Deum nonnulli etiam, quorum tenebris fides lucem non attulit, aeternam substantiam esse intellexerunt, a qua res ortae essent, et cuius providentia omnia gubernarentur, suumque ordinem et statum conservarent. Ex humanis igitur rebus ducta similitudine, quemadmodum eum, a quo familia propagata est, cuiusque consilio et imperio regitur, patrem vocabant: ita hac ratione factum est, ut Deum, quem omnium rerum opificem et rectorem agnoscebant, Patrem appellari voluerint; eodem nomine sacrae etiam literae usae sunt, cum de Deo loquentes universorum creationem, potestatem, admirabilemque providentiam ei tribuendam indicarent; legimus enim<sup>1)</sup>: „Numquid non ipse est Pater tuus, qui possest te, et fecit, et creavit te?“ et alibi<sup>2)</sup>: „Numquid non Pater unus omnium nostrum? Numquid non Deus unus creavit nos?“ At vero multo frequentius et peculiari quodam nomine, praesertim in novi Testamenti libris, Deus Pater Christianorum dicitur, qui non acceperunt „spiritum<sup>3)</sup> servitus in timore, sed acceperunt Spiritum adoptionis filiorum Dei, in quo clamant: Abba, Pater;“ eam enim „caritatem<sup>4)</sup> dedit nobis Pater, ut filii Dei nominemur et simus; quodsi filii<sup>5)</sup>, et heredes, heredes quidem Dei, coheredes autem Christi, qui est primogenitus<sup>6)</sup> in multis fratribus; nec<sup>7)</sup> confunditur vocare nos fratres.“ Sive igitur communem creationis et providentiae, sive praecipuum spiritualis adoptionis causam spectes, merito fideles Deum Patrem se credere profitentur.

<sup>1)</sup> Deut. 32, 6. <sup>2)</sup> Mal. 2, 10. <sup>3)</sup> Rom. 8, 15. <sup>4)</sup> I. Io. 3, 1. <sup>5)</sup> Rom. 8, 17  
<sup>6)</sup> Rom. 8, 29. <sup>7)</sup> Hebr. 2, 11.

*X. Ex hac voce Patris quae colligenda mysteria, et de distinctione personarum in divinis.*

Verum praeter eas notiones, quas explicavimus, Patris nomine auditio ad altiora mysteria mentem erigendam esse parochus docebit. Quod enim in luce illa inaccessibili, quam inhabitat Deus, magis reconditum et abstrusum est, quodque humana ratio et intelligentia non consequi, aut ne suspicari quidem poterat, id Patris vocabulo divina oracula nobis aperire incipiunt. Indicat autem hoc nomen, in una divinitatis essentia non unam tantum personam, sed personarum distinctionem credendam esse. Tres enim sunt in una divinitate personae: Patris, qui a nullo genitus est; Filii, qui ante omnia saecula a Patre genitus est; Spiritus sancti, qui itidem ab aeterno ex Patre et Filio procedit. Atqui Pater est in una divinitatis substantia prima persona, qui cum unigenito Filio suo et Spiritu sancto unus est Deus, unus est Dominus; non in unius singularitate personae, sed in unius Trinitate substancialiae. Iam vero hae tres personae, quum in iis quidquam dissimile aut dispar cogitare nefas sit, suis tantummodo proprietatibus distinctae intelliguntur. Pater siquidem ingenitus est; Filius a Patre genitus; Spiritus sanctus ab utroque procedit. Atque ita trium personarum eandem essentiam, eandem substantialiam confitemur, ut in confessione verae sempiternaeque Deitatis, et in personis proprietatem, et in essentia unitatem, et in Trinitate aequalitatem pie et sancte colendam credamus. Nam quod Patris primam esse personam dicimus, hoc non ita accipiendo est, perinde ac si aliquid in Trinitate prius aut posterius, maius aut minus cogitemus; absit enim haec a fidelium mentibus impietas, quum eandem aeternitatem, eandem gloriae maiestatem in tribus personis Christiana religio praedicet. Sed Patrem propterea, quod ipse sit principium sine principio, primam esse personam, vere et sine ulla dubitatione affirmamus; quae quidem uti Patris proprietate distincta est, ita in unam illam praecipue hoc convenit, quod Filium ab aeterno genuerit; semper enim Deum simul et Patrem fuisse nobis significatur, quum Dei et Patris nomina coniuncta in hac confessione pronunciamus. Verum quoniam in nullius rei, quam huius omnium altissimae ac difficillimae notitia atque explicatione, aut periculosius versari, aut gravius errare possumus: doceat parochus, religiose retinenda esse essentiae et personae propria vocabula, quibus hoc mysterium significatur, et sciant fideles unitatem esse in essentia, distinctionem autem in personis. Sed haec subtilius exquirere ni-

hil oportet, quum meminerimus illius vocis<sup>1)</sup>: „Qui scrutator est maiestatis, opprimetur a gloria.“ Satis enim videri debet, quod fide certum et exploratum habeamus, nos a Deo, cuius oraculis non assentiri extremae stultitiae atque miseriae est, ita edoces esse: „Docete,“ inquit<sup>2)</sup>, „omnes gentes, baptizantes eos in nomine Patris, et Filii et Spiritus sancti. Rursus<sup>3)</sup>: „Tres sunt, qui testimonium dant in coelo, Pater, Verbum et Spiritus sanctus, et hi tres unum sunt.“ Oret tamen assidue ac precetur Deum et Patrem, qui universa ex nihilo condidit, disponitque<sup>4)</sup> omnia suaviter, qui dedit nobis potestatem filios Dei fieri<sup>5)</sup>, qui Trinitatis mysterium humanae menti patefecit; oret, inquam, sine intermissione, qui divino beneficio haec credit, ut, aliquando in aeterna tabernacula receptus, dignus sit, qui videat, quae tanta sit Dei Patris foecunditas, ut se ipsum intuens atque intelligens, parem et aequalem sibi Filium gignat, quo modo duorum idem plane et par caritatis amor, qui Spiritus sanctus est, a Patre et Filio procedens, genitorem et genitum aeterno atque indissolubili vinculo inter se connectat; atque ita divinae Trinitatis una sit essentia et trium personarum perfecta distinctio.

#### Omnipotentem.

#### *XI. Nomine omnipotentis quid hic intelligamus.*

Solent sacrae literae multis nominibus Dei summam vim et immensam maiestatem explicare, ut ostendant, quanta religione et pietate illius sanctissimum numen colendum sit; sed in primis doceat parochus, illi omnipotentem vim frequentissime tribui. Ipse enim de se dicit<sup>6)</sup>: „Ego Dominus omnipotens;“ et rursus Iacob, quum filios ad Ioseph mitteret, ita illis precatus est<sup>7)</sup>: „Deus autem meus omnipotens faciat vobis eum placabilem;“ deinde vero in Apocalypsi scriptum est<sup>8)</sup>: „Dominus Deus, qui est, et qui erat, et qui venturus est, omnipotens,“ et alibi<sup>9)</sup>: „Dies magnus Dei omnipotentis“ appellatur. Nonnunquam etiam pluribus verbis illud idem significari solet. Atque hoc pertinet, quod dicitur<sup>10)</sup>: „Non erit impossibile apud Deum omne verbum.“ „Numquid<sup>11)</sup> manus Domini invalida est?“ item<sup>12)</sup>: „Subest enim tibi, quum volueris, posse,“ et alia generis eiusdem. Ex quibus variis dicendi formis id percipitur, quod uno omnipotentis verbo comprehendendi perspicuum est. Intelligimus autem hoc nomine, nihil esse, nihil animo et cogitatione fingi posse, quod Deus effi-

<sup>1)</sup> Prov. 25, 27. <sup>2)</sup> Mat. 28, 19. <sup>3)</sup> 1. Io. 5, 7. <sup>4)</sup> Sap. 8, 1. <sup>5)</sup> Io. 1, 12. <sup>6)</sup> Gen. 17, 1. <sup>7)</sup> Gen. 43, 14. <sup>8)</sup> Apoc. 1, 8. <sup>9)</sup> Apoc. 16, 14. <sup>10)</sup> Luc. 1, 37. <sup>11)</sup> Num. 11, 23. <sup>12)</sup> Sap. 12, 18.

cere nequeat. Etenim non solum haec, quae tametsi maxima sunt, aliquo tamen modo in cogitationem nostram cadunt, efficiendi potestatem habet, nimirum ut omnia ad nihilum recidunt, atque ut plures mundi ex nihilo repente exsistant; verum etiam multa maiora in illius potestate sita sunt, quae humanae menti et intelligentiae suspicari non licet.

*XII. Quum Deus sit omnipotens, peccare tamen vel falli non potest.*

Neque vero, quum omnia Deus possit, mentiri tamen, aut fallere, aut falli, aut peccare, aut interire, aut ignorare aliquid potest. Haec enim in eam naturam cadunt, cuius imperfecta actio est; Deus vero, cuius perfectissima semper est actio, ideo haec non posse dicitur, quia posse ea infirmitatis est, non summae et infinitae omnium rerum potestatis, quam ille habet. Ita igitur Deum omnipotentem esse credimus, ut ab eo tamen longe omnia abesse cogitemus, quae perfectae eius essentiae maxime coniuncta et convenientia non sunt.

*XIII. Cur aliis nominibus, quae de Deo dicuntur, praetermissis, solius omnipotentiae in symbolo fiat mentio, quaeque eius fidei sit utilitas.*

Recte autem sapienterque factum parochus ostendat, ut, praetermissis aliis nominibus, quae de Deo dicuntur, hoc unum nobis credendum in symbolo proponeretur. Nam quum Deum omnipotentem agnoscimus, simul etiam fateamur necesse est, eum omnium rerum scientiam habere, omnia item eius ditioni et imperio subiecta esse. Cum vero omnia ab eo fieri posse non dubitemus, consequens omnino est, ut cetera etiam explorata de illo habeamus; quae si desint, quo modo omnipotens sit, prorsus intelligere non possumus. Praeterea nulla res tam ad fidem et spem nostram confirmandam valet, quam si fixum in animis nostris teneamus, nihil non fieri a Deo posse. Quidquid enim deinceps credere oporteat, quamvis magnum et admirabile sit, rerumque ordinem ac modum supereret, illi tamen facile humana ratio, postquam Dei omnipotentis notitiam perceperit, sine ulla haesitatione assentitur; quin potius quo maiora sint, quae divina oracula doceant, eo libentius fidem eis habendam esse existimat. Quod si boni etiam aliquid expectandum sit, nunquam animus rei magnitudine, quam exoptat, frangitur, sed erigit sese atque confirmat, saepe illud cogitans, nihil esse, quod ab omnipotenti Deo effici non possit. Quare hac fide praecipue munitos nos esse oportet, vel quum admiranda aliqua opera ad proximorum usum et utilitatem edere cogimur, vel quum a Deo precibus impetrare aliquid volumus. Alterum enim ipse Dominus docuit, quum Apo-

stolis incredulitatem obiiciens diceret<sup>1)</sup>): „Si habueritis fidem sicut granum sinapis, dicetis monti huic: transi hinc illuc, et transibit, et nihil impossibile erit vobis.“ De altero autem sanctus Iacobus ita testatus est<sup>2)</sup>: „Postulet in fide nihil haesitans; qui enim haesitat, similis est fluctui maris, qui a vento movetur et circumfertur. Non ergo aestimet homo ille, quod accipiat aliquid a Domino.“ Multa praeterea haec fides comoda atque utilitates nobis praebet, in primis vero ad omnem animi modestiam et humilitatem nos instituit; sic enim inquit princeps Apostolorum<sup>3)</sup>: „Humiliamini sub potenti manu Dei.“ Monet etiam non esse trepidandum, ubi non sit timor, sed unum Deum timendum esse, in cuius potestate nos ipsi nostraque omnia posita sint; ait enim Salvator noster<sup>4)</sup>: „Ostendam vobis, quem timeatis. Timete eum, qui, postquam occiderit, habet potestatem mittere in gehennam.“ Utimur deinde hac fide ad immensa erga nos Dei beneficia cognoscenda et celebranda. Nam qui Deum omnipotentem cogitat, tam ingrato animo esse non potest, quin saepius exclamat<sup>5)</sup>: „Fecit mihi magna, qui potens est.“

*XIV. Omnipotentiae vox non ita Patri hic tribuitur, ut de Filio vel Spiritu sancto etiam non dicatur.*

Sed quod Patrem omnipotentem in hoc articulo vocamus, neminem eo errore duci oportet, ut arbitretur, ita illi hoc nomen tributum esse, ut Filio etiam et Spiritui sancto commune non sit. Nam quemadmodum Deum Patrem, Deum Filium, Deum Spiritum sanctum, neque tamen tres Deos, sed unum Deum esse dicimus: ita aequo Patrem, ac Filium et Spiritum sanctum omnipotentem, neque tamen tres omnipotentes, sed unum omnipotentem esse confitemur. At vero praecipua quadam ratione Patrem, qui omnis originis fons est, hoc nomine vocamus, uti etiam Filio, qui aeternum Patris Verbum est, sapientiam, et Spiritui sancto, qui utriusque amor est, bonitatem tribuimus; quamvis haec et alia huiusmodi nomina communiter in tribus personis ex catholicae fidei regula dicantur.

C r e a t o r e m c o e l i e t t e r r a e .

*XV. Quo pacto quaque de causa Deus coelum et terram creaverit.*

Quam necessarium fuerit, omnipotentis Dei cognitionem paulo ante fidelibus tradi, ex iis, quae nunc de universorum creatione explicanda erunt, perspici potest. Tanti enim operis miraculum facilius creditur, quod nullus de immensa creatoris potestate dubitandi locus relinquitur. Deus enim non ex ma-

---

<sup>1)</sup> Mat. 17, 19. <sup>2)</sup> Iac. 1, 6. 7. <sup>3)</sup> I. Petr. 5, 6. <sup>4)</sup> Luc. 12, 5. <sup>5)</sup> Luc. 1, 49.

teria aliqua mundum fabricatus est, sed ex nihilo creavit, idque nulla vi aut necessitate coactus, sed sua sponte et voluntate instituit. Neque vero ulla alia fuit causa, quae illum ad opus creationis impelleret, nisi ut rebus, quae ab ipso effectae essent, bonitatem suam impertiretur. Nam Dei natura, ipsa per se beatissima, nullius rei indigens est, ut inquit David<sup>1)</sup>: „Dixi Domino, Deus meus es tu, quoniam bonorum meorum non eges.“ Quemadmodum autem sua bonitate ad ductus quaecumque<sup>2)</sup> voluit fecit: ita non exemplum aliquod aut formam; quae extra se posita esset, quum universa conderet, secutus est; verum, quia rerum omnium exemplar divina intelligentia continetur, id summus artifex in se ipso intuens ac veluti imitatus, summa sapientia et infinita virtute, quae ipsis propria est, rerum universitatem initio procreavit. „Ipse“ enim<sup>3)</sup> „dixit, et facta sunt; ipse mandavit, et creata sunt.“

#### *XVI. Quid per coelum et terram hoc loco intelligendum sit.*

Verum coeli et terrae nomine quidquid coelum et terra complectitur intelligendum est. Nam praeter coelos, quos „opera digitorum“ eius Propheta appellavit<sup>4)</sup>, solis etiam splendorem lunaeque et ceterorum siderum ornatum addidit, atque<sup>5)</sup>, ut „essent in signa et tempora et dies et annos“, ita coelorum orbes certo et constanti cursu temperavit, ut nihil perpetua eorum conversione mobilius, nihil mobilitate illa certius videri possit.

#### *XVII. De creatione coelorum spiritualium, id est angelorum.*

Praeterea spiritualem naturam innumerabilesque angelos, qui Deo ministrarent atque assisterent, ipse ex nihilo creavit, quos deinde admirabili gratiae suae et potestatis munere auxit atque ornavit. Nam quum illud sit in divinis literis, diabolum „in veritate<sup>6)</sup> non stetisse:“ perspicuum est, eum reliquosque desertores angelos ab ortus sui initio gratia praeditos fuisse. De quo ita est apud sanctum Augustinum<sup>7)</sup>: Cum bona voluntate, id est, cum amore casto, quo illi adhaerent, angelos creavit, simul in eis et condens naturam et largiens gratiam. Unde sine bona voluntate, hoc est Dei amore, nunquam sanctos angelos fuisse credendum est. Quod autem ad scientiam attinet, exstat illud sacrarum literarum testimonium<sup>8)</sup>: „Tu Domine, mi rex, sapiens es, sicut habet sapientiam angelus Dei, ut intelligas omnia super terram.“ Potestatem denique eis tribuit divinus David illis verbis<sup>9)</sup>: „Potentes vir-

<sup>1)</sup> Ps. 15, 2. <sup>2)</sup> Ps. 113, 3. <sup>3)</sup> Ps. 148, 5. <sup>4)</sup> Ps. 8, 4. <sup>5)</sup> Gen. 1, 14. <sup>6)</sup> Io. 8, 44. <sup>7)</sup> De civitate Dei 12, 9. <sup>8)</sup> II. Reg. 14, 20. <sup>9)</sup> Ps. 102, 20.

tute, facientes verbum illius.“ Atque ob eam rem saepe in sacris literis virtutes et exercitus Domini appellantur<sup>1)</sup>. Sed quamvis omnes ii coelestibus donis ornati fuerint, plurimi tamen, qui a Deo parente et creatore suo defecerunt, ex altissimis illis sedibus deturbati atque in obscurissimum terrae carcerem inclusi, aeternas superbiae suae poenas luunt, de quibus princeps Apostolorum scribit in hunc modum<sup>2)</sup>: „Angelis peccantibus non pepercit, sed rudentibus inferni detractos in tartarum tradidit cruciandos, in iudicium reservari.“

### *XVIII. De terrae creatione.*

At vero, terram etiam super stabilitatem suam fundatam<sup>3)</sup>, Deus verbo suo iussit in media mundi parte consistere, effectique, ut ascenderent montes, et descenderent campi in locum, quem fundavit eis; ac ne aquarum vis illam inundaret, terminum posuit, quem non transgredientur, neque convertentur operire terram. Deinde non solum arboribus omnique herbarum et florum varietate convestivit atque ornavit, sed innumerabilibus etiam animantium generibus, quemadmodum antea aquas et aëra, ita etiam terras complevit.

### *XIX. De creatione hominis.*

Postremo ex limo terrae hominem sic corpore affectum et constitutum effinxit, ut non quidem naturae ipsius vi, sed divino beneficio immortalis esset et impassibilis. Quod autem ad animam pertinet, eum ad imaginem et similitudinem suam formavit, liberumque ei arbitrium tribuit; omnes praeterea motus animi atque appetitiones ita in eo temperavit, ut rationis imperio nunquam non parerent. Tum originalis iustitiae admirabile donum addidit, ac deinde ceteris animantibus praesse voluit; quae quidem facile erit parochis ad fidelium institutionem ex sacra Genesis historia cognoscere.

### *XX. Coeli et terrae nomine visibilia omnia et invisibilia comprehenduntur.*

Haec igitur de universorum creatione, coeli et terrae verbis intelligenda sunt, quae omnia breviter quidem Propheta complexus est illis verbis<sup>4)</sup>: „Tui sunt coeli, et tua est terra; orbem terrae et plenitudinem eius tu fundasti.“ Sed multo etiam brevius Patres Nicaeni concilii, additis in symbolo duabus illis verbis, „visibilium et invisibilium“ significaverunt. Quaecumque enim rerum universitate comprehenduntur, atque a Deo creata esse confitemur, ea vel sub sensum cadunt, et

<sup>1)</sup> Ps. 23, 10. 45, 8. 58, 6. Ies. 6, 3. <sup>2)</sup> II. Petr. 2, 4. <sup>3)</sup> Ps. 103, 5. 8. <sup>4)</sup> Ps. 88, 12.

visibilia dicuntur, vel mente et intelligentia percipi a nobis possunt, quae invisibilium nomine significantur.

*XXI. Res Dei virtute conditae crita ipsius gubernationem et providentiam subsistere non possunt.*

Nec vero ita Deum creatorem atque effectorem omnium credere oportet, ut existimemus, perfecto absolutoque opere ea, quae ab ipso effecta sunt, deinceps sine infinita eius virtute constare potuisse. Nam quemadmodum omnia ut essent, creatoris summa potestate, sapientia et bonitate effectum est, ita etiam, nisi conditis rebus perpetua eius providentia adesset, atque eadem vi, qua ab initio constitutae sunt, illas conservaret, statim ad nihilum reciderent. Atque id Scriptura declarat, quum inquit<sup>1)</sup>: „Quomodo posset aliquid permanere, nisi tu voluisses; aut quod a te vocatum non esset conservaretur?“

*XXII. Deus sua gubernatione secundarum causarum vim non revertit.*

Non solum autem Deus universa, quae sunt, providentia sua tuerit atque administrat: verum etiam, quae moventur et agunt aliquid, intima virtute ad motum atque actionem ita impellit, ut, quamvis secundarum causarum efficientiam non impedit, praeveniat tamen, quum eius occultissima vis ad singula pertineat, et, quemadmodum Sapiens testatur<sup>2)</sup>: „Attin-  
gat a fine usque ad finem fortiter, et disponat omnia suavi-  
ter.“ Quare ab Apostolo dictum est, quum apud Athenienses annunciareret Deum, quem ignorantes colebant<sup>3)</sup>: „Non longe est ab unoquoque nostrum; in ipso enim vivimus, et movemur,  
et sumus.“

*XXIII. Rerum creatio soli Patri tribuenda non est.*

Atque haec de primi articuli explicatione satis fuerint, si tamen illud etiam admonuerimus, creationis opus omnibus sanctae et individuae Trinitatis personis commune esse. Nam hoc loco ex Apostolorum doctrina Patrem creatorem coeli et terrae confitemur; in Scripturis sacris legimus de Filio<sup>4)</sup>: „Omnia per ipsum facta sunt,“ et de Spiritu sancto<sup>5)</sup>: „Spiritus Dei ferebatur super aquas;“ et alibi<sup>6)</sup>: „Verbo Domini coeli firmati sunt, et spiritu oris eius omnis virtus eorum.“

---

<sup>1)</sup> Sap. 11, 26. <sup>2)</sup> Sap. 8, 1. <sup>3)</sup> Act. 17, 27. 28. <sup>4)</sup> Io. 1, 3. <sup>5)</sup> Gen. 1, 2  
<sup>6)</sup> Ps. 32, 6.

---

**CAPUT III.****De secundo Articlelo.**

**Et in Iesum Christum, Filium eius unicum, Dominum nostrum.**

**I. De secundo articulo et de professionis eius utilitate.**

Mirificam et uberrimam esse utilitatem, quae ex huius articuli fide et confessione confluxit ad humanum genus, et illud sancti Ioannis testimonium ostendit<sup>1)</sup>: „Quisquis confessus fuerit, quoniam Iesus est Filius Dei, Deus in eo manet, et ipse in Deo, „et beatitudinis paeconium declarat, quod a Christo Domino tributum est principi Apostolorum<sup>2)</sup>: „Beatus es, Simon Bar-Iona, quia caro et sanguis non revelavit tibi, sed Pater meus, qui in coelis est.“ Hoc enim fundamentum firmissimum est nostrae salutis ac redemptions.

**II. Unde magnitudo beneficij hoc articulo propositi potissimum cognoscatur.**

Sed quoniam admirabilis huius utilitatis fructus maxime ex felicissimi illius status ruina intelligitur, in quo Deus primos homines collocarat: incumbat in hanc curam parochus, ut fideles communium misericordiarum et aerumnarum causam cognoscant. Quum enim a Dei obedientia descivisset Adam, interdictumque violasset illud<sup>3)</sup>: „Ex omni ligno paradisi comedere, de ligno autem scientiae boni et mali ne comedas, in quocumque die enim comederis ex eo, morte morieris;“ in summam illam incidit calamitatem, ut sanctitatem et iustitiam, in qua constitutus fuerat, amitteret, et reliqua subiret mala, quae sancta Tridentina synodus uberius explicavit. Propterea vero peccatum et peccati poenam in uno Adam non constitisse commemorabit, sed ex eo tanquam ex semine et causa ad omnem posteritatem iure permanasse.

**III. Nullus praeter Christum genus humanum potuit restaurare.**

Cum igitur ex altissimo dignitatis gradu concidisset nostrum genus, sublevari inde, et in pristinum locum restitui nullo modo poterat hominum aut angelorum viribus. Quare reliquum erat illud ruinae et malorum subsidium, ut Dei Filii infinita virtus, assumpta carnis nostrae imbecillitate, infinitam tolleret peccati vim, et nos reconciliaret Deo in sanguine suo.

**IV. Citra redemptionis fidem, nullus unquam salvari potuit, et propterea Christus a mundi initio saepe praenunciatus est.**

Huius autem redemptionis fides et confessio hominibus ad salutem consequendam necessaria est, semperque fuit, quam

<sup>1)</sup> 1. 10. 4, 15. <sup>2)</sup> Mat. 16, 17. <sup>3)</sup> Gen. 2, 16. 17.

Deus initio praemonstravit; nam in illa damnatione humani generis, quae statim peccatum consecuta est, ostensa etiam spes redemptionis fuit illis verbis, quibus proprium diabolo damnum, quod ex liberatione hominum facturus erat, denunciavit<sup>1)</sup>: „Inimicitias ponam inter te et mulierem, semen tuum et semen illius; ipsa conteret caput tuum, et tu insidaberis calcaneo eius;“ et deinceps eandem promissionem saepe confirmavit, maioremque sui consilii significationem iis praesertim hominibus dedit, quibus voluit singularem benevolentiam praestare; inter ceteros vero, quum Patriarchae Abrahae saepenumero hoc mysterium significasset, tum eo tempore apertius declaravit, quum ille Dei iussis obediens, filium suum unicum Isaac immolare voluit; ait enim<sup>2)</sup>: Quia fecisti hanc rem, et non pepercisti filio tuo unigenito, benedicam tibi, et multiplicabo semen tuum sicut stellas coeli, et velut arenam, quae est in litore maris; possidebit semen tuum portas inimicorum tuorum, et benedicentur in semine tuo omnes gentes terrae, quia obedisti voci meae.“ Ex quibus verbis facile colligi poterat, ex progenie Abrahae futurum, qui omnibus ab immanissima satanae tyrannide libertatis salutem afferret. Illum autem Dei Filium, natum ex semine Abrahae secundum carnem, fore necesse erat. Non ita multo post Dominus, ut eiusdem promissionis memoria conservaretur, idem foedus cum Iacob Abrahae nepote sancivit; nam quum ille in somnis vidit scalam stantem super terram, et cacumen illius tangens coelos, angelos quoque Dei ascendentes et descendentes per eam, ut testatur scriptura: audivit etiam Dominum innixum scalae, dicentem sibi<sup>3)</sup>: „Ego sum Dominus Deus Abraham patris tui, et Deus Isaac; terram, in qua dormis, tibi dabo, et semini tuo; eritque semen tuum quasi pulvis terrae. Dilataberis ad orientem, et occidentem, et septentrionem, et meridiem, et benedicentur in te et in semine tuo cunctae tribus terrae.“ Neque postea destitit Deus eadem sui promissi memoria renovanda et generi Abraham et multis praeterea hominibus Salvatoris exspectationem commovere; si quidem Iudeorum republica et religione constituta notior populo suo fieri coepit. Nam et mutae res significarunt, et homines praedixerunt, quae et quanta nobis bona salvator ille et redemptor noster Christus Jesus allaturus esset. Ac Prophetae quidem, quorum mens coelesti lumine illustrata fuit, Filii Dei ortum, admirabilia opera, quae homo natus effect, doctrinam,

<sup>1)</sup> Gen. 3, 15. <sup>2)</sup> Gen. 22, 16. 17. <sup>3)</sup> Gen. 28, 12. seq.

mores, consuetudinem, mortem, resurrectionem, ceteraque eius mysteria, haec omnia, quasi tunc adessent, palam docentes, populo praenunciarunt ita, ut, si futuri et praeteriti temporis tollatur diversitas, nihil iam inter Prophetarum praedicta et Apostolorum prædicationem, nihil inter veterum Patriarcharum fidem et nostram interesse videamus. Sed iam de singulis articuli partibus dicendum videtur.

*V. De Iesu nomine, et quod Christo proprio conveniat.*

Iesus proprium est nomen eius, qui Deus et homo est, quod Salvatorem significat; non quidem fortuito aut hominum iudicio et voluntate, sed Dei consilio et præcepto illi impostum. Angelus enim Mariae matri ita annunciavit<sup>1)</sup>: „Ecce concipies in utero, et paries filium, et vocabis nomen eius Iesum.“ Ac deinde Ioseph Virginis sponso non solum, ut eo nomine puerum appellaret, præcepit, sed etiam, cur ita nominandus esset, declaravit; inquit enim<sup>2)</sup>: „Ioseph, fili David, noli timere accipere Mariam coniugem tuam, quod enim in ea natum est, de Spiritu sancto est; pariet autem filium, et vocabis nomen eius Iesum; ipse enim salvum faciet populum suum a peccatis eorum.“

*VI. Non est eadem ratio, cur aliis quibusdam hominibus idem nomen sit tributum.*

Ac multi quidem hoc nomine fuerunt in divinis literis; nam idem nomen Nave filio fuit, qui Moysi successit, et populum a Moyse ex Aegypto liberatum in terram promissionis, quod illi negatum fuerat, deduxit. Eodem etiam nomine Iosedech sacerdotis filius appellatus est. Sed quanto verius Salvatorem nostrum hoc nomine appellandum existimabimus, qui non uni alicui populo, sed universis omnium aetatum hominibus, non quidem fame, aut Aegyptiaco vel Babylonico dominatu oppressis, sed in umbra mortis sedentibus, et durissimis peccati et diaboli vinculis obstrictis, lucem, libertatem et salutem dederit, qui eis coelestis regni ius et haereditatem acquisiverit, qui eos Deo Patri reconciliaverit? In illis Christianum Dominum adumbratum videmus, a quo iis beneficiis, quae diximus, cumulatum est genus humanum. Quae praeterea nomina prædicta sunt Dei Filio divinitus imponenda, ad unum hoc Iesus nomen referuntur; quum enim cetera salutem, quam nobis daturus erat, aliqua ex parte attingerent, hoc ipsum universae salutis humanae vim rationemque complexum est.

<sup>1)</sup> Luc. 1, 31. <sup>2)</sup> Mat. 1, 20. 21.

*VII. Quid sibi velit Christi nomen, et quot rationibus Iesu nostro conveniat.*

Iesus nomini Christi etiam nomen additum est, quod Unctum significat, et honoris et officii nomen est, nec unius rei proprium, sed commune multorum; nam veteres illi patres nostri Christos appellabant sacerdotes et reges, quos Deus propter muneris dignitatem ungí praeceperat. Sacerdotes enim ii sunt, qui populum assiduis precibus Deo commendant, qui sacrificia Deo faciunt, qui pro populo deprecantur. Regibus autem populorum gubernatio commissa est, ad eosque pertinet maxime legum auctoritatem, innocentium vitam tueri, et nocentium audaciam ulcisci. Quoniam igitur utraque harum functionum Dei maiestatem referre in terris videtur, ideo, qui vel ad regium, vel ad sacerdotale munus obeundum delecti erant, unguento ungebantur. Prophetas etiam ungendi mos fuit, qui Dei immortalis interpretes et internuncii coelestia arcana nobis aperuerunt, atque ad emendandos mores salutribus praceptis et futurorum praedictione hortati sunt. At vero, quum Iesus Christus Salvator noster in mundum venit, trium personarum partes et officia suscepit, Prophetae, Sacerdotis ac Regis, atque ob eas causas Christus dictus est, et unctus ad illorum munerum functionem, non quidem alicuius mortalis opera, sed coelestis Patris virtute, non terreno unguento, sed spirituali oleo; quippe quum in sanctissimam eius animam Spiritus sancti plenitudo gratiae, et omnium donorum uberior copia effusa sit; quam ulla alia creata natura capere potuerit. Atque id paeclare Prophetae ostendit, quum redemptorem ipsum affatus diceret<sup>1)</sup>: „Dilexisti iustitiam, et odisti iniquitatem; propterea unxit te Deus, Deus tuus, oleo laetitiae pae consortibus tuis.“ Idem etiam ac multo aperiens Isaias iis verbis demonstravit<sup>2)</sup>: „Spiritus Domini super me, eo quod unxerit me Dominus, ad annuntiandum mansuetis misit me.“ Itaque Iesus Christus summus Prophetae et magister fuit, qui nos Dei voluntatem docuit, et a cuius doctrina orbis terrarum Patris coelestis cognitionem accepit; quod ei nomen praecarius ac praestans convenit, quod omnes, quicunque Prophetae nomine dignati sunt, eius discipuli fuerunt, atque ob illam praecipue causam missi, ut Prophetam hunc, qui ad salvandos omnes venturus erat, praenunciarent. Christus item sacerdos fuit, non quidem ex ordine, ex quo in veteri lege Leviticae tribus sacerdotes extiterunt: verum ex illo,

<sup>1)</sup> Ps. 44, 8. <sup>2)</sup> Is. 61, 1

de quo David Propheta cecinit<sup>1)</sup>: „Tu es sacerdos in aeternum secundum ordinem Melchisedec.“ Cuius rei argumentum Apostolus<sup>2)</sup> ad Hebreos scribens accurate persecutus est. Sed Christum, non solum ut Deus, verum ut homo ac nostrae naturae particeps est, regem etiam agnoscimus; de quo Angelus testatus est<sup>3)</sup>: „Regnabit in Domo Iacob in aeternum, et regni eius non erit finis.“ Quod quidem Christi regnum spirituale est atque aeternum, in terrisque inchoatur, in coelo perficitur. Ac regis quidem officia admirabili providentia suae praestat ecclesiae. Ipse eam regit; ipse ab hostium impetu atque insidiis tuetur; ipse ei leges praescribit; ipse non solum sanctitatem, iustitiam largitur, verum etiam ad perseverandum facultatem et vires praebet. Quamquam autem huius regni finibus tam boni quam mali contineantur, atque adeo omnes homines iure ad illud pertineant: ii tamen prae ceteris summam regis nostri bonitatem et beneficentiam experiuntur, qui ex eius praeceptis integrum atque innocentem vitam degunt. Neque vero hoc illi regnum hereditario aut humano iure obtigit, tametsi genus a clarissimis regibus duceret: sed rex fuit propterea, quod Deus in illum hominem contulit quidquid potestatis, amplitudinis, dignitatis hominis natura capere posset. Illi igitur totius mundi regnum tradidit, eique omnia, quod iam fieri coeptum est, plene<sup>4)</sup> perfecteque in die iudicii subiicientur.

#### Filiū eius unicum.

*VIII. Quo pacto Iesum Christum, Filium Dei unicum, nos credere et confiteri conveniat.*

His verbis altiora mysteria de Iesu credenda et contemplanda fidelibus proponuntur; nimirum Filiū Dei esse, et verum Deum, sicuti Pater est, qui eum ab aeterno genuit. Praeterea illum divinae Trinitatis secundam personam, aliis duabus omnino aequalē, confitemur; nihil enim impar et dissimile in divinis personis aut esse aut fingi animo debet, quum unam omnium essentiam, voluntatem, potestatem agnoscamus; quod quum multis pateat divinae Scripturae oraculis, tum praeclarissime illud ostendit sancti Ioannis testimonium<sup>5)</sup>: „In principio erat Verbum, et Verbum erat apud Deum, et Deus erat Verbum.“ Sed quum Iesum Filium Dei esse audimus, nihil terrenum aut mortale de eius ortu cogitandum est; verum ortum illum, quo ab omni aeternitate Pater Filium genuit, quem ratione percipere atque perfecte intelligere nullo modo

<sup>1)</sup> Ps. 109, 4. <sup>2)</sup> Hebr. 5, 6. <sup>3)</sup> Luc. 1, 32. 33. <sup>4)</sup> I. Cor. 15, 26. <sup>5)</sup> Io. 1, 1.

possumus, constanter credere, et summa animi pietate colere debemus; ac veluti mysterii admiratione obstupefacti, illud cum Propheta dicere<sup>1)</sup>: „Generationem eius quis enarrabit?“ Hoc igitur credendum est, Filium eiusdem esse naturae, eiusdem potestatis et sapientiae cum Patre, ut in symbolo Niceno explicatus confitemur; ait enim: „Et in Iesum Christum Filium eius unigenitum, et ex Patre natum ante omnia saecula, Deum de Deo, lumen de lumine, Deum verum de Deo vero, genitum, non factum, consubstantialem Patri, per quem omnia facta sunt.“

*IX. De modo generationis aeternae, ducta similitudine a rebus creatis, et de duplice nativitate et filiatione Christi.*

Ex omnibus autem, quae ad indicandum modum rationemque aeternae generationis similitudines afferuntur, illa proprius ad rem videtur accedere, quae ab animi nostri cogitatione sumitur; quamobrem sanctus Ioannes Filium eius Verbum appellat. Ut enim mens nostra se ipsam quodam modo intelligens sui effingit imaginem, quam „verbum“ theologi dixerunt: ita Deus, quantum tamen divinis humana conferri possunt, se ipsum intelligens, Verbum aeternum generat; etsi praestat contemplari, quod fides proponit, et sincera mente Iesum Christum verum Deum et verum hominem credere et confiteri, genitum quidem ut Deum, ante omnium saeculorum aetates ex Patre; ut hominem vero natum in tempore ex matre Maria virgine. Et quanquam duplē eius nativitatem agnoscamus, unum tamen Filium esse credimus. Una enim persona est, in quam divina et humana natura convenit.

*X. Quomodo Christus fratres habere, vel non habere censendus sit.*

Et quod ad divinam generationem attinet, nullos aut fratres aut coheredes habet, quum ipse Patris unicus filius, nos<sup>2)</sup> vero homines figmentum et opus manuum eius simus. At si humanum ortum consideremus, multos ille non solum fratrum nomine appellat, sed fratrum etiam loco habet, ut<sup>3)</sup> una cum eo paternae hereditatis gloriam adipiscantur. Ii sunt, qui fide Christum Dominum receperunt, et fidem, quam nomine profidentur, re ipsa et caritatis officiis praestant; quare „primogenitus<sup>4)</sup> in multis fratribus“ ab Apostolo vocatur.

D o m i n u m n o s t r u m .

*XI. Christus secundum utramque naturam Dominus noster dicitur.*

Multa sunt, quae de Salvatore nostro in sacris literis dicuntur, quorum alia ut Deus est, alia ut homo, ipsis convenire

<sup>1)</sup> Isa. 53, 8. <sup>2)</sup> Isa. 64, 8. <sup>3)</sup> Hebr. 2, 12. <sup>4)</sup> Rom 8, 29.

perspicuum est, quoniam a diversis naturis diversas earum proprietates accepit. Igitur vere dicimus Christum esse omnipotentem, aeternum, immensum, quod a divina natura habet. Rursus de illo dicimus, passum, mortuum esse, resurrexisse, quae naturae hominum convenire nemo dubitat. Verum praeter haec quaedam alia utriusque naturae congruunt, ut hoc loco, quum Dominum nostrum dicimus. Igitur si ad utramque naturam hoc nomen referatur, merito Dominus noster praedicandus est. Nam quemadmodum ipse aeternus Deus est, uti Pater; ita etiam omnium rerum aequae Dominus est ac Pater; et quemadmodum ipse et Pater non est alius atque alius Deus, sed idem plane Deus: ita etiam ipse et Pater non est alius atque alius Dominus. Sed recte etiam multis rationibus, ut homo est, Dominus noster appellatur. Ac primum quidem, quoniam ipse redemptor noster fuit atque a peccatis nos liberavit, iure hanc potestatem accepit, ut vere Dominus noster esset ac diceretur. Ita enim Apostolus docet<sup>1)</sup>: „Humiliavit semet ipsum, factus obediens usque ad mortem, mortem autem crucis, propter quod et Deus exaltavit illum, et donavit illi nomen, quod est super omne nomen, ut in nomine Iesu omne genu flectatur, coelestium, terrestrium et infernorum, et omnis lingua confiteatur, quia Dominus Iesus Christus in gloria est Dei patris.“ Atque ipse de se post resurrectionem<sup>2)</sup>: „Data est,“ inquit, „mihi omnis potestas in coelo et in terra.“ Ob eam quoque rem Dominus dicitur, quod in una persona duae naturae, divina et humana, coniunctae sint; hac enim admirabili coniunctione meruit, ut quamvis pro nobis mortuus non esset, tamen Dominus constitueretur, communiter quidem omnium rerum, quae conditae sunt, praecipue autem fidelium, qui illi parent, atque summo animi studio inserviunt.

*XII. Christiani se totos Iesu Christo, principe tenebrarum conculcato, tradere debent.*

Quod igitur reliquum est, parochus fidem populum ad eam rationem cohortabitur, ut sciat, aequissimum esse, praeceteris hominibus, nos, qui ab eo nomen invenimus, Christianique vocamur, et quanta ille in nos beneficia contulerit, ignorare non possumus, ob id maxime, quod eius munere haec omnia fide intelligimus, aequum esse, inquam, nos ipsos, non secus ac mancipia, redemptori nostro et Domino in perpetuum addicere et consecrare. Et quidem quum baptismo iniciaremur, ante ecclesiae fores id professi sumus; declaravimus

<sup>1)</sup> Phil. 2, 8—11. <sup>2)</sup> Mat. 28, 18.

enim, nos satanae et mundo renunciare, et Iesu Christo totos nos tradere. Quodsi, ut Christianae militiae adscriberemur, tam sancta et solemni professione nos ipsos Domino nostro devovimus: quo suppicio digni erimus, si postquam ecclesiam ingressi sumus, Dei voluntatem et leges cognovimus; postquam sacramentorum gratiam percepimus, ex mundi et diaboli praecaptis ac legibus vixerimus, perinde ac si, quum baptismo absulti sumus, mundo et diabolo, non Christo Domino ac Redemptori nomen dedissemus? Sed cuius animum amoris facibus non incendat tanti Domini tam benigna et propensa in nos voluntas, qui tametsi nos in potestate sua et dominatu, veluti servos sanguine suo redemptos habeat, ea tamen caritate complectitur, „ut non servos vocet, sed amicos, sed fratres?“ (Ioan. 15, 14.) Haec profecto iustissima causa est, atque haud scio, an omnium sit maxima, cur eum perpetuo debeamus Dominum nostrum agnoscere, venerari et colere.

## CAPUT IV.

### De tertio Articulo.

Qui conceptus est de Spiritu sancto, natus ex Maria Virgine.

#### *I. Tertius fidei articulus quid credendum fidelibus proponat.*

Maximo quidem et singulari beneficio humanum genus a Deo affectum esse, qui nos e durissimi tyranni servitute in libertatem vindicarit, ex iis, quae superiori articulo declarata sunt, intelligere fideles possunt. At vero si consilium et rationem, qua potissimum id efficere voluit, nobis ante oculos ponamus, profecto nihil divina in nos beneficentia ac bonitate illustrius, nihil magnificentius esse videbitur. Eius igitur mysterii magnitudinem, quod nobis tanquam salutis nostrae praecipuum caput sacrae literae considerandum saepissime proponunt, parochus a tertii articuli explicatione ostendere incipiet, cuius hanc esse sententiam docebit, nos credere et confiteri, eum ipsum Iesum Christum, unicum Dominum nostrum, Dei Filium, quum pro nobis humanam carnem suscepit in utero Virginis, non ex virili semine, ut alii homines, sed supra omnem naturae ordinem Spiritus sancti virtute conceptum esse, ita ut eadem persona Deus permanens, quod ex aeternitate erat, homo fieret, quod ante non erat. Ea autem verba ita accipienda esse, ex sacri concilii Constantinopolitani confessione plane perspicitur; inquit enim: „Qui propter nos

homines, et propter nostram salutem descendit de coelis; et incarnatus est de Spiritu sancto ex Maria virgine, et homo factus est.“ Atque id etiam S. Ioannes Evangelista explicavit, ut qui ex ipsis Domini Salvatoris pectore altissimi huius mysterii cognitionem hausisset; nam quum divini Verbi naturam declarasset illis verbis<sup>1)</sup>: „In principio erat Verbum, et Verbum erat apud Deum, et Deus erat Verbum,“ ad extremum conclusit: „Et Verbum caro factum est, et habitavit in nobis.“

*II. Per temporariam nativitatem nulla facta fuit in Christo naturarum confusio.*

Verbum enim, quod divinae naturae hypostasis est, ita humanam naturam assumpsit, ut una et eadem esset divinae et humanae naturae hypostasis ac persona; quo factum est, ut tam admirabilis coniunctio utriusque naturae actiones et proprietates conservaret; atque, ut est apud S. Leonem<sup>2)</sup>, magnum illum Pontificem: „nec inferiorem consumeret glorificatio, nec superiorum minueret assumptio.“

*III. Solus Spiritus S. incarnationis opus non perfecit.*

Sed quoniam praetermittenda non est verborum explicatio, doceat parochus, quum dicimus, Dei Filium Spiritus sancti virtute conceptum esse, unam hanc divinae Trinitatis personam incarnationis mysterium non confecisse. Quamvis enim unus Filius humanam naturam assumpserit, tamen omnes divinae Trinitatis personae, Pater, Filius et Spiritus sanctus, huius mysterii auctores fuerunt. Siquidem illa Christianae fidei regula tenenda est: omnia, quae Deus extra se in rebus creatis agit, tribus personis communia esse, neque unam magis quam aliam, aut unam sine alia agere. Quod autem una persona ab alia procedat, hoc unum omnibus commune esse non potest; nam Filius a Patre tantum generatur, Spiritus sanctus a Patre et Filio procedit. Quidquid vero extra illas ab ipsis proficiscitur, tres personae sine ullo discrimine agunt atque ex hoc genere Filii Dei incarnatione censenda est. Quamquam vero haec ita se habeant, solent tamen sacrae literae earum rerum, quae omnibus personis communes sunt, aliam aliis tribuere; quemadmodum summam omnium rerum potestatem Patri, sapientiam Filio, Spiritui sancto amorem adscribunt. Et quoniam divinae incarnationis mysterium singularem atque immensam Dei erga nos benignitatem declarat, ob eam rem peculiari quadam ratione hoc opus Spiritui sancto tribuitur.

<sup>1)</sup> Io. 1, 1. 14. <sup>2)</sup> Serm. 21. c. 2.

*IV. Omnia supra naturae ordinem in Christi conceptione facta  
non sunt, sed plurima.*

In hoc mysterio quaedam supra naturae ordinem, quae-dam naturae vi effecta esse animadvertisimus. Nam quod ex purissimo Virginis matris sanguine Christi corpus formatum credimus, in eo naturam humanam agnoscimus, quum illud omnium hominum corporibus commune sit, ut ex matris sanguine formentur. Quod vero et naturae ordinem et humanam intelligentiam superat, illud est, simul atque beata Virgo Angeli verbis assentiens, dixit<sup>1)</sup>: „Ecce ancilla Domini, fiat mihi secundum verbum tuum;“ statim sanctissimum Christi corpus formatum, eique anima rationis compos coniuncta est, atque ita in ipso temporis articulo perfectus Deus et perfectus homo fuit. Hoc autem novum fuisse atque admirabile Spiritus sancti opus, nemo dubitare potest, quum, servato naturae ordine, nullum corpus, nisi intra praescriptum temporis spatium, hominis anima informari queat. Deinde vero illud accedit maxima admiratione dignum, quod, ut primum cum corpore anima coniuncta fuit, ipsa etiam divinitas cum corpore et anima copulata est; quare simul corpus formatum atque animatum est, corpori et animae divinitas coniuncta. Ex quo fit, ut eodem temporis punto perfectus Deus et perfectus homo esset, et Virgo sanctissima vere et proprie mater Dei et hominis diceretur, quod eodem momento Deum et hominem concepisset. Hoc autem ab Angelo ei significatum est, quum ait<sup>2)</sup>: „Ecce concipies in utero, et paries filium, et vocabis nomen eius Iesum; hic erit magnus, et Filius Altissimi vocabitur,“ et eventu comprobatum est quod Isaias praedixit<sup>3)</sup>: „Ecce virgo concipiet, et pariet filium.“ Idem quoque Elisabeth, quum Spiritu sancto repleta Filii Dei conceptionem intellexisset, his verbis declaravit<sup>4)</sup>: „Unde hoc mihi, ut veniat mater Domini ad me?“ Sed quemadmodum Christi corpus ex purissimis integerrimae virginis sanguinibus, sine ulla viri opera, ut antea diximus, verum sola Spiritus sancti virtute formatum est: ita etiam, ut primum conceptus est, illius anima uberrimam Spiritus Dei copiam, atque omnem charismatum abundantiam accepit. Neque enim ut aliis hominibus, qui sanctitate et gratia ornantur, „ipsi ad mensuram,“ ut testatur S. Ioannes<sup>5)</sup>, „dat Deus Spiritum:“ sed omnem gratiam tam affluenter in eius animam infudit, ut<sup>6)</sup> „de plenitudine eius nos omnes acceperimus.“

<sup>1)</sup> Luc. 1, 38. <sup>2)</sup> Luc. 1, 31. 32. <sup>3)</sup> Ies. 7, 14. <sup>4)</sup> Luc. 1, 43. <sup>5)</sup> Io. 3, 34  
<sup>6)</sup> Io. 1, 16.

*V. Christus dici non potest Filius Dei adoptivus.*

Neque tamen Filium Dei adoptivum appellare licet, quamvis spiritum illum habuerit, quo sancti homines filiorum Dei adoptionem consequuntur; nam quum natura Filius Dei sit, adoptionis gratiam aut nomen in eum convenire nullo modo existimandum est.

*VI. Quid circa primam articuli partem praecipue meditandum sit.*

Haec sunt, quae de admirabili conceptionis mysterio explicanda visa sunt, ex quibus ut salutaris fructus ad nos redundare possit, illa in primis fideles memoria repetere, ac saepius cogitare cum animis suis debent, Deum esse, qui humana carnem assumpsit; ea vero ratione hominem factum, quam mente nobis assequi non licet, nedum verbis explicare; ob eum denique finem hominem fieri voluisse, ut nos homines filii Dei renasceremur. Haec cum attente consideraverint, tum vero omnia mysteria, quae hoc articulo continentur, humili ac fideli animo credant et adorent; nec curiose, quod sine periculo vix unquam fieri potest, illa investigare ac perscurtari velint.

*Natus ex Maria Virgine.**VII. Christum ex Maria Virgine natum quid sit.*

Haec altera est huius articuli pars, in qua explicanda parochus diligenter versabitur, quum fidelibus credendum sit, Iesum Dominum non solum conceptum Spiritus sancti virtute, sed etiam ex Maria Virgine natum, et in lucem editum esse. Cuius mysterii fides quanta cum laetitia et iucunditate animi meditanda sit, Angeli vox, qui primus felicissimum nuntium mundo attulit, declarat; ait enim<sup>1)</sup>: „Ecce evangelizo vobis gaudium magnum, quod erit omni populo;“ tum ex illius coelestis militiae cantico: „Gloria in altissimis Deo, et in terra pax hominibus bonae voluntatis,“ quod Angeli cecinerunt facile est intelligere. Hinc etiam amplissimum illud Dei promissum ad Abraham impleri incepit, cui dictum est<sup>2)</sup>, fore aliquando, ut in eius semine omnes gentes benedicerentur. Maria enim, quam vere matrem Dei praedicamus et colimus, quod eam personam, quae simul Deus et homo erat, peperit, a Davide rege originem duxit.

*VIII. Christus secundum communem naturae cursum non est natus.*

Sed quemadmodum conceptio ipsa naturae ordinem prorsus vincit: ita in ortu nihil non divinum licet contemplari.

<sup>1)</sup> Luc. 2, 10. 14. <sup>2)</sup> Gen. 22, 18.

Praeterea, quo nihil admirabilius dici omnino aut cogitari potest, nascitur ex matre sine ulla maternae virginitatis diminutione; et quo modo postea ex sepulero clauso et obsignato egressus est, atque „ad<sup>1)</sup>“ discipulos clausis ianuis introivit;“ vel, ne a rebus etiam, quae natura quotidie fieri videmus, discedatur, quo modo solis radii concretam vitri substantiam penetrant, neque frangunt tamen, aut aliqua ex parte laedunt; simili, inquam, et altiori modo, Iesus Christus ex materna alvo sine ullo maternae virginitatis detrimento editus est, ipsius enim incorruptam et perpetuam virginitatem verissimis laudibus celebramus. Quod quidem Spiritus sancti virtute effectum est, qui in Filii conceptione et partu matri ita affuit, ut ei et foecunditatem dederit, et perpetuam virginitatem conservarit.

*IX. Christus secundus Adam, et Maria altera Eva recte dicitur.*

Solet interdum Apostolus Christum Iesum „novissimum Adam<sup>2)</sup>“ appellare, eumque primo Adam conferre; nam ut in primo omnes homines moriuntur, ita in secundo omnes ad vitam revocantur, atque ut Adam, quod ad naturalen condicionem pertinet, humani generis parens fuit, ita Christus gratiae et gloriae auctor est. Ad eum modum nobis etiam licet Virginem matrem cum Eva ita conferre, ut priori Eva secunda Eva, quae est Maria, respondeat; quemadmodum secundum Adam, hoc est, Christum, primo Adam respondere ostendimus. Eva enim, quia serpenti fidem habuit, maledictum et mortem in humanum genus invexit; et Maria, postquam Angelo credidit, Dei bonitate effectum est, ut benedictio et vita ad homines perveniret. Propter Eevam nascimur filii irae<sup>3)</sup>: a Maria Iesum Christum accepimus, per quem filii gratiae regeneramur. Evae dictum est<sup>4)</sup>: „In dolore paries filios;“ Maria hac lege soluta est, ut quae, salva virginalis pudicitiae integritate, sine ullo doloris sensu, ut antea dictum est, Iesum Filium Dei peperit.

*X. Quibus praecipue figuris ac prophetiis conceptionis et nativitatis Christi sacramenta adumbrata sint.*

Cum igitur tanta et tam multa sint admirandae huius conceptionis et nativitatis sacramenta, divinae providentiae consentaneum fuit, ut ea multis figuris et oraculis significarentur. Quare huc pertinere sancti Doctores intellexerunt multa, quae in variis sacrae Scripturae locis legimus; praecipue vero portam illam sanctuarii, quam Ezechiel<sup>5)</sup> clausam

---

<sup>1)</sup> Io. 20, 19. <sup>2)</sup> I. Cor. 15, 21. Rom. 5, 12—14. <sup>3)</sup> Eph. 2, 3. <sup>4)</sup> Gen. 3, 16. <sup>5)</sup> Ez. 44, 2.

vicit; item: „lapidem de monte sine manibus abscissum,“ ut est apud Danielem<sup>1)</sup> , „qui factus est magnus mons, et impletiv universam terram;“ deinde<sup>2)</sup>: „Aaron virgam, quae una inter virgas principum Israëlis germinavit; et rubum<sup>3)</sup> , quem Moyses vidit ardere, et non comburi.“ Multis verbis sanctus Evangelista Christi nativitatis historiam descriptis; qua de re nihil est, quod plura a nobis dicantur, cum ea lectio parocho in promptu sit.

*XI. Incarnationis mysterium saepius populo est inculcandum, quidque utilitatis ex eius meditatione capiatur.*

Danda autem illi est opera, ut haec mysteria, quae „ad<sup>4)</sup> doctrinam nostram scripta sunt,“ infixa animo et mentibus fidelium haereant, primum quidem ut tanti beneficii commemoratione aliquam gratiam eius auctori Deo referant; deinde, ut eximium hoc et singulare humilitatis exemplum eis ante oculos ad imitandum proponat. Quid enim nobis utilius, atque ad animorum nostrorum superbiam et elationem comprehendendam accommodatius esse potest, quam saepius cogitare, Deum ita sese humiliare, ut cum hominibus gloriam suam communicet, et hominum infirmitatem fragilitatemque assumat; Deum hominem fieri, summamque illam et infinitam maiestatem homini ministrare, „ad<sup>5)</sup> cuius nutum columnae coeli,“ ut inquit Scriptura, „contremiscunt et pavent,“ eumque in terra nasci<sup>6)</sup> , quem in coelis Angeli adorant? Quid igitur, quum haec Deus nostra causa faciat, quid, inquam, nos, ut illi obsequamur, facere oportet? quam libenti atque alacri animo debemus omnia humilitatis officia amare, amplecti, praestare? Videant fideles, quam salutari doctrina Christus nascens nos instituat, antequam vocem aliquam emittere incipiat. Nascitur egenus; nascitur ut peregrinus in diversorio; nascitur in vili praesepio; nascitur media hieme. Ita enim scribit sanctus Lucas<sup>7)</sup>: „Factum est, quum essent ibi, impleti sunt dies, ut pareret, et peperit filium suum primogenitum, et panis eum involvit; et reclinavit eum in praesepio, quia non erat ei locus in diversorio.“ Potuitne Evangelista humilioribus verbis omnem coeli et terrae maiestatem et gloriam includere? Neque vero scribit, non fuisse locum in diversorio, sed ei non fuisse, qui dicit<sup>8)</sup>: „Meus est orbis terrae, et plenitudo eius.“ Quod etiam aliis Evangelista testatus est<sup>9)</sup>: „In propria venit, et sui eum non receperunt.“ Haec quum fideles sibi ante oculos proposuerint, tum vero cogitent, Deum car-

<sup>1)</sup> Dan. 2, 34. <sup>2)</sup> Num. 17, 8. <sup>3)</sup> Ex. 3, 2. <sup>4)</sup> Rom. 15, 4. <sup>5)</sup> Iob. 26, 11. <sup>6)</sup> Ps. 96, 8. <sup>7)</sup> Luc. 2, 6. 7. <sup>8)</sup> Ps. 49, 12. <sup>9)</sup> Io. 1, 11.

nis nostrae humilitatem et fragilitatem subire voluisse, ut humanum genus in altissimo dignitatis gradu collocaretur. Nam illud unum satis declarat excellentem hominis dignitatem et praestantiam, quae illi divino beneficio tributa est, quod homo fuerit, qui idem verus et perfectus Deus sit; ut iam gloriari nobis liceat, Filium Dei os nostrum, et carnem nostram esse, quod beatissimis illis spiritibus non licet. „Nusquam enim,“ ut est apud Apostolum<sup>1)</sup> „Angelos apprehendit, sed semen Abrahae apprehendit.“ Praeterea cavendum est, ne maximo nostro malo eveniat, ut quemadmodum illi in diversorio Bethlehem locus, ubi nasceretur, defuit: ita etiam, quando iam in carne non nascitur, locum in cordibus nostris invenire non possit, ubi in spiritu nascatur. Hoc enim, quum salutis nostrae cupidissimus sit, vehementer optat; nam ut ille Spiritus sancti virtute supra naturae ordinem homo factus et natus est, sanctusque atque adeo sanctitas ipsa fuit: ita nos oportet, „non<sup>2)</sup> ex sanguinibus, neque ex voluntate carnis, sed ex Deo nasci,“ ac deinde veluti novam creaturam „in novitate spiritus<sup>3)</sup> ambulare,“ sanctitatem illam, ac mentis integritatem custodire, quae homines spiritu Dei regeneratos maxime decet. Hac enim ratione sanctae huius Filii Dei conceptionis et nativitatis imaginem aliquam in nobis ipsis exprimemus, quam fidi animo credimus, et credentes, „Dei<sup>4)</sup> sapientiam in mysterio, quae abscondita est,“ suspicimus et adoramus.

## C A P U T V.

### De quarto Articulo.

Passus sub Pontio Pilato, crucifixus, mortuus, et sepultus.

#### I. Articuli quarti cognoscendi necessitas et eius sententia.

Quantam habeat necessitatem huius articuli cognitione, et quam diligenter parochus curare debeat, ut fideles dominicae passionis memoriam saepissime animo repeatant, docet Apostolus<sup>5)</sup>, qui „nihil aliud se scire testatus est, nisi Iesum Christum, et hunc crucifixum.“ Quare in hoc argumento omne studium et opera adhibenda est, ut quam maxime illustretur, fidelesque, tanti beneficii commemoratione excitati, totos se ad Dei erga nos amorem et bonitatem suspiciendam convertant. Fides itaque priore articuli parte (nam de altera postea dicetur) illud nobis credendum proponit, Christum Dominum,

<sup>1)</sup> Hebr. 2, 16. <sup>2)</sup> Io. 1, 18. <sup>3)</sup> Rom. 6, 4. Gal. 6, 15. <sup>4)</sup> I. Cor. 2, 7. <sup>5)</sup> I. Cor. 2, 2.

quum Pontius Pilatus Tiberii Caesaris iussu Iudeam provinciam administraret, cruci affixum esse: nam captus, irrisus, variis iniuriarum et cruciatum generibus affectus, demum in crucem sublatus est.

*II. Anima Christi cruciatus sensit.*

Nec vero cuiquam dubitandum est, eius animam, quod ad inferiorem partem attinet, ab iis cruciatibus liberam non fuisse; nam quod humanam naturam vere assumpsit, necesse est fateri, animo etiam gravissimum dolorem sensisse; quare inquit<sup>1)</sup>: „Tristis est anima mea usque ad mortem.“ Nam etsi personae divinae humana natura coniuncta fuit, tamen propter eam coniunctionem nihilominus passionis acerbitatem sensit, quam si ea coniunctio facta non fuisset, quum in una Iesu Christi persona utriusque naturae, divinae et humanae, proprietates servatae sint, atque idcirco, quod erat passibile et mortale, passibile et mortale permansit; rursus vero quod impassibile et immortale erat, qualem esse divinam naturam intelligimus, suam proprietatem retinuit.

*III. Cur in symbolo exprimatur, sub quo Iudeaeae praeside Christus sit passus.*

Quod autem hoc loco tam diligenter observari videmus, Iesum Christum eo tempore passum esse, quo Pontius Pilatus Iudeam provinciam procuraret, id ea re factum esse docebit parochus, quia tantae rei et tam necessariae cognitio exploratior omnibus esse poterat, si rei gestae certum, quod et ab Apostolo Paulo factum legimus<sup>2)</sup>, tempus describeretur; tum etiam, quia iis verbis declaratur, illam Salvatoris praedictionem exitu comprobatam esse: „Tradent,“ inquit<sup>3)</sup>, „eum gentibus ad illudendum, et flagellandum et crucifigendum.“

*IV. Non temere accidit, quod Christus in ligno crucis mortem est perpessus.*

Sed quod potissimum in ligno crucis mortem pertulit, hoc etiam divino consilio tribuendum est, ut scilicet, unde mors oriebatur, inde vita resurgeret. Serpens enim, qui in ligno primos parentes vicerat, victus est a Christo in ligno crucis. Plures eius rei afferri rationes possunt, quas sancti Patres latius persecuti sunt, ut ostendamus consentaneum fuisse, Redemptorem nostrum mortem crucis potissimum subire. Verum satis esse parochus admoneat, si fideles credant, illud genus mortis a Salvatore delectum esse, quod quidem ad humani generis redemptionem aptius atque accommodatius videretur,

<sup>1)</sup> Mat. 26, 38. Marc. 14, 34. <sup>2)</sup> I. Tim. 6, 13. <sup>3)</sup> Mat. 20, 19.

quemadmodum certe nullum turpius atque indignius esse potuit. Non solum enim apud gentiles crucis supplicium exsecrandum et dedecoris ignominiaeque plenissimum semper existimatum est, verum etiam in lege Moysis<sup>1)</sup> „maledictus homo appellatur, qui pendet in ligno.“

*V. Historia passionis Christi frequentius populo est replicanda.*

Neque vero parochus huius articuli historiam praetermittet, quae diligentissime a sanctis Evangelistis exposita est, ut saltem summa eius mysterii capita, quae ad confirmandam fidei nostrae veritatem magis necessaria videntur, fideles cognita habeant. Hoc enim articulo veluti fundamento quadam Christiana religio et fides nititur, eoque posito reliqua omnia recte constituta sunt. Nam si quid aliud humanae menti et intelligentiae difficultatem affert, certe crucis mysterium omnium difficillimum existandum est, vixque percipi a nobis potest, salutem nostram ex cruce ipsa, et ex eo, qui pro nobis ligno illi affixus est, pendere. Sed in hoc, ut docet Apostolus, summam Dei providentiam licet admirari. Nam „quia<sup>2)</sup> in Dei sapientia non cognovit mundus per sapientiam Deum, placuit Deo per stultitiam praedicationis salvos facere credentes.“ Quare mirandum non est, si Prophetae ante Christi adventum, Apostoli post eius mortem et resurrectionem tantopere laborarunt, ut hominibus persuaderent, hunc esse mundi redemptorem, eosque in crucifixi potestatem atque obedientiam redigerent. Quare Dominus, quum nihil tam ab humana ratione remotum esset, quam crucis mysterium, statim post peccatum nunquam destitit, tum figuris, tum Prophetarum oraculis, Filii sui mortem significare. Atque ut de figuris pauca quaedam attingamus, Abel primum, qui fratris invidia occisus est, deinde Isaac sacrificium, praeterea agnus, quem Iudei, quum e terra Aegypti egredierentur, immolarunt, tum serpens aeneus, quem Moyses in deserto exaltavit, Christi Domini passionis ac mortis figuram praemonstrabant. Quod autem ad Prophetas pertinet, quam multi exstiterint, qui de ea vaticinati sunt, id vero multo notius est, quam ut explicari hoc loco oporteat. Sed prae ceteris, ut Davidem omittamus, qui omnia praecipua redemptionis nostrae mysteria in Psalmis complexus est, Isaiae oracula tam aperta et clara sunt, ut recte dici queat, cum potius rem gestam exposuisse, quam futuram praedixisse.

<sup>1)</sup> Deut. 21, 23. Gal. 3, 13. <sup>2)</sup> 1. Cor. 1, 21.

## Mortuus et sepultus.

*VII. Quid haec clausula, mortuus et sepultus, credendum significet.*

His verbis parochus credendum explicabit, Iesum Christum, postquam crucifixus est, vere mortuum ac sepultum esse. Neque vero sine causa hoc separatim fidelibus credendum proponitur, quum non defuerint qui eum in cruce mortuum negarent. Illi igitur errori hanc fidei doctrinam sancti Apostoli merito opponendam censuerunt, de cuius articuli veritate dubitandi nullus nobis locus relinquitur; nam omnes Evangelistae consentiunt: „Iesum spiritum emisisse.“ Praeterea quum Christus verus et perfectus homo fuerit, vere etiam mori potuit; moritur autem homo, quum anima separatur a corpore. Quare quum Iesum mortuum esse dicimus, id significamus, eius animam a corpore divisam esse; neque tamen concedimus divinitatem seiunctam a corpore; quin potius constanter credimus et confitemur, anima eius a corpore divisa, divinitatem tum corpori in sepulcro, tum animae apud inferos coniunctam semper fuisse. Decebat<sup>1)</sup> autem Filium Dei mori, „ut per mortem destrueret eum, qui habebat mortis imperium, id est, diabolum, et liberaret eos, qui timore mortis per totam vitam obnoxii erant servituti.“

*VII. Invitus et coactus mortem Christus non subiit.*

Sed illud in Christo Domino singulare fuit, quod tunc mortuus est, quum ipse mori decrevit, et mortem non tam aliena vi illatam, quam voluntariam obiit. Nec vero mortem solum, sed locum etiam et tempus, in quo moreretur, ipse sibi constituit. Ita enim Isaías scripsit<sup>2)</sup>: „Oblatus est, quia ipse voluit.“ Atque idem Dominus de se ante passionem dixit<sup>3)</sup>: „Ego pono animam meam, ut iterum sumam eam. Nemo tollit eam a me, sed ego pono eam a me ipso; potestatem habeo ponendi eam, et potestatem habeo iterum sumendi eam.“ Quod autem ad tempus et locum attinet, quum Herodes eius vitae insidiaretur, ipse inquit<sup>4)</sup>: „Dicite vulpi illi, ecce eiicio daemonia et sanitates perficio hodie et cras, et tertia die consumor; verumtamen oportet me hodie et cras et sequenti die ambulare, quia non capit Prophetam perire extra Hierusalem.“ Ille igitur nihil invitus aut coactus fecit, sed ipse sese volens obtulit, atque inimicis suis obviam procedens dixit<sup>5)</sup>: „Ego sum;“ et sponte sua ea omnia supplicia pertulit, quibus illum iniuste et crudeliter affecerunt; quo quidem nihil ad commovendos animi nostri sensus maiorem

<sup>1)</sup> Hebr. 2, 14. 15. <sup>2)</sup> Is. 53, 7. <sup>3)</sup> Io. 10, 17. 18. <sup>4)</sup> Luc. 13, 32. 33. <sup>5)</sup> Io. 18, 5.

vim habere potest, quum poenas tormentaque eius omnia cogitatione perpendimus. Nam si quispiam nostra causa omnes dolores patiatur, non quos ipse sua voluntate suscipiat, sed quos vitare nequeat: hoc vero haud magni beneficii loco a nobis ponetur. Verum si nostro tantum nomine mortem, quam defugere poterat, libenter occumbat: profecto hoc beneficii genus tantum est, ut omnem non solum referenda, sed etiam habendae gratiae facultatem vel gratissimo cuique eripiat. Ex quo Iesu Christi summa et eximia caritas, eiusque divinum et immensum in nos meritum perspici potest.

*VIII. Cur Christum non modo mortuum, sed etiam sepultum esse dicamus.*

Iam vero, quod sepultum fuisse confitemur, hoc quidem veluti articuli pars non constituitur, quod novam aliquam difficultatem habeat, praeter ea, quae iam de morte dicta sunt. Nam si Christum mortuum credimus, facile etiam nobis persuaderi potest, eum sepultum esse. Verum hoc additum est, primum ut minus dubitare de morte liceat, quum maximo argumento sit, aliquem mortuum esse, si eius corpus sepultum probemus; deinde ut resurrectionis miraculum magis declaretur atque eluceat. Neque vero hoc solum credimus, Christi corpus sepultum esse, sed illud praecipue his verbis credendum proponitur, Deum sepultum esse, quemadmodum ex fidei catholicae regula verissime etiam dicimus, Deum mortuum, et ex Virgine natum esse. Nam quum divinitas nunquam divisa fuerit a corpore, quod in sepulcro conditum est, recte confitemur Deum sepultum esse.

*IX. Quae circa mortem et sepulturam Christi sint maxime observanda.*

Ac de genere quidem et loco sepulturae illa parochos satis erunt, quae a sanctis Evangelistis dicta sunt. Duo vero in primis observanda sunt: alterum, Christi corpus in sepulcro nulla ex parte corruptum esse, de quo Propheta ita vaticinatus erat<sup>1)</sup>: „Non dabis sanctum tuum videre corruptionem.“ Alterum est, quod ad omnes huius articuli partes attinet, sepulturam scilicet, passionem etiam et mortem Christo Iesu, ut homini, non ut Deo convenire; nam pati et mori in humanam tantum naturam cadunt, quamvis Deo etiam haec omnia tribuantur; quoniam de illa persona, quae simul perfectus Deus, perfectus homo fuit, recte dici perspicuum est.

---

<sup>1)</sup> Ps. 15. 10. Act. 2. 27. 31.

*X. Qua ratione contemplari oporteat passionis Christi beneficium*

His cognitis ea de Christi passione et morte parochus explicabit, ex quibus tanti mysterii immensitatem, si non comprehendere, contemplari saltem fideles possint. Ac primum quidem considerandum est, quis ille sit, qui haec omnia patitur. Et quidem nullis verbis eius dignitatem explicare, aut mente comprehendere possumus. S. Ioannes<sup>1)</sup> „Verbum“ esse dicit, „quod erat apud Deum.“ Apostolus magnificis verbis describit in hunc modum<sup>2)</sup>: „Esse eum, quem Deus constituit heredem universorum, per quem fecit et saecula, qui est splendor gloriae, et figura substantiae eius, qui portat omnia verbo virtutis suae.“ Hic igitur „purgationem peccatorum faciens, sedet ad dexteram maiestatis in excelsis.“ Atque, ut uno verbo complectamus, patitur Jesus Christus Deus et homo; patitur Creator pro iis, quos ipse condidit; patitur Dominus pro servis; patitur is, per quem Angeli, homines, coeli, elementa facta sunt, ille, inquam, in quo<sup>3)</sup>, per quem, et ex quo sunt omnia. Quare mirandum non est, si, eo tot passionum tormentis commoto, totum etiam aedificium concussum est; nam, ut inquit Scriptura, „Terra<sup>4)</sup> mota est, et petrae scissae sunt; tenebrae<sup>5)</sup> etiam factae per universam terram, et sol obscuratus est.“ Quod si mutae etiam res et sensu carentes Creatoris sui passionem luxerunt, cogitent fideles, quibus lacrymis ipsi, tanquam<sup>6)</sup> vivi lapides huius aedificii, dolorem suum declarare debeant.

*XI. Cur Christus voluerit extrema pati, quidque sentiendum de his sit, qui Christianismum professi, in peccatis sordescunt.*

Iam vero causae etiam passionis exponentiae sunt, ut eo magis divinae erga nos caritatis magnitudo et vis appareat. Si quis igitur quaerat, quae causa fuerit, cur Filius Dei acerbissimam passionem subierit, hanc potissimum fuisse inveniet, praeter hereditariam labem primorum parentum, vitia et peccata, quae homines a mundi origine usque ad hanc diem ad miserunt, ac deinceps usque ad consummationem saeculi admissuri sunt. Hoc enim in passione et morte Filius Dei salvator noster spectavit, ut omnium aetatum peccata redimeret ac deleret, et pro iis Patri abunde cumulateque satisfaceret. Illud etiam accedit ad augendam rei dignitatem, quod non solum Christus pro peccatoribus passus est, sed etiam pro illis, qui poenarum omnium, quas pertulit, auctores et ministri fuerunt; de quo Apostolus nos admonet, ita ad Hebreos scri-

<sup>1)</sup> Io. 1, 1. <sup>2)</sup> Hebr. 1, 2. 3. <sup>3)</sup> Rom. 11, 36. <sup>4)</sup> Mat. 27, 51. <sup>5)</sup> Luc. 23, 44.  
45. <sup>6)</sup> I. Petr. 2, 5.

bens<sup>1)</sup>: „Recogitate eum, qui tales sustinuit a peccatoribus adversus semetipsum contradictionem, ut ne fatigemini animis vestris deficientes.“ Atque hac culpa omnes teneri iudicandum est, qui in peccata saepius prolabuntur; nam quum peccata nostra Christum Dominum impulerint, ut crucis supplcum subiret: profecto qui in flagitiis et sceleribus voluntantur, rursus<sup>2)</sup>, quod in ipsis est, crucifigunt in „semetipsis Filium Dei, et ostentui“ habent. Quod quidem scelus eo gravius in nobis videri potest, quam fuerit in Iudeis, quod illi, eodem Apostolo teste<sup>3)</sup>: „Si cognovissent, nunquam Dominum gloriae crucifixissent,“ nos autemet nosse eum profitemur, et tamen factis negantes, quodammodo violentas ei manus vide-  
mur inferre.

*XII. Christus a Patre et a semetipso etiam traditus est.*

Sed a Patre etiam, et a semetipso Christum Dominum traditum esse, sacrae literae testantur; ait enim apud Isaiah<sup>4)</sup>: „Propter scelus populi percussi eum;“ et paulo ante idem Prophetæ, quum Dominum, plagiis et vulneribus affectum, Spiritu Dei plenus videret, dixit<sup>5)</sup>: „Omnes nos quasi oves erravimus; unusquisque in viam suam declinavit, et posuit Dominus in eo iniuriam omnium nostrum.“ De Filio autem scriptum est<sup>6)</sup>: „Si posuerit pro peccato animam suam, videbit semen longaevum.“ Sed eandem rem Apostolus gravioribus etiam verbis expressit, quum tamen ex altera parte vellet ostendere, quantum nobis de immensa Dei misericordia et bonitate sperare liceat; ait enim<sup>7)</sup>: „Qui etiam proprio filio suo non pepercit, sed pro nobis omnibus tradidit illum; quomodo non etiam cum illo omnia nobis douavit?“

*XIII. Christus tormentorum acerbitatem corpore et animo vere sensit.*

Sequitur nunc, ut quanta fuerit passionis acerbitas parochus doceat; quanquam si memoria teneamus<sup>8)</sup>: „sudorem Domini factum ut guttas sanguinis decurrentes in terram, quum ille tormenta et cruciatus animo perciperet, quibus paulo post afficiendus erat, facile ex eo unusquisque intelliget, nihil ad illum dolorem addi potuisse. Nam si malorum imminentium cogitatio tam acerba fuit, id quod sanguinis sudor declaravit: quid ipsam perpersionem fuisse existimandum est? Sed tamen Christum Dominum summis tum animi tum corporis doloribus affectum esse constat. Ac primum quidem nulla fuit eius corporis pars, quae gravissimas poenas non senserit;

<sup>1)</sup> Hebr. 12, 3. <sup>2)</sup> Hebr. 6, 6. <sup>3)</sup> I. Cor. 2, 8. <sup>4)</sup> Is. 53, 8. <sup>5)</sup> Ibid. v. 6. <sup>6)</sup> Ibid. v. 10. <sup>7)</sup> Rom. 8, 32. <sup>8)</sup> Luc. 22, 44.

nam et pedes et manus clavis crucis affixa, caput spinis compunctum, et arundine percussum, facies sputis foedata, alapis caesa, totum corpus flagellis verberatum est. Praeterea omnium et generum et ordinum homines „convenerunt<sup>1)</sup> in unum adversus Dominum et adversus Christum eius.“ Gentes enim et Iudaci passionis suasores, auctores, ministri fuerunt; Iudas eum prodidit, Petrus negavit, ceteri omnes deseruerunt. Iam vero in cruce ipsa acerbitatemne, an ignominiam, an utrumque simul queremur? Ac profecto nullum aut turpius genus mortis, aut acerbius excogitari eo potuit, quo affici non nisi nocentissimi et sceleratissimi homines consueverunt, et in quo summi doloris et cruciatus sensum mortis diurnitas vehementiorem efficiebat. Augebat autem poenarum magnitudinem ipsa Christi Iesu corporis constitutio et habitus; quod quidem, quum Spiritus sancti virtute formatum esset, multo perfectius et temperatius fuit, quam aliorum hominum corpora esse possunt; atque ideo acriorem quoque sentiendi vim habuit, et gravius tormenta illa omnia perpessum est. Quod vero ad intimum animi dolorem pertinet, nemo dubitare potest, quin summus in Christo fuerit. Sanctis enim hominibus, quicunque supplicia et cruciatus pertulerunt, non defuit animae solatium divinitus datum, quo recreati tormentorum vim aequo animo ferre possent, immo vero in cruciatibus plerique intima laetitia efferebantur; ait enim Apostolus<sup>2)</sup>: „Gaudeo in passionibus pro vobis, et adimpleo ea, quae desunt passionum Christi, in carne mea pro corpore eius, quod est ecclesia;“ et alibi<sup>3)</sup>: „Repletus sum consolatione, superabundo gudio in omni tribulatione nostra.“ Verum Christus Dominus amarissimae passionis calicem, quem bibit, nulla suavitate permixta temperavit. Humanae enim naturae, quam assumpserat, sentire omnia tormenta permisit, non secus ac si homo, non etiam Deus fuisse.

*XIV. Quae potissimum commoda et bona Christiano generi Christi passio pepererit.*

Reliquum modo est, ut commoda et bona, quae ex passione Domini percepimus, a parocho accurate explicitur. Primum igitur Domini passio peccati liberatio fuit; nam ut est apud S. Ioannem<sup>4)</sup>: „Dilexit nos, et lavit nos a peccatis nostris in sanguine suo;“ et Apostolus inquit<sup>5)</sup>: „Convivificavit vos, donans vobis omnia delicta, delens, quod adversum nos erat, chirographum decreti, quod erat contrarium nobis,

<sup>1)</sup> Ps. 2, 2. <sup>2)</sup> Col. 1, 24. <sup>3)</sup> II. Cor. 7, 4. <sup>4)</sup> Apoc. 1, 5. <sup>5)</sup> Col. 2, 13.

et ipsum tulit de medio, affigens illud cruci.<sup>4)</sup> Deinde a daemonis tyrannide nos eripuit; ipse enim Dominus inquit<sup>1):</sup> „Nunc iudicium est mundi, nunc princeps huius mundi eiicitur foras, et ego, si exaltatus fuero a terra, omnia traham ad me ipsum.“ Poenam praeterea peccatis nostris debitam persolvit. Tum vero, quia nullus gratius et acceptius Deo sacrificium offerri potuit, Patri nos reconciliavit, eumque nobis placatum et propitium reddidit. Postremo quoniam peccata sustulit, coelorum etiam aditum, communis humani generis peccato interclusum, nobis patefecit. Atque id Apostolus significavit illis verbis<sup>2):</sup> „Habemus fiduciam in introitu Sanctorum in sanguine Christi.“ Neque vero in veteri lege huius mysterii figura et imago quaedam defuit. Nam illi, quibus interdictum erat, ne in patriam ante summi sacerdotis mortem reverterentur, hoc significabant, nemini<sup>3)</sup>, quamvis iuste et pie vixisset, aditum in coelestem patriam patere, antequam summus ille atque aeternus sacerdos Christus Jesus mortem obiret; qua quidem obita statim coeli fores patuerunt iis, qui sacramentis expiati, fideque, spe et caritate praediti passionis eius participes fuissent.

*XV. Unde vim habuerit Christi passio ad tanta nobis bona promerenda.*

Haec autem omnia maxima et divina bona parochus debet, ex Domini passione ad nos pervenisse; primum quidem, quia est integra atque omnibus numeris perfecta satisfactio, quam admirabili quadam ratione Iesus Christus pro peccatis nostris Deo Patri persolvit. Neque vero pretium, quod pro nobis persolvit, debitum nostris par solum et aequale fuit, verum ea longe superavit. Deinde sacrificium Deo acceptissimum fuit, quod quum illi Filius in ara crucis obtulit, Patris iram atque indignationem prorsus mitigavit. Atque hoc nomine Apostolus usus est, quum inquit<sup>4):</sup> „Christus dilexit nos, et tradidit semetipsum pro nobis oblationem et hostiam, Deo in odorem suavitatis.“ Praeterea redemptio, de qua est apud Apostolorum principem<sup>5):</sup> „Non corruptibilibus auro vel argento redempti estis de vana vestra conversatione paternae traditionis; sed pretioso sanguine, quasi agni immaculati Christi et incontaminati;“ et Apostolus docet<sup>6):</sup> „Christus nos redemit de maledicto legis, factus pro nobis maledictum.“

*XVI. In Christi passione sunt omnium virtutum exempla.*

Verum praeter haec immensa beneficia illud etiam vel

---

<sup>1)</sup> Io. 12, 31. <sup>2)</sup> Hebr. 10, 19. <sup>3)</sup> Num. 35, 25. <sup>4)</sup> Eph. 5, 2. <sup>5)</sup> I. Petr. 1, 18.  
<sup>6)</sup> Gal. 3, 13.

maximum consecuti sumus, ut in hac una passione omnium virtutum clarissima exempla habeamus; nam et patientiam, et humilitatem, et eximiam caritatem, et mansuetudinem, et obedientiam, et summam animi constantiam, non solum in perferendis propter iustitiam doloribus, sed etiam in morte opptenda, ita ostendit, ut vere dicere possimus, Salvatorem nostrum, quaecunque vitae praecepta toto praedicationis suae tempore verbis nos docuit, ea omnia uno passionis die in se ipso expressisse. Atque haec breviter de Christi Domini saluberrima passione et morte dicta sunt. Utinam vero haec mysteria in animis nostris assidue versentur, ut una cum Domino pati et mori et sepeliri discamus; ut deinde, abiecta omni sorde peccati, ad novam vitam cum illo resurgentem, aliquando tandem ipsius gratia et misericordia digni simus, qui coelestis regni et gloriae participes efficiamur.

## CAPUT VI.

### *De quinto Articulo.*

Descendit ad inferos, tertia die resurrexit a mortuis.

#### *I. Pars prima huius articuli quomodo sit intelligenda.*

Maxime quidem refert nosse gloriam sepulturae Domini nostri Iesu Christi, de qua proxime dictum est; sed plus interest fidelis populi cognoscere illustres triumphos, quos ex devicto diabolo et spoliatis inferorum sedibus deportavit; de quibus simulque de resurrectione dicendum est. Qui locus, etsi separatim per se recte tractari possit, nos tamen, sanctorum Patrum auctoritatem secuti, eum cum descensu ad inferos coniungendum putavimus. Eius igitur priori parte hoc nobis credendum proponitur, Christo iam mortuo, eius animam ad inferos descendisse, ibique tamdiu mansisse, quamdiu eiusdem corpus in sepulcro fuit. His autem verbis simul etiam confitemur, eandem Christi personam eo tempore et apud inferos fuisse, et in sepulcro iacuisse. Quod quidem quum dicimus, nemini mirum videri debet, propterea quod, ut saepe iam docuimus, quamvis anima a corpore discesserit, nunquam tamen divinitas vel ab anima vel a corpore separata est.

#### *II. Quid hic inferorum vocabulo intelligendum sit.*

Sed quoniam articuli explanationi plurimum lucis afferre potest, si parochus prius doceat, quid hoc loco inferorum vocabulo intelligendum sit, monere oportet, inferos hoc loco pro

sepulcro non accipi, ut quidam non minus impie quam imperite putaverunt. Superiori enim articulo Christum Dominum sepultum esse, edocti sumus, nec ulla causa erat, cur in fide tradenda alio et quidem obscuriori loquendi genere idem a sanctis Apostolis repeteretur; verum inferorum nomen abdita illa receptacula significat, in quibus animae detinentur, quae coelestem beatitudinem non sunt consecutae. Ita vero sacrae literae hanc vocem multis in locis usurparunt. Nam apud Apostolum legimus<sup>1)</sup>: „In nomine Iesu omne genu flecti, coelestium, terrestrium et infernorum,“ et in Actis Apostolorum D. Petrus testatur<sup>2)</sup>: Christum Dominum suscitatum „solutis doloribus inferni.“

*III. Quot sint loca, quibus animae extra beatitudinem constitutae post mortem detinentur.*

Neque tamen ea receptacula unius et eiusdem generis sunt omnia. Est enim tetricus et obscurissimus carcer, ubi perpetuo et inextingibili igne damnatorum animae simul cum immundis spiritibus torquentur, qui etiam gehenna, abyssus, et propria significatione infernus<sup>3)</sup> vocatur. Praeterea est purgatorius ignis, quo piorum animae ad definitum tempus cruciatae expiantur, ut eis in aeternam patriam ingressus patere possit, in quam nihil coinquinatum ingreditur. Ac de huius quidem doctrinae veritate, quam et Scripturarum testimoniis et apostolica traditione confirmatam esse sancta concilia declarant, eo diligentius et saepius parocho disserendum erit, quod in ea tempora incidimus, quibus homines sanam doctrinam non sustinent. Tertium postremo receptaculi genus est, in quo animae Sanctorum ante Christi Domini adventum excipiebantur, ibique sine ullo doloris sensu, beata redemptoris spe sustentati, quieta habitatione fruebantur. Horum igitur piorum animas, quae in sinu Abrahæ Salvatorem exspectabant, Christus Dominus ad inferos descendens liberavit.

*IV. Anima Christi non potentia tantum, sed re ipsa ad inferos descendit.*

Nec vero existimandum est, eum sic ad inferos descendisse, ut eius tantummodo vis ac virtus, non etiam anima eo pervenerit; sed omnino credendum est, ipsam animam re et praesentia ad inferos descendisse, de quo exstat firmissimum illud Davidis testimonium<sup>4)</sup>: „Non derelinques animam meam in inferno.“

---

<sup>1)</sup> Phil. 2, 10. <sup>2)</sup> Act. 2, 24. <sup>3)</sup> Mat. 10, 28. Luc. 16, 22. Ap. 9, 11. <sup>4)</sup> Ps. 15, 10.

*V. Aliquid dignitati Christi descensu ad inferos detractum non est.*

Verum etsi Christus ad inferos descendit, nihil de eius summa potestate detractum est; neque eius sanctitatis splendor macula aliqua adspersus, quum potius hoc facto verissima esse omnia, quae de illius sanctitate celebrata erant, eumque Filium Dei esse, quemadmodum antea tot prodigiis declaraverat, apertissime comprobatum sit. Id quod facile intelligemus, si causas, cur Christus et alii homines in ea loca venerint, inter se conferamus. Ceteri enim omnes captivi descendebant; ipse vero inter „mortuos<sup>1)</sup> liber,“ et victor, ad profigandos daemones, a quibus illi ob noxam inclusi et constricti tenebantur, descendit. Praeterea alii omnes, qui descendebant, partim poenis acerbissimis torquebantur, partim vero, ut alio doloris sensu carerent, tamen Dei adspectu privati, et spe beatiae gloriae, quam exspectabant, suspensi torquebantur. At Christus Dominus descendit, non ut aliquid pateretur, verum ut sanctos et iustos homines ex misera illius custodiae molestia liberaret, eisque passionis suae fructum impertiret. Quod igitur ad inferos descendit, nulla prorsus de summa eius dignitate et potestate diminutio facta est.

*VI. Quibus de causis Christus ad inferos descendere voluerit.*

His expositis docendum erit, propterea Christum Dominum ad inferos descendisse, ut, ereptis daemonum spoliis, sanctos illos Patres ceterosque pios e carcere liberatos secum adduceret in coelum; quod ab eo admirabiliter summaque cum gloria perfectum est. Statim enim illius adspectus clarissimam lucem captivis attulit, eorumque animas immensa laetitia gaudioque implevit; quibus etiam optatissimam beatitudinem, que in Dei visione consistit, impertivit. Quo facto id comprobatum est, quod latroni promiserat illis verbis<sup>2)</sup>: „Hodie mecum eris in paradyso.“ Hanc vero piorum liberationem Oseas tanto ante praedixerat in hunc modum<sup>3)</sup>: „Ero mors tua, o mors! morsus tuus ero, inferne!“ Hoc etiam significavit Zacharias Propheta, quum ait<sup>4)</sup>: „Tu quoque in sanguine testamenti tui emisisti vinctos tuos de lacu, in quo non est aqua.“ Id ipsum denique expressit Apostolus illis verbis<sup>5)</sup>: „Expolians principatus et potestates, traduxit confidenter, palam triumphans, illos in semetipso.“ Verum ut huius mysterii vim melius intelligamus, saepe illud memoria repetere debemus, pios homines, non solum qui post adventum Domini in lucem editi erant, sed qui illum post Adam antecesserant, vel qui

<sup>1)</sup> Ps. 87, 6. <sup>2)</sup> Luc. 23, 43. <sup>3)</sup> Os. 13, 14. <sup>4)</sup> Zach. 9, 11. <sup>5)</sup> Col. 2, 15.

usque ad finem saeculi futuri sunt, eius passionis beneficio salutem consecutos esse. Quamobrem, antequam ille moreretur ac resurgeret, coeli portae nemini unquam patuerunt; sed piorum animae, quum e vivis excessissent, vel in sinum Abrahae deferebantur, vel, quod etiam nunc iis contingit, quibus aliquid diluendum et persolvendum est, purgatorii igne expiabantur. Est illa praeterea causa, cur descenderit ad inferos Christus Dominus, ut ibi etiam, quemadmodum in coelo et in terris, vim suam potestatemque declararet, et omnino, „ut<sup>1)</sup> in nomine eius omne genu flecteretur, coelestium, terrestrium et infernorum.“ Quo loco quis summam Dei benignitatem in genus humanum non admiretur et obstupescat, qui non modo pro nobis acerbissimam mortem subire, sed infimas etiam terrae partes penetrare voluerit, ut sibi carissimas animas inde eratas ad beatitudinem traduceret?

#### *VII. Alterius partis quinti articuli sensus.*

Sequitur altera articuli pars, in qua explicanda quantum laborare parochus debeat, declarant illa Apostoli verba<sup>2)</sup>: „Memor esto, Dominum Iesum Christum resurrexisse a mortuis.“ Quod enim Timotheo praecipit, idem etiam reliquis animarum curatoribus praeceptum esse dubitandum non est. Ea autem articuli est sententia: Postquam Christus Dominus sexta feria, hora diei nona, in cruce spiritum emisit, et eadem die vespere sepultus est ab eius discipulis, qui Pilati praesidis permissu corpus Domini e cruce depositum in propinqui horti monumentum novum intulerunt: tertio a morte die, qui fuit dominicus, summo mane illius anima corpori iterum coniuncta est, atque ita is, qui triduum illud mortuus fuerat, ad vitam, ex qua moriens discesserat, rediit et surrexit.

#### *VIII. Non aliena virtute, ut ceteri homines, sed propria vi Christus resurrexit.*

Sed resurrectionis voce non illud solum intelligendum est, Christum a mortuis excitatum esse, quod multis aliis commune fuit; sed sua vi ac virtute resurrexisse, quod proprium in illo fuit et singulare. Neque enim natura patitur, nec ulli homini concessum est, ut se ipsum possit virtute sua a morte ad vitam revocare. Hoc vero summae Dei potestati tantummodo reservatum est, ut ex illis Apostoli verbis intelligimus<sup>3)</sup>: „Etsi crucifixus est ex infirmitate, sed vivit ex virtute Dei.“ Quae quoniam neque a Christi corpore in sepulcro, neque ab

<sup>1)</sup> Phil. 2, 10. <sup>2)</sup> II. Tim. 2, 8. <sup>3)</sup> II. Cor. 13, 4.

anima, quum ad inferos descendisset, seiuneta unquam fuit, divina vis tum in corpore incravat, qua animae iterum coniungi, tum in anima, qua ad eorum denuo reverti posset, qua et levit sua virtute reviviscere atque a mortuis resurgere. Id vero David spiritu Dci plenus praedixit his verbis<sup>1)</sup>: „Salvavit sibi dextera eius et brachium sanetum eius.“ Deinde ipse Dominus divino oris sui testimonio confirmavit<sup>2)</sup>: „Ego pono animam meam, ut iterum sumam eam, et potestatem habeo ponendi eam, et potestatem habeo iterum sumendi eam.“ Iudeis etiam ad confirmandam doctrinæ veritatem dixit<sup>3)</sup>: „Solvite templum hunc, et in tribus diebus exiret illud.“ Quod quidem tametsi de templo illo magnifice ex lapidibus structo intellegent: ille tamen, ut Scripturæ verbis eodem in loco declaratum est, diebat de templo corporis sui. Quamvis autem in Scripturis<sup>4)</sup> interdum legamus, Christum Dominum a Patre suscitatum esse, hoc ad eum, ut ad hominem, referendum est; quemadmodum illa rursus ad eundem ut Deum, spectant, quibus significatur, eum sua virtute resurrexisse.

#### *IX. Quomodo Christus primogenitus mortuorum dicatur, cum aliis ante ipsum resuscitati noscantur.*

Sed illud etiam praeceipuum Christi fuit, quod ipse primus omnium hoc divino resurrectionis beneficio affectus est; nam in Scripturis et „primogenitus<sup>5)</sup> ex mortuis,“ et „primogenitus<sup>6)</sup> mortuorum“ vocatur. Atque, ut est apud Apostolum<sup>7)</sup>: „Christus resurrexit a mortuis primitiae dormientium; quoniam quidem per hominem mors, et per hominem resurrectio mortuorum, et sicut in Adam omnes moriuntur, ita et in Christo omnes vivificabuntur. Unusquisque autem in suo ordine: primitiae Christus, deinde ii, qui sunt Christi.“ Quae quidem verba de perfecta resurrectione interpretanda sunt, qua ad immortalem vitam omni prorsus moriendi necessitate sublata exieruntur. Atque in eo genere Christus Dominus primum locum obtinet. Nam si de resurrectione loquimur, hoc est, de reditu ad vitam, cui iterum moriendi necessitas adiuneta est: ante Christum multi alii a mortuis exierunt, qui omnes tamen ea conditione revixerunt, ut eis iterum moriendum esset; at Christus Dominus ita resurrexit morte subacta et oppressa, ut mori amplius non posset, quod quidem apertissimo illo testimonio confirmatur<sup>8)</sup>: „Christus resurgens ex mortuis iam non moritur; mors illi ultra non dominabitur.“

<sup>1)</sup> Ps. 97, 2. <sup>2)</sup> Io. 10, 17. 18. <sup>3)</sup> Io. 2, 19. <sup>4)</sup> Act. 2, 24. 3, 15. Rom. 8, 11  
<sup>5)</sup> Col. 1, 18. <sup>6)</sup> Apoc. 1, 5. <sup>7)</sup> I. Cor. 15, 20–23. <sup>8)</sup> Rom. 6, 9.

*X. Quomodo et qua ex causa Christus in tertiam diem suam resurrectionem distulerit.*

Quod vero articulo additur; „tertia die,“ parocho explanandum erit, ne fideles arbitrentur, totos ipsos tres dies Dominum in sepulcro fuisse; nam quod integrum naturalem diem, partemque tum antecedentis, tum consequentis diei in sepulcro conditus est, ob eam rem verissime dicitur triduo in sepulcro iacuisse, ac tertia die a mortuis surrexisse; ut enim divinitatem suam declararet, resurrectionem ad finem saeculi differre noluit; rursus vero, ut eum vere hominem vereque mortuum esse crederemus, non statim post mortem, sed tertio die revixit; quod temporis spatium ad veram mortem comprobandum satis esse videbatur.

*XI. Quare Patres Constantinopolitanae synodi huic articulo clausulam adiecerint: „secundum Scripturas.“*

Patres primae Constantinopolitanae Synodi huic loco addiderunt: „secundum scripturas,“ quod quidem ab Apostolo acceptum in fidei symbolum propterea transtulerunt, quod resurrectionis mysterium maxime necessarium esse, idem Apostolus docuerit iis verbis<sup>1)</sup>: „Si Christus non resurrexit, inanis est ergo praedicatio nostra, inanis est et fides vestra;“ et: „si Christus non resurrexit, vana est fides vestra; adhuc enim estis in peccatis vestris.“ Quare D. Augustinus, quum huius articuli fidem admiraretur, ita scripsit<sup>2)</sup>: „Non magnum est credere, quia mortuus est Christus; hoc et pagani et Iudaei et omnes iniqui credunt, hoc omnes credunt, quia mortuus est. Fides Christianorum resurrectio Christi est; hoc pro magno habemus, quia credimus eum surrexisse.“ Ex quo factum est, ut frequentissime Dominus de sua resurrectione locutus sit, ac nunquam fere de passione sua cum discipulis collocutus est, quin de resurrectione loqueretur. Quare quum dixisset<sup>3)</sup>: „Filius hominis tradetur gentibus, et illudetur, et flagellabitur, et conspuetur; et postquam flagellaverint, occident eum,“ ad extremum addidit: „et tertia die resurget.“ Et quum Iudei ab eo peterent, ut aliquo signo et miraculo doctrinam suam comprobaret, respondit<sup>4)</sup>: „Nullum aliud signum eis datum iri, quam Ionaee Prophetae signum; sicut enim fuit Ionas in ventre ceti tribus diebus et tribus noctibus: sic futurum“ affirmavit „filium hominis in corde terrae tribus diebus et tribus noctibus.“ Verum ut huius articuli vim et sensum melius perspiciamus, tria nobis investiganda et cognoscenda

<sup>1)</sup> L. Cor. 15, 14. 17. <sup>2)</sup> in Ps. 120. <sup>3)</sup> Lue. 18, 32. sq. <sup>4)</sup> Mat. 12, 39. sq.

sunt: Primum quidem, quare necesse fuerit Christum resurgere; deinde, qui resurrectionis finis et scopus sit, et quae ab ea utilitates et commoda in nos sint profecta.

*XII. Quas ob causas necesse fuerit Christum resurgere.*

Quod igitur ad primum attinet, necesse fuit eum resurgere, ut Dei iustitia ostenderetur, a quo maxime deccebat eum extolli, qui, ut illi obtemperaret, depressus atque omni ignominia affectus erat. Hanc Apostolus causam attulit; quum ad Philippenses inquit<sup>1)</sup>: „Humiliavit semetipsum, factus obediens usque ad mortem, mortem autem crucis, propter quod et Deus exaltavit illum.“ Praeterea ut fides nostra confirmaretur, sine qua hominis iustitia constare non potest. Illud enim maximo argumento esse debet, Christum Filium Dei fuisse, quod sua virtute a mortuis resurrexit. Deinde ut spes nostra aleretur atque sustentaretur. Quum enim Christus resurrexerit, certa spe nitimur, fore ut nos etiam resurgamus, siquidem membra capitinis sui conditionem consequantur necesse est. Ita enim Apostolus argumentationem concludere videtur, quum ad Corinthios<sup>2)</sup> et ad Thessalonicenses scribit. Et a principe Apostolorum Petro dictum est<sup>3)</sup>: „Benedictus Deus et Pater Domini nostri Iesu Christi, qui secundum misericordiam suam magnam regeneravit nos in spem vivam per resurrectionem Iesu Christi ex mortuis in haereditatem incorruptibilem.“ Postremo ob eam etiam rem Domini resurrectionem necessariam fuisse docendum est, ut salutis et redemptiois nostrae mysterium absolveretur. Christus enim morte sua nos a peccatis liberavit; resurgens vero praecipua nobis bona restituit, quae peccando amiseramus. Quare est apud Apostolum dictum<sup>4)</sup>: „Christus traditus est propter delicta nostra, et resurrexit propter iustificationem nostram.“ Ne quid igitur humani generis saluti deesset, quemadmodum illum mori, ita resurgere etiam oportuit.

*XIII. Quae commoda ex resurrectione Christi ad homines redeant.*

Ex iis vero, quae hactenus dicta sunt, perspicere possumus, quantum utilitatis Christi Domini resurrectio fidelibus attulerit. In resurrectione enim Deum esse immortalem, plenum gloria, mortis et diaboli victorem agnoscimus; quod de Christo Iesu sine ulla dubitatione credendum et confitendum est. Deinde Christi resurrectio nobis etiam corporis resurrectionem peperit, tum quia eius mysterii efficiens causa fuit,

<sup>1)</sup> Phil. 2, 8. 9. <sup>2)</sup> I Cor. 15, 12. seq. I. Thes. 4, 12—14. <sup>3)</sup> I. Petr. 1, 3. 4.

<sup>4)</sup> Rom. 4, 25.

tum quia ad Domini exemplum resurgere omnes debemus. Nam quod ad corporis resurrectionem attinet, Apostolus ita testatur<sup>1)</sup>: „Per hominem mors et per hominem resurrectio mortuorum.“ Quaecunque enim Deus in redemptionis nostrae mysterio egit, ad omnia Christi humanitate tanquam efficienti instrumento usus est. Quare eius resurrectio instrumentum quoddam fuit ad resurrectionem nostram efficiendam; exemplar vero dici potest, quoniam Christi Domini resurrectio omnium est perfectissima; ac quemadmodum Christi corpus resurgens ad immortalem gloriam immutatum est: ita nostra etiam corpora, quae prius imbecilla et mortalia fuerant, gloria et immortalitate ornata restituentur. Ut enim Apostolus docet<sup>2)</sup>: „Salvatorem exspectamus Dominum nostrum Iesum Christum, qui reformabit corpus humilitatis nostrae configuratum corpori claritatis suae.“ Hoc etiam de anima in peccatis mortua dici potest, cui quo pacto Christi resurrectio exemplar proponatur, idem Apostolus iis verbis ostendit<sup>3)</sup>: „Quomodo Christus surrexit a mortuis per gloriam Patris, ita et nos in novitate vitae ambulemus. Si enim complantati facti sumus similitudini mortis eius, simul et resurrectione erimus.“ Et paucis interiectis inquit<sup>4)</sup>: „scientes quod Christus resurgens ex mortuis, iam non moritur; mors illi ultra non dominabitur. Quod enim mortuus est peccato, mortuus est semel; quod autem vivit, vivit Deo. Ita et vos existimate, vos mortuos quidem esse peccato, viventes autem Deo in Christo Iesu.“

#### *XIV. Quae ex Christi resurrectione exempla sint sumenda.*

Duo igitur a Christi resurrectione exempla petere debemus. Alterum est, ut, postquam peccati maculas eluimus, novum vitae genus instituamus, in quo morum integritas, innocentia, sanctitas, modestia, iustitia, beneficentia, humilitas eluceant. Alterum est, ut in eo vitae instituto ita perseveremus, ut, adiuvante Domino, a iustitiae via, quam semel ingressi fuerimus, non excidamus. Neque vero Apostoli verba id solum demonstrant, Christi resurrectionem ad resurrectoris exemplum nobis proponi: verum etiam resurgendi virtutem nobis praebere, viresque et spiritum largiri, quo in sanctitate et iustitia permaneamus, ac Dei praecpta servemus, declarant. Nam quemadmodum ex eius morte non solum peccatis moriendo exemplum capimus, sed virtutem etiam haurimus, qua peccatis moriamur: ita eius resurrectio ad iustitiam consequendam nobis vires affert, ut, deinde pie et sancte Deum colentes, in novi-

<sup>1)</sup> I. Cor. 15, 21. <sup>2)</sup> Phil. 3, 20. <sup>3)</sup> Rom. 6, 4, seq. <sup>4)</sup> Rom. 6, 9–11.

tate vitae ambulemus, ad quam resurgimus. Hoc enim maxime resurrectione sua Dominus effecit, ut qui antea una cum illo peccatis et huic saeculo mortui eramus, cum illo etiam ad novam vitae institutionem et disciplinam resurgeremus.

*XV. Quibus indicis colligatur, aliquem secundum spiritum cum Christo surrexisse.*

Huius resurrectionis quae potissimum signa observanda sint, Apostolus nos admonet; nam quum inquit<sup>1)</sup>: „Si consurrexistis cum Christo, quae sursum sunt quaerite, ubi Christus est in dextera Dei sedens:“ plane ostendit, eos, qui vitam, honores, otium, divitias, ibi maxime, ubi Christus est, habere cupiunt, vere cum Christo surrexisse; quum vero addit<sup>2)</sup>: „Quae sursum sunt sapite, non quae super terram: alteram etiam hanc veluti notam apposuit, qua perspicere possimus, num vere cum Christo surreximus. Ut enim corporis affectio- nem et valetudinem gustus indicare solet, ita, si „quaecunque<sup>3)</sup> sunt vera, quaecunque pudica, quaecunque iusta, quaecunque sancta“ alicui sapiant, isque coelestium rerum iucunditatem intimo mentis sensu percipiat: hoc maximo arguento esse potest, eum, qui ita affectus sit, ad novam et spiritualem vitam una cum Christo Iesu surrexisse.

## CAPUT VII.

### De sexto Articulo.

Ascendit ad coelos, sedet ad dexteram Dei Patris omnipotentis.

*I. Huius articuli excellentia et primae partis sententia.*

David Propheta, quum beatam et gloriosam Domini ascensionem spiritu Dei plenus contemplaretur, omnes ad eum triumphum summa laetitia et gaudio celebrandum illis verbis hortatur, quum inquit<sup>4)</sup>: „Omnes gentes plaudite manibus, iubilate Deo in voce exultationis: ascendit Deus in iubilatione.“ Ex quo intelliget parochus, maximo studio hoc mysterium explicandum esse, sibique diligenter curandum, ut fideles illud non solum fide et mente percipiant, sed, quoad eius fieri poterit, iuvante Domino factis etiam et vita exprimere studeant. Quod igitur ad sexti articuli explanationem attinet, in quo potissimum de divino hoc mysterio agitur, a priori eius parte incipiendum est, et quae eius sit vis atque sententia, aperiendum. De Christo enim Iesu illud etiam fideles sine

<sup>1)</sup> Col. 3, 1. <sup>2)</sup> Col. 3, 2. <sup>3)</sup> Phil 4, 8. <sup>4)</sup> Ps. 46, 2, 6.

ulla dubitatione credere oportet, eum, perfecto iam et absolo-  
luto redemptionis nostrae mysterio, ut homo est, in coelum  
corpore et anima ascendisse. Nam ut Deus est, nunquam ab  
eo abfuit, ut qui divinitate sua loca omnia compleat.

*II. Non solum divinitatis virtute Christus ascendit, sed vi etiam  
humanitatis.*

Ascendisse autem sua virtute doceat, non aliena vi sub-  
latum, quemadmodum Elias<sup>1)</sup>, qui „igneo curru in coelum  
ejectus est;“ vel Habacuc<sup>2)</sup> Propheta, vel Philippus<sup>3)</sup> diaconus,  
qui divina virtute per aërem delati longinqua terrarum  
spatia permearunt. Neque vero solum ut Deus praepotenti  
divinitatis virtute in coelos ascendit, sed etiam ut homo est.  
Quamvis enim naturali vi id fieri non potuerit, tamen virtus  
illa, qua beata Christi anima praedita erat, corpus, ut libuit,  
movere potuit; corpus vero, quod iam gloriam adeptum erat,  
moventis animae imperio facile parebat. Atque hac ratione,  
ut Deus, et ut homo est, Christum in coelum sua virtute  
ascendisse credimus.

*III. Quo sensu Christus posteriore articuli parte dicatur sedere  
ad dexteram Dei Patris.*

In altera articuli parte haec sunt: „Sedet ad dexteram  
Dei Patris.“ Quo loco tropum, id est verbi immutationem, licet  
animadvertere, frequentem in divinis literis, quum humanas  
affectiones et membra ad nostram intelligentiam accommodan-  
tes Deo tribuimus; neque enim, quum spiritus sit, quidquam in  
eo corporeum cogitari potest. Sed quoniam in humanis rebus  
ei maiorem honorem tribui existimamus, qui ad dexteram col-  
locatus est, eandem rem ad coelestia etiam transferentes, ad  
explicandam Christi gloriam, quam ut homo prae caeteris  
omnibus adeptus est, eum in Patris dextera esse confitemur.  
Sedere autem hoc loco non situm et figuram corporis signifi-  
cat, sed etiam regiae summaeque potestatis ac gloriae firmam  
et stabilem possessionem, quam a Patre accepit, declarat; de  
quo ait Apostolus<sup>4)</sup>: „Suscitans illum a mortuis, et consti-  
tuens ad dexteram suam in coelestibus supra omnem princi-  
patum, et potestatem, et virtutem, et dominationem, et omne  
nomen, quod nominatur non solum in hoc saeculo, sed etiam  
in futuro, et omnia subiecit sub pedibus eius.“ Ex quibus  
verbis appareat, hanc gloriam adeo propriam et singularem  
Domini esse, ut cuivis alii creatae naturae convenire non possit.  
Quare alio loco testatur<sup>5)</sup>: „Ad quem autem Angelorum dixit  
aliquando: Sede a dexteris meis?“

<sup>1)</sup> IV. Reg. 2, 11. <sup>2)</sup> Dan. 14, 35. <sup>3)</sup> Act. 8, 39. <sup>4)</sup> Eph. 1, 20. seq. <sup>5)</sup> Hebr. 1, 13

*IV. Quare ascensionis Christi historia frequentius apud populum sit repetenda.*

Sed articuli sensum parochus latius explanabit, ascensionis historiam persequens, quam sanctus Lucas Evangelista in Actis Apostolorum admirabili ordine descriptis. In cuius explicatione illud primum observare oportebit, cetera omnia mysteria ad ascensionem tanquam ad finem referri, in eoque omnium perfectionem et absolutionem contineri. Nam, ut ab incarnatione Domini omnia religionis nostrae mysteria initium habent, ita ascensione eius peregrinatio concluditur. Praeterea alia symboli capita, quae ad Christum Dominum pertinent, summam eius humilitatem et contemptionem ostendunt; neque enim afflictus aut humilius quidquam cogitari potest, quam quod Filius Dei pro nobis humanam naturam et imbecillitatem assumperit, patique et mori voluerit. At vero, quod tum superiori articulo a mortuis resurrexisse, nunc vero in coelum ascendisse, et ad Dei Patris dexteram sedere confitemur, nihil ad eius summam gloriam divinamque maiestatem declarandam magnificentius dici aut admirabilius potest.

*V. Cur Christus in coelum ascenderit, nec in terra potius regnum suum constituerit.*

Iam his expositis accurate docendum est, cuius rei causa Christus Dominus in coelos ascenderit. Primum enim ascendit propterea, quod eius corpori, quod immortalitatis gloria in resurrectione donatum fuerat, non terrenae huius et obscurae habitationis locus, sed altissimum et splendidissimum coeli domicilium conveniret, nec vero solum, ut eius gloriae et regni solio potiretur, quod sanguine meruerat: verum etiam ut ea, quae ad salutem nostram pertinebant, curaret, deinde ut „regnum<sup>1)</sup> suum non esse ex hoc mundo“ re ipsa comprobaret; nam mundi regna terrena et fluxa sunt, magnisque opibus et carnis potentia nituntur. Christi vero regnum non terrenum, quale Iudei exspectabant, sed spirituale et aeternum; itemque eius opes et divitias spirituales esse ipse ostendit, quum suam sedem in coelis collocavit. In quo quidem regno illi ditiores, et omnium bonorum copia affluentiores existimandi sunt, qui ea, quae Dei sunt, diligentius quaerunt. Nam et S. Iacobus<sup>2)</sup> testatur, Deum elegisse „pauperes in hoc mundo, divites in fide, et heredes regni, quod repromisit Deus diligentibus se.“ Sed illud etiam Dominus noster in coelum ascendens efficere voluit, ut nos eum ascendentem mente et

<sup>1)</sup> Io. 18, 36. <sup>2)</sup> Iac. 2, 5.

desiderio prosequeremur. Nam, quemadmodum morte et resurrectione sua moriendi et resurgendi spiritu exemplum nobis reliquerat: ita ascensu nos docet atque instruit, ut in terris positi in coelum nos cogitatione conferamus, confitentes nos peregrinos<sup>1)</sup> et hospites esse super terram ac patriam inquietantes, cives<sup>2)</sup> esse sanctorum, et domesticos Dei; „nostra“ enim, ut idem inquit Apostolus<sup>3)</sup>, „conversatio in coelis est.“

*VI. Quae beneficia ex Christi assensione hominibus sint collata.*

Iam vero vim et magnitudinem inexplicabilium bonorum, quae in nos Dei benignitas effundit, divinus David, Apostolo<sup>4)</sup> interprete, multo ante cecinerat illis verbis<sup>5)</sup>: „Ascendens in altum captivam duxit captivitatem, dedit dona hominibus;“ nam decimo die Spiritum sanctum dedit, cuius virtute atque ubertate complevit praesentem illam fidelium multitudinem, et vere tum magnifica illa promissa persolvit<sup>6)</sup>: „Expedit vobis ut ego vadam; si enim non abiero, Paracletus non veniet ad vos; si autem abiero, mittam eum ad vos.“ Ascendit etiam in coelum ex Apostoli<sup>7)</sup> sententia, „ut appareat nunc vultui Dei pro nobis,“ et apud Patrem advocati officio fungatur. „Filioli mei,“ inquit<sup>8)</sup> S. Ioannes, „haec scribo vobis, ut non peccetis, sed et si quis peccaverit, advocatum habemus apud Patrem, Iesum Christum iustum, et ipse est propitiatio pro peccatis nostris.“ Nec vero quidquam est, unde fideles maiorem laetiam et animi iucunditatem capere debeant, quam Iesum Christum patronum causae ac deprecatorem salutis nostrae constitutum esse, cuius sit apud aeternum Patrem summa gratia et auctoritas. „Paravit“ denique „nobis locum,“ quod etiam se facturum promiserat<sup>9)</sup>, atque omnium nostrum nomine caput ipse Jesus Christus venit in coelestis gloriae possessionem. Nam in coelum abiens portas, quae Adami peccato interclusae fuerant, patefecit, nobisque viam munivit, qua ad coelestem beatitudinem perveniremus; quemadmodum ipse in coena discipulis futurum praedixerat. Quod quidem ut rei etiam eventu aperte comprobaret, piorum animas, quas ab inferis eripuerat, secum in aeternae beatitudinis domicilium introduxit.

*VII. Comoda, quae Christus sua ascensione nobis intulit.*

Hanc coelestium munerum admirabilem copiam salutaris illa commodorum series consecuta est; primum enim fidei nostrae merito maximus cumulus accessit; nam fides earum re-

<sup>1)</sup> Hebr. 11, 13. <sup>2)</sup> Eph. 2, 19. <sup>3)</sup> Phil. 3, 20. <sup>4)</sup> Eph. 4, 8. <sup>5)</sup> Ps. 67, 19. <sup>6)</sup> Io. 16, 7. <sup>7)</sup> Hebr. 9, 24. <sup>8)</sup> I. Io. 2, 1. <sup>9)</sup> Io. 14, 2.

rum est, quae sub aspectum non cadunt, atque ab hominum ratione ac intelligentia remotae sunt. Quare si Dominus a nobis non discessisset, fidei nostrae meritum minueretur; si quidem a Christo Domino beati praedicantur<sup>1)</sup>, „qui non viderunt et crediderunt.“ Praeterea Christi in coelum ascensus ad confirmandam spem in cordibus nostris magnum momentum habet. Nam quoniam Christum hominem in coelum ascendisse, et humanam naturam in dextera Dei Patris collocaisse credimus, magna in spe sumus, fore ut nos etiam, eius membra, illuc ascendamus, atque ibi cum capite nostro coniungamur. Quod ipse Dominus his verbis testatus est<sup>2)</sup>: „Pater, quos dedisti mihi, volo, ut ubi sum ego, et illi sint mecum.“ Deinde hoc quoque vel maximum beneficium consecuti sumus, quod amorem nostrum ad coelum rapuit, ac divino Spiritu inflammavit; nam verissime dictum est<sup>3)</sup>, ibi cor nostrum esse, ubi thesaurus noster est.

*VIII. Non fuit nobis utile, Christum in terris manere.*

Ac profecto, si Christus Dominus in terris versaretur, omnis nostra cogitatio in ipso hominis adspectu et consuetudine defixa esset, et illum dumtaxat hominem spectaremus, qui nos tantis beneficiis afficeret, eumque terrena quadam benevolentia prosequeremur. Verum in coelum ascendens, amorem nostrum spiritualem reddidit, effecitque, ut quem nunc absentem cogitamus, eum ut Deum veneremur et diligamus. Id autem partim Apostolorum exemplo intelligimus, quibus dum praesens affuit Dominus, humano fere sensu de illo iudicare videbantur; partim vero ipsius Domini testimonio confirmatum est, quem inquit<sup>4)</sup>: „Expedit vobis, ut ego vadam.“ Nam imperfectus ille amor, quo Christum Iesum praesentem diligebant, divino amore perficiendus erat, idque Spiritus sancti adventu; quare statim addit: „Si enim non abiero, Paracletus non veniet ad vos.“

*IX. Post Christi ascensionem ecclesia maxime amplificata fuit.*

Accedit etiam, quod in terris domum suam, id est ecclesiam, amplificavit, quae Spiritus sancti virtute et ductu gubernaretur. Eius vero universae inter homines pastorem et summum antistitem Petrum, Apostolorum principem, reliquit; tum vero „dedit<sup>5)</sup> quosdam quidem Apostolos, quosdam autem Prophetas, alios vero Evangelistas, alios autem pastores et doctores;“ atque ita ad dexteram Patris sedens aliis atque aliis diversa dona semper impertitur. Nam testatur Aposto-

<sup>1)</sup> Io. 20, 29. <sup>2)</sup> Io. 17, 24. <sup>3)</sup> Mat. 6, 21. <sup>4)</sup> Io. 16, 7. <sup>5)</sup> Eph. 4, 11.

lus<sup>1)</sup>: „Unicuique nostrum datam esse gratiam secundum mensuram donationis Christi.“ Ad extremum vero, quod antea de mortis et resurrectionis mysterio docuimus, idem etiam de ascensu fidelibus cogitandum est. Quamvis enim Christi passioni salutem et redemptionem nostram debeamus, qui merito suo aditum iustis ad coelum aperuit: tamen eius ascensus non solum veluti exemplar nobis propositum est, quo alte spectare et spiritu in coelum ascendere discamus, sed divinam etiam virtutem, qua id efficere possimus, largitus est.

## CAPUT VIII.

### **De septimo Articulo.**

Inde venturus est iudicare vivos et mortuos.

#### *I. Christi tria in suam ecclesiam beneficia, et articuli septimi sententia.*

Tria sunt Domini nostri Iesu Christi ad suam ecclesiam decorandam et illustrandam insignia officia et munera: redemptionis, patrocinii et iudicii. Quum autem superioribus articulis ab eo genus humanum passione et morte redemptum esse, ascensu etiam in coelum nostram causam et patrocinium in perpetuum susceptum constet: sequitur, ut eius iudicium hoc articulo declaretur; cuius articuli ea vis est et ratio, summo illo die Christum Dominum de universo hominum genere iudicaturum esse.

#### *II. Duplex est Christi adventus.*

Sacrae enim literae duos Filii Dei adventus esse testantur: alterum, quum salutis nostrae causa carnem assumpsit, et homo in Virginis alvo effectus est; alterum, quum in consummatione saeculi ad iudicandos omnes homines veniet. Hic adventus in sacris literis dies Domini appellatur, de quo Apostolus ait<sup>2)</sup>: „Dies Domini, sicut fur in nocte, ita veniet;“ et Salvator ipse<sup>3)</sup>: „De die autem illa et hora nemo scit.“ Ac de summo iudicio satis sit illa auctoritas Apostoli<sup>4)</sup>: „Omnes nos manifestari oportet ante tribunal Christi, ut referat unusquisque propria corporis, prout gessit, sive bonum sive malum.“ Plena enim est sacra Scriptura testimoniorum, quae passim parochis occurrent, ad rem non solum comprobandam, sed etiam fidelium oculis subiiciendam, ut, quemad-

<sup>1)</sup> Eph. 4, 7. <sup>2)</sup> I. Thes. 5, 2. <sup>3)</sup> Mat. 24, 36. <sup>4)</sup> II. Cor. 5, 10.

modum a mundi initio dies ille Domini, quo humanam carnem induit, omnibus optatissimus semper fuit, quod in eo mysterio liberationis suaem spem positam haberent: ita deinceps post Filii Dei mortem et ascensum in coelum alterum diem Domini vehementissimo studio desideremus (Tit. 2, 13.), „exspectantes beatam spem et adventum gloriae magni Dei.“

*III. Quoties quilibet homo Christi iudicis sententiam coram subire debeat.*

Sed duo tempora parochis ad rei explicationem obser-vanda sunt, in quibus unicuique necesse est in conspectum Domini venire, et singularum cogitationum, actionum, verbo-rum denique omnium rationem reddere, demumque iudicis praesentem subire sententiam. Primum est, quum unusquis-que nostrum migrat e vita; nam statim ad Dei tribunal sisti-tur, ibique de omnibus iustissima quaestio habetur, quaecun-que aut egerit, aut dixerit, aut cogitarit unquam. Atque hoc privatum iudicium vocatur. Alterum vero, quum uno die at-que uno in loco omnes simul homines ad tribunal iudicis sta-bunt, ut, omnibus omnium saeculorum hominibus inspectanti-bus et audientibus, singuli quid de ipsis decretum et iudica-tum fuerit cognoscant; cuius sententiae pronunciatio impiis et scelestis hominibus non minima futura est poenarum et sup-pliciorum pars; rursus vero pii et iusti non parvum ex ea praemium fructumque percepturi sunt, quum qualis quisque in hac vita fuerit apparebit. Hoc autem generale iudicium ap-pellatur.

*IV. Cur necesse fuerit privato iudicio generale subiicere.*

De quo illud necessario ostendendum est, quae causa fu-erit, cur, praeter privatum de singulis, alterum etiam de uni-versis hominibus iudicium exerceretur. Nam quum vel ipsis hominibus mortuis interdum superstites sint filii parentum imi-tatores, reliqui sint libri, discipuli, exemplorum, orationum, actionum amatores ac propugnatores, quibus rebus ipsorum mortuorum praemia et poenas augeri necesse est, quum haec vel utilitas vel calamitas, ad plurimos pertinens, non prius finem habitura sit, quam extremus veniat mundo dies: aequum erat, de universa hac recte aut perperam factorum dictorumque ratione perfectam quaestionem haberi; quod fieri non po-terat, nisi facto communi omnium hominum iudicio. Accedit etiam, quod quum piorum fama saepe laedatur, impii vero in-nocentiae laude commendentur, divinae iustitiae ratio postulat, ut pii ereptam iniuria apud homines existimationem in publico

universorum hominum conventu et iudicio recuperent. Deinde vero boni et mali homines, quaecunque in vita egerunt, quum non sine corporibus egerint, omnino sequitur, ut benefacta sive malefacta ad corpora etiam pertineant, quae actionum ipsarum instrumentum fuerunt. Maxime igitur conveniebat, corporibus una cum eorum animis debita aeternae gloriae praemia aut supplicia impertiri; quod quidem neque sine omnium hominum resurrectione, neque sine generali iudicio fieri poterat. Postremo, quoniam in adversis et secundis hominum rebus, quae promiscue nonnunquam bonis et malis eveniunt, probandum erat, nihil non infinita Dei sapientia et iustitia geri ac gubernari: par fuit, non solum bonis praemia, improbis supplicia in futuro saeculo constitui, verum etiam publico ac generali iudicio decerni, quo omnibus notiora et illustriora fierent, atque ut Deo iustitiae et providentiae laus ab omnibus tribueretur, pro iniusta illa querela, qua sancti etiam viri deplorare interdum, ut homines, solebant, quum improbos valentes opibus et honoribus florentes animadvertebant. Nam Prophetæ: „Mei,” inquit<sup>1)</sup>), „pene moti sunt pedes, pene effusi sunt gressus mei, quia zelavi super iniquos pacem peccatorum videns;” et paulo post<sup>2)</sup>: „Ecce ipsi peccatores et abundantes in saeculo obtainuerunt divitias; et dixi: Ergo sine causa iustificavi cor meum, et lavi inter innocentes manus meas, et fui flagellatus tota die, et castigatio mea in matutinis.“ Atque haec frequens querela multorum fuit. Ergo necesse erat, ut generale iudicium exerceretur, ne forte homines dicerent: Deum<sup>3)</sup> circa cardines coeli perambulantem non curare terrena. Haec autem veritatis formula iure una ex duodecim fidei Christianæ articulis constituta est, ut, si quorum animi in providentia et iustitia Dei nutarent, huius doctrinae ratione confirmarentur. Praeterea proposito iudicio pios recreari, impios terrori oportebat, ut cognita Dei iustitia illi ne deficerent, hi a malis aeterni supplicii metu atque exspectatione revocarentur. Quare Dominus et Salvator noster, quum de extremo die loqueretur, declaravit futurum aliquando generale iudicium, signaque adventantis eius temporis descripsit, ut, quum illa viderimus, finem saeculi prope esse intelligamus; ac deinde in coelum ascendens Angelos misit, qui Apostolos, eius absentia moerentes, his verbis consolarentur<sup>4)</sup>: „Hic Iesus, qui assumptus est a vobis in coelum, sic veniet, quemadmodum vidistis eum euntem in coelum.“

<sup>1)</sup> Ps. 72, 2. <sup>2)</sup> ibid. 12. 13. 14. <sup>3)</sup> Tob. 22, 14. <sup>4)</sup> Act. 1, 11.

*V. Iuxta utramque naturam Christo tributa est potestas iudicandi genus humanum.*

Verum Christo Domino non solum ut Deo, sed etiam ut homini hoc iudicium datum esse, sacrae literae declarant. Quamvis enim iudicandi potestas omnibus sanctae Trinitatis personis communis sit, praecipue tamen Filio eam tribuimus, quod ipsi quoque sapientiam convenire dicimus. Quod autem ut homo mundum iudicaturus sit, Domini testimonio confirmatur, qui inquit<sup>1)</sup>: „Sicut Pater habet vitam in semetipso, sic dedit et Filio habere vitam in semetipso, et potestatem dedit ei iudicium facere, quia filius hominis est.“

*VI. Cur perinde Patri vel Spiritui sancto hoc iudicium non adscribatur.*

Decebat autem maxime a Christo Domino hoc iudicium exerceri, ut, quum de hominibus decernendum esset, illi corporeis oculis iudicem videre, et auribus sententiam, quae proferebatur, audire possent, et omnino iudicium illud sensibus percipere. Ac praeterea aequissimum erat, ut homo ille, qui iniquissimis hominum sententiis condemnatus fuerat, omnium deinde iudex sedere ab omnibus conspiceretur. Quamobrem Apostolorum princeps quum in Cornelii domo summa Christianae religionis capita exposuisset, docuisissetque Christum a Iudeis in ligno suspensum atque occisum, tertia vero die ad vitam resurrexisse, subiunxit<sup>2)</sup>: „Et praecepit nobis praedicare populo et testificari, quia ipse est, qui constitutus est a Deo iudex vivorum et mortuorum.“

*VII. Quibus indiciis extrellum iudicium imminere agnosceretur.*

Sed tria haec praecipua signa iudicium antecessura esse, sacrae literae declarant: praedicationem evangelii per universum orbem, discessionem, Antichristum; ait enim Dominus<sup>3)</sup>: „Praedicabitur hoc evangelium regni in universo orbe in testimonium omnibus gentibus, et tunc veniet consummatio;“ et Apostolus nos admonet, ne ab aliquo seducamur<sup>4)</sup>, „quasi instet dies Domini; quoniam, nisi venerit discessio primum, et revelatus fuerit homo peccati,“ iudicium non fiet.

*VIII. Quomodo fiet iudicium, quaque ratione de omnibus fereatur sententia.*

Quae autem iudicii forma et ratio futura sit, parochis ex Danielis oraculis, tum ex sanctorum Evangeliorum et Apostoli doctrina facile erit cognoscere. Praeterea sententia, quae a iudice pronuncianda sit, diligenter hoc loco expendenda

<sup>1)</sup> Io. 5, 26. seq. <sup>2)</sup> Act. 10, 42. <sup>3)</sup> Mat. 24, 14. <sup>4)</sup> II. Thess. 2, 3. seq.

erit. Christus enim Salvator noster, laetis oculis pios a dextera stantes intuens, ita de illis iudicium summa cum benignitate pronunciabit<sup>1)</sup>: „Venite benedicti Patris mei; possidete regnum,“ quod „paratum“ est „vobis a constitutione mundi.“ Quibus verbis nihil iucundius audiri posse illi intelligent, qui ea cum impiorum damnatione contulerint; ac cum animo suo cogitaverint, iis verbis pios et iustos homines a laboribus ad quietem, a lacrymarum valle ad summum gaudium, a miseriis ad perpetuam beatitudinem, quam illi caritatis officiis promeriti fuerint, vocari.

*IX. Quibus poenarum generibus impii a sinistris constituti afficiuntur.*

Deinde ad eos, qui a sinistra stabunt, conversus, suam iustitiam in eos effundet his verbis<sup>2)</sup>): „Discedite a me maledicti in ignem aeternum, qui paratus est diabolo et angelis eius.“ Prioribus enim illis verbis, „Discedite a me,“ maxima poena significatur, qua impii plectendi erunt, quum a Dei aspectu quam longissime eiicientur, neque ulla spes eos consolari poterit, fore aliquando, ut tanto bono perfruantur. Atque haec quidem a theologis poena damni appellata est, quod scilicet impii apud inferos divinae visionis luce perpetuo carituri sint. Quod vero additur: „Maledicti,“ mirum in modum auget illorum miseriam et calamitates. Si enim, quum a divina praesentia expellendi essent, aliqua saltem benedictione digni haberentur, hoc profecto magno eis solatio esse potuisse; at quoniam nihil eiusmodi ipsis exspectandum est, quod calamitatatem leviorum faciat: iure optimo, quum expellentur, divina iustitia eos omni maledictione persecutetur.

*X. De poena sensus, et societate damnatorum.*

Sequitur deinde: „in ignem aeternum;“ quod quidem alterum poenarum genus poenam sensus theologi vocarunt: propterea quod sensu corporis percipiatur, ut in verberibus et flagellis, aliove graviore suppliciorum genere, inter quae dubitari non potest ignis tormenta summum doloris sensum efficere. Cui malo quum accedat, ut perpetuum tempus duraturum sit, ex eo ostenditur, damnatorum poenam omnibus suppliciis cumulandam esse. Atque hoc magis declarant verba illa, quae in extrema sententiae parte posita sunt: „qui paratus est diabolo, et angelis eius.“ Quum enim ita comparatum sit, ut omnes molestias levius feramus, si calamitatibus nostrae socium aliquem et consortem habeamus, cuius prudentia atque huma-

<sup>1)</sup> Mat. 25, 34. <sup>2)</sup> Mat. 25, 41.

nitate aliqua ex parte iuvari possimus: quae tandem erit damnatorum miseria, quibus in tantis aerumnis a perditissimorum daemonum societate divelli nunquam licebit? Et haec quidem sententia in impios iustissime a Domino Salvatore nostro feretur, ut qui omnia verae pietatis opera neglexerint, et esurienti ac sitiensi nec cibum nec potum ministraverint, hospitem non exceperint, nudum non operuerint, aut in carcere inclusum aegrumque non visitarint.

*XI. Iudicii materia saepius fidelis populi auribus inculcari debet.*

Haec sunt, quae pastores fidelis populi auribus saepissime inculcare debent. Nam huius articuli veritas fide concepta maximam vim habet ad frenandas pravas animi cupiditates, atque a peccatis homines abstrahendos. Quare in Ecclesiastico (7, 40.) dictum est: „In omnibus operibus tuis memorare novissima tua, et in aeternum non peccabis.“ Ac profecto vix quisquam adeo praeceps in scelera feretur, quem illa cogitatio ad pietatis studium non revocet, fore aliquando, ut ei apud iustissimum iudicem, omnium non solum factorum dictorumque, sed occultissimarum etiam cogitationum ratio reddenda, et pro meritis poena persolvenda sit. Iustus vero ad colendum iustitiam magis ac magis incitetur, ac summa laetitia efferatur necesse est, quamvis etiam in egestate, infamia, cruciatibus vitam degat, quum animum ad eum diem refert, quo post aerumnosae huius vitae certamina victor universis hominibus audientibus declarabitur; et divinis, atque illis quidem aeternis honoribus, in coelestem patriam receptus, afficietur. Quod igitur reliquum est, hortari fideles oportet, ut optime vivendi rationem comparent, ad omne pietatis studium se exerceant, quo possint adventantem magnum illum diem Domini maiore cum securitate animi exspectare, atque adeo, ut filios decet, cum summa cupiditate expetere.

## CAPUT IX.

### De octavo Articulo.

Credo in Spiritum sanctum.

*I. Quanta sit fidei in Spiritum sanctum necessitas et fructus.*

Hactenus, quae ad primam et secundam sanctae Trinitatis personam pertinebant, quantum propositi argumenti ratio

postulare videbatur, exposita sunt: sequitur nunc, ut illa etiam, quae in symbolo de tertia persona, hoc est de Spiritu sancto, traduntur, explicitur. Quia in re declaranda omne studium et diligentiam pastores adhibebunt, quum homini Christiano non magis liceat hanc partem ignorare, vel de ea minus recte sentire, quam de aliis superioribus articulis existimandum sit. Quare Apostolus non permisit Ephesios quosdam Spiritus sancti personam ignorare; a quibus quum quaesisset<sup>1)</sup>, „an Spiritum sanctum accepissent,“ quum illi, „ne si Spiritus sanctus quidem esset, se scire“ respondissent, statim rogavit: „In quo ergo baptizati estis?“ Quibus verbis significavit distinctam huius articuli notitiam fidelibus maxime necessariam esse; ex qua eum praecipue fructum capiunt, quod quum attente cogitant, se quidquid habent Spiritus sancti munere et beneficio consecutos esse, tum vero de se ipsis modestius et humilius sentire, et in Dei praesidio omnem spem ponere incipiunt, qui primus homini Christiano gradus ad summam sapientiam et felicitatem esse debet.

*II. Spiritus sancti verbum non ita tertiae personae Trinitatis convenit, ut etiam aliis tribui non possit.*

Huius igitur articuli explanationem a vi et notione, quae hoc loco Spiritus sancti vocabulo subiecta est, exordiri oportebit; nam quum illud aequa de Patre et Filio rectissime dicitur, (uterque enim spiritus est, et sanctus, si quidem Deum spiritum esse confitemur), deinde vero hac voce angeli etiam, et piorum animae significantur: cavendum est, ne populus verbi ambiguitate in errorem inducatur. Quare docendum est, in hoc articulo Spiritus sancti nomine tertiam Trinitatis personam intelligi, quomodo in sacris literis, tum veteris non-nunquam, tum novi Testamenti frequenter accipitur; nam David precatur<sup>2)</sup>: „et Spiritum sanctum tuum ne auferas a me;“ in libro Sapientiae legimus<sup>3)</sup>: „Sensem tuum quis sciet, nisi tu dederis sapientiam, et miseris Spiritum sanctum tuum de altissimis?“ et alibi<sup>4)</sup>: „Ipse creavit illam in Spiritu sancto.“ In novo vero Testamento iubemur<sup>5)</sup> „baptizari in nomine Patris, et Filii et Spiritus sancti;“ et sanctissimam Virginem<sup>6)</sup> „de Spiritu sancto concepisse“ legimus; tum vero a sancto Ioanne<sup>7)</sup> ad Christum mittimur, „qui nos Spiritu sancto baptizat;“ ac plurimis praeterea aliis in locis ea vox legentibus occurrit.

---

<sup>1)</sup> Act. 19, 2. seq. <sup>2)</sup> Ps. 50, 13. <sup>3)</sup> Sap. 9, 17. <sup>4)</sup> Eccles. 1, 9. <sup>5)</sup> Mat. 28, 19.  
<sup>6)</sup> ib. 1, 18. 20. Luc. 1, 35. <sup>7)</sup> Io. 1, 33. Marc. 1, 18.

*III. Quare tertiae personae Trinitatis, perinde ac aliis duabus,  
proprium nomen non sit tributum.*

Verum nemo mirari debet, tertiae personae, quemadmodum primae et secundae, proprium nomen tributum non esse. Nam secunda persona ideo proprium nomen habet, et Filius dicitur, quia eius aeternus a Patre ortus proprie generatio vocatur, ut in superioribus articulis explicatum est. Ut igitur ortus ille generationis nomine significatur, ita personam, quae emanat, proprie Filium appellamus, et a qua emanat, Patrem. Nunc quum tertiae personae productioni proprium nomen impositum non sit, sed spiratio et processio appelletur: sequitur, ut etiam persona, quae producitur, suo nomine careat. Nullum autem proprium nomen eius emanatio habet, propterea quod nomina, quae Deo tribuuntur, a rebus creatis mutuari cogimur; in quibus quoniam nullam aliam naturae et essentiae communicandae rationem, quam generandi virtute agnoscimus: ob eam causam fit, ut rationem, qua se ipsum totum Deus vi amoris communicat, proprio vocabulo exprimere non possimus. Quare communi „Spiritus sancti“ nomine tertia persona appellata est, quod quidem illi maxime convenire ex eo intelligimus, quia spiritualem vitam in nos infundit, ac sine eius sanctissimi numinis afflatu nihil aeterna vita dignum efficiere possumus.

*IV. Spiritus sanctus Deus est, eiusdem omnino cum Patre et  
Filio potentiae et naturae.*

Verum explicata vocabuli significatione docendus in primis erit populus, Spiritum sanctum aequa ac Patrem et Filium Deum esse, eidem aequali, aequa omnipotentem, aeternum, et infinitae perfectionis, summum bonum ac sapientissimum, eiusdemque cum Patre et Filio naturae. Quod quidem illius vocis „in,“ quum dicimus: „Credo in Spiritum sanctum,“ proprietas satis indicat, quae ad exprimendam fidei nostrae vim singulis Trinitatis personis apposita est. Atque id etiam aperta sacrarum literarum testimonia confirmant. Nam quum S. Petrus in Actis Apostolorum<sup>1)</sup> dixisset: „Anania, cur tentavit satanas cor tuum, mentiri te Spiritui sancto?“ mox inquit: „non es mentitus hominibus, sed Deo.“ Quem prius Spiritum sanctum appellaverat, eundem statim Deum vocat. Apostolus etiam ad Corinthios, quem Deum dixerat, Spiritum sanctum esse interpretatur: „Divisiones,“ inquit<sup>2)</sup>, „operacionum sunt: idem vero Deus, qui operatur omnia in omnibus:“

<sup>1)</sup> Act. 5, 3. 4. <sup>2)</sup> 1. Cor. 12, 6. 11.

deinde subiungit: „Haec autem omnia operatur unus atque idem Spiritus, dividens singulis prout vult.“ Praeterea in Actis Apostolorum, quod uni Deo prophetae tribuunt, ille Spiritui sancto adscribit. Dixerat enim Isaias<sup>1)</sup>: „Audivi vocem Domini dicentis: „Quem mittam? et dixit mihi: Wade, et dices populo huic: Excaeca cor populi huius, et aures eius aggrava, et oculos eius clade, ne forte videat oculis suis, et auribus suis audiat.“ Quae verba quum Apostolus citaret: „Bene,“ inquit<sup>2)</sup>), Spiritus sanctus locutus est per Isaiam prophetam.“ Deinde vero, quum Scriptura Spiritus sancti personam cum Patre et Filio coniungit, ut quum Patris, et Filii et Spiritus sancti nomen in baptismo adhiberi praecipit, nullus nobis de huius mysterii veritate dubitandi locus relinquitur. Nam si Pater Deus est, et Filius Deus, omnino fateri cogimur, etiam Spiritum sanctum, qui cum eis pari honoris gradu coniungitur, Deum esse. Accedit autem, quod is, qui in nomine cuiusvis rei creatae baptizatur, nullum ex eo fructum consequi potest. „Numquid in nomine Pauli,“ inquit<sup>3)</sup>, „baptizati estis?“ ut ostenderet, hoc eis nihil ad comparandam salutem profuturum esse. Quum igitur baptizemur in nomine Spiritus sancti, eum esse Deum fateri oportet. Sed hunc eundem trium personarum ordinem, quo Spiritus sancti divinitas comprobatur, licet animadvertere tum in epistola Ioannis<sup>4)</sup>: „Tres sunt, qui testimonium dant in coelo, Pater, Verbum et Spiritus sanctus, et hi tres unum sunt;“ tum ex praeclaro illo sanctae Trinitatis elogio, quo divinae laudes et psalmi concluduntur: „Gloria Patri, et Filio et Spiritui sancto.“ Postremo, quod ad eam veritatem confirmandam maxime pertinet, quaecunque Dei propria esse credimus, ea Spiritui sancto convenire sacrae literae testantur. Quare illi templorum honorem tribuunt, ut quum Apostolus ait<sup>5)</sup>: „An nescitis, quoniam membra vestra templum sunt Spiritus sancti?“ item „sanctificationem<sup>6)</sup> et vivificationem<sup>7)</sup>, et scrutari<sup>8)</sup> profunda Dei, et per Prophetas<sup>9)</sup> loqui, et ubique<sup>10)</sup> esse,“ quae omnia divino tantum numini tribuenda sunt.

*V. Certo credendum est, Spiritus sancti vocabulum tertiam divinitatis personam per se subsistentem significare.*

Sed illud praeterea fidelibus accurate explanandum est, Spiritum sanctum ita Deum esse, ut eum tertiam personam, in divina natura a Patre et Filio distinctam, et voluntate productam confiteri oporteat; nam ut alia Scripturarum testimo-

<sup>1)</sup> Is. 6, 8—10. <sup>2)</sup> Act. 28, 25. <sup>3)</sup> I. Cor. 1, 13. <sup>4)</sup> I. Io. 5, 7. <sup>5)</sup> I. Cor. 6, 19. <sup>6)</sup> I. Petr. 1, 2. <sup>7)</sup> Io. 6, 64. <sup>8)</sup> I. Cor. 2, 10. <sup>9)</sup> II. Petr. 1, 21. <sup>10)</sup> Ps. 138, 7.

nia omittantur, baptismi forma, quam Salvator noster docuit, apertissime ostendit, „Spiritum sanctum tertiam esse personam, quae in divina natura per se constet, et ab aliis distincta sit.“ Quod etiam Apostoli verba declarant, quum inquit<sup>1)</sup>: „Gratia Domini nostri Iesu Christi, et caritas Dei, et communicatio sancti Spiritus sit cum omnibus vobis, Amen.“ Idem vero multo apertius demonstrant, quae patres in Constantinopolitano primo Concilio hoc loco ad confutandam impian Macedonii amentiam addiderrunt: „Et in Spiritum sanctum, Dominum, et vivificantem, qui ex Patre Filioque procedit; qui cum Patre et Filio simul adoratur et conglorificatur; qui locutus est per Prophetas.“ Quod igitur Spiritum sanctum Dominum confitentur, in eo declarant, quantum Angelis antecellat, qui tamen nobilissimi spiritus a Deo conditi sunt. Illos enim omnes S. Paulus testatur esse<sup>2)</sup> „administratorios spiritus, in ministerium missos, propter eos, qui hereditatem capiunt salutis.“ Vivificantem vero appellant, quod anima cum Deo coniuncta magis vivit, quam corpus animae coniunctione alitur ac sustinetur. Quoniam vero Spiritui sancto sacrae literae hanc animae cum Deo coniunctionem tribuunt, rectissime vivificantem Spiritum sanctum vocari perspicuum est.

*VI. Spiritum sanctum a Patre et Filio tanquam ab uno principio procedere declarant.*

Iam vero quod sequitur: „Qui ex Patre Filioque procedit,“ docendi sunt fideles, Spiritum sanctum a Patre et Filio tanquam ab uno principio aeterna processione procedere. Id enim ecclesiastica regula, a qua Christiano non licet aberrare, credendum nobis proponit, et divinarum literarum et conciliorum auctoritate confirmatur. Nam Christus Dominus, quum de Spiritu sancto loqueretur, dixit<sup>3)</sup>: „Ille me clarificabit, quia de meo accipiet.“ Hoc idem ex eo colligitur, quod in Scripturis sacris Spiritus sanctus nonnunquam Spiritus Christi, interdum Spiritus Patris appellatur; modo a Patre, modo a Filio mitti dicitur, ut aequa a Patre et Filio procedere, non obscure significetur. „Qui Spiritum Christi non habet,“ inquit St. Paulus<sup>4)</sup>, „hic non est eius;“ et idem Spiritum Christi vocat, quum ad Galatas inquit<sup>5)</sup>: „Misit Deus Spiritum Filii sui in corda vestra, clamantem Abba, Pater.“ Apud sanctum Matthaeum<sup>6)</sup> Spiritus Patris appellatur: „Non vos estis, qui loquimini, sed Spiritus Patris vestri;“ et Dominus in coena inquit<sup>7)</sup>: „Paracletus, quem ego mittam vobis, Spiritum ve-

<sup>1)</sup> II. Cor. 13, 13. <sup>2)</sup> Hebr. 1, 14. <sup>3)</sup> Io. 16, 14. <sup>4)</sup> Rom. 8, 9. <sup>5)</sup> Gal. 4, 6.  
<sup>6)</sup> Mat. 10, 20. <sup>7)</sup> Io. 15, 26.

ritatis, qui a Patre procedit, ille testimonium perhibebit de me.“ Tum alibi eundem Spiritum sanctum a Patre mittendum affirmat his verbis<sup>1)</sup>: „Quem mittet Pater in nomine meo.“ Ex quibus verbis quum processionem Spiritus sancti intelligamus, perspicuum est, eundem ab utroque procedere. Haec sunt, quae de Spiritus sancti persona tradenda erunt.

*VII. Quum opera Trinitatis sint indivisa, quare peculiariter quidam effectus et dona Spiritui S. tribuantur.*

Docere praeterea oportebit, quosdam esse Spiritus sancti admirabiles effectus, et amplissima quaedam munera, quae ab ipso tanquam a perenni bonitatis fonte oriri et manare dicuntur. Quamvis enim sanctissimae Trinitatis opera, quae extrinsecus fiunt, tribus personis communia sint: ex iis tamen multa Spiritui sancto propria tribuuntur, ut intelligamus, illa in nos a Dei immensa caritate proficiisci; nam quum Spiritus sanctus a divina voluntate veluti amore inflammata procedat: perspici potest, eos effectus, qui proprie ad Spiritum sanctum referuntur, a summo erga nos Dei amore oriri. Quare ex eo consequitur, ut Spiritus sanctus donum appelletur; nam doni vocabulo significatur id, quod benigne et gratuito, nulla spe remunerationis proposita, donatur. Ac proinde quaecunque bona et beneficia a Deo in nos collata sunt, („quid autem habemus, quod a Deo,“ ut inquit Apostolus<sup>2</sup>), „non acceperimus?“) ea nobis Spiritus sancti concessu et munere data esse, pio et grato animo agnoscere debemus.

*VIII. Qui qualesve, et quanti sint Spiritus S. effectus.*

Eius autem plures effectus sunt; nam, ut mundi creationem creatarumque rerum propagationem et gubernationem omittamus, de quibus in primo articulo commemoravimus, vivificationem Spiritui sancto proprie tribui, paulo ante demonstratum est, et Ezechielis testimonio confirmatur: „Dabo,“ inquit<sup>3)</sup>, „vobis Spiritum et vivetis.“ Praecipios tamen et maxime proprios Spiritus sancti effectus Prophetam enumerat<sup>4)</sup>: „Spiritum sapientiac et intellectus, spiritum consilii et fortitudinis, spiritum scientiae et pietatis, et spiritum timoris Domini;“ quae dona Spiritus sancti vocantur, interdum autem Spiritus sancti nomen eis tribuitur. Quare sapienter divus Augustinus monet<sup>5</sup>), animadvertisendum esse, quum in sacris literis huius vocis Spiritus sancti mentio fit, ut dijudicare possumus, tertiamne Trinitatis personam, an eius effectus atque

<sup>1)</sup> Io. 14, 26. <sup>2)</sup> I. Cor. 4, 7. <sup>3)</sup> Ez. 37, 6. <sup>4)</sup> Is. 11, 2. 3. <sup>5)</sup> de Trinitat. 15. 6. 18. 19.

operationes significet; nam haec duo eodem intervallo distinguenda sunt, quo etiam creatorem a rebus creatis differre credimus. Atque haec eo diligentius explicanda sunt, quod ex hisce Spiritus sancti donis Christianae vitae praecepta haurimus, sentireque possumus, an Spiritus sanctus in nobis sit. Verum prae ceteris eius amplissimis muneribus gratia illa praedicanda est, quae nos iustos facit, signatque<sup>1)</sup> „Spiritu promissionis sancto, qui est pignus hereditatis nostrae.“ Haec enim mentem nostram arctissimo amoris vinculo Deo iungit, ex quo fit, ut summo pietatis studio accensi, novam vitam instituamus, ac „naturae<sup>2)</sup>“ divinae participes effecti, filii<sup>3)</sup> Dei nominemur et vere simus.“

## CAPUT X.

### De nono Articulo.

Credo sanctam Ecclesiam Catholicam, Sanctorum communionem.

#### *I. Quibus de causis nonus articulus omnium frequentissime populo inculcandus sit.*

Quanta diligentia curare pastores debeant, ut huius noni articuli veritatem fidelibus explicent, si duo potissimum considerantur, facile cognosci poterit. Primum enim, teste S. Augustino<sup>4)</sup>, Prophetae planius et apertius de ecclesia, quam de Christo locuti sunt, quum in eo multo plures errare ac decipi posse, quam in incarnationis Sacramento, praeviderent. Neque enim defuturi erant impii, qui ad simiae imitationem, quae se hominem esse fingit, solos se catholicos esse profiterentur, et catholicam ecclesiam apud se tantum non minus nefarie quam superbe affirmarent. Deinde si quis hanc veritatem firmo animo conceptam habuerit, facile horrendum haeresis periculum effugiet. Non enim, ut quisque primum in fide peccarit, haereticus dicendus est; sed qui ecclesiae auctoritate neglecta impias opiniones pertinaci animo tuetur. Quum igitur fieri non possit, ut aliquis se haeresis peste commaculet, si iis fidem adhibeat, quae in hoc articulo credenda proponantur: curent omni studio pastores, ut fideles, cognito hoc mysterio, contra adversarii artes muniti in fidei veritate perseverent. Pendet autem hic articulus a superiori, quia, quum iam demonstratum sit, Spiritum sanctum omnis sancti-

<sup>1)</sup> Eph. 1, 13. 14. <sup>2)</sup> II. Petr. 1, 4. <sup>3)</sup> I. Io. 3, 1. <sup>4)</sup> in Ps. 30.

tatis fontem et largitorem esse, nunc ab eodem ecclesiam sanctitate donatam confitemur.

*II. Quid peculiari ratione nomine ecclesiae, quidque generatim denotetur.*

Ac quoniam ecclesiae vocem Latini a Graecis mutuatis post divulgatum evangelium ad res sacras transtulerunt: quam vim habeat hoc vocabulum, aperiendum est. Significat autem ecclesia evocationem; verum scriptores postea usurparunt pro concilio et concione. Neque vero refert, utrum populus ille veri Dei, an falsae religionis cultor exstiterit; in Actis enim de Ephesino populo scriptum est, cum scriba turbas sedasset, dixisse<sup>1)</sup>: „Si quid autem alterius rei quaeritis, in legitima ecclesia poterit absolviri.“ Legitimam vocat ecclesiam populum Ephesinum, Dianaee cultui addictum. Neque solum gentes, quae Deum non noverunt, sed etiam malorum et impiorum hominum concilia interdum ecclesia nominantur. „Odivi,“ inquit Propheta<sup>2)</sup>, „ecclesiam malignantium, et cum impiis non sedebo.“ Communi vero deinde sacrarum Scripturarum consuetudine haec vox ad rempublicam Christianam, fideliumque tantum congregations significandas usurpata est; qui scilicet ad lucem veritatis et Dei notitiam per fidem vocati sunt, ut, reiectis ignorantiae et errorum tenebris, Deum verum et vivum pie et sancte colant, illique ex toto corde inserviant; atque, ut unico verbo haec res tota absolvatur, „Ecclesia,“ ut ait S. Augustinus<sup>3)</sup>, „est populus fidelis per universum orbem dispersus.“

*III. Quae potissimum mysteria in vocabulo ecclesiae contemplanda offerantur.*

Nec vero levia mysteria in hoc vocabulo continentur. Etenim in evocatione, quam ecclesia significat, statim divinae gratiae benignitas et splendor elucet, intelligimusque ecclesiam ab aliis rebus publicis maxime differre. Illae enim humana ratione et prudentia nituntur, haec autem Dei sapientia et consilio constituta est. Vocavit enim nos intimo quidem Spiritus sancti afflatus, qui corda hominum aperit, extrinsecus autem pastorum et praedicatorum opera ac ministerio. Praeterea ex hac vocatione quis nobis finis propositus esse debeat, nimirum aeternarum rerum cognitio et possessio, is optime perspiciet, qui animadverterit, cur olim fidelis populus sub lege positus „synagoga,“ id est congregatio, diceretur. Nam, ut docet sanctus Augustinus<sup>4)</sup>, hoc ei nomen impositum est, quia

<sup>1)</sup> Act. 19, 39. <sup>2)</sup> Ps. 25, 5. <sup>3)</sup> in Ps. 149. <sup>4)</sup> in Ps. 77 et 81.

pecudum more, quibus magis congregari convenit, terrena et caduca tantum bona spectaret. Quare merito Christianus populus non synagoga, sed ecclesia dicitur, quia terrenis et mortalibus rebus contemptis coelestes et aeternas tantummodo consecatur.

*IV. Quibus nominibus Christianorum universitas in sacris literis descripta inveniatur.*

Multa praeterea nomina, quae plena sunt mysteriis, ad Christianam rem publicam significandam traducta sunt; nam et domus et aedificium Dei ab Apostolo vocatur. „Si tardavero“ inquit ad Timotheum<sup>1)</sup>), „ut scias, quo modo oporteat te in domo Dei conversari, quae est ecclesia Dei vivi, columna et firmamentum veritatis.“ Domus autem ecclesia idcirco appellatur, quia sit veluti una familia, quam unus pater familias moderatur, et in qua est bonorum omnium spiritualium communio. Dicitur etiam grec<sup>2)</sup> ovium Christi, quarum ille ostium est et pastor. Vocabatur sponsa Christi: „Despondi vos uni viro virginem castam exhibere Christo,“ inquit Apostolus ad Corinthios<sup>3)</sup>). Idem ad Ephesios<sup>4)</sup>: „Viri, diligitе uxores vestras, sicut et Christus dilexit ecclesiam.“ Ac de matrimonio: „Sacramentum hoc,“ inquit<sup>5)</sup>), „magnum est; ego autem dico in Christo et in ecclesia.“ Dicitur denique ecclesia, „corpus Christi,“ ut ad Ephesios<sup>6)</sup> et Colossenses<sup>7)</sup> licet videre. Et haec singula plurimum valent ad fideles excitandos, ut se dignos immensa Dei clementia et bonitate praebeant, qui eos, ut populus Dei esset, elegit.

*V. Duae praecipue ecclesiae partes recensentur, triumphans una, militans altera.*

His vero explicatis, necesse erit, singulas ecclesiae partes enumerare, earumque differentias docere, quo magis Deo dilectae ecclesiae naturam, proprietates, dona et gratias populus percipiat, et ob eam causam sanctissimum Dei nomen laudare nunquam intermittat. Ecclesiae autem duae potissimum sunt partes, quarum altera triumphans, altera militans vocatur. Triumphans est coetus ille clarissimus et felicissimus beatorum spirituum, et eorum, qui de mundo, de carne, de iniquissimo daemone triumpharunt, et ab huius vitae molestiis liberi ac tuti aeterna beatitudine fruuntur. Militans vero ecclesia est coetus omnium fidelium, qui adhuc in terris vivunt; quae ideo militans vocatur, quod illis cum immanissimis hostibus, mundo, carne, satana, perpetuum sit bellum.

<sup>1)</sup> 1. Tim. 3, 15. <sup>2)</sup> Io. 10, 1. <sup>3)</sup> II. Cor. 11, 2. <sup>4)</sup> Eph. 5, 25. <sup>5)</sup> ibid. 1, 32.  
<sup>6)</sup> Eph. 1, 23. <sup>7)</sup> Col. 1, 18, 24.

*VI. Ecclesia militans et triumphans una est.*

Neque idcirco tamen duas esse ecclesias censendum est; sed eiusdem ecclesiae, ut antea diximus, partes duae sunt, quarum una antecessit, et coelesti patria iam potitur, altera in dies sequitur, donec aliquando cum Salvatore nostro coniuncta in sempiterna felicitate conquiescat.

*VII. In ecclesia militanti duo hominum genera, boni scient et mali.*

Iam in ecclesia militanti duo sunt hominum genera bonorum et improborum; et improbi quidem, eorundem sacramentorum participes, eandem quoque quam boni fidem profitentur, vita ac moribus dissimiles; boni vero in ecclesia dicuntur ii, qui non solum fidei professione et communione sacramentorum, sed etiam spiritu gratiae et caritatis vinculo inter se coniuncti et colligati sunt, de quibus dicitur<sup>1)</sup>: „Cognovit Dominus, qui sunt eius.“ Possunt vero etiam homines aliquibus coniecturis opinari, quinam sint, qui ad hunc piorum hominum numerum pertineant, certo autem scire minime possunt. Quare existimandum non est, Christum Salvatorem de hac ecclesiae parte locutum esse, quum ad ecclesiam nos remisit<sup>2)</sup>, eique ut pareamus praecepit. Nam quum illa sit incognita, cui certum esse poterit, ad cuius iudicium confundendum, et cuius auctoritati obtemperandum sit? Bonos igitur et improbos ecclesia complectitur, quemadmodum et divinae literae et sanctorum virorum scripta testantur. In quam sententiam scriptum est illud Apostoli<sup>3)</sup>: „Unum corpus, et unus spiritus.“

*VIII. Ecclesia visibilis est, et bonos et malos suo sinu concludit.*

Haec autem ecclesia nota est, urbique supra montem siuae comparata, quae undique conspicitur; nam cum illi ab omnibus parendum sit, cognoscatur necesse est. Neque bonos tantum, sed malos etiam complectitur, ut multis parabolis Evangelium docet; veluti quum regnum coelorum, id est militantem ecclesiam, „simile<sup>4)</sup> esse sagenae in mare missae“ commemorat; vel „agro<sup>5)</sup>, in quo zizania superseminata sunt:“ vel „areae<sup>6)</sup>, in qua frumentum cum paleis continetur;“ vel<sup>7)</sup> „decem virginibus, partim fatuis, partim prudentibus.“ Sed multo ante etiam „in<sup>8)</sup> arca Noe,“ qua non solum „munda,“ sed etiam „immunda animantia“ concludebantur, huius ecclesiae figuram et similitudinem licet intueri. Quamvis autem

<sup>1)</sup> II. Tim. 2, 19. <sup>2)</sup> Mat. 18, 17. <sup>3)</sup> Eph. 4, 4. <sup>4)</sup> Mat. 13, 47. <sup>5)</sup> ib. 24. <sup>6)</sup> Mat. 8, 12. <sup>7)</sup> Ib. 25, 1. <sup>8)</sup> Gen. 7, 1.

bonos et malos ad ecclesiam pertinere, catholica fides vere et constanter affirmet: ex iisdem tamen fidei regulis fidelibus explicandum est, utriusque partis diversam admodum rationem esse. Ut enim paleae cum frumento in area confusae sunt, vel interdum membra varie intermortua corpori coniuncta: ita etiam mali in ecclesia continentur.

*IX. Quinam ecclesiae militantis finibus non contineantur.*

Ex quo fit, ut tria tantummodo hominum genera ab ea excludantur: primo infideles, deinde haeretici et schismatici, postremo excommunicati. Ethnici quidem, quod in ecclesia nunquam fuerunt, neque eam unquam cognoverunt, nec ullius sacramenti participes in populi Christiani societate facti sunt; haeretici vero atque schismatici, quia ab ecclesia desciverunt. Neque enim illi magis ad ecclesiam spectant, quam transfugae ad exercitum pertineant, a quo defecerunt. Non negandum tamen, quin in ecclesiae potestate sint, ut qui ab ea in iudicium vocentur, puniantur et anathemate damnentur. Postremo etiam excommunicati, quod, ecclesiae iudicio ab ea exclusi, ad illius communionem non pertineant, donec resipiscant. De ceteris autem, quamvis improbis et sceleratis hominibus, adhuc eos in ecclesia perseverare dubitandum non est; idque fidelibus tradendum assidue, ut, si forte ecclesiae antistitum vita flagitiosa sit, eos tamen in ecclesia esse, nec propterea quidquam de eorum potestate detrahi, certo sibi persuadeant.

*X. Nominis ecclesiae significationum varietas.*

Verum universae etiam ecclesiae partes ecclesiae nomine significari solent, ut quum Apostolus „ecclesiam, quae est Corinthi, Galatiae, Laodicensium, Thessalonicensium“ nominat; privatas etiam fidelium familias „ecclesias“ vocat; nam „Priscae<sup>1)</sup>“ et Aquilae domesticam ecclesiam salutari iubet; „item alio in loco<sup>2)</sup>: „Salutant vos,“ inquit, „in Domino multum Aquila et Priscilla cum domestica sua ecclesia.“ Ad Philemonem<sup>3)</sup> etiam scribens eandem vocem usurpavit. Interdum quoque ecclesiae nomine eius praesides ac pastores significantur. „Si te non audierit,“ inquit Christus<sup>4)</sup>, „dic ecclesiae,“ quo in loco praepositi ecclesiae designantur. Sed locus etiam, in quem populus sive ad concionem sive alicuius rei sacrae causa convenit, ecclesia appellatur.<sup>5)</sup> Praecipue vero in hoc articulo ecclesia bonorum simul et malorum multitudinem, nec praesides solum, sed eos etiam, qui parere debent, significat.

<sup>1)</sup> Rom. 16, 3. 5. <sup>2)</sup> 1. Cor. 16, 19. <sup>3)</sup> Phil. 1, 2. <sup>4)</sup> Mat. 18, 17. <sup>5)</sup> 1. Cor. 11, 18. 22.

*XI. De notis verae ecclesiae, et primo, cur una dicatur.*

Aperiendae autem sunt fidelibus huius ecclesiae proprietates, ex quibus licebit agnoscere, quanto beneficio a Deo affecti sint, quibus contigerit in ea nasci atque educari. Prima igitur proprietas in symbolo Patrum describitur, ut una sit. „Una“ enim, inquit<sup>1)</sup>, „est columba mea,“ una est „speciosa mea.“ Vocatur autem una tanta hominum multitudo, quae tamen longe lateque diffusa est, ob eas causas, quae ab Apostolo ad Ephesios<sup>2)</sup> scriptae sunt: „Unum“ enim „Dominum, unam fidem, unum baptismum“ tantum esse praedicat. Unus est etiam eius rector ac gubernator, invisibilis quidem Christus, quem aeternus Pater dedit „caput<sup>3)</sup>“ super omnem ecclesiam, quae est corpus eius.“ Visibilis autem is, qui Romanam cathedram Petri Apostolorum principis legitimus successor tenet.

*XII. Quid de Romano Pontifice, visibili ecclesiae Christi capite, sentiendum sit.*

De quo fuit illa omnium Patrum ratio et sententia consentiens, hoc visibile caput ad unitatem ecclesiae constituantem et conservandam necessarium fuisse. Quod praecclare et vidit et scripsit sanctus Hieronymus, et contra Iovinianum<sup>4)</sup> iis verbis: „Unus eligitur, ut, capite constituto, schismatis tollatur occasio;“ et ad Damasum<sup>5)</sup>: „Facessat invidia, Romani culminis recedat ambitio; cum successore piscatoris et discipulo crucis loquor. Ego nullum primum, nisi Christum, sequens, beatitudini tuae, id est cathedralae Petri, communione consocior; super illam petram aedificatam ecclesiam scio. Quicunque extra hanc domum agnum comederit, profanus est. Si quis in arca Noë non fuerit, peribit regnante diluvio.“ Quod et longe antea ab Irenaeo<sup>6)</sup> probatur, et Cypriano<sup>7)</sup>, qui de unitate ecclesiae loquens ait: „Loquitur Dominus ad Petrum<sup>8)</sup>: „Ego, Petre, dico tibi, quia tu es Petrus, et super hanc petram aedificabo ecclesiam meam.“ Super unum aedificat ecclesiam, et quamvis Apostolis omnibus post resurrectionem suam parem potestatem tribuat et dicat<sup>9)</sup>: „Sicut misit me Pater, et ego mitto vos; accipite Spiritum sanctum:“ tamen, ut unitatem manifestaret, unitatis eiusdem originem ab uno incipientem, auctoritate sua disposuit etc.“ Optatus deinde Milevitanus ait<sup>10)</sup>: „Ignorantia tibi adscribi non potest, scienti in urbe Roma Petro primo cathedralm episcopalem esse collatam, in qua sederit omnium Apostolorum caput,

<sup>1)</sup> Cant. 6, 8. <sup>2)</sup> Eph. 4, 5. <sup>3)</sup> Eph. 1, 22. <sup>4)</sup> I, 26. <sup>5)</sup> ep. 15. <sup>6)</sup> adv. haer. 8, 3. <sup>7)</sup> ib. 8, 2. <sup>8)</sup> Mat. 16, 18. <sup>9)</sup> Io. 20, 21. <sup>10)</sup> de schism. Don. 2, 2.

Petrus; in quo uno cathedrae unitas ab omnibus servaretur, ne ceteri Apostoli singulas sibi quisque defenserent; ut iam schismaticus et praevericator esset, qui contra singularem cathedralm alteram collocaret.“ Post vero Basilius sic scriptum reliquit<sup>1)</sup>: „Petrus collocatus est in fundamento; dixit enim<sup>2)</sup>: „Tu es Christus, filius Dei vivi,“ et vicissim audivit, se esse petram; licet enim petra esset, non tamen petra erat ut Christus. Nam Christus vere immobilis petra, Petrus vero propter petram. Dignitates enim suas Iesus largitur aliis: „sacerdos est, et facit sacerdotes; petra est, et petram facit; et quae sua sunt, largitur servis suis.“ Postremo vero sanctus Ambrosius ait: „Quia solus profitetur ex omnibus, omnibus antefertur.

*XIII. Quomodo praeter Christum ecclesia uno capite visibili indigeat.*

Si quis obiciat, ecclesiam uno capite et sponso Iesu Christo contentam, praeterea nullum requirere: in promptu responsio est. Ut enim Christum Dominum singulorum sacramentorum non solum auctorem, sed intimum etiam praebitorem habemus, (nam ipse est, qui baptizat et qui absolvit, et tamen is homines sacramentorum externos ministros instituit); sic ecclesiae, quam ipse intimo Spiritu regit, hominem suae potestatis vicarium et ministrum praefecit. Nam quum visibilis ecclesia visibili capite egeat, ita Salvator noster Petrum universi fidelium generis caput et pastorem constituit, quum illi oves suas pascendas verbis amplissimis commendavit, ut, qui ei successisset, eandem plane totius ecclesiae regendae et gubernandae potestatem habere voluerit.

*XIV. Cur ecclesia una dicatur, alias rationes subiungit.*

„Unus“ praeterea „idemque est Spiritus,“ inquit Apostolus<sup>3)</sup> ad Corinthios, qui fidelibus gratiam, perinde atque anima corporeis membris vitam, impertitur. Ad quam unitatem servandam quum Ephesios hortaretur, inquit<sup>4)</sup>: „Solliciti servare unitatem spiritus in vinculo pacis, unum corpus et unus spiritus.“ Quemadmodum enim humanum corpus multis constat membris, eaque ab una anima aluntur, quae oculis visum, auribus auditum, et aliis sensibus diversas vires subministrat: ita corpus Christi mysticum, quod est ecclesia, ex multis fidelibus compositum est. „Una“ quoque „est spes<sup>5)</sup>,“ ut in eodem loco idem Apostolus testatur, „ad quam vocati sumus;“

<sup>1)</sup> Homil. 29. de Poenitent. <sup>2)</sup> Mat. 16, 16. <sup>3)</sup> I. Cor. 12, 11. <sup>4)</sup> Eph. 4, 3.  
<sup>5)</sup> ib. 4. I. Cor. 9, 10.

siquidem omnes eandem rem, nempe aeternam et beatam vitam, speramus. Una est denique fides, quae omnibus tenenda est ac prae se ferenda. „Non sint,“ inquit Apostolus<sup>1)</sup>, „in vobis schismata.“ Atque unum baptisma, quod quidem est Christianae fidei sacramentum.

*XV. De secunda nota ecclesiae, qua dicitur sancta.*

Altera proprietas ecclesiae est, ut sit sancta; quod a principe Apostolorum accepimus eo loco<sup>2)</sup>: „Vos autem genus electum, gens sancta.“ Appellatur autem sancta, quod Deo consecrata dedicataque sit; sic enim cetera huiuscmodi, quanquam corporea sint, sancta vocari consueverunt, quum divino cultui addicta et dedicata sunt. Cuius generis sunt in lege veteri vasa, vestes et altaria; in qua primogeniti quoque, qui Deo altissimo dedicabantur, sancti sunt appellati. Nec mirum cuiquam videri debet, ecclesiam dici sanctam, tametsi multos peccatores continet. Sancti enim vocantur fideles, qui populus Dei effecti sunt, quive se fide et baptismate suscepto Christo consecrarunt, quanquam in multis offendunt, et quae polliciti sunt non praestant; quemadmodum etiam, qui artem aliquam profitentur, etsi artis pracepta non servent, nomen tamen artificum retinent. Quare D. Paulus<sup>3)</sup> Corinthios „sanctificatos et sanctos“ appellat, in quibus non nullos fuisse perspicuum est, quos ut carnales et gravioribus etiam nominibus acriter obiurgat. Sancta etiam dicenda est, quod veluti corpus cum sancto capite Christo Domino totius sanctitatis fonte coniungitur, a quo Spiritus sancti charismata et divinae bonitatis divitiae diffunduntur. Praeclare sanctus Augustinus<sup>4)</sup>, interpretans verba illa Prophetae: „Custodi animam meam, quoniam sanctus sum,“ „Audeat,“ inquit, „et corpus Christi, audeat et unus ille homo, clamans a finibus terrae, cum capite suo, et sub capite suo dicere: Sanctus sum; accepit enim gratiam sanctitatis, gratiam baptismi et remissionis peccatorum.“ Ac paulo post: „Si Christiani omnes, et fideles in Christo baptizati ipsum induerunt, sicut Apostolus dicit<sup>5)</sup>: „Quotquot in Christo baptizati estis, Christum induistis;“ si membra sunt facti corporis eius, et dicunt se sanctos non esse: capiti ipsi faciunt iniuriam, cuius membra sancta sunt.“ Accedit etiam, quod sola ecclesia legitimum sacrificii cultum et salutarem habet sacramentorum usum, per quae tanquam efficacia divinae gratiae instrumenta Deus veram sanctitatem efficit, ita ut quicunque vere sancti sunt, extra

<sup>1)</sup> I. Cor. 1, 10. <sup>2)</sup> I. Petr. 2, 9. <sup>3)</sup> I. Cor. 1, 2. <sup>4)</sup> in Ps. 85, 2. <sup>5)</sup> Gal. 3, 27.

hanc ecclesiam esse non possint. Patet igitur, ecclesiam esse sanctam, ac sanctam quidem, quoniam corpus est Christi, a quo sanctificatur, cuiusque sanguine abluitur.

*XVI. Qua ratione ecclesia Christi sit catholica.*

Tertia proprietas ecclesiae ea est, ut catholica, nempe universalis, vocetur; quae appellatio vere illi tributa est, quoniam, ut testatur sanctus Augustinus<sup>1)</sup>), „a solis ortu usque ad occasum unius fidei splendore diffunditur.“ Neque enim, ut in humanis rebus publicis aut haereticorum conventibus, unius tantum regni terminis, aut uno hominum genere ecclesia definita est; verum omnes homines, sive illi barbari sint sive Scythae, sive servi sive liberi, sive masculi sive feminae, caritatis sinu complectitur. Quare scriptum est<sup>2)</sup>: „Redemisti nos Deo in sanguine tuo, ex omni tribu, et lingua, et populo et natione, et fecisti nos Deo nostro regnum.“ De ecclesia dicit David<sup>3)</sup>: „Postula a me; et dabo tibi gentes hereditatem tuam, et possessionem tuam terminos terrae;“ item<sup>4)</sup>: „Memor ero Rahab et Babylonis scientium me;“ et: „homo natus est in ea.“ Praeterea omnes fideles, qui ab Adam in hunc usque diem fuerunt, quive futuri sunt, quamdiu mundus exstabit, veram fidem profitentes, ad eandem ecclesiam pertinent, quae „super<sup>5)</sup> fundamento Apostolorum“ fundata est, „ac Prophetarum,“ qui omnes, in illo „lapide angulari Christo,“ qui fecit utraque unum, et pacem<sup>6)</sup> iis, qui prope, et iis, qui longe, annunciat, constituti sunt et fundati. Universalis etiam ob eam causam dicitur, quod omnes, qui salutem aeternam consequi cupiunt, eam tenere et amplecti debeant, non secus ac qui<sup>7)</sup> „arcam, ne diluvio perirent, ingressi sunt.“ Haec igitur veluti certissima regula tradenda est, qua vera et falsa ecclesia iudicetur.

*XVII. Quo pacto ecclesia Christi etiam apostolica dicatur.*

Sed ex origine etiam, quam revelata gratia ab Apostolis dicit, ecclesiae veritatem agnoscimus; siquidem eius doctrina veritas est, non recens, neque nunc primum orta, sed ab Apostolis iam olim tradita, et in omnem orbem terrarum disseminata. Ex quo fit, ut nemo dubitare possit, impias haereticorum voces longe a verae ecclesiae fide abesse, quum doctrinae ecclesiae, quae ab Apostolis ad hanc fidem praedicata est, adversentur. Quare, ut omnes inteligerent, quaenam esset ecclesia catholica, Patres in symbolo illud divinitus addi-

<sup>1)</sup> Serm. 242. <sup>2)</sup> Col. 3, 11. Apoc. 5, 9. sq. <sup>3)</sup> Ps. 2, 8. <sup>4)</sup> Ps. 86, 4. 5. <sup>5)</sup> Ep. 2, 20. <sup>6)</sup> Ib. 14. 17. <sup>7)</sup> Gen. 7, 8.

derunt: „Apostolicam.“ Etenim Spiritus sanctus, qui ecclesiae praesidet, eam non per aliud genus ministrorum, quam per apostolicum gubernat, qui Spiritus primum quidem Apostolis tributus est, deinde vero summa Dei benignitate semper in ecclesia mansit.

*XVIII. Ecclesia in fidei aut morum dogmatibus errare non potest.*

Sed quemadmodum haec una ecclesia errare non potest in fidei ac morum disciplina tradenda, quum a Spiritu sancto gubernetur: ita ceteras omnes, quae sibi ecclesiae nomen arrogant, ut quae diaboli spiritu ducantur, in doctrinae et morum perniciosissimis erroribus versari necesse est.

*XIX. Quibus praecipue figuris Christi ecclesia in veteri Testamento adumbrata sit.*

Sed quoniam magnam vim habent figurae veteris Testamenti ad excitandos fidelium animos, revocandamque rerum pulcherrimarum memoriam, cuius rei potissimum causa Apostoli his usi sunt: illam quoque doctrinae partem, quae magnas utilitates habet, parochi non praetermittent. In his autem illustreret significacionem habet „Arca Noe,“ quae ob eam rem tantum „divino iussu constructa est,“ ut nullus dubitandi locus relinquatur, quin ecclesiam ipsam significet, quam Deus sic constituit, ut quicumque per baptismum illam ingredierentur, ab omni mortis aeternae periculo tuti esse possent; qui vero extra illam essent, quemadmodum iis evenit, qui in arcum recepti non sunt, suis sceleribus obruerentur. Alia figura est magna illa civitas Hierusalem, cuius nomine Scripturae saepius sanctam ecclesiam significant. Nimurum in illa sola offerre Deo sacrificia licebat, quia in sola etiam Dei ecclesia, neque extra eam usquam, verus cultus verumque sacrificium reperitur, quod Deo placere ullo modo possit.

*XX. Qua ratione credere Christi ecclesiam ad articulos fidei pertineat.*

Iam illud etiam extremo loco de ecclesia docendum erit, quanam ratione, nos credere ecclesiam, ad articulos fidei pertineat. Nam etsi quivis ratione et sensibus percipit, ecclesiam, id est hominum conventum, in terris esse, qui Christo Domino addicti et consecrati sunt, neque ad eam rem animo concipiendam fide opus esse videatur, quum nec Iudei, nec Turcae quidem de eo dubitent: tamen illa mysteria, quae in sancta Dei ecclesia contineri partim declaratum est, partim in sacramento ordinis explicabitur, mens fidei tantummodo illustrata, non ullis rationibus convicta, intelligere potest.

Quum igitur hic articulus, non minus quam ceteri, intelligentiae nostrae facultatem et vires superet: iure optimo confitemur, nos ecclesiae ortum, munera et dignitatem non humana ratione cognoscere, sed fidei oculis intueri.

*XXI. Quae, quot et quanta sint, quae in ecclesia esse credere iubentur.*

Neque enim homines huius ecclesiae auctores fuerunt, sed Deus ipse immortalis, qui eam super firmissimam petram aedificavit, teste Propheta<sup>1)</sup>: „Ipse fundavit eam Altissimus,“ quam ob causam hereditas Dei et Dei populus appellatur. Nec potestas, quam accepit, humana est, sed divino munere tributa. Quare, quemadmodum naturae viribus comparari non potest, ita etiam fide solum intelligimus, in ecclesia claves regni coelorum esse, eique potestatem peccata remittendi, excommunicandi, verumque Christi corpus consecrandi traditam; deinde cives, qui in ea morantur, „non<sup>2)</sup> habere hic civitatem permanentem, sed futuram inquirere.“ Unam igitur ecclesiam sanctam et catholicam esse, necessario credendum est.

*XXII. Non ut in Deum ita in ecclesiam credendum est.*

Tres enim Trinitatis personas, Patrem, et Filium, et Spiritum sanctum ita credimus, ut in eis fidem nostram colloceamus. Nunc autem mutata dicendi forma, sanctam, et non „in“ sanctam ecclesiam credere profitemur, ut hac etiam diversa loquendi ratione Deus omnium effector a creatis rebus distinguatur, praeclaraque illa omnia, quae in ecclesiam collata sunt, beneficia divinae bonitati accepta referamus.

*XXIII. De extrema huius articuli clausula: Sanctorum communionem.*

*Sanctorum communionem.*

Cum sanctus Ioannes Evangelista de divinis mysteriis ad fideles scriberet, cur eos in illis erudiret, hanc rationem attulit: „Ut et vos,“ inquit<sup>3)</sup>), „societatem habeatis nobiscum, et societas nostra sit cum Patre et cum Filio eius Iesu Christo.“ Haec societas in communione sanctorum sita est, de qua in hoc articulo sermo habetur. Utinam vero in eo explicando ecclesiarum praesides Pauli et aliorum Apostolorum diligentiam imitarentur. Est enim non solum quaedam superioris articuli interpretatio doctrinaque uberrimorum fructuum, sed etiam, quis usus mysteriorum esse debeat, quae symbolo continentur, declarat. Omnia enim eius rei causa pervesti-

<sup>1)</sup> Ps. 86, 5. <sup>2)</sup> Hebr. 13, 14. <sup>3)</sup> I. Io. 1, 3.

ganda sunt ac percipienda, ut in hanc tam amplam et beatam societatem sanctorum admittamus, admissique constantissime perseveremus<sup>1)</sup>), „cum gaudio gratias agentes Deo Patri, qui dignos nos fecit in partem sortis sanctorum in lumine.“

*XXIV. Explicatio huius particulae, et in quo consistat sanctorum communio.*

In primis igitur fideles docendi sunt, hunc articulum esse illius, qui de una sancta ecclesia catholica antea positus est, veluti explicationem quandam. Unitas enim Spiritus, a quo illa regitur, efficit, ut quidquid in eam collatum est commune sit. Omnia enim sacramentorum fructus ad universos fideles pertinet; quibus sacramentis veluti sacris vinculis Christo connectuntur et copulantur, et maxime omnium baptismo, quo tanquam ianua in ecclesiam ingrediuntur. Hac autem sanctorum communione sacramentorum communionem intelligi debere, Patres in symbolo significant illis verbis: „Confiteor unum baptismum.“ Baptismum vero, in primis eucharistia, et deinceps cetera sacramenta consequuntur; nam etsi hoc nomen omnibus sacramentis convenit, quem Deo nos coniungant, illiusque participes, cuius gratiam recipimus, efficiant: magis tamen proprium est eucharistiae, quae hanc efficit communionem.

*XXV. Participatio meritorum est in ecclesia.*

Sed alia etiam communio in ecclesia cogitanda est. Quaecunque enim pie sancteque ab uno suscipiuntur, ea ad omnes pertinent, et, ut illis prosint, caritate, quae<sup>2)</sup> non quaerit quae sua sunt, efficitur. Id vero cum S. Ambrosii testimonio comprobatur, qui locum illum Psalmi explanans<sup>3)</sup>: „Particeps ego sum omnium timentium te,“ ita inquit: „Sicut membrum particeps esse dicimus totius corporis, sic coniunctum omnibus timentibus Deum.“ Quare Christus eam nobis orandi formam praescripsit, ut diceremus, „Panem nostrum,“ non „meum,“ ac reliqua eius generis, non nobis tantum, sed omnium saluti et commodis prospicientes. At vero haec bonorum communicatio membrorum humani corporis aptissima similitudine in sacris literis<sup>4)</sup> saepe demonstratur. Nam in corpore multa sunt membra; sed etsi multa sunt, unum tamen corpus constituunt, in quo singula proprio, non autem omnia eodem munere funguntur. Nec vero omnia eandem dignitatem habent, aut aequae utiles et decoras functiones exsequuntur, nullique suum, sed totius corporis commodum atque utilitas proposita est. Omnia deinde tam apta inter se et connexa sunt, ut si

<sup>1)</sup> Col. 1, 11. seq. <sup>2)</sup> I. Cor. 13, 5. <sup>3)</sup> in Ps. 118. serm. 8. <sup>4)</sup> I. Cor. 12, 12. seq.

unum aliquod dolore afficitur, cetera item naturae cognitione et consensu doleant; si contra bene affectum est, communis sit omnibus ille iucunditatis sensus. Atque haec eadem in ecclesia licet contemplari, in qua etsi diversa sunt membra, nempe variae nationes, Iudeorum, gentium, liberi et servi, pauperes et divites, quum tamen baptismo initiantur, unum corpus cum Christo fiunt, cuius ille caput est.<sup>1)</sup> Unicuique praeterea in hac ecclesia suum munus assignatum est. Ut enim alii in ea Apostoli, alii doctores, omnes vero publicae utilitatis causa sunt constituti: ita aliorum est praeesse ac docere, aliorum item parere et subiectos esse.

*XXVI. Scelerati in ecclesia participatione bonorum spiritualium non gaudent.*

At vero tot tantisque muneribus ac bonis divinitus collatis illi fruuntur, qui in caritate vitam Christianam degunt, iustique et cari Deo sunt. Membra vero mortua, nimis homines sceleribus obstricti et a Dei gratia alienati, hoc quidem bono non privantur, ut huius corporis membra esse desinant: sed, quum sint mortua, fructum spiritualem, qui ad iustos et pios homines pervenit, non percipiunt. Tametsi, quum in ecclesia sint, ad amissam gratiam vitamque recuperandam ab iis adiuvantur, qui spiritu vivunt, et eos fructus capiunt, quorum expertes esse dubitari non potest, qui omnino ab ecclesia sunt praecisi.

*XXVII. Gratia gratis data, et cetera Dei dona toti ecclesiae sunt communia.*

Nec vero tantum communia sunt ea dona, quae homines caros Deo ac iustos reddunt; sed gratiae etiam gratis datae, in quibus numerantur scientia, prophetia, donum linguarum ac miraculorum, et cetera huius generis; quae dona malis etiam hominibus, non privatae, sed publicae utilitatis causa ad aedificandam ecclesiam conceduntur. Nam sanitatis gratia non illius, qui ea praeditus est, sed aegroti curandi causa tributa est. Ac nihil tandem a vere Christiano homine possidetur, quod sibi cum ceteris omnibus commune esse non existimare debeat; quare ad sublevandam indigentium miseriam prompti ac parati esse debent. Nam qui huiusmodi bonis ornatus est, si viderit fratrem suum egere, nec illi subvenerit, is Dei caritatem<sup>2)</sup> non habere plane convincitur. Quae quum ita se habeant, satis constat, eos, qui in hac sancta communione sunt, quadam felicitate perfrui, et vere illud dicere posse<sup>3)</sup>:

<sup>1)</sup> Rom. 12, 4. I. Cor. 12, 28. Eph. 4, 16. <sup>2)</sup> I. Io. 3, 17. <sup>3)</sup> Ps. 83, 2. 3. 5

„Quam dilecta tabernacula tua, Domine virtutum. Concupisit et deficit anima mea in atria Domini;“ et: „Beati qui habitant in domo tua, Domine.“

## C A P U T XI.

## De decimo Articulo.

## Remissionem peccatorum.

*I. Quomodo necessarium sit credere, remissionem peccatorum esse in ecclesia.*

Nemo est, qui, quum videat, hunc articulum de remissione peccatorum in ceteris fidei articulis numeratum esse, dubitare possit, eo non solum divinum aliquod mysterium, sed etiam ad salutem comparandam maxime necessarium contineri; nam antea declaratum est, sine certa eorum fide, quae in symbolo credenda proponuntur, nemini ad Christianam pie-tatem aditum patere. Verum si id, quod per se omnibus notum esse debet, aliquo etiam testimonio confirmandum videatur, satis illud erit, quod Salvator noster paulo ante ascensem in coelum de ea re testatus est, quum discipulis sensum aperuit, ut intelligerent scripturas<sup>1)</sup>: „Oportebat,“ inquit, „Christum pati, et resurgere a mortuis tertia die, et praedicari in nomine eius poenitentiam et remissionem peccatorum in omnes gentes, incipientibus ab Hierosolyma.“ Quae verba si parochi animadverterint, facile intelligent, quum cetera, quae ad religionem pertinent, fidelibus tradenda sint, tum vero prae-cipue huius articuli diligenter explicandi magnam eis a Domino necessitatem impositam esse.

*II. In ecclesia veram esse remittendorum peccatorum potestatem.*

Munus igitur parochi erit, quod ad hunc locum attinet, docere, non solum peccatorum remissionem in catholica ecclesia reperiri; de qua Isaías praedixerat<sup>2)</sup>: „Populus, qui habitat in ea, auferetur ab eo iniquitas;“ sed etiam potestatem peccata remittendi in ea esse. Qua si rite et secundum leges a Christo Domino praescriptas sacerdotes utantur, vere peccata remitti et condonari credendum est.

*III. Qua ratione peccata in ecclesia remittantur.*

Haec autem venia, quum primum fidem profitentes sacro baptismo ablui-mur, adeo cumulate nobis datur, ut nihil aut

<sup>1)</sup> Luc. 24, 46. seq. Io. 1, 29. 1s. 53, 5. seq. <sup>2)</sup> 33, 24. Io. 20, 23.

culpae delendum, sive ea origine contracta, sive quid propria voluntate omissum vel commissum sit, aut poenae persolendum relinquatur. Verum per baptismi gratiam nemo tamen ab omni naturae infirmitate liberatur; quin potius, quum unicuique adversus concupiscentiae motus, quae nos ad peccata incitare non desinit, pugnandum sit: vix ullum reperias, qui vel tam acriter resistat, vel tam vigilanter salutem suam tueratur, ut omnes plagas vitare possit.

*IV. Praeter baptismum remitti peccata in ecclesia virtute clavium ostenditur.*

Cum igitur necesse fuerit, in ecclesia potestatem esse peccata remittendi, alia etiam ratione, quam baptismi sacramento: claves regni coelorum illi concreditae sunt, quibus possint unicuique poenitenti, etiam si usque ad extremam vitae diem peccasset, delicta condonari. Clarissima huius rei testimonia in sacris literis habemus; nam apud sanctum Matthaeum Dominus ita ad Petrum loquitur<sup>1)</sup>: „Tibi dabo claves regni coelorum, et quodcumque ligaveris super terram erit ligatum et in coelis:“ et „quodcumque solveris super terram erit solutum et in coelis.“ Item<sup>2)</sup>: „Quaecunque alligaveritis super terram erunt ligata et in coelo, et quaecunque solveritis super terram erunt soluta et in coelo.“ Deinde sanctus Ioannes<sup>3)</sup> testatur, Dominum, quum insufflasset Apostolis, dixisse: „Accipite Spiritum sanctum; quorum remiseritis peccata, remittuntur eis; et quorum retinueritis, retenta sunt.“

*V. Nullis certis peccatis et temporibus potestas remittendi peccata circumscribitur.*

Neque vero existimandum est, hanc potestatem certis quibusdam peccatorum generibus definitam esse; nullum enim tam nefarium facinus vel admitti vel cogitari potest, cuius remittendi potestatem sancta ecclesia non habeat; quemadmodum etiam nemo adeo improbus et scelestus fuerit<sup>4)</sup>, quem si erratorum suorum vere poeniteat, certa ei veniae spes proposita esse non debeat. Sed neque haec eadem potestas ita circumscribitur, ut praefinito solum aliquo tempore ea uti licet; nam quacunque hora peccator ad sanitatem redire voluerit, reiciendum non esse docuit Salvator noster, quum principi Apostolorum interroganti, quoties peccatoribus ignoscendum esset, an septies, respondit<sup>5)</sup>: „Non septies, sed usque septuagies septies.“

<sup>1)</sup> Mat. 16, 19. <sup>2)</sup> Id. 18, 18. <sup>3)</sup> Io. 20, 22. <sup>4)</sup> Is. 1, 18. Ez. 18, 21. <sup>5)</sup> Mat. 18, 22.

*VI. Non omnibus Christianis potestas remittendi peccata est concessa.*

Verum si ministros divinae huius potestatis spectemus, ea minus late patere videbitur. Dominus enim non omnibus, sed episcopis tantum et sacerdotibus tam sancti munera potestatem dedit. Idem etiam censendum erit, quod ad rationem eius potestatis exercendae pertinet; nam per sacramenta solum, si eorum forma servetur, peccata remitti possunt; aliter vero nullum ius a peccatis solvendi ecclesiae datum est. Ex quo sequitur, tum sacerdotes, tum sacramenta, ad peccata condonanda veluti instrumenta valere, quibus Christus Dominus, auctor ipse et largitor salutis, remissionem peccatorum et iustitiam in nobis efficit.

*VII. Quantum sit munus remittendorum peccatorum ecclesiae concessum.*

Ut autem fideles coeleste hoc munus, quod singulari in nos Dei misericordia ecclesiae donatum est, magis suspiciant, atque ad eius usum et tractationem ardentiori pietatis studio accedant, conabitur parochus huius gratiae dignitatem et amplitudinem demonstrare. Ea autem ex hoc potissimum perspicitur, si, cuius virtutis sit peccata remittere, et homines ex iniustis iustos reddere, diligenter expositum fuerit. Constat enim, infinita et immensa Dei vi hoc effici, quam eandem in excitandis mortuis et in mundi creatione necessariam esse credimus. Quod si etiam, ut Augustini<sup>1)</sup> sententia confirmatur, maius opus existimandum est, aliquem ex impio pium facere, quam coelum et terram ex nihilo creare, quum ipsa creatio nonnisi ex infinita virtute possit existere: consequens est, ut multo magis peccatorum remissio infinitae potestati tribuenda sit.

*VIII. Nullus praeter solum Deum propria auctoritate peccata remittit.*

Quare verissimas esse prisorum Patrum voces agnoscimus, quibus confitentur, ab uno Deo peccata hominibus condonari, neque ad alium auctorem, quam ad summam eius bonitatem et potentiam, tam mirificum opus referendum esse. „Ego sum,” inquit ipse Dominus<sup>2)</sup> per Prophetam, „ego sum ipse, qui deleo iniquitates tuas.“ Nam scelerum remittendorum eadem ratio videtur esse, quam in pecunia debita servare oportet. Quemadmodum igitur a nemine, nisi a creditore, pecunia, quae debetur, remitti potest: ita, quum uni Deo

<sup>1)</sup> in Io. tract. 72. <sup>2)</sup> ls. 43, 25.

peccatis obstricti simus, siquidem quotidie oramus<sup>1)</sup>: „Dimitte nobis debita nostra,“ perspicuum est, a nemine, praeter illum debita nobis condonari posse.

*IX. Potestas remittendi peccata ante Christum natum nulli mortalium concessa fuit.*

Hoc vero admirabile et divinum munus, antequam Deus homo fieret, nulli creatae naturae impertitum est. Primus omnium Christus salvator noster ut homo, quum idem Deus verus esset, hoc munus a coelesti Patre traditum accepit. „Ut sciatis,“ inquit<sup>2)</sup>, „quia Filius hominis habet potestatem in terra dimitendi peccata, ait paralytico: Surge, tolle grabatum tuum, et vade in domum tuam.“ Quum igitur homo factus esset, ut hominibus hanc peccatorum veniam largiretur, priusquam in coelum ascenderet, ut ibi ad dexteram Dei in perpetuum sederet, eam potestatem episcopis et presbyteris in ecclesia concessit, quanquam, ut antea docuimus, Christus sua auctoritate, ceteri ut eius ministri, peccata dimittunt. Quamobrem, si quae infinita virtute effecta sunt maxime admirari et suspicere debemus, satis intelligimus, pretiosissimum hoc munus esse, quod Christi Domini benignitate ecclesiae donatum est.

*X. Qua virtute homines peccatorum suorum veniam consequantur.*

Sed ipsa etiam ratio, qua Deus clementissimus Pater mundi peccata delere constituit, animos fidelium ad huius beneficii magnitudinem contemplandam vehementer excitabit; sanguine enim unigeniti Filii sui scelera nostra expiari voluit, ut poenam, quam nos pro peccatis commeruimus, ultro<sup>3)</sup> ille persolveret, iustusque pro iniustis damnaretur, innocens pro reis morte acerbissima afficeretur. Quare cum animo cogitabimus, „nos<sup>4)</sup> non corruptibilis auro et argento redemptos esse, sed pretioso sanguine quasi agni immaculati Christi et incontaminati:“ facile statuemus, nihil nobis salubrious contingere potuisse hac remittendi peccata potestate, quae inexplicabilem Dei providentiam summamque erga nos caritatem ostendit. Ex hac autem cogitatione maximus fructus ad omnes perveniat necesse est.

*XI. Quo maxime pacto cernatur amplitudo beneficij, quod in potestate clavium offertur.*

Nam qui Deum mortali aliquo peccato offendit, quidquid meritorum ex Christi morte et cruce consecutus est, statim amittit, et omnino paradisi aditu, quem prius interclusum Sal-

<sup>1)</sup> Mat. 6, 12. <sup>2)</sup> Mat. 9, 6. Marc. 2, 9. <sup>3)</sup> I. Petr. 3, 18. <sup>4)</sup> I. Petr. 1, 18. seq

vator noster passione sua omnibus patefecit, prohibetur. Quod quidem quum in mentem venit, facere non possumus, quin humanae miseriae consideratio vehementer sollicitos nos habeat. Verum si animum ad hanc admirabilem potestatem referamus, quae ecclesiae divinitus tributa est, et huius articuli fide confirmati oblatam unicuique facultatem credamus, ut possit divina ope adiutus in pristinum dignitatis statum restitui; tunc vero cogimur summo gaudio et laetitia exsultare, et immortales Deo gratias agere. Ac profecto, si grata et iucunda medicamenta videri solent, quae nobis medicorum arte et industria, quum gravi aliquo morbo laboramus, parantur: quanto iucundiora esse debent ea remedia, quae Dei sapientia ad animorum curationem, atque adeo ad vitam reparandam instituit; quum praesertim non quidem dubiam salutis spem, ut medicinae illae, quae corporibus adhibentur, sed certissimam iis, qui sanari cupiunt, salutem afferant?

*XII. Cur ac quomodo remedia in potestate clavium ecclesiae tributa Christiani frequentare debeant.*

Erunt igitur fideles hortandi, postquam tam ampli et praelati muneri dignitatem cognoverint, ut illud etiam studeant ad suum commodum religiose convertere. Vix enim fieri potest, ut qui re utili et necessaria non utatur, eam contemnere non existimetur, praesertim vero quum Dominus hanc potestatem remittendi peccata ea re tradiderit ecclesiae, ut omnes hoc salutari remedio uterentur. Nam quemadmodum nemo sine baptismo expiari potest, ita, quicumque baptismi gratiam mortiferis sceleribus amissam recuperare voluerit, ad illud expiationis genus, nimirum poenitentiae sacramentum, confiat necesse est. Verum hoc loco admonendi sunt fideles, ne tam ampla veniae facultate proposita, quam etiam nullius temporis termino definiri declaravimus, vel ad peccandum faciliores, vel ad resipiscendum tardiores reddantur. In altero enim, quum iniuriosi et contumeliosi in hanc divinam potestatem manifeste deprehendantur, indigni sunt, quibus Deus misericordiam suam impertiatur; in altero vero magnopere verendum est, ne morte praecipiti frustra peccatorum remissionem confessi fuerint, quam tarditate et procrastinatione merito amiserunt.

## CAPUT XII.

## De undecimo Articulo.

## Carnis resurrectionem.

*I. Quantum referat de hoc articulo exploratam habere cognitionem.*

Magnam huius articuli vim esse ad fidei nostrae veritatem stabiendam, id maxime ostendit, quod divinis literis non solum credendus fidelibus proponitur, sed multis etiam rationibus confirmatur. Quod quidem quum in aliis symboli articulis vix fieri videamus, intelligi potest, hoc veluti firmissimo fundamento salutis nostrae spem nixam esse. Nam ut Apostolus ratiocinatur<sup>1)</sup>: „Si mortuorum resurrectio non est, neque Christus resurrexit; quod si Christus non resurrexit, inanis est praedicatio nostra, inanis est et fides vestra.“ In eo igitur explicando parochus non minus operae et studii ponet, quam in eo evertendo multorum impietas laborarit. Magnas enim et praeclaras utilitates ex ea cognitione ad fidelium fructum redundare, paulo post demonstrabitur.

*II. Cur Apostoli resurrectionem hominum, hic carnis resurrectionem appellari.*

Sed hoc in primis attendere oportebit, resurrectionem hominum in hoc articulo carnis resurrectionem appellari. Quod quidem sine causa factum non est. Nam docere voluerunt Apostoli id, quod necessario ponendum est, animam esse immortalem. Quare ne quis forte eam simul cum corpore interisse, utrumque vero in vitam revocari existimaret, quum animam plurimis sacrarum literarum locis immortalem esse plane constet: ob eam rem carnis tantum suscitandae mentio in articulo facta est. Et quanquam saepe etiam in sacris Scripturis caro integrum hominem, ut est apud Isaiam<sup>2)</sup>: „Omnis caro foenum,“ et apud S. Ioannem<sup>3)</sup>: „Et verbum caro factum est,“ significet: hoc tamen loco carnis vox corpus declarat, ut duarum partium, animae et corporis, quibus homo constat, alteram tantum, nempe corpus, corrumpi et in pulverem terrae, ex qua compactum est, redire, animam vero incorruptam manere intelligamus. At vero quum nemo, nisi mortuus fuerit, ad vitam revocetur, anima proprie non dicitur resurgere. Carnis quoque mentio facta est illius „haeresis“ confutandae causa, „quae,“ vivo Apostolo<sup>4)</sup>, „Hymenaei et

<sup>1)</sup> 1. Cor. 15, 13. 14. <sup>2)</sup> 1s. 40, 6. <sup>3)</sup> Io. 1, 14. <sup>4)</sup> II. Tim. 2, 17. seq.

Phileti fuit,<sup>1)</sup> qui asserebant, quum de resurrectione in Scripturis sacris ageretur, non de corporea, sed de spirituali, qua a morte peccati ad vitam innocentem resurgitur, accipendum esse. Itaque his verbis planum fit, eum errorem tolli, et veram corporis resurrectionem confirmari.

*III. Quibus potissimum rationibus doctrina de vera corporum resurrectione stabilienda sit.*

Verum parochi partes erunt, hanc veritatem illustrare exemplis ex veteri novoque Testamento et ex omni ecclesiastica historia depromptis. Alii enim ab Elia et Elisaeo in veteri Testamento, alii praeter eos, quos Christus Dominus a morte excitavit, a sanctis Apostolis aliisque permultis ad vitam revocati sunt; quae resurrectio multorum huius articuli doctrinam confirmat. Ut enim plures a morte excitatos credimus, ita universos ad vitam revocatum iri credendum est. Quin etiam praecipuus fructus, quem nos ex huiusmodi miraculis capere debemus, ille est, ut summam fidem huic articulo tribuamus. Sunt multa testimonia, quae parochis, qui in sacris literis mediocriter versati sunt, facile occurrent. Illustriora vero loca sunt in veteri quidem Testamento, quae leguntur apud Iob, quum ait<sup>1)</sup>: „se in carne sua conspecturum Deum suum;“ et apud Danielem<sup>2)</sup>, „de iis, qui in pulvere terrae dormiunt, alios in vitam aeternam, alios in opprobrium sempiternum evigilaturos;“ in novo autem Testamento, quae sanctus Matthaeus<sup>3)</sup> refert de disputatione, quam Dominus cum Sadducaeis habuit; praeterea, quae Evangelistae narrant de extremo iudicio. Atque huc etiam referenda sunt, quae Apostolus ad Corinthios<sup>4)</sup> et ad Thessalonicenses<sup>5)</sup> scribens, accurata ratione disseruit.

*IV. Quibus similitudinibus eadem veritas stabiliri possit.*

Sed quamvis hoc fide certissimum sit, multum tamen proderit, vel exemplis vel rationibus ostendere, id, quod fides credendum proponit, a natura aut ab humanae mentis intelligentia non abhorrere. Itaque Apostolus quaerenti, quo modo resurgerent mortui, sic respondit<sup>6)</sup>: „In sapientia, tu quod seminas non vivificatur, nisi prius moriatur; et quod seminas non corpus, quod futurum est, seminas, sed nudum granum, ut puta tritici, aut alicuius ceterorum; Deus autem dat illi corpus, sicut vult;“ et paulo post inquit: „Seminatur in corruptione, surget in incorruptione.“ Ad eam similitudinem multas praeterea adiungi posse, S. Gregorius ostendit<sup>7)</sup>:

<sup>1)</sup> Iob. 19, 26. <sup>2)</sup> Dan. 12, 2. <sup>3)</sup> Mat. 22, 23. Io. 5, 25—29. <sup>4)</sup> 1. Cor. 15, 12.  
<sup>5)</sup> 1. Thes. 4, 13. <sup>6)</sup> 1. Cor. 15, 36, seq. <sup>7)</sup> Moral. lib. 14. c. 55.

„Lux enim, inquit, quotidie quasi moriendo oculis subtrahitur, et rursus quasi resurgendo revocatur, et arbusta viriditatem amittunt, et rursus quasi resurgendo reparantur, et semina putrescendo moriuntur, et rursum germinando resurgent.“

*V. Rationes, quibus haec ipsa veritas comprobatur.*

Rationes illae praeterea, quae ab ecclesiasticis scriptoribus afferuntur, satis ad eam rem probandam accommodatae videri possunt. Ac primum quidem, quum animae immortales sint, et tanquam pars hominis ad humana corpora naturalem propensionem habeant, eas a corporibus seiunctas perpetuo manere praeter naturam existimandum est. Quoniam vero, quod naturae adversatur, ac violentum est, diuturnum esse non potest: consentaneum fore videtur, ut denuo cum corporibus iungantur; ex quo etiam sequitur, ut corporum resurrectio futura sit. Quo quidem argumentandi genere Salvator<sup>1)</sup> noster usus est, quum, adversus Sadducaeos disputans, ex animarum immortalitate corporum resurrectionem conclusit. Deinde quum malis supplicia, bonis praemia a iustissimo Deo sint proposita, ex illis vero quam plurimi, antequam debitas poenas persolvant, ex his magna ex parte nullis affecti virtutis praemiis a vita decadent: necesse est iterum animas cum corporibus coniungi, ut pro sceleribus aut recte factis corpora, quibus veluti peccati sociis homines utuntur, una cum anima poena aut praemio afficiantur. Qui locus diligenter tractatus est a sancto Chrysostomo<sup>2)</sup> in homilia ad populum Antiochenum. Quare Apostolus, quum de resurrectione dissereret<sup>3)</sup>: „Si in hac vita, inquit, tantum in Christo sperantes sumus, miserabiliores sumus omnibus hominibus.“ Quae quidem verba nemo ad animae miseriam referri existimabit, quae quum immortalis sit, quamvis corpora non resurgerent, in futura tamen vita beatitudine frui posset: verum de toto homine intelligenda sunt. Nisi enim corpori debita pro laboribus praemia reddantur, necesse est, ut qui, quemadmodum Apostoli, tot aerumnas et calamitates in vita perpessi sunt, omnium sint miserrimi. Idem vero multo aperiens docet ad Thessalonenses his verbis<sup>4)</sup>: „Gloriamur in ecclesiis Dei pro patientia vestra et fide, in omnibus persecutionibus vestris et tribulationibus, quas sustinetis in exemplum iusti iudicii Dei, ut digni habeamini in regno Dei, pro quo et patimini: si tamen iustum est apud Deum retribuere tribulationem iis, qui vos tribulant, et vobis, qui tribulamini, re-

<sup>1)</sup> Mat. 22, 31. <sup>2)</sup> Rom. 1. <sup>3)</sup> I. Cor. 15, 19. <sup>4)</sup> II. Thes. 1, 4-8

quiem nobiscum in revelatione Domini Iesu de coelo cum angelis virtutis eius in flamma ignis, dantis vindictam iis, qui non neverunt Deum, et qui non obediunt evangelio Domini nostri Iesu Christi.“ Adde etiam, non posse homines, quamdiu anima a corpore seiuncta est, plenam felicitatem et bonis omnibus cumulatam adipisci. Ut enim quaelibet pars a toto separata, imperfecta est: ita etiam anima, quae corpori non est adiuncta. Ex quo sequitur, ut illi ad summam felicitatem nihil desit, corporum resurrectionem necessariam esse. His igitur atque aliis huiusmodi rationibus parochus fideles in hoc articulo erudire poterit.

*VI. Nullus homo tunc invenietur, qui mortis et resurrectionis sit expers.*

Explicare praeterea diligenter oportet ex Apostoli doctrina, quinam ad vitam suscitandi sint. Nam ad Corinthios scribens<sup>1)</sup>: „Sicut in Adam,“ inquit, „omnes moriuntur, ita et in Christo omnes vivificabuntur.“ Omni itaque malorum bonorumque discrimine remoto, omnes a mortuis, quamquam non omnium par conditio futura est, resurgent<sup>2)</sup>), „qui bona fecerunt, in resurrectionem vitae, qui vero mala egerunt, in resurrectionem iudicii.“ Quum autem „omnes“ dicimus, tam eos intelligimus, qui adventante iudicio mortui iam erunt, quam eos, qui morientur. Huic enim sententiae, quae asserit omnes morituros esse nemine excepto, ecclesiam acquiescere, ipsamque sententiam magis veritati convenire, scriptum reliquit sanctus Hieronymus<sup>3)</sup>; idem sentit et sanctus Augustinus<sup>4)</sup>). Neque vero huic sententiae repugnant Apostoli verba ad Thessalonicenses scripta: „Mortui<sup>5)</sup> qui in Christo sunt, resurgent primi, deinde nos, qui vivimus, qui relinquimur, simul rapiemur cum illis in nubibus obviam Christo in aëra.“ Nam S. Ambrosius, quum ea explanaret, ita inquit: „In ipso raptu mors praeveniet; et quasi per soporem, ut egressa anima in momento reddatur; quum enim tollentur, morientur; ut pervenientes ad Dominum praesentia Domini recipient animas, quia cum Domino mortui esse non possunt.“ Eademque sententia comprobatur sancti Augustini<sup>6)</sup> auctoritate in libro de civitate Dei.

*VII. Idem prorsus corpus anima humana in extremo iudicio recipiet.*

Cum vero multum referat, nobis certo persuaderi, hoc ipsum atque ideo idem corpus, quod uniuscuiusque proprium

<sup>1)</sup> I. Cor. 15, 22. <sup>2)</sup> Io. 5, 29. <sup>3)</sup> Ep. 119. <sup>4)</sup> de civit. Dei 20, 20. <sup>5)</sup> I. Thes. 4, 15. seq. <sup>6)</sup> Lib. 20, 20.

fuit, quamvis corruptum sit et in pulverem redierit, tamen ad vitam suscitandum esse, illud etiam parochus accurate explicandum suscipiet. Haec Apostoli est sententia, quum inquit<sup>1)</sup>: „Oportet corruptibile hoc induere incorruptionem,“ ea voce hoc proprium corpus aperte demonstrans. Iob etiam de eo clarissime vaticinatus est<sup>2)</sup>: „Et in carne mea,“ inquit, „videbo Deum, quem visurus sum ego ipse, et oculi mei conspicuntur sunt, et non aliis.“ Hoc idem colligitur ex ipsius resurrectionis definitione; est enim resurrectio, auctore Damasceno<sup>3)</sup>, ad eum statum, unde cecideris, revocatio. Denique, si consideremus, cuius rei causa resurrectionem futuram paulo ante demonstratum est: nihil erit, quod cuiusquam animalium hac in re dubium facere possit.

*VIII. Cuius rei causa resurrectio corporum divinitus sit instituta.*

Idecirco autem corpora excitanda esse docuimus<sup>4)</sup>, „ut referat unusquisque propria corporis, prout gessit, sive bonum sive malum.“ Hominem igitur ex ipso corpore, cuius opera vel Deo vel daemoni servivit, resurgere oportet, ut cum eodem corpore triumphi coronas et praemia consequatur, aut poenas et supplicia miserrima perferat.

*IX. Corpora contractam in hac mortali vita deformitatem non resument.*

Neque vero corpus tantum resurget, sed quidquid ad illum naturae veritatem, atque ad hominis decus et ornamentum pertinet, restituendum est. Praeclarum ea de re S. Augustini testimonium legimus: „Nihil tunc vitii,“ inquit<sup>5)</sup>, „in corporibus existet; si aliqui plus pinguedine obesi et crassi extiterint, non totam corporis molem assumunt; sed, quod illam habitudinem superabit, reputabitur superfluum, et e diverso, quaecumque vel morbus vel senium confecit in corpore, reparabitur per Christum virtute divina, ut, si aliqui propter macrorem fuerint graciles, quia Christus non solum nobis corpus reparabit, sed quidquid per miseriam huius vitae fuerit nobis ademptum.“ Idem alio loco: „Non resumet homo capillos, quos habuerit, sed quos decuerit, iuxta illud<sup>6)</sup>: „Omnes capilli capitum vestri numerati sunt,“ qui secundum divinam sapientiam sunt reparandi.“ In primis vero, quoniam membra ad veritatem humanae naturae pertinent, simul restituentur omnia. Qui enim vel ab ipso ortu oculis capti sunt, vel ob aliquem morbum lumina amiserunt, claudi atque omnino manci et quibusvis membris debiles, integro ac perfecto cor-

<sup>1)</sup> 1. Cor. 15, 53. <sup>2)</sup> Iob. 19, 26. seq. <sup>3)</sup> de fide orthodox. 4, 27. <sup>4)</sup> II. Cor. 5, 10..  
<sup>5)</sup> de civit. Dei 22, 19—21. Enchir. 89. seq. <sup>6)</sup> Mat. 10, 30.

pore resurgent. Aliter enim animae desiderio, quae ad corporis coniunctionem propensa est, minime satisfactum esset cuius tamen cupiditatem in resurrectione explendam esse, sine dubitatione credimus. Praeterea satis constat, resurrectionem aequae ac creationem inter praecipua Dei opera numerari. Quemadmodum igitur omnia a Deo initio creationis perfecta fuerunt, ita etiam in resurrectione futurum omnino affirmare oportet.

*X. Martyres corporibus integris resurgententes, in eis vulnerum cicatrices gestabunt.*

Neque id de martyribus solum fatendum est, de quibus sanctus Augustinus ita testatur<sup>1)</sup>: „Non erunt absque illis membris;“ non enim posset illa mutilatio non esse corporis vitium, alioquin qui capite truncati sunt deberent sine capite resurgere: verumtamen exstabunt in eorundem membrorum articulis gladii cicatrices refulgentes super omne aurum et lapidem pretiosum, veluti et cicatrices vulnerum Christi.

*XI. Etiam improborum corpora mutilata hic resurgent integra.*

Quod de improbis quoque verissime dicitur, etsi illorum culpa membra amputata fuerint. Nam quo plura membra habebunt, tanto acerbiori dolorum cruciatu conficientur. Quare illa membrorum restitutio non ad eorum felicitatem, sed ad calamitatem ac miseriam est redundatura, quum merita non ipsis membris, sed personae, cuius corpori coniuncta sunt, adscribantur. Nam iis, qui poenitentiam egerunt, ad praemium; illis vero, qui eandem contempserint, ad supplicium restituentur. Haec vero, si a parochis attente considerentur, nunquam eis rerum et sententiarum copia deerit ad excitandos inflammadosque pietatis studio fidelium animos, ut, vitae huius molestias et aerumnas cogitantes, beatam illam resurrectionis gloriam, quae iustis et piis proposita est, avide exspectent.

*XII. Corpora hominum, postquam resurrexerint, qualia sint futura.*

Sequitur nunc, ut fideles intelligent, si ea spectemus, quae corporis substantiam constituant, quamvis illud ipsum atque idem corpus a mortuis revocari oporteat, quod antea extinctum fuerat: longe aliam tamen et diversam eius conditionem fore. Ut enim cetera omittamus, in eo maxime resurgentium corpora omnia a se ipsis different, quod, quum antea mortis legibus subiecta essent, posteaquam ad vitam suscitata fuerint, sublato bonorum malorumque discrimine immortalitatem

<sup>1)</sup> Serm. 362. c. 90.

assequentur. Quam quidem admirabilem naturae restitutionem insignis Christi victoria meruit, quam de morte reportavit, quemadmodum sacrarum scripturarum testimonia nos admonent. Scriptum est enim<sup>1)</sup>: „Praecipitabit mortem in sempiternum;“ et alibi<sup>2)</sup>: „Ero mors tua, o mors,“ quod explicans Apostolus inquit<sup>3)</sup>: „Novissim e inimica destruetur mors;“ et apud sanctum Ioannem legimus<sup>4)</sup>: „mors ultra non erit.“ Decebat autem maxime, Christi Domini merito, quo mortis imperium eversum est, peccatum Adae longo intervallo superari. Idem etiam divinae iustitiae consentaneum fuit, ut boni beata vita perpetuo fruerentur, mali vero sempiternas poenas luentes, „quaererent<sup>5)</sup> mortem, et non invenirent: optarent mori, et mors fugeret ab eis.“ Atque haec quidem immortalitas bonis malisque communis erit.

*XIII. Cuiusmodi dotibus beatorum corpora post resurrectionem erunt ornata.*

Habebunt praeterea sanctorum rediviva corpora insignia quaedam et praeclara ornamenta, quibus multo nobiliora futura sint, quam unquam antea fuerint. Praecipua vero sunt quatuor illa, quae dotes appellantur, ex Apostoli doctrina a Patribus observatae. Earum prima est impassibilitas, munus scilicet et dos, quae efficiet, ne molesti aliquid pati, ullove dolore aut incommodo affici queant. Nihil enim aut frigorum vis, aut flammæ ardor, aut aquarum impetus obesse eis poterit. „Seminatur,“ inquit Apostolus<sup>6)</sup>, „in corruptione, surget in incorruptione.“ Quod autem impassibilitatem potius quam incorruptionem scholastici appellariunt, ea causa fuit, ut, quod est proprium corporis gloriosi, significant. Non enim impassibilitas illis communis est cum damnatis, quorum corpora, licet incorruptibilia sint, aestuare tamen possunt atque algere, variisque cruciatibus affici. Hanc consequitur claritas, qua sanctorum corpora tamquam sol fulgebunt; ita enim apud sanctum Matthaeum testatur Salvator noster: „Iusti,“ inquit<sup>7)</sup>, „fulgebunt sicut sol in regno Patris eorum.“ Ac ne quis de eo dubitaret, suae transfigurationis exemplo declaravit<sup>8)</sup>. Hanc interdum Apostolus gloriam, modo claritatem appellat: „Reformabit,“ inquit<sup>9)</sup>, „corpus humilitatis nostrae configuratum corpori claritatis suae;“ et rursum<sup>10)</sup>: „Seminatur in ignobilitate, surget in gloria.“ Huius etiam gloriae imaginem quandam vidit populus Israël in deserto, quum „fa-

<sup>1)</sup> Isa. 25, 8. <sup>2)</sup> Os. 13, 14. <sup>3)</sup> I. Cor. 15, 26. <sup>4)</sup> Apoc. 21, 4. <sup>5)</sup> Apoc. 9, 6.  
<sup>6)</sup> I. Cor. 15, 42. <sup>7)</sup> Mat. 13, 43. <sup>8)</sup> Ib. 17, 2. <sup>9)</sup> Phil. 3, 21. <sup>10)</sup> I. Cor. 15, 43.

cies Moysis<sup>1)</sup>“ ex colloquio et praesentia Dei ita colluceret, ut in eam filii Israel oculos intendere non possent. Est vero claritas haec fulgor quidam ex summa animae felicitate ad corpus redundans, ita, ut sit quaedam communicatio illius beatitudinis, qua anima fruatur, quomodo etiam anima ipsa beata efficitur, quod in eam pars divinae felicitatis derivetur. Hoc vero munere non aequae omnes, perinde ac primo, ornari credendum est; erunt quidem sanctorum corpora omnia aequae impassibilia, sed eundem splendorem non habebunt; nam, ut testatur Apostolus<sup>2)</sup>: „Alia claritas solis, alia claritas lunae, et alia claritas stellarum; stella enim a stella differt in claritate: sic et resurrectio mortuorum.“ Cum hac dote coniuncta est illa, quam agilitatem vocant, qua corpus ab onere, quo nunc premitur, liberabitur, facillimeque in quamecumque partem anima voluerit ita moveri poterit, ut ea motione nihil celerius esse queat: quemadmodum aperte sanctus Augustinus<sup>3)</sup> in libro de civitate Dei, et Hieronymus<sup>4)</sup> in Isaiam docuerunt. Quare ab Apostolo dictum est<sup>5)</sup>: „Seminatur in infirmitate, surgit in virtute.“ His vero addita est, quae vocatur subtilitas, cuius virtute corpus animae imperio omnino subiicitur, eique serviet, et ad nutum praesto erit: quod ex illis Apostoli verbis ostenditur: „Seminatur,“ inquit<sup>6)</sup> corpus animale, surget corpus spirituale.“ Haec fere sunt praecipua capita, quae in huius articuli explicatione tradenda erunt.

*XIV. Quem fructum ex tantis resurrectionis mysteriis fideles capient.*

Ut autem fideles sciant, quem fructum ex tot tantorumque mysteriorum cognitione capere possint: primum declarare oportebit, maximas a nobis Deo gratias agendas esse, qui haec sapientibus<sup>7)</sup> absconderit, et revelaverit parvulis. Quot enim viri vel prudentiae laude praestantes vel singulari doctrina praediti in hac tam certa veritate caeci plane fuerunt? Quod igitur nobis illa patefecerit, quibus ad eam intelligentiam adspirare non licebat, est, quod summam eius benignitatem et clementiam perpetuis laudibus celebremus. Deinde magnus etiam ille fructus ex huius articuli meditatione consequetur, quod scilicet in eorum morte, qui nobis necessitudine vel benevolentia coniuncti sunt, facile tum alios, tum nos ipsos consolabimur. Quo quidem genere consolationis Apostolum usum esse constat, quum ad Thessalonicenses<sup>8)</sup> de

---

<sup>1)</sup> Ex. 34, 29. II. Cor. 3, 7. <sup>2)</sup> I. Cor. 15, 41. <sup>3)</sup> Lib. 13, 18. et 20. seq. <sup>4)</sup> Hier. in cap. 40. lib. 12. <sup>5)</sup> I. Cor. 15, 43. <sup>6)</sup> ib. 15, 44. <sup>7)</sup> Mat. 11, 25. <sup>8)</sup> I. Thes. 4, 12. seq.

dormientibus scribebat. Sed in omnibus etiam aliis aerumnis et in calamitatibus futurae resurrectionis cogitatio summam nobis doloris levationem afferet, quemadmodum sancti Iob<sup>1)</sup> exemplo didicimus, qui una hac spe afflictum et moerentem animum sustentabat, fore aliquando, ut in resurrectione Dominum Deum suum conspiceret. Praeterea hoc plurimum vallebit ad persuadendum fidelibus populis, ut rectam vitam, integrum, ab omni peccati labore puram agere quam diligentissime curent. Si enim cogitaverint, ingentes illas divitias, quae resurrectionem consequuntur, ipsis propositas esse: facile ad virtutis et pietatis studia allicantur. Contra vero nulla res maiorem vim habitura est ad comprimendas animi cupiditates, hominesque a sceleribus avocandos, quam si saepius admoneantur, quibusnam malis et cruciatibus improbi afficiendi sunt, qui extremo illo die procedent in resurrectionem<sup>2)</sup> iudicii.

### CAPUT XIII.

#### De duodecimo Articulo.

Vitam aeternam.

*I. Cur postremo loco hic fidei articulus sit positus, et quantum referat, illum frequenter populo explicari.*

Sancti Apostoli, duces nostri, symbolum, quo fidei nostrae summa continetur, aeternae vitae articulo claudi et terminari voluerunt, tum quia post carnis resurrectionem nihil aliud fidelibus exspectandum est, nisi aeternae vitae praemium, tum vero ut perfecta illa felicitas et bonis omnibus cumulata nobis semper ante oculos versaretur, doceremurque, in ea mentem et cogitationes nostras omnes defigendas esse. Quare parochi in erudiendis fidelibus nunquam intermittent, praemiis aeternae vitae propositis eorum animos accendere, ut, quaeunque vel difficillima Christiani nominis causa subeunda esse docuerint, facilia atque ideo iucunda existiment, promptioresque ad parendum Deo et alacriores reddantur.

*II. Quid hic per vitam aeternam significetur.*

Sed quoniam sub his verbis, quae ad beatitudinem nostram declarandam hoc loco usurpantur, plurima mysteria in occulto latent, ea sic aperienda sunt, ut, quantum cuiusque

<sup>1)</sup> Iob. 19, 26. seq. <sup>2)</sup> Io. 5, 29.

ingenium ferat, omnibus patere possint. Admonendi igitur sunt fideles, his vocibus, „vitam aeternam,“ non magis perpetuitatem vitae, cui etiam daemones sceleratique homines addicti sunt, quam in perpetuitate beatitudinem, quae beatorum desiderium expleat, significari. Atque ita intelligebat legis peritus<sup>1)</sup> ille, qui a Domino salvatore nostro, quid sibi faciendum esset, ut vitam aeternam possideret, in Evangelio quaesivit; perinde ac si diceret: Quaenam mihi praestanda sunt, ut ad eum locum, ubi perfecta felicitate frui liceat, perveniam? In hunc vero sensum sacrae literae haec verba accipiunt, ut multis in locis licet animadvertere.

*III. Cur vitae aeternae nomine summa illa beatitudo designetur.*

Hoc vero potissimum nomine summa illa beatitudo appellata est, ne quis existimaret, eam in rebus corporeis et cadiuis, quae aeternae esse non possunt, consistere. Neque enim haec ipsa beatitudinis vox satis explicare poterat quod quaerebatur, praesertim quum non defuerint homines, inanis cuiusdam sapientiae opinione inflati, qui summum bonum in iis rebus ponerent, quae percipiuntur sensibus. Haec enim pereunt et veterascunt, beatitudo vero nullo temporis termino definienda est; quin potius terrena haec longissime a vera felicitate absunt, a qua is quam maxime recedit, qui mundi amore et desiderio tenetur. Scriptum est enim<sup>2)</sup>: „Nolite diligere mundum, neque ea, quae in mundo sunt. Si quis diligit mundum, non est caritas Patris in eo;“ et paulo post: „Mundus transit et concupiscentia eius.“ Haec igitur parochi fidelium mentibus imprimenda diligenter curabunt, ut mortalia contemnere, nullamque in hac vita, in qua non cives, sed advenae<sup>3)</sup> sumus, felicitatem obtineri posse, in animum inducant. Quamquam hic etiam spe beati merito dicemur, si „abnegantes<sup>4)</sup> impietatem et saecularia desideria, sobrie et iuste et pie vixerimus in hoc saeculo, exspectantes beatam spem, et adventum gloriae magni Dei et Salvatoris nostri Iesu Christi.“ Haec autem quum permulti, qui sibi ipsis sapientes<sup>5)</sup> videbantur, minus inteligerent, et in hac vita felicitatem quaerendam putarent, stulti facti sunt, et in maximas calamitates inciderunt. Sed illud praeterea ex vi huius nominis, „vitam aeternam,“ percipimus, semel adeptam felicitatem amitti nunquam posse, ut falso nonnulli suspiciati sunt. Nam felicitas ex omnibus bonis sine ulla mali admixtione cumulatur, quae quum hominis desiderium expleat, in aeterna vita necessario

<sup>1)</sup> Lue. 18, 18. <sup>2)</sup> I. Io. 2, 15. 17. <sup>3)</sup> I. Petr. 2, 11. <sup>4)</sup> Tit. 2, 12. seq. <sup>5)</sup> Rom. 1, 22.

consistit; neque enim potest beatus non magnopere velle, ut illis bonis, quae adeptus est, sibi perpetuo frui liceat. Quare, nisi ea possessio stabilis et certa sit, maximo cruciatu timoris angatur necesse est.

*IV. Aeterna beatitudo verbis aut mente humana comprehendendi non potest.*

Verum quanta sit beatorum, qui in coelesti patria vivunt, felicitas, eaque ab ipsis tantum, praeterea a nemine, comprehendendi possit, hae ipsae voces, quum vitam beatam dicimus, satis demonstrant. Nam quum ad rem aliquam significandam eo nomine utimur, quod cum multis aliis commune est: facile intelligimus, deesse propriam vocem, qua res illa plane exprimatur. Quum igitur felicitas iis vocibus declaretur, quae non magis in beatos, quam in omnes, qui perpetuo vivant, recte convenient: hoc nobis arguento esse potest, altiore et praestantiorem quandam rem esse, quam ut proprio vocabulo perfecte significare eius rationem possimus. Nam etsi plurima alia nomina coelesti huic beatitudini in sacris literis tribuuntur, cuiusmodi sunt: regnum Dei, Christi, coelorum, paradisus, sancta civitas, nova Ierusalem, domus Patris: tamen perspicuum est, nullum ex iis ad eius magnitudinem explicandam satis esse. Quare parochi hoc loco oblatam sibi occasionem non praetermittent, fideles tam amplis praemiis, quae vitae aeternae nomine declarantur, ad pietatem, iustitiam, et omnia Christianae religionis officia invitandi. Constat enim, vitam in maximis bonis, quae natura expetuntur, numerari solere. Atqui hoc potissimum bono, quum vitam aeternam dicimus, beatitudo definitur. Quod si exigua hac et calamitosa vita, quae tot et tam variis miseriis subiecta est, ut mors verius dicenda sit, nihil magis amatur, nihil aut carius aut iucundius esse potest: quo tandem animi studio, qua contentione aeternam illam vitam querere debemus, quae defunctis omnibus malis perfectam et absolutam bonorum omnium rationem coniunctam habet?

*V. Beatitudo omnium malorum privatione, omnium bonorum adeptione continetur.*

Nam, ut sancti Patres tradiderunt, aeternae vitae felicitas omnium malorum liberatione et bonorum adeptione definienda est. De malis clarissima sunt sanctorum literarum testimonia; scriptum est enim in Apocalypsi<sup>1)</sup>: „Non esurient, neque sitiens amplius, neque cadet super illos sol, neque ullus aestus,“ et rursus<sup>2)</sup>:

<sup>1)</sup> Apoc. 7. 16. <sup>2)</sup> Ib. 21, 4

„Absterget Deus omnem lacrymam ab oculis eorum, et mors ultra non erit, neque luctus, neque clamor, neque dolor erit ultra, quia prima abierunt.“ Iam vero beatorum immensa gloria, innumeraque solidae laetitiae et voluptatis genera futura sunt; cuius gloriae magnitudinem, quum animus noster capere, aut illa in animos nostros penetrare nullo modo possit, necesse est, nos in illam, nempe in gaudium<sup>1)</sup> Domini, introire, ut eo circumfusi mentis desiderium cumulate expleamus.

*VI. Quibus praecipue bonorum generibus perfruentur.*

Quamvis autem, ut S. Augustinus<sup>2)</sup> scribit, facilius mala, quibus carituri sumus, quam bona ac voluptates, quas hausuri sumus, numerari posse videantur: danda tamen erit opera, ut, quae fideles summae illius felicitatis adipiscendae cupiditate inflammare poterunt, breviter et dilucide explicentur. Sed illa in primis distinctione uti oportebit, quam a gravissimis divinarum rerum scriptoribus accepimus; ii enim duo bonorum genera esse statunt, quorum alterum ad beatitudinis naturam pertinet, alterum ipsam beatitudinem consequitur. Quare illa essentialia, haec vero accessoria bona docendi causa appellarunt.

*VII. In quo consistat essentialis et primaria aeternae beatitudinis causa.*

Ac solida quidem beatitudo, quam essentiale communi nomine licet vocare, in eo sita est, ut Deum videamus, eiusque pulchritudine fruamur, qui est omnis bonitatis ac perfectionis fons et principium. „Haec est vita aeterna,“ inquit Christus<sup>3)</sup> Dominus, „ut cognoscant te solum Deum verum, et quem misisti, Iesum Christum;“ quam sententiam S. Ioannes videtur interpretari, quum ait<sup>4)</sup>: „Carissimi, nunc filii Dei sumus, et nondum apparuit, quid erimus. Scimus, quoniam, quum apparuerit, similes ei erimus; quoniam videbimus eum, sicuti est.“ Significat enim beatitudinem ex iis duobus constare: tum quod Deum intuebimur, qualis in natura sua ac substantia est, tum quod veluti dii efficiemur. Nam qui illo fruuntur, quamvis propriam substantiam retineant, admirabilem tamen quandam et prope divinam formam induunt, ut dii potius, quam homines videantur.

*VIII. Beati quomodo Dei formam et naturam quodammodo induant.*

Hoc autem, cur ita fiat, ex eo perspicuum est, quod unaquaeque res, vel ex eius essentia, vel ex eius similitudine et

<sup>1)</sup> Mat. 25, 21. <sup>2)</sup> Serm. 127. <sup>3)</sup> Io. 17, 3. <sup>4)</sup> 1. Io. 3, 2.

specie cognoscitur. At quoniam nihil est Deo simile, cuius similitudinis adiumento ad perfectam eius notitiam pervenire possimus: consequens est, ut eius naturam et essentiam videre nemini licet, nisi haec eadem divina essentia se nobis coniunxerit. Atque id Apostoli verba illa significant<sup>1)</sup>: „Videmus nunc per speculum in aenigmate, tunc autem facie ad faciem.“ Nam quod inquit, „in aenigmate,“ interpretatur S. Augustinus<sup>2)</sup> in similitudine ad Deum intelligendum accommodata. Quod etiam S. Dionysius<sup>3)</sup> aperte ostendit, quum affirmat, nulla inferiorum similitudine superiora percipi posse. Neque enim ex alicuius rei corporeae similitudine eius, quae corpore careat, essentia et substantia cognosci potest, quum praesertim necesse sit, rerum similitudines minus concretionis habere et magis spirituales esse, quam res ipsas, quarum imaginem referunt; quemadmodum in omnium rerum cognitione facile experimur. Quoniam vero fieri non potest, ut alicuius rei creatae similitudo aequa pura et spiritualis, ac Deus ipse est, reperiatur: ita fit, ut ex nulla similitudine divinam essentiam perfecte intelligere possimus. Accedit etiam, quod omnes creatae res certis perfectionis terminis circumscribuntur. At Deus infinitus est, neque ullius rei creatae similitudo eius immensitatem capere potest. Quocirca una illa ratio divinae substantiae cognoscenda relinquitur, ut ea se nobis coniungat, et incredibili quodam modo intelligentiam nostram altius extollat, atque ita idonei ad eius naturae speciem contemplandam reddamur.

*IX. Lumine gloriae beati illustrantur, et ad Deum videndum tota spe omnes commoveri debent.*

Id vero lumine gloriae assequemur, quum eo splendore illustrati, Deum „lumen<sup>4)</sup> verum in eius lumine videbimus.“ Nam beati Deum praesentem semper intuentur; quo quidem dono omnium maximo et praestantissimo divinae essentiae participes effecti, vera et solida beatitudine potiuntur; quam nos ita credere debemus, ut etiam, eam Dei benignitate cum certa spe notis exspectandam esse, in symbolo Patrum definitum sit; ait enim: „Exspecto resurrectionem mortuorum, et vitam venturi saeculi.“

*X. Quo modo in beatitudine homo Deo coniungatur, similitudine explicatur.*

Divina haec plane sunt, neque ullis verbis explicari aut cogitatione comprehendi a nobis possunt. Verum licet ali-

<sup>1)</sup> I. Cor. 13, 12. <sup>2)</sup> de Trinit. 15, 9. <sup>3)</sup> de div. nom. c. 1. <sup>4)</sup> Ps. 35, 10.

quam huius beatitudinis imaginem in eis etiam rebus, quae sensu percipiuntur, cernere. Nam quemadmodum ferrum ad moto igni ignem concipit, et, quamvis eius substantia non mutetur, fit tamen, ut diversum quippam, nimirum ignis, esse videatur: eodem modo, qui in coelestem illam gloriam admissi sunt, Dei amore inflammati ita afficiuntur, quum tamen id, quod sunt, esse non desinant, ut multo magis distare ab iis, qui in hac vita sunt, merito dici possint, quam ferrum candens ab eo, quod nullam caloris vim inter se contineat. Ut igitur rem paucis complectamur, summa illa et absoluta beatitudo, quam essentialē vocamus, in Dei possessione constituenda est. Quid enim ei ad perfectam felicitatem deesse potest, qui Deum optimum et perfectissimum possidet?

*XI. Quae sint accidentalia bona, quibus beati circumfluent.*

Verum ad illam tamen quaedam accedunt ornamenta omnibus beatis communia, quae, quoniam ab humana ratione minus remota sunt, vehementius quoque animos nostros commovere et excitare solent. Huius generis ea sunt, de quibus Apostolus ad Romanos videtur intelligere<sup>1)</sup>: „Gloria, et honor et pax omni operanti bonum;“ nam gloria quidem beati perfruentur, non illa solum, quam tandem essentialē beatitudinem, vel cum eius natura maxime coniunctam esse ostendimus: sed ea etiam, quae constat ex clara et aperta notitia, quam singuli de alterius eximia et praestanti dignitate habituri sunt. At vero quantus ille honor existimandus est, qui eis a Domino tribuitur, quum non amplius servi, sed amici<sup>2)</sup>), fratres ac filii Dei vocentur? Quare ita electos suos amantissimos et honorificentissimos verbis Salvator noster compellabit<sup>3)</sup>: „Venite benedicti Patris mei, possidete paratum vobis regnum;“ ut merito liceat exclamare<sup>4)</sup>: „Nimis honorificati sunt amici tui, Deus.“ Sed laudibus etiam a Christo Domino coram Patre coelesti et angelis eius celebrabuntur. Praeterea si hoc commune omnibus hominibus desiderium natura ingenuit honoris, qui a viris sapientia praestantibus habebatur, quod eos locupletissimos virtutis suae testes fore existiment: quantum beatorum gloriae accessurum putamus, quod alius alium summo honore prosequetur.

*XII. Quibus bonorum copiis beati in aeternis illis sedibus cumulabuntur.*

Infinita esset omnium oblectationum enumeratio, quibus beatorum gloria cumulata erit, ac ne cogitatione quidem fin-

<sup>1)</sup> Rom 2, 10. <sup>2)</sup> Io. 15, 14. et 20, 17. Rom. 8, 14. <sup>3)</sup> Mat. 25, 34. <sup>4)</sup> Ps. 138, 17.

gere eas possumus. Sed tamen hoc fidelibus persuasum esse debet, quaecunque nobis iucunda in hac vita contingere vel etiam optari queant, sive ea ad mentis cognitionem sive ad corporis perfectum habitum pertineant, earum rerum omnium copiis beatam coelestium vitam circumfluere; quamvis hoc altiore quodam modo, „quam<sup>1)</sup> oculus vidit, aut auris audivit, aut in cor hominis ascendit,“ fieri Apostolus affirmet. Nam corpus quidem, quod antea crassum et concretum erat, quum in coelo detracta mortalitate tenue et spirituale effectum fu-erit, nullis amplius alimentis indigebit; anima autem aeternae gloriae pabulo, quod magni illius convivii auctor „transiens<sup>2)</sup> omnibus ministrabit,“ cum summa voluptate exsaturabitur. Quis vero pretiosas vestes, aut regales corporis ornatus desiderare poterit, ubi nullus harum rerum usus futurus sit,<sup>3)</sup> omnesque immortalitate et splendore amicti, et sempiternae gloriae corona ornati erunt? Sed si ampliae etiam et magnifica domus possessio ad humanam felicitatem pertinet: quid coelo ipso, quod Dei caritate undique collustratur, vel amplius vel magnificentius cogitari potest? Quare Propheta, quum eius domicilii pulchritudinem sibi ante oculos poneret, et ad beatas illas sedes perveniendi cupiditate arderet<sup>4)</sup>: „Quam dilecta,“ inquit, „tabernacula tua, Domine virtutum! concupiscit et deficit anima mea in atria Domini, cor meum et caro mea exultaverunt in Deum vivum.“ Atque ut hic sit omnium fidelium animus, haec communis omnium vox, quemadmodum parochi vehementer optare, ita etiam omni studio curare debent.

### *XIII. Praemii iisdem citra ullum discriminem beati non sufficientur.*

Nam „in domo Patris mei,“ inquit Dominus<sup>5)</sup> „mansiones multae sunt,“ in quibus maiora et minora praemia, ut quisque promeritus erit, reddentur. „Qui<sup>6)</sup>“ enim „parce seminat, parce et metet, et qui seminat in benedictionibus, de benedictionibus et metet. Quare non solum ad eam beatitudinem fideles excitabunt, verum etiam eius consequendae certam rationem hanc esse frequenter monebunt, ut fide et caritate instructi, et in oratione, et sacramentorum salutari usu perseverantes, ad omnia benignitatis officia in proximos se exerceant. Ita enim Dei misericordia fiet, qui beatam illam gloriam diligentibus se praeparavit, ut aliquando impleatur quod dictum est per Prophetam<sup>7)</sup>: „Sedebit populus meus in pulchritudine pacis, et in tabernaculis fiduciae et in requie opulenta.“

<sup>1)</sup> I. Cor. 2, 9. <sup>2)</sup> Luc. 12, 37. <sup>3)</sup> I. Cor. 9, 25. II. Tim. 4, 5. Apoc. 7, 9.  
<sup>4)</sup> Ps. 83, 2. <sup>5)</sup> Io. 14, 2. <sup>6)</sup> II. Cor. 9, 6. <sup>7)</sup> Is. 32, 18.

## CATECHISMI PARS SECUNDA.

### CAPUT I.

#### **De Sacramentis in genere.**

*I. Doctrinam sacramentorum tradere parocho in primis est curandum.*

Cum omnis Christianae doctrinae pars scientiam diligenter disiderat, tum sacramentorum disciplina, quae et Dei iusu necessaria, et utilitate uberrima est, parochi facultatem et industriam postulat singularem, ut eius accurata ac frequenti perceptione fideles evadant, quibus praestantissimae ac sanctissimae res digne et salutariter impertiri possint, et sacerdotes ab illa divini interdicti regula non descendant<sup>1)</sup>: „Nolite sanctum dare canibus, neque mittatis margaritas vestras ante porcos.“

*II. Quidnam sibi velit sacramenti vocabulum.*

Principio igitur, quoniam universe de toto genere sacramentorum agendum est, ab ipsis nominis vi atque notione oportet incipere, eiusque ambiguam significationem explanare, ut, quae huius verbi sententia hoc loco propria sit, facilius intelligatur. Quare docendi sunt fideles, sacramenti nomen, quod ad propositam rem attinet, aliter a profanis, quam a sacris scriptoribus acceptum esse. Nam alii auctores sacramenti nomine obligationem illam significari voluerunt, quum iurati aliquo servitutis vinculo obstringimur, ex quo iusurandum, quo se milites fidelem operam reipublicae praestituros pollicentur, sacramentum militare dictum est. Atque haec frequentissima huius vocabuli significatio apud illos videtur fuisse. Verum apud latinos Patres, qui res divinas scriptis tradiderunt, sacramenti nomen aliquam rem sacram, quae in occulto latet, declarat, quemadmodum Graeci ad eandem rem significandam mysterii vocabulo usi sunt. In eam vero sententiam sacramenti vocem accipiendam esse intelligimus, quum ad Ephesios<sup>2)</sup> scribitur: „Ut notum faceret nobis Sacramentum voluntatis sua;“ deinde ad Timotheum<sup>3)</sup>: Magnum est pietatis sacramentum;“ praeterea in libro Sapientiae<sup>4)</sup>: „Ne scierunt sacramenta Dei.“ Quibus in locis et aliis multis li-

<sup>1)</sup> Mat. 7, 6. <sup>2)</sup> Eph. 1, 9. <sup>3)</sup> I. Tim. 3, 16. <sup>4)</sup> Sap. 2, 22. Eph. 5, 22.

cet animadvertere, sacramentum nihil aliud, nisi rem sacram, abditam atque occultam significare.

*III. Sacramenti nomen ad signa sacra significanda a Patribus accommodatum est antiquissimum.*

Quare latini doctores signa quaedam sensibus subiecta, quae gratiam, quam efficiunt, simul etiam declarant ac veluti ante oculos ponunt, sacramenta commode appellari posse existimarunt, quamquam, ut D. Gregorio placet<sup>1)</sup>, ob id sacramenta dici possunt, quod divina virtus sub rerum corporearum tegumentis occulte salutem efficiat. Nec vero quisquam putet, hoc vocabulum nuper in ecclesiam inductum esse; nam qui sanctos Hieronymum et Augustinum legerit, facile perspiciet, antiquos religionis nostrae scriptores ad eam, de qua loquimur, rem demonstrandam saepissime sacramenti nomine, interdum vero etiam symboli, vel mystici signi, vel sacri signi voce usos esse. Atque haec de sacramenti nomine dicta sint; quod quidem veteris etiam legis sacramentis convenient, de quibus nihil opus est pastoribus pracepta tradere, quum ea evangelii lege et gratia sublata sint.

*IV. Quam rem Catholicis scriptoribus proprie denotet sacramentum.*

Verum praeter nominis notionem, quae hactenus declarata est, rei etiam vis et natura diligenter investiganda, et, quid sacramentum sit, fidelibus aperiendum est. Sacmenta enim ex genere earum rerum esse, quibus salus et iustitia comparatur, dubitare nemo potest. Sed quum multae rationes sint, quae ad hanc rem explicandam aptae et accommodatae videantur: nulla tamen planius et dilucidius eam demonstrat, quam definitio a D. Augustino tradita, quam deinde omnes doctores scholastici secuti sunt. „Sacramentum,“ inquit ille<sup>2)</sup>, „est signum rei sacrae,“ vel, ut aliis verbis, in eandem tamen sententiam, dictum est: „Sacramentum est invisibilis gratiae visible signum, ad nostram iustificationem institutum.“

*V. Rerum sensibilium divisio, quidque signi nomine intelligentium sit.*

Quae quidem definitio ut magis pateat, singulae eius partes pastoribus exponendae erunt, atque in primis docere oportebit, rerum omnium, quae sensibus percipiuntur, duo esse genera. Aliae enim ob id inventae sunt, ut aliquid significant; aliae non alterius rei significandae, sed sua tantum causa effectae sunt, quo in numero omnes pene res, quae

<sup>1)</sup> c. 84. c. 1. cit. 1. <sup>2)</sup> De Civ. Dei 10, 5.

natura constant, haberi possunt. At vero in priori genere vocabula rerum, scriptura, vexilla, imagines, tubae et alia huiuscemodi permulta ponenda sunt. Nam si ex vocabulis vim significandi detraxeris, sublata videtur esse causa, quamobrem vocabula instituerentur. Haec igitur signa proprie dicuntur. Illud enim signum esse sanctus Augustinus<sup>1)</sup> testatur, quod praeter rem, quam sensibus obiicit, efficit etiam, ut ex se alterius rei cognitionem capiamus, sicuti ex vestigio, quod terae impressum intuemur, transiisse aliquem, cuius vestigium apparet, facile cognoscimus.

*VI. Quomodo sacramenta in genere signa reponenda sint, ostenditur.*

Quae cum ita se habeant, sacramentum ad hoc rerum genus, quae significandi causa institutae sunt, referri perspicuum est; siquidem specie quadam et similitudine id nobis declarat, quod Deus in animis nostris sua virtute, quae sensu percipi non potest, efficit. Baptismus enim (ut quod docetur exemplo notius fiat) quum adhibitis certis et solemnibus verbis aqua extrinsecus abluiimur, hoc significat, Spiritus sancti virtute omnem peccati maculam et turpitudinem interius elui, et animas nostras praeclaro illo coelestis iustitiae dono augeri atque ornari; simulque ea corporis ablutio, ut postea suo loco explicabitur, illud in animo efficit, quod significat.

*VII. Idem etiam ex scripturis demonstratur.*

Sed ex scripturis etiam aperte colligitur, sacramentum inter signa numerandum esse. Apostolus enim de circumcisione, veteris legis sacramento, quae Abraham, patri omnium credentium, data erat, ita ad Romanos scribit<sup>2)</sup>: „Et signum accepit circumcisionis, signaculum iustitiae fidei.“ Et alio loco, quum affirmat<sup>3)</sup> nos omnes, qui „baptizati sumus in Christo Iesu, in morte ipsius baptizatos esse,“ licet cognoscere, baptismum huius rei significationem habere, nimirum, ut ait idem Apostolus<sup>4)</sup>, „nos conseputos esse cum illo per baptismum in mortem.“ Neque vero parum proderit, si fidelis populus sacramenta ad signa pertinere intellexerit; ita enim fiet, ut, quae illis significantur, continentur atque efficiuntur, sancta et augusta esse facilius sibi persuadeat, cognitaque eorum sanctitate, ad divinam erga nos beneficentiam colendam ac venerandam magis excitetur.

*VIII. Quot sint signorum genera.*

Sequitur nunc, ut verba illa, „rei sacrae,“ quae est altera definitionis pars, explicentur. Quod quidem et commode

<sup>1)</sup> de doctr. Christ. 2, 1. <sup>2)</sup> Rom. 4, 11. <sup>3)</sup> ib. 6, 3. <sup>4)</sup> ib. 4, 11.

fieri possit, paulo altius repetenda sunt, quae de signorum varietate S. Augustinus<sup>1)</sup> acute et subtiliter disputavit. Quaedam enim signa naturalia dicuntur, quae praeter se ipsa alterius rei notitiam (quod omnibus signis commune esse, ante demonstratum est) in animis nostris gignunt, veluti fumus, ex quo statim ignem adesse intelligitur. Atque hoc signum ob eam causam naturale appellandum est, quod fumus non voluntate ignem significat, sed rerum usus efficit, ut, si quis fumum tantum videat, naturam simul et viam ignis, qui adhuc latet, subesse mente et cogitatione percipiat. Quaedam vero signa natura non constant, sed constituta atque ab hominibus inventa sunt, ut et colloqui inter se, et aliis animi sui sensa explicare, vicissimque aliorum sententiam et consilia possent cognoscere. Haec autem quam varia et multiplica sint, ex eo licet animadvertere, quod nonnulla ad oculorum, pleraque ad aurium sensum, reliqua ad ceteros sensus pertineant. Nam quum aliquid alicui innuimus, et, exempli causa, sublato vexillo quippiam declaramus: satis constat, eam significationem ad oculos tantum referri, quemadmodum tubarum, tibiarum, aut citharae sonus, qui non solum delectandi, sed plerumque significandi causa funditur, ad aurium iudicium spectat; quo quidem praecipue sensu verba etiam accipiuntur, quae ad exprimendas intimas animi cogitationes maximam vim habent.

*IX. De signis a Deo institutis tam in veteri quam in novo testamento.*

Verum praeter illa signa, quae hominum consensu et voluntate constituta esse hactenus diximus, alia quaedam sunt divinitus data, quorum tamen non unum genus esse omnes consentiunt. Alia enim signa ob eam tantum rem a Deo hominibus commendata sunt, ut aliquid significant vel admoneant; cuiusmodi fuerunt legis purificationes,<sup>2)</sup> panis azymus, et alia permulta, quae ad Mosaici cultus ceremonias pertinebant. Alia vero Deus instituit, quae non significandi modo, sed efficiendi etiam vim haberent; atque in hoc posteriori signorum genere sacramenta novae legis numeranda esse, liquido apparent. Signa enim sunt divinitus tradita, non ab hominibus inventa, quae rei cuiuspam sacrae, quam declarant, efficientiam in se continere certo credimus.

*X. Res sacra quo modo in definitione sacramenti sit intelligenda.*

Sed quemadmodum signa in multiplice varietate esse ostendimus, ita etiam res sacra non unius modi existimanda est.

<sup>1)</sup> de doctr. Christ. 2, 1. seq. <sup>2)</sup> Ex. 12, 15. 34, 18.

Quod vero ad propositam sacramenti definitionem attinet, divinarum rerum scriptores sacrae rei nomine Dei gratiam, quae nos sanctos efficit, ac omnium divinarum virtutum habitu exornat, demonstrant. Huic enim gratiae propriam sacrae rei appellationem tribuendam merito putarunt, quippe quum eius beneficio animus noster Deo consecretur et coniungatur.

*XI. Sacramenti uberior definitio, et qua ratione a reliquis signis sacris illud differat.*

Quare, ut explicatius, quid sacramentum sit declaretur, docendum erit, rem esse sensibus subiectam, quae ex Dei institutione, sauctitatis et iustitiae tum significandae, tum efficiendae vim habet; ex quo sequitur, ut facile quivis possit intelligere, imagines Sanctorum, cruces et alia id generis, quamvis sacrarum rerum signa sint, non ideo tamen sacramenta dicenda esse. Huius autem veritatis doctrinam facile erit omnium sacramentorum exemplo comprobare, si, quod antea de baptismo admonuimus, quum dicebamus, solemnem illam corporis ablutionem signum esse, et efficientiam habere rei sacrae, quae interius Spiritus sancti vi fieret, idem etiam in aliis sacramentis exercere aliquis velit.

*XII. Sacraenta non unam tantum rem, sed plures significant.*

Iam vero hisce mysticis signis, quae a Deo instituta sunt, illud etiam praecipue convenit, ut ex Domini institutione non unam aliquam rem, sed plures simul significant. Quod in singulis sacramentis licet cognoscere, quae non solum sanctitatem et iustitiam nostram, sed praeterea duo alia cum ipsa sanctitate maxime coniuncta declarant, Christi scilicet redemptoris passionem, quae sanctitatis causa est, et vitam aeternam, coelestemque beatitudinem, ad quam sanctitas nostra tanquam ad finem referri debet. Quod quidem quum in omnibus sacramentis perspici possit, merito sacri doctores unicuique sacramentorum triplicem significandi vim inesse tradiderunt, tum quia alicuius rei praeteritiae memoriam afferat, tum quia aliam praesentem iudicet ac demonstret, tum quia aliam futuram praeannunciet. Neque vero existimandum est, hoc ita ab illis doceri, ut etiam sanctorum Scripturarum testimonio non probetur. Nam quum Apostolus ait<sup>1)</sup>: „Quicunque baptizati sumus in Christo Iesu, in morte ipsius baptizati sumus,“ plane ostendit, idcirco baptismum signum dicendum esse, quod dominicae passionis et mortis nos admoneat. Deinde quum inquit<sup>2)</sup>:

<sup>1)</sup> Rom. 6, 3. <sup>2)</sup> ib. 4.

„Conseulti enim sumus cum illo per baptismum in mortem, ut, quo modo Christus surrexit a mortuis per gloriam Patris, ita et nos in novitate vitae ambulemus:“ ex his verbis perspicuum est, baptismum signum esse, quo coelestis gratia in nos infusa declaratur; cuius munere nobis datum est, ut novam vitam instituentes omnia verae pietatis officia facile et libenti animo exsequamur. Postremo quum addit<sup>1)</sup>: „Si enim complantati facti sumus similitudini mortis eius, simul et resurrectionis erimus:“ appetat baptismum vitae etiam aeternae, quam per illum consecuturi sumus, non obscuram significacionem dare.

*XIII. Sacramentum non unam tantum praesentem rem, sed plures designat.*

Sed praeter haec, quae commemoravimus, varia significandi genera et rationes saepe etiam evenit, ut sacramentum non unam tantum rem praesentem, sed plures demonstret ac notet. Id vero sanctissimum eucharistiae sacramentum intuentibus facile est intelligere, quo veri corporis et sanguinis Domini praesentia, nec non gratia, quam non impure sacra mysteria sumentes percipiunt, designatur. Ex iis igitur, quae dicta sunt, pastoribus argumenta deesse non poterunt, quibus ostendant, quanta divinitatis potentia, quot arcana miracula sacramentis novae legis insint, ut, ea summa cum religione colenda et suscipienda esse, omnibus persuadeant.

*XIV. Cur sacramenta institui apud Christianos oportuerit.*

Verum ad rectum sacramentorum usum docendum nihil accommodatius videri potest, quam diligenter causas exponere, cur sacramenta institui oportuerit. Plures autem numerari solent, quarum prima est humani ingenii imbecillitas; siquidem natura ita comparatum videmus, ut ad earum rerum notitiam, quae mente atque intelligentia comprehensae sunt, nisi per ea, quae aliquo sensu percipiuntur, nemini aspirare liceat. Ut igitur quae occulta Dei virtute efficiuntur facilius intelligere possemus, idem summus rerum omnium artifex sapientissime fecit, ut eam ipsam virtutem aliquibus signis, quae sub sensum cadunt, pro sua in nos benignitate declararet. Nam ut praecclare a S. Chrysostomo<sup>2)</sup> dictum est, si homo corporis concretione caruisset, nuda ipsa bona neque illis integumentis involuta ei oblata essent; quoniam vero anima corpori coniuncta est, omnino opus fuit, ut rerum, quae sentiuntur, administriculo ad ea intelligenda uteretur. Altera vero causa est,

<sup>1)</sup> Rom. 6, 5. <sup>2)</sup> Homil. 82. in Mat.

quod animus noster haud facile commovetur ad ea, quae nobis promittuntur, credenda. Quare Deus a mundi exordio, quae facere instituerat, verbis quidem frequentissime indicare consuevit; interdum vero, quum opus aliquod institueret, cuius magnitudo promissi fidem abrogare posset, alia etiam signa, quae nonnunquam miraculi speciem haberent, verbis adiunxit. Nam quum Deus<sup>1)</sup> Moysen ad Israelitici populi liberationem mitteret, ille vero, ne Dei quidem praecipientis auxilio fretus, timeret, ne onus sibi gravius imponeretur, quam ut sustinere posset, aut ne populus divinis oraculis et dictis fidem non adiungeret: Dominus promissionem suam multa signorum varietate firmavit. Quemadmodum igitur in veteri Testamento Deus fecerat, ut magni alicuius promissi constantiam signis testificaretur: ita etiam in nova lege Christus salvator noster, quum nobis peccatorum veniam, coelestem gratiam, Spiritus sancti communicationem pollicitus est, quaedam signa oculis et sensibus subiecta instituit, quibus eum quasi pignoribus obligatum haberemus, atque ita fidelem in promissis futurum dubitare nunquam possemus. Tertia causa fuit, ut illa tanquam remedia, ut scribit sanctus Ambrosius, atque evangelici Samaritani<sup>2)</sup> medicamenta, ad animarum sanitatem vel recuperandam vel tuendam praesto essent. Virtutem enim, quae ex passione Christi manat, hoc est gratiam, quam ille nobis in ara crucis meruit, per sacramenta, quasi per alveum quemdam, in nos ipsos derivare oportet; aliter vero nemini ulla salutis spes reliqua esse poterit. Quare clementissimus Dominus sacramenta verbo suo et promissione sancita relinquere in ecclesia voluit, per quae passionis suae fructum nobis re ipsa communicari sine dubitatione crederemus, si modo unusquisque nostrum ad se eam curationem pie et religiose admoveret. Sed quarta etiam causa accedit, cur sacramentorum institutio necessaria videri possit, ut scilicet notae quaedam et symbola essent, quibus fideles internoscerentur; quum praesertim nullus hominum coetus queat, ut etiam a D. Augustino<sup>3)</sup> traditum est, sive verae sive falsae religionis nomine, quasi in unum corpus coagamenti, nisi aliquo visibilium signorum foedere coniungantur. Utrumque igitur praestant novae legis sacramenta, quae et Christianae fidei cultores ab infidelibus distinguunt, et ipsos fideles sancto quodam vinculo inter se connectunt. Praeterea etiam iustissimam fuisse causam sacramenta instituendi, ex illis Apostoli verbis<sup>4)</sup>:

<sup>1)</sup> Ex. 3, 10. seq. <sup>2)</sup> De Sacram. 1, 5. c. 4. <sup>3)</sup> Cont. Faust. 1, 19. c. 11. <sup>4)</sup> Rom. 10, 10.

„Corde creditur ad iustitiam, ore autem confessio fit ad salutem,“ ostendi potest. Sacramentis enim fidem nostram in hominum conspectu profiteri, et notam facere videmur. Quare ad baptismum accedentes palam testamur, nos credere eius aquac virtute, qua in sacramento abluiur, spiritualem animae purgationem fieri. Magnam deinde vim habent sacramenta non solum ad fidem in animis nostris excitandam et excedendam, sed etiam eam caritatem inflammandam, qua amare inter nos debemus, quum, arctissimo nos vinculo colligatos et unius corporis membra effectos esse, ex sacrorum mysteriorum communione recordamur. Postremo, quod in Christianae pietatis studio plurimi faciendum est, humanae mentis superbiam edomant ac comprimunt, nosque ad humilitatem exercent, dum sensibilibus elementis subiictere nos cogimur, ut Deo obtemperemus, a quo antea impie defeceramus, ut mundi elementis serviremus. Haec sunt, quae potissimum de sacramenti nomine, natura, institutione, fidei populo tradenda esse visa sunt; quae posteaquam a pastoribus accurate exposita fuerint, docere deinceps oportebit, quibus ex rebus singula sacramenta constent, quaeque sint illorum partes, ac praeterea, qui ritus et caeremoniae additae illis fuerint.

*XV. Partes ad constituendum unumquodque sacramentum necessariae.*

Primum igitur explicandum est, reni sensibilem, quae supra in sacramenti definitione posita est, non unam tantum esse, quamvis unum signum constitui credendum sit. Duo enim sunt, ex quibus quodlibet sacramentum conficitur, quorum alterum materiae rationem habet, atque elementum dicitur, alterum formae vim, et verbum communi vocabulo appellatur. Sic enim a Patribus accepimus. Qua in re notum est atque apud omnes perulgatum illud sancti Augustini testimonium<sup>1)</sup>: „Accedit verbum ad elementum, et fit sacramentum.“ Rei igitur sensibilis nomine tum materiam sive elementum intelligunt, ut in sacramento baptismi aquam, confirmationis chrisma, et extremae unctionis oleum, quae omnia sub aspectum cadunt; tum praeterea verba, quae formae rationem habent, atque ad aurium sensum pertinent. Apostolus vero utrumque aperte indicavit, quum inquit<sup>2)</sup>: „Christus dilexit ecclesiam, et se ipsum tradidit pro ea, ut illam sanctificaret, mundans eam lavacro aquae in verbo vitae.“ Quo in loco materia et forma sacramenti exprimitur.

<sup>1)</sup> Tract. 80. in Io. <sup>2)</sup> Eph. 5, 25. seq.

*XVI. Cur elemento verba addita fuerint.*

Addenda autem erant verba ad materiam, ut apertior clariorque rei, quae gerebatur, significatio fieret. Verba enim inter omnia signa maximam vim habere perspicuum est, ac, si ipsa desint, plane obscurum erit, quidnam materia sacramentorum designet ac demonstret. Nam, ut in baptismo licet videre, quum aqua non minus refrigerandi quam abluendi vim habeat, et utriusque rei symbolum esse possit, nisi verba addantur, utrum horum in baptismo significet, aliquis fortasse coniectura aliqua diiudicabit, nemo autem ea de re quippiam certi affirmare audebit; at, quum verba adhibentur, statim intelligimus, ablucndi vim et significationem habere.

*XVII. Excellentia sacramentorum novae legis.*

In hoc autem nostra sacramenta antiquae legis sacramentis plurimum praestant, quod in illis administrandis nulla, quod quidem acceperimus, definita forma servaretur; quo etiam fiebat, ut incerta admodum et obscura essent; nostra vero formam verborum ita praecriptam habent, ut, si forte ab ea discedatur, sacramenti ratio constare non possit, ob eamque rem clarissima sunt, ac nullum relinquunt dubitandi locum. Hae igitur sunt partes, quae ad naturam et substantiam sacramentorum pertinent, et ex quibus unumquodque sacramentum necessario constituitur.

*XVIII. Quae sit caeremoniarum in sacramentis virtus et natura.*

His accedunt caeremoniae, quae tametsi praetermitti sine peccato non possunt, nisi aliud facere ipsa necessitas cogat, tamen, si quando omittantur, quoniam rei naturam non attin-gunt, nihil de vera sacramenti ratione imminui credendum est. Ac merito quidem a primis usque ecclesiae temporibus illud semper servatum est, ut sacramenta solemnibus quibusdam cae-remoniis ministrarentur. Primum enim maxime decuit, sacris mysteriis eum religionis cultum tribuere, ut sancta sancte tractare videremur. Praeterea, quae sacramento efficiuntur, cae-remoniae ipsae magis declarant ac veluti ante oculos ponunt, et earum rerum sanctitatem in animos fidelium altius imprimit. Deinde vero mentes illorum, qui eas intuentur, et diligenter observant, ad sublimum rerum cogitationem erigunt, fidemque in eis et caritatem excitant; quo maior cura et diligentia adhibenda erit, ut fideles vim caeremoniarum, quibus singula sa-cramenta conficiuntur, cognitam et perspectam habeant.

*XIX. Quot sint catholicae ecclesiae sacramenta.*

Sequitur ut sacramentorum etiam numerus explicetur, quae quidem cognitio hanc utilitatem affert, quod populus eo maiori

pietate omnes animi sui vires ad laudandam et praedicandam Dei erga nos singularem beneficentiam convertet, quo plura salutis ac beatae vitae adiumenta nobis divinitus parata esse intellexerit. Catholicae igitur ecclesiae sacramenta, quemadmodum ex scripturis probatur, et Patrum traditione ad nos pervenit, et conciliorum testatur auctoritas, septenario numero definita sunt.

*XX. Cur nec maiori nec minori numero sacramenta concludantur.*

Cur autem neque plura neque pauciora numerentur, ex iis etiam rebus, quae per similitudinem a naturali vita ad spiritualem transferuntur, probabili quadam ratione ostendi poterit. Homini enim ad vivendum, vitamque conservandam et ex sua reique publicae utilitate traducendam, haec septem necessaria videntur, ut scilicet in lucem edatur, augeatur, alatur; si in morbum incidat, sanetur; imbecillitas virium reficiatur; deinde, quod ad rem publicam attinet, ut magistratus nunquam desint, quorum auctoritate et imperio regatur; ac postremo legitima sobolis propagatione se ipsum et humanum genus conservet. Quae omnia, quoniam vitae illi, qua anima Deo vivit, respondere satis appetet, ex iis facile sacramentorum numerus colligetur.

*XXI. Septem sacramenta esse ex scripturis demonstratur.*

Primus enim est baptismus, veluti ceterorum ianua, quo Christo renascimur. Deinde confirmatio, cuius virtute fit, ut divina gratia augeamur et roboremur; baptizatis enim iam Apostolis, ut D. Augustinus<sup>1)</sup> testatur, inquit Dominus<sup>2)</sup>: „Sedete in civitate, donec induamini virtute ex alto.“ Tum eucharistia, qua tanquam cibo vere coelesti spiritus noster alitur et sustinetur. De ea enim dictum est a Salvatore<sup>3)</sup>: „Caro mea vere est cibus, et sanguis meus vere est potus.“ Sequitur quarto loco poenitentia, cuius ope sanitas amissa restituitur, postquam peccati vulnera accepimus. Postea vero extrema unctionio, qua peccatorum reliquiae tolluntur, et animi virtutes recreantur; siquidem D. Iacobus, quum de hoc sacramento loqueretur, ita testatus est<sup>4)</sup>: „Et si in peccatis sit, remittentur ei.“ Sequitur ordo, quo publica sacramentorum ministeria perpetuo in ecclesia exercendi, sacrasque omnes functiones exse- quendi potestas traditur. Postremo additur matrimonium, ut ex maris et feminae legitima et sancta coniunctione filii ad Dei cultum et humani generis conservationem procreentur, et religiose eduentur.

<sup>1)</sup> Epist. 265. <sup>2)</sup> Luc. 24, 49. <sup>3)</sup> Act. 1, 8. <sup>4)</sup> Io. 6, 56. <sup>4)</sup> Iac. 5, 15.

*XXII. Aequalis non est omnium sacramentorum vel necessitas,  
vel dignitas.*

Illud vero maxime animadvertendum est, quamvis omnia sacramenta divinam et admirabilem virtutem in se contineant, tamen non parem omnia, et aequalem necessitatem, aut dignitatem, aut unam eandemque significandi vim habere. Atque ex iis tria sunt, quae, tametsi non eadem ratione, tamen prae ceteris necessaria dicuntur. Baptismum enim unicuique sine ulla adiunctione necessarium esse, Salvator his verbis declaravit<sup>1</sup>): „Nisi quis renatus fuerit ex aqua et Spiritu sancto, non potest introire in regnum Dei.“ Poenitentia vero illis tantummodo necessaria est, qui se post baptismum aliquo mortali peccato obstrinxerunt; neque enim aeternum exitium effugere poterunt, nisi eos admissi peccati rite poenituerit. Ordo praeterea, etsi non singulis fidelibus, toti tamen ecclesiae omnino necessarius est. Verum si dignitas in sacramentis spectetur, eucharistia sanctitate et mysteriorum numero ac magnitudine longe ceteris antecellit. Quae omnia facilius intelligentur, quum suo loco ea, quae ad singula sacramenta pertinent, explicabuntur.

*XXIII. A quo haec sacra et divina mysteria sint accepta, principaliterque dispensentur.*

Deinceps videndum est, a quo haec sacra et divina mysteria acceperimus; neque enim dubitandum est, quin praeclari alicuius muneris dignitas eius, a quo „donum ipsum“ profectum est, dignitate et praestantia quam maxime augeatur. Sed ea quaestio difficilem explicationem habere non potest. Nam quum Deus sit, qui homines iustos efficiat, ipsa vero sacramenta iustitiae adipiscendae mirifica quaedam instrumenta sint: patet, unum eundemque Deum in Christo iustificationis et sacramentorum auctorem agnoscendum esse. Praeterea sacramenta eam vim et efficientiam continent, quae ad intimam animam penetrat. Quum vero unius Dei potentiae proprium sit, in corda et mentes hominum illabi, ex hoc etiam perspicitur, sacramenta a Deo ipso per Christum instituta esse, quemadmodum ab eo quoque intus dispensari, certa et constanti fide tenendum est. Hoc enim testimonium de illo se accepisse sanctus Ioannes affirmat, quum ait<sup>2</sup>): „Qui misit me baptizare in aqua, ille mihi dixit: Super quem videris Spiritum descendenter et manentem super eum, hic est, qui baptizat in Spiritu sancto.“

<sup>1)</sup> Io. 3, 5. <sup>2)</sup> Io. 1, 33.

*XXIV. Quibus ministris utatur Deus in sacramentis dispensandis.*

Sed quamvis Deus sacramentorum auctor et dispensator sit, ea tamen non per angelos, verum per homines ministrari in ecclesia voluit; non minus enim ministrorum officio, quam materia et forma ad sacramenta conficienda opus esse, perpetua sanctorum Patrum traditione confirmatum est.

*XXV. Minister sua pravitate gratiae sacramentalis virtutem impedire non potest.*

Atque hi quidem ministri, quoniam in sacra illa functione non suam, sed Christi personam gerunt, ea re fit, ut, sive boni sive mali sint, ea modo forma et materia utantur, quam ex Christi instituto semper ecclesia catholica servavit, idque facere proponant, quod ecclesia in ea administratione facit, vere sacramenta conficiant et conferant, ita ut gratiae fructum nulla res impedire possit, nisi, qui ea suscipiunt, se ipsos tanto bono fraudare, et Spiritui sancto velint obsistere. Hanc vero in ecclesia certam et exploratam sententiam semper fuisse, S. Augustinus in iis disputationibus, quas adversus Donatistas<sup>1)</sup> conscripsit, clarissime demonstravit. Quod si etiam scripturae testimonia quaerimus, ipsum Apostolum his verbis loquentem audiamus: „Ego,“ inquit<sup>2)</sup> „plantavi, Apollo rigavit; sed Deus incrementum dedit. Itaque neque qui plantat est aliquid, neque qui rigat, sed qui incrementum dat, Deus.“ Ex quo loco satis intelligitur, quemadmodum arboribus nihil obest eorum improbitas, quorum manu satae sunt: ita nihil vitii aliena culpa contrahi ab illis posse, qui malorum hominum ministerio Christo insiti sunt. Quare, ut ex D. Ioannis evangelio<sup>3)</sup> sancti Patres nostri docuerunt, Iudas etiam Iscariotes plures baptizavit, ex quibus tamen neminem iterum baptizatum fuisse legitimus, ita ut praecclare D. Augustinus scriptum reliquerit<sup>4)</sup>: „Dedit baptismum Iudas, et non baptizatum est post Iudam, dedit Ioannes, et baptizatum est post Ioannem, quia, si datum est a Iuda, „baptisma Christi“ erat; quod autem a Ioanne datum est, „Ioannis“ erat; non Iudam Ioanni, sed baptismum Christi, etiam per Iudei manus datum, baptismo Ioannis, etiam per manus Ioannis dato, recte praeponimus.“

*XXVI. Quid de illis sentiendum sit, qui impura conscientia sacramenta administrant.*

Neque vero pastores aliive sacramentorum ministri, quum haec audiunt, satis sibi esse arbitrentur, si, posthabita morum integritate ac conscientiae munditia, illud tantum cogitent,

<sup>1)</sup> I. 3. c. 10. I. 4. c. 4. I. 5. c. 19. <sup>2)</sup> I. Cor. 3. 6. seq. <sup>3)</sup> 4. 2. <sup>4)</sup> Tract. in Io. 5.

quo modo sacramenta ab illis rite ministrantur; id enim etsi diligenter curandum est, in hoc tamen omnia, quae ad eam functionem pertinent, posita non sunt. Meminisse autem semper debent, sacramenta divinam quidem virtutem, quae illis inest, nunquam amittere, at vero impure ea ministrantibus aeternam perniciem et mortem afferre. Sancta enim, quod semel atque iterum ac saepius admonere oportet, sancte et religiose tractanda sunt. „Peccatori,“ ut est apud Prophetam<sup>1)</sup>), „dixit Deus: Quare tu enarras iustias meas, et assumis testamentum meum per os tuum? tu vero odisti disciplinam.“ Quod si homini peccatis contaminato minus licet de rebus divinis agere, quantum ab eo scelus concipi existimandum erit, qui sibi multorum scelerum conscientia est, nec tamen sacra mysteria polluto ore confidere, vel in foedas manus sumere, contrectare, atque aliis porrigitur et ministrare vereatur? Quum praesertim apud S. Dionysium<sup>2)</sup> scriptum sit, malis symbola (ita enim sacramenta appellat) ne contingere quidem permisum esse. Sanctitatem igitur sacrarum rerum ministri in primis sectentur, pure ad sacramenta ministranda accedant, atque ita se ad pietatem exerceant, ut ex eorum frequenti tractatione et usu uberiorem in dies gratiam adiuvante Deo consequantur.

#### *XXVII. De duobus praecipuis sacramentorum effectibus.*

Sed iam his rebus explicatis docendum erit, quinam sacramentorum effectus sit; id enim sacramenti definitioni, quae supra tradita est, non parum lucis allaturum videtur. II autem duo praecipue numerantur. Ac principalem quidem locum merito gratia illa obtinet, quam usitato a sacris doctoribus nomine „iustificantem“ vocamus; ita enim Apostolus apertissime nos docuit<sup>3)</sup>), quum inquit, Christum dilexisse ecclesiam, et se ipsum tradidisse pro ea; ut illam sanctificaret, mundans eam lavacro aquae in verbo vitae. Quo autem pacto tanta res et tam admirabilis per sacramentum efficiatur, ut, quemadmodum S. Augustini<sup>4)</sup> sententia celebratum est, aqua corpus abluit, et cor tangat: id quidem humana ratione atque intelligentia comprehendi non potest. Constitutum enim esse debet, nullam rem sensibilem suapte natura ea vi praeditam esse, ut penetrare ad animam queat. At fidei lumine cognoscimus, omnipotentis Dei virtutem in sacramentis inesse, qua id efficiant, quod sua vi res ipsae naturales praestare non possunt.

<sup>1)</sup> Ps. 49, 16. seq. <sup>2)</sup> De eccles. hierarch. c. 1. <sup>3)</sup> Eph. 5, 25. seq. <sup>4)</sup> Tract. 80. in Io.

*XXVIII. Quomodo effectus sacramenti initio nascentis ecclesiae sint mirabiliter designati.*

Quocirca, ne ulla unquam huius effectus dubitatio in animis fidelium resideret, quum ministrari sacramenta coeptum est, voluit clementissimus Deus, quid illa interius efficerent, miraculorum significationibus declarare, ut eadem perpetuo interius fieri constantissime crederemus, quavis longe a nostris sensibus remota essent. Itaque ut omittamus, Salvatori nostro in Iordane baptizato coelos apertos esse, et Spiritum sanctum columbae specie apparuisse, ut admoneremur, eius gratiam, quum salutari fonte abluimur, in animam nostram infundi, ut hoc, inquam, omittamus, (magis enim ad baptismi significationem, quam sacramenti administrationem pertinet): nonne legimus, quum Pentecostes die Apostoli Spiritum sanctum acceperunt, quo deinde ad praedicandam fidei veritatem, adeundaque pro Christi gloria pericula alacriores et fortiores fuerunt, tunc<sup>1)</sup> „facto repente de coelo sonitu, tanquam advenientis spiritus vehementis, apparuisse illis dispertitas linguis quasi ignis?“ Ex quo intellectum est, sacramento confirmationis eundem nobis spiritum tribui, easque vires addi, quibus possimus carni, mundo et satanae, perpetuis scilicet hostibus nostris, fortiter repugnare et resistere. Atque haec miracula, quoties Apostoli sacramenta ista ministrarent, initio nascentis ecclesiae aliquamdiu visa sunt, donec firmata iam fide et corroborata fieri desierunt.

*XXIX. Quanta sit sacramentorum novae legis supra veteris legis sacramenta excellentia.*

Ex iis igitur, quae de priori sacramentorum effectu, gratia scilicet iustificante, demonstrata sunt, illud etiam plane constat, excellentiorem et praestantiorum vim sacramentis novae legis inesse, quam olim veteris legis sacramenta habuerunt, quae, quum infirma<sup>2)</sup> essent egenaque elementa, inquinatos<sup>3)</sup> sanctificabant ad emundationem carnis, non animae. Quare, ut signa tantum earum rerum, quae mysteriis nostris efficiendae essent, instituta sunt. At vero sacramenta novae legis, ex Christi latere manantia, „qui<sup>4)</sup> per Spiritum sanctum semetipsum obtulit immaculatum Deo, emundant conscientiam nostram ab operibus mortuis, ad serviendum Deo viventi,“ atque ita eam gratiam, quam significant, Christi sanguinis virtute operantur. Quocirca, si ea cum antiquis sacramentis conferamus, praeterquam, quod plus efficacie habent, et utilitate uberiora et sanctitate augustiora esse invenientur.

<sup>1)</sup> Act. 2, 2. seq. <sup>2)</sup> Gal. 4, 9. <sup>3)</sup> Hebr. 9, 13. <sup>4)</sup> Hebr. 9, 14.

*XXX. Quae sacramenta characterem imprimant, et quid sit character.*

Alter vero sacramentorum effectus non quidem omnibus communis, sed trium tantummodo proprius, baptismi, confirmationis, et ordinis sacri, est character, quem animae imprimitur. Nam quum Apostolus<sup>1)</sup> ait: „Unxit nos Deus, qui et signavit nos, et dedit pignus Spiritus in cordibus nostris,“ voce illa „signavit“ non obscure characterem descriptis, cuius proprium est aliquid signare et notare. Est autem character veluti insigne quoddam animae impressum, quod deleri nunquam potest, eique perpetuo inhaeret, de quo ita apud S. Augustinum<sup>2)</sup> scriptum est: „An minus forte sacramenta Christiana, quam corporalis haec nota, qua scilicet miles insignitur, poterunt? Illa namque militi ad militiam, quam deseruisset, revertenti non nova imprimitur, sed antiqua cognoscitur et approbat.“

*XXXI. Quis sit characteris effectus, et quomodo sacramenta characterem imprimentia iterari non debeant.*

Iam vero character hoc praestat, tum ut apti ad aliquid sacri suscipiendum vel peragendum efficiamur, tum ut aliqua nota alter ab altero internoscatur. Ac baptismi quidem charactere utrumque consequimur, ut ad alia sacramenta percipienda reddamur idonei, et eo praeterea fidelis populus a gentibus, quae fidem non colunt, distinguatur. Idem autem in charactere confirmationis et sacri ordinis licet agnosceret; quorum altero, veluti Christi milites, ad eius nominis publicam confessionem et propugnationem, ac contra insitum nobis hostem et spiritualia nequitiae in coelestibus armamur atque instruimur, simulque ab iis, qui nuper baptizati,<sup>3)</sup> tanquam modo geniti infantes sunt, discernimur; alter vero, tum potestatem sacramenta conficiendi et ministrandi coniunctam habet, tum eorum, qui huiusmodi potestate praediti sunt, a reliquo fidelium coetu distinctionem ostendit. Tenenda igitur est catholicae ecclesiae regula, qua docemur, tria haec sacramenta characterem imprimere, neque ullo unquam tempore iteranda esse.

*XXXII. Quibus rationibus assequentur pastores, ut populus sacramenta veneretur, et his religiose utatur.*

Haec sunt, quae generatim de sacramentis tradenda erunt. In cuius argumenti explicatione pastores duo potissimum efficere omni studio conentur. Primum est, ut fideles intelligent, quanto honore et cultu et veneratione haec divina et

<sup>1)</sup> II. Cor. 1, 21. seq. <sup>2)</sup> Tract. 6. in Io. et 1. l. c. Cresc. 1, 30. <sup>3)</sup> I. Petr. 2, 2.

coelestia munera digna sint; alterum vero, ut, quoniam a clementissimo Deo ad communem omnium salutem proposita sunt, iis pie et religiose utantur, atque ita Christianae perfectionis desiderio exardescant, ut, si poenitentiae praesertim et eucharistiae saluberrimo usu aliquamdiu careant, plurimum damni se fecisse existiment. Haec autem facile pastores assequi poterunt, si, quae de sacramentorum divinitate et fructu supra dicta sunt, auribus fidelium saepius inculcabunt: primum, a Domino salvatore nostro, a quo nihil nisi perfectissimum profici potest, instituta esse; praeterea, quum ministrantur, Spiritus sancti intima cordis nostri permeantis efficacissimum numen praesto esse; deinde admirabili et certa curandarum animarum virtute praedita esse; tum, per ea immensas illas dominicae passionis divitias ad nos derivari. Postremo vero ostendant, totum Christianum aedificium firmissimo quidem lapidis angularis fundamento inniti, verum, nisi verbi Dei prædicatione et sacramentorum usu undique fulciatur, magnopere verendum esse, ne magna ex parte labefactatum concidat; ut enim per sacramenta in vitam suscipimus, ita hoc veluti pabulo alimur, conservamur, augemur.

## CAPUT II.

### De Baptismi Sacramento.

#### I. Cur expediat doctrinam baptismi frequenter populis fidelibus inculcari.

Ex iis quidem, quae hactenus de sacramentis universe tradita sunt, cognosci potest, quam necessarium sit ad Christianae religionis vel doctrinam percipiendam, vel pietatem exercendam, ea intelligere, quae de illorum singulis credenda catholica ecclesia proponit; sed si quis diligentius Apostolum legerit, sine dubitatione ita statuet, perfectam baptismi cognitionem a fidelibus magnopere requiri, adeo non solum frequenter, sed gravibus verbis et Spiritu Dei plenis eius mysterii memoriam renovat, divinitatem commendat, atque in eo Redemptoris nostri mortem, sepulturam et resurrectionem nobis ante oculos tum ad contemplandum, tum ad imitandum constituit. Quare pastores nunquam se satis multam operam et studium in huius sacramenti tractatione collocasse arbitrentur.  
 II. Quando potissimum parocho sermo de baptismo sit insti-tuendus.

Verum praeter eos dies, in quibus more maiorum divina baptismi mysteria potissimum explananda essent, in sabbato

magnō Paschae et Pentecostes, quo tempore ecclesia summa cum religione maximisque caeremoniis hoc sacramentum celebrare consueverat, aliis etiam diebus occasionem captent de hoc argumento disserendi. Atque illud in primis tempus maxime oportunum ad eam rem videri poterit, si interdum, quum baptismus alicui ministrandus sit, fidelis populi multitudinem convenisse animadverterint; tunc enim facilius multo erit, si minus liceat omnia capita, quae ad hoc sacramentum attinent, perseQUI, unum saltem aut alterum docere, quum fideles eorum rerum doctrinam, quam auribus percipiunt, simul etiam sacris baptismi caeremoniis expressam vident, pioque et attento animo contemplantur. Ex quo deinde fiet, ut unusquisque iis rebus admonitus, quas in alio geri videat, secum recordetur, qua se sponsione Deo obligaverit, quum baptismo initiatus est; simulque illud cogitet, an vita et moribus talem se praebeat, qualem ipsa Christiani nominis professio pollicetur. Ut igitur quae docenda erunt dilucide exponantur, quaenam sit baptismi natura et substantia, aperiendum est, si prius tamen ipsius vocis significatio explicetur.

### *III. Quid baptismi nomen proprie denotet.*

Ac baptismum quidem graecum esse nomen, nemo ignorat; quod etsi in sacris literis non solum eam ablutionem, quae cum sacramento coniuncta est,<sup>1)</sup> sed etiam omne ablutionis genus, quod aliquando ad passionem translatum est, significat: tamen apud ecclesiae scriptores non quamvis corporis ablutionem declarat, sed eam, quae cum sacramento coniungitur, nec sine praescripta verborum forma ministratur; qua quidem significatione Apostoli ex Christi Domini instituto frequentissime usi sunt.

### *IV. Quibus praeterea nominibus ablutionem sacramentalem Patres expresserint.*

Alia quoque nomina ad eandem rem significandam sancti Patres usurparunt. Sacramentum enim fidei appellari, quod illud suscipientes universam Christianae religionis fidem profiteantur, D. Augustinus<sup>2)</sup> testatur. Alii vero, quia fide corda nostra illuminantur, quam in baptismo profitemur, hoc sacramentum illuminationem vocarunt. Nam et Apostolus<sup>3)</sup> ita inquit: „Rememoramini pristinos dies, in quibus illuminati magnum certamen sustinuitis passionum;“ tempus nimirum, quo baptizati erant, significans. Chrysostomus praeterea in oratione, quam ad baptizandos habuit, tum expurgationem, quia

<sup>1)</sup> II. Esd. 4, 23. Marc. 7, 4. 10, 38. <sup>2)</sup> Epist. 98, 8. <sup>3)</sup> Hebr. 10, 32.

per baptismum expurgamus vetus fermentum, ut simus nova conspersio, tum sepulturam, tum plantationem, tum crucem Christi nominat; quarum omnium appellationum causam ex epistola ad Romanos scripta licet colligere. Cur autem D. Dionysius<sup>1)</sup> principium sanctissimorum mandatorum vocaverit, perspicuum est, quum hoc sacramentum veluti ianua sit, qua in Christianae vitae societatem ingredimur, atque ab eo divinis paeceptis obtemperandi initium facimus. Atque haec de nomine breviter exponenda erunt.

#### *V. Quae sit baptismi definitio.*

Quod autem ad rei definitionem attinet, etsi multae ex sacris scriptoribus afferri possunt, illa tamen aptior et commodior esse videtur, quam ex verbis Domini apud Ioannem, et Apostoli ad Ephesios licet intelligere; nam quum Salvator<sup>2)</sup> dicat: „Nisi quis renatus fuerit ex aqua et Spiritu sancto, non potest introire in regnum Dei,“ et Apostolus, quum de ecclesia loqueretur<sup>3)</sup>: „Mundans eam lavacro aquae in verbo“: ita fit, ut recte et apposite definiatur, baptismum esse sacramentum regenerationis per aquam in verbo. Natura enim ex Adam filii irae nascimur, per baptismum vero in Christo filii misericordiae renascimur; siquidem<sup>4)</sup> „dedit hominibus potestatem filios Dei fieri, iis, qui credunt in nomine eius, qui non ex sanguinibus, neque ex voluntate carnis, neque ex voluntate viri, sed ex Deo nati sunt.“

#### *VI. Qua ratione baptismi sacramentum perficiatur.*

Sed quibuscumque tandem verbis baptismi naturam explicari contigerit, docendus erit populus, hoc sacramentum confici ablutione, cui ex Domini salvatoris instituto certa et solemnia verba necessario adhibentur; quemadmodum semper sancti Patres docuerunt. Quod apertissimo illo divi Augustini testimonio demonstratur<sup>5)</sup>: „Accedit verbum ad elementum, et fit Sacramentum.“ Id vero eo diligentius monere oportebit, ne forte fideles in eum errorem inducantur, ut existiment, quod vulgo dici solitum est, aquam ipsam, quae ad conficiendum baptismum in sacro fonte asservatur, sacramentum esse. Tunc enim sacramentum baptisci dicendum est, quum aqua ab abluendum aliquem, additis verbis, quae a Domino instituta sunt, re ipsa utimur. Iam vero quoniam singula sacramenta ex materia et forma constitui initio diximus, quum generatim de omnibus Sacramentis ageretur: idcirco, quae utraque sit in baptismo, a pastoribus declarandum erit.

<sup>1)</sup> de eccles. hierar. c. 2. Rom. 6, 4. I. Cor. 5, 7. <sup>2)</sup> Io. 3, 5. <sup>3)</sup> Eph. 5, 26.  
<sup>4)</sup> Io. 1, 12. seq. <sup>5)</sup> Tract. 80. in Io.

*VII. Quae sit propria baptismi materia.*

Materiam igitur sive elementum huius sacramenti esse omne naturalis aquae genus, sive ea maris sit, sive fluvii, sive paludis, sive putei, aut fontis, quae sine ulla adiunctione aquadici solet. Nam et Salvator docuit<sup>1)</sup>: „Nisi quis renatus fuerit ex aqua et Spiritu sancto, non potest introire in regnum Dei;“ et Apostolus<sup>2)</sup> inquit: Ecclesiam lavacro aquae mundatam esse; et in B. Ioannis epistola scriptum legimus<sup>3)</sup>: „Tres sunt, qui testimonium dant in terra, Spiritus, aqua et sanguis.“ Quod etiam aliis sacrarum literarum testimoniois comprobatur.

*VIII. Locus D. Matthei de baptismo ignis exponitur.*

Quod vero a Ioanne Baptista dictum est<sup>4)</sup>, venturum esse Dominum, qui baptizaret „in Spiritu sancto et igne,“ id quidem nullo modo de baptismi materia intelligendum est, sed vel ad intimum Spiritus sancti effectum, vel certe ad miraculum referri debet, quod die Pentecostes<sup>5)</sup> apparuit, „quum Spiritus sanctus e coelo“ in Apostolos „ignis specie delapsus est;“ de quo alio loco Christus Dominus noster praedixit<sup>6)</sup>: „Ioannes quidem baptizavit aqua, vos autem baptizabimini Spiritu sancto non post multos hos dies.“

*IX. Quibus figuris et Prophetiis vis aquarum baptismi sit demonstrata.*

Verum idem quoque a Domino tum figuris, tum Prophetarum oraculis significatum esse, ex divinis Scripturis animadvertisimus; diluvium enim, quo mundus purgatus est, quod multa malitia hominum esset in terra, et cuncta cogitatio cordis intenta esset ad malum, huius aquae figuram et similitudinem gessisse, Apostolorum princeps in priori epistola (3, 21.) ostendit. Et maris rubri transitum eiusdem aquae significationem habuisse, D. Paulus<sup>7)</sup> ad Corinthios scribens exposuit. Ut interim omittamus tum Naaman<sup>8)</sup> Syri ablutionem, tum probaticae piscinae admirabilem vim<sup>9)</sup> et alia id genus multa, in quibus huius mysterii symbolum inesse facile appareat. De praedictionibus autem dubitare nemo potest, quin „aqua illae, ad quas“ tam liberaliter Isaias Propheta<sup>10)</sup> omnes sitientes invitat, vel quas e templo egredientes Ezechiel<sup>11)</sup> in spiritu vidit; tum praeterea „fons ille, quem domui David et habitantibus Ierusalem“ paratum „in ablutionem peccatoris et menstruatae,“ Zacharias<sup>12)</sup> prae-nunciavit, ad salutarem baptismi aquam indicandam atque exprimendam pertineant.

<sup>1)</sup> Io. 3, 5. <sup>2)</sup> Eph. 5, 26. <sup>3)</sup> I. Io. 5, 8. <sup>4)</sup> Mat. 3, 11. <sup>5)</sup> Act. 2, 1. <sup>6)</sup> Act. 1, 5. <sup>7)</sup> I. Cor. 10, 1. <sup>8)</sup> IV. Reg. 5, 14. <sup>9)</sup> Io. 5, 2. <sup>10)</sup> Is. 55, 1. <sup>11)</sup> Ez. 47, 1.

<sup>12)</sup> Zach. 13, 1.

*X. Cur aqua ad baptismum conficiendum potius uti voluerit Deus, quam alia materia.*

Quantum vero baptisci naturae et virtuti consentaneum fuerit, ut eius propria materia aqua institueretur, pluribus quidem rationibus D. Hieronymus ad Oceanum scribens demonstravit. Sed quod ad hunc locum attinet, pastores docere in primis poterunt, quoniam hoc sacramentum omnibus sine ulla exceptione ad consequendam vitam necessarium erat, idcirco aquae materiam, quae nunquam non praesto est, atque ab omnibus facile parari potest, maxime idoneam fuisse. Deinde aqua effectum baptisci maxime significat. Ut enim aqua sordes abluit, ita etiam baptisci vim atque efficientiam, quo peccatorum maculae eluuntur, optime demonstrat. Accedit illud, quod, quemadmodum aqua refrigerandis corporibus aptissima est, sic baptismo cupiditatum ardor magna ex parte restinguitur.

*XI. Aquae simplici et naturali quare chrisma adiiciatur.*

Illud vero animadvertisendum est, quamvis aqua simplex, quae nihil aliud admixtum habet, materia apta sit ad hoc sacramentum conficiendum, quoties scilicet baptisci ministrandi necessitas incidat, tamen ex Apostolorum traditione semper in catholica ecclesia observatum esse, ut, quum solemnibus caeremoniis baptismus conficitur, sacrum etiam chrisma addatur, quo baptisci effectum magis declarari perspicuum est. Docendus quoque erit populus, etsi aliquando incertum esse potest, utrum haec an illa vera aqua sit, qualem sacramenti perfectio requirat, hoc tamen pro certo habendum esse, nunquam ex alia materia, quam ex aquae naturalis liquore, baptisci sacramentum ulla ratione confici posse.

*XII. Quare promiscue omnibus fidelibus perfecta baptisci formaclare exponenda sit.*

Sed duarum partium, ex quibus baptismus constare debet, postquam altera, hoc est materia, diligenter explicata fuerit, studebunt pastores eadem diligentia formam etiam tradere, quae est altera eius pars maxime necessaria. In huius autem sacramenti explicatione eo maiori cura et studio elaborandum putabunt, quod tam sancti mysterii notitia non solum sua sponte fideles vehementer delectare potest, quod quidem in omni divinarum rerum scientia communiter evenit, verum etiam ad usus fere quotidianos summopere expetenda est. Quum enim saepe incident tempora, quemadmodum suo loco planius dicetur, in quibus tum ab aliis de populo, tum saepissime a mulierculis baptismum ministrari oporteat: ita fit, ut promiscue

omnibus fidelibus ea, quae ad huius sacramenti substantiam pertinent, cognita et perspecta esse debeant.

*XIII. Quae sit perfecta et absoluta huius sacramenti forma.*

Quare dilucidis et apertis verbis, quae facile percipi ab omnibus possint, Pastores docebunt, hanc esse perfectam et absolutam baptismi formam: „Ego te baptizo in nomine Patris, et Filii, et Spiritus sancti.“ Ita enim a Domino et Salvatore nostro traditum est, quum Apostolis apud Matthaeum<sup>1)</sup> praecepit: „Euntes docete omnes gentes, baptizantes eos in nomine Patris, et Filii et Spiritus sancti.“ Ex illo autem verbo „baptizantes“ catholica ecclesia divinitus edocta optime intellexit, in huius sacramenti forma actionem ministri exprimendam esse; quod quidem fit, quum dicitur: „ego te baptizo.“ Ac quoniam praeter ministros tum illius personam, qui baptizatur, tum principalem causam, quae baptismum efficit, significare oportebat, idcirco illud pronomen „te“ et distincta divinarum personarum nomina adduntur, ut absoluta sacramenti forma iis verbis concludatur, quae modo exposita sunt: „Ego te baptizo in nomine Patris, et Filii, et Spiritus sancti.“ Neque enim sola Filii persona, de quo a Ioanne<sup>2)</sup> scribitur: „Hic est, qui baptizat,“ sed simul omnes sanctae Trinitatis personae ad baptismi sacramentum operantur. Quod autem „in nomine,“ non „in nominibus“ dictum est, hoc plane declarat unam Trinitatis naturam et divinitatem. Etenim hoc loco nomen ad personas non refertur; sed divinam substantiam, virtutem et potestatem, quae una et eadem est in tribus personis, significat.

*XIV. An in forma baptismi verba omnia perinde sint necessaria.*

Sed in hac forma, quam integrum et perfectam esse ostendimus, observandum est, quaedam prorsus necessaria esse, quae si omittantur, sacramentum confici non potest; quaedam vero non ita necessaria, ut, si desint, sacramenti ratio non constet; cuiusmodi est vox illa „Ego,“ cuius vis in verbo „baptizo“ continetur. Immo vero in ecclesiis Graecorum variata dicendi ratione praetermitti consuevit, propterea, quod nullam fieri oportere ministri mentionem iudicarunt; ex quo factum est, ut in baptismo hac forma passim utantur: „Baptizatur servus Christi in nomine Patris, et Filii, et Spiritus sancti.“ A quibus tamen perfecte sacramentum ministrari, ex concilii Florentini sententia et definitione apparent,

<sup>1)</sup> Mat. 28, 19. <sup>2)</sup> Io. 1, 33.

quum iis verbis satis explicetur id, quod ad baptismi veritatem attinet, nimurum ablutio, quae tunc re ipsa peragitur.

*XV. Quo modo Apostoli in nomine Christi baptizaverint.*

Quod si etiam aliquando tempus fuisse dicendum est, quum Apostoli<sup>1)</sup> in nomine tantum Domini Iesu Christi baptizarent, id quidem Spiritus sancti afflatu eos fecisse, exploratum nobis esse debet, ut initio nascentis ecclesiae Iesu Christi nomine praedicatio illustrior fieret, divinaque et immensa eius potestas magis celebraretur. Deinde vero rem penitus introsponentes facile intelligimus, nullam earum partium in ea forma desiderari, quae ab ipso Salvatore praescriptae sunt; qui enim Iesum Christum dicit, simul etiam Patris personam, a quo unctus, et Spiritum sanctum, quo unctus est, significat.

*XVI. Apostolos in nomine Christi, tacitis aliis duabus personis Trinitatis, nunquam baptizasse, credendum est.*

Quamquam dubium fortasse alicui videri potest, an huiusmodi forma Apostoli aliquem baptizaverint, si Ambrosii<sup>2)</sup> et Basili sanctissimorum et gravissimorum Patrum auctoritatem sequi volumus, qui ita baptismum in nomine Iesu Christi interpretati sunt, ut dixerint, iis verbis significari baptismum, non qui a Ioanne, sed qui a Christo Domino traditus esset; tametsi a communi et usitata forma, quae distincta trium personarum nomina continet, Apostoli non discederent. Atque hoc loquendi genere Paulus etiam in epistola ad Galatas usus videtur, quum inquit<sup>3)</sup>: „Quicunque in Christo baptizati estis, Christum induistis,“ ut significaret, in fide Christi, nec alia tamen forma, quam idem Salvator et Dominus noster servandam praeceperat, baptizatos esse. Hactenus igitur de materia et forma, quae ad baptismi substantiam maxime pertinent, fideles docere satis fuerit.

*XVII. Quo pacto in hoc regenerationis mysterio fieri debeat ablutio.*

Quoniam vero in hoc sacramento confiendo legitimae etiam ablutionis rationem servari oportet: idcirco eius quoque partis doctrina a pastoribus tradenda est, atque ab eis breviter explicandum, communi ecclesiae more et consuetudine receptum esse, ut baptismus uno aliquo ex tribus modis confici posset. Nam qui hoc sacramento initiari debent, vel in aquam merguntur, vel aqua in eos infunditur, vel aquae aspersione tinguntur. Ex his autem ritibus quicunque serve-

<sup>1)</sup> Act. 2, 38. et 8, 12. 16. <sup>2)</sup> Ambr. De Spirit. S. 1, 3. Basii. de Spir. S. c. 12  
<sup>3)</sup> Gal. 3, 27.

tur, baptismum vere perfici credendum est; aqua enim in baptismo adhibetur ad significandam animae ablutionem, quam efficit. Quare baptismus ab Apostolo<sup>1)</sup> „lavacrum“ appellatus est. Ablutio autem non magis fit, quum aliquis aqua mergitur, quod diu a primis temporibus in ecclesia observatum animadvertisimus, quam vel aquae effusione, quod nunc in frequenti usu positum videmus; vel aspersione, quemadmodum a Petro<sup>2)</sup> factum esse colligitur, quum „uno die tria millia“ hominum ad fidei veritatem traduxit, et baptizavit.

*XVIII. Unicane ablutio requiratur, an trina.*

Utrum vero unica an trina ablutio fiat, nihil referre existimandum est. Utrovis euim modo et antea in ecclesia baptismum vere confectum esse, et nunc confici posse, ex D. Gregorii Magni epistola ad Leandrum scripta satis appetet. Retinendus est tamen a fidelibus is ritus, quem unusquisque in sua ecclesia servari·animadverterit.

*XIX. Quare caput hic potissimum abluatur.*

Atque illud praecipue monere oportet, non quamlibet corporis partem, sed potissimum caput, in quo omnes tum interiores, tum externi sensus vigent, abluendum, simulque ab eo, qui baptizat, non ante aut post ablutionem verba sacramenti, quae formam continent, sed eodem tempore, quo ablutio ipsa peragitur, pronuncianda esse.

*XX. Christusne baptismum ante, an post passionem instituerit.*

His expositis conveniet praeterea docere atque in memoriam fidelium reducere, baptismum, quemadmodum et reliqua sacramenta, a Christo Domino institutum esse. Hoc igitur pastores frequenter docebunt explicabuntque, duo diversa tempora baptismi notanda esse, alterum, quum Salvator eum instituit, alterum, quum lex de eo suscipiendo sancita est. Ac quod ad primum attinet, tunc a Domino hoc sacramentum institutum esse perspicitur, quum ipse a Ioanne baptizatus sanctificandi virtutem aquae tribuit. Testantur enim sancti Gregorius Nazianzenus<sup>3)</sup> et Augustinus<sup>4)</sup>, eo tempore aquae vim generandi in spiritualem scilicet vitam datam esse. Et alio loco ita scriptum reliquit<sup>5)</sup>: „Ex quo Christus in aqua mergitur, ex eo omnia peccata abluit aqua.“ Et alibi<sup>6)</sup>: „Baptizatur Dominus, non mundari indigens, sed tactu mundae carnis aquas mundans, ut vim abluendi habeant.“ Atque ad eam rem illud maximo arguento esse potuit, quod tunc

<sup>1)</sup> Tit. 7, 5. Eph. 5, 26. <sup>2)</sup> Act. 2, 41. <sup>3)</sup> or. 38. <sup>4)</sup> cf. Serm. 136. In App. <sup>5)</sup> cf. Aug. Serm. 135. in App. <sup>6)</sup> ib.

sanctissima Trinitas, in cuius nomine baptismus conficitur, numen suum praesens declaravit. „Vox<sup>1)</sup> enim Patris auditæ est, Filii persona aderat, et Spiritus sanctus in columbae specie descendit;“ praeterea „coeli aperti sunt,“ quo nobis iam per baptismum licet ascendere. Quod si quis scire cupiat, quanam ratione tanta et tam divina virtus a Domino aquis tributa sit, id quidem humanam intelligentiam superat. Hoc vero satis percipi a nobis potest, baptismo a Domino suscepto sanctissimi et purissimi eius corporis tactu aquam ad baptismi salutarem usum consecratam esse; ita tamen, ut hoc sacramentum, etsi ante passionem institutum fuerit, a passione tamen, quae omnium Christi actionum tanquam finis erat, vim et efficientiam duxisse credendum sit.

*XXI. Quando lex baptismi homines obligare coeperit.*

Sed de altero etiam, quo scilicet tempore lex de baptismō lata fuerit, nullus dubitandi locus relinquitur. Nam inter sacros scriptores convenit, post Domini resurrectionem, quum Apostolis praecepit<sup>2)</sup>: „Euntes docete omnes gentes, baptizantes eos in nomine Patris, et Filii et Spiritus sancti,“ ex eo tempore omnes homines, qui salutem aeternam consecuti erant, lege de baptismo teneri coepisse. Quod quidem ex Apostolorum principis auctoritate colligitur, quum inquit<sup>3)</sup>: „Regeneravit nos in spem vivam per resurrectionem Iesu Christi ex mortuis;“ idemque ex illo Pauli<sup>4)</sup> loco: „Se ipsum tradidit pro ea, ut illam sanctificaret“ (quum de ecclesia loqueretur), mundans eam lavacro aquae in verbo,“ licet cognoscere; uterque enim baptismi obligationem ad tempus, quod mortem Domini consecutum est, videtur retulisse, ut dubitandum nullo modo sit, verba etiam illa Salvatoris<sup>5)</sup>: „Nisi quis renatus fuerit ex aqua et Spiritu sancto, non potest introire in regnum Dei,“ id ipsum tempus spectasse, quod post passionem futurum erat.

*XXII. Sacramentum baptismi in quanta veneratione habendum.*

Ex iis igitur, si accurate a pastoribus tractentur, haud dubium esse potest, quin fideles maximam in hoc sacramento dignitatem agnoscant ac summa animi pietate venerentur: præsertim vero quum cogitarint, præclara illa et amplissima munera, quae, quum Christus Dominus baptizaretur, miraculorum significationibus declarata sunt, singulis, quum baptizantur, intima Spiritus sancti virtute donari atque impertiri. Ut

<sup>1)</sup> Mat. 3, 16. seq. Marc. 1, 9. seq. 3, 21. seq. <sup>2)</sup> Mat. 28, 19. <sup>3)</sup> I. Petr. 1, 3. Eph. 5, 25. seq. <sup>5)</sup> Io. 3, 5.

enim, si, quemadmodum Elisaei<sup>1)</sup> puero contigit, nobis oculi ita aperirentur, ut coelestes res intueri possemus, nemo adeo communi sensu carere putandus esset, quem divina baptismi mysteria in maximam admirationem non traducerent: cur idem etiam eventurum non existimemus, quum a pastoribus huius sacramenti divitiae ita expositae fuerint, ut eas fideles, si non corporis oculis, at mentis acie, fidei splendore illuminatae, contemplari queant?

*XXIII. Quot hominum genera baptismum administrare possint.*

Iam vero a quibus ministris hoc sacramentum conficiatur, non utiliter modo, sed necessario tradendum videtur, tum ut ii, quibus praecipue hoc munus commissum est, illud sancte et religiose curare studeant; tum ut ne quis, tanquam fines suos egressus, in alienam possessionem intempestive ingrediatur vel superbe irrumpat, quum in omnibus ordinem servandum esse Apostolus<sup>2)</sup> admoneat. Doceantur igitur fideles, triplicem esse eorum ordinem; ac in primo quidem episcopos et sacerdotes collocandos esse, quibus datum est, ut iure suo, non extraordinaria aliqua potestate, hoc munus exerceant. Iis enim in Apostolis praeceptum est a Domino: „Euntes baptizate;“ quamvis episcopi, ne graviorem illam docendi populi curam deserere cogerentur<sup>3)</sup>, baptism iministerium sacerdotibus relinquere soliti essent. Quod vero sacerdotes iure suo hauc functionem exerceant, ita ut praesente etiam episcopo ministrare baptismum possint, ex doctrina Patrum et usu ecclesiae constat. Nam quum ad eucharistiam consecrandam instituti sint, quae est<sup>4)</sup> pacis et unitatis sacramentum: consentaneum fuit, potestatem iis dari omnia illa administrandi, per quae necessario huius pacis et unitatis quilibet particeps fieri posset. Quod si aliquando Patres sacerdotibus sine episcopi venia baptizandi ius permisum non esse dixerunt: id de eo baptismo, qui certis anni diebus solemni caeremonia administrari consueverat, intelligendum videtur. Secundum ministrorum locum obtinent diaconi, quibus sine episcopi aut sacerdotis concessu non licere hoc sacramentum administrare, plurima SS. Patrum decreta testantur.

*XXIV. Qui sacramentum baptismi in casu necessitatis conferre possint.*

Extremus ordo illorum est, qui cogente necessitate sine solemnibus caeremoniis baptizare possunt; quo in numero sunt omnes, etiam de populo, sive mares sive feminae, quamcunque

<sup>1)</sup> IV. Reg. 6. 17. <sup>2)</sup> I. Cor. 14, 40. <sup>3)</sup> I. Cor. 1, 17. <sup>4)</sup> I. Cor. 10, 17.

illi sectam profiteantur. Nam et Iudaeis quoque, et infidelibus et haereticis, quum necessitas cogit, hoc munus permissum est; si tamen id efficere propositum eis fuerit, quod ecclesia catholica in eo administrationis genere efficit. Haec autem quum multa veterum Patrum<sup>1)</sup> et conciliorum decreta confirmarunt, tum vero a sacra Tridentina synodo anathema in eos sancitum est, qui dicere audeant, baptismum, qui etiam datur ab haereticis in nomine Patris, et Filii et Spiritus sancti, cum intentione faciendi quod facit ecclesia, non esse verum baptismum. In quo profecto summam Domini nostri bonitatem et sapientiam licet admirari. Nam quum hoc sacramentum necessario ab omnibus percipiendum sit, quemadmodum aquam eius materiam instituit, qua nihil magis commune esse potest: sic etiam neminem ab eius administratione excludi voluit; quamvis, ut dictum est, non omnibus liceat solemnes caeremonias adhibere, non quidem quod ritus aut caeremoniae plus dignitatis, sed quod minus necessitatis quam sacramentum habeant.

*XXV. Quis ordo in baptizando a fidelibus servandus sit.*

Neque vero hoc munus ita omnibus promiscue permissum esse, fideles arbitrentur, quin ordinem aliquem ministrorum statuere maxime deceat. Mulier enim, si mares adsint, laicus item praesente clero, tum clericus coram sacerdote, baptismi administrationem sibi sumere non debent. Quanquam obstetrics, quae baptizare consueverunt, improbandae non sunt, si interdum praesente aliquo viro, qui huius sacramenti confiendi minime peritus sit, quod alias viri magis proprium officium videretur, ipsae exsequantur.

*XXVI. Cur praeter eos, qui baptizant, in regenerationis myste-  
riis patrini adhibeantur.*

Accedit autem ad eos ministros, qui, ut hactenus declaratum est, baptismum conficiunt, aliud etiam ministrorum genus, qui ad sacram et salutarem ablutionem celebrandam ex vetustissima catholicae ecclesiae consuetudine adhiberi solent. Ii nunc patrini, olim susceptores, sponsores seu fideiussores communis vocabulo a rerum divinarum scriptoribus vocabantur. De quorum munere, quoniam ad omnes fere laicos pertinet, accurate a pastoribus agendum erit, ut fideles intelligent, quae potissimum ad illud recte perficiendum necessaria sint. In primis vero explicare oportet, quae causa fuerit, cur ad baptismum praeter sacramenti ministros patrini etiam et

<sup>1)</sup> Sess. 7. de bapt. cap. 4.

susceptores adiungerentur. Quod quidem optimo iure factum esse, omnibus videbitur, si meminerint, baptismum esse spiritualem regenerationem, per quam filii Dei nascimur. De ea enim ita loquitur D. Petrus<sup>1)</sup>: „Sicut modo geniti infantes rationabiles, sine dolo, lac concupiscite.“ Ut igitur, postquam aliquis in hanc lucem editus est, nutrice et paedagogo indiget, quorum ope atque opera educetur, ac doctrina et bonis artibus erudiatur: ita etiam necesse est, ut, qui ex baptismo fonte vitam spiritualem vivere incipiunt, alicuius fidei et prudentiae committantur, a quo Christianae religionis pracepta haurire, ad omnemque pietatis rationem institui possint, atque ita paulatim in Christo adolescere, donec tandem viri perfecti iuvante Domino evadant; quum praesertim pastoribus, qui publicae parochiarum curationi praepositi sunt, tantum temporis non supersit, ut privatam illam curam pueros in fide erudiendi suscipere possint. Huius autem vetustissimae consuetudinis praeclarum testimonium a D. Dionysio habemus, quum inquit<sup>2)</sup>: „Divinis nostris ducibus“ (sic enim Apostolos vocat) „in mentem venit, et visum est, suspicere infantes secundum istum sanctum modum, quod naturales parentes pueri eum cuidam docto in divinis veluti paedagogi traderent, sub quo, sicut sub divino patre et salvationis sanctae susceptore, reliquum vitae puer degeret.“ Eandem vero sententiam confirmat Hyginii<sup>3)</sup> auctoritas.

*XXVII. Cognatio spiritualis in baptismo contracta matrimonium impedit et dirimit.*

Quamobrem sapientissime a sancta ecclesia constitutum est, ut non solum is, qui baptizat, cum baptizato, sed etiam susceptor cum eo, quem suscipit, et cum eius veris parentibus affinitate devinciantur ita, ut legitima nuptiarum foedera inter hos omnes iniri non possint, atque inita dirimantur.

*XXVIII. Quae sint patrinorum partes, quidque ab illis exigatur.*

Praeterea docere oportet fideles, quae sint susceptoris partes. Etenim hoc munus adeo negligenter in ecclesia tractatur, ut nudum tantum huius functionis nomen relictum sit; quid autem sancti in eo contineatur, ne suspicari quidem homines videantur. Hoc igitur universe susceptores semper cogitent, se hac potissimum lege obstrictos esse, ut spirituales filios perpetuo commendatos habeant, atque in iis, quae ad Christianae vitae institutionem spectant, current diligenter, ut illi tales se in omni vita praebeant, quales eos futuros esse

<sup>1)</sup> I. Petr. 2, 2. <sup>2)</sup> De eccl. Hier. c. 7. <sup>3)</sup> c. 100. Dist. V. de cons.

solemni caeremonia sponponderunt. Audiamus, quid ea de re sanctus Dionysius scribat, verba sponsoris exprimens<sup>1)</sup>: „Spondeo puerum inducturum, quum ad sacram intelligentiam venerit, sedulis adhortationibus meis, ut abrenunciet contrariis omnino, profiteatur, peragatque divina, quae pollicetur.“ Item divus Augustinus<sup>2)</sup>: „Vos,“ inquit, „ante omnia, tam viros quam mulieres, qui filios in baptimate suscepistis, moneo, ut cognoscatis, fideiussores apud Deum exstisset pro illis, quos visi estis de sacro fonte suscipere.“ Ac profecto decet maxime, eum, qui aliquod officium suscepit, in eo diligenter exsequendo nunquam defatigari, et qui se alterius paedagogum et custodem professus est, minime pati illum esse desertum, quem semel in fidem et clientelam suam recepit, donec illum opera et praesidio suo egere intellexerit. Quae autem filii spiritualibus tradenda sint, paucis D. Augustinus comprehen-dit, quum de hoc ipso susceptorum officio loqueretur; ait enim<sup>3)</sup>: „Debent eos admonere, ut castitatem custodian, iustitiam diligent, caritatem teneant, et ante omnia symbolum et orationem dominicam eos doceant, decalogum etiam, et quae sint prima Christianae religionis rudimenta.“

*XXIX. Quivis promiscue ad susceptoris munus non est admittendus.*

Quae quum ita se habeant, facile intelligimus, cuinam hominum generi sanctae huius tutelae administratio committenda non sit; nimirum iis, qui eam gerere aut fideliter nolint, aut sedulo et accurate non queant. Quocirca praeter naturales parentes, quibus non licet eam curationem suscipere, ut ex eo magis appareat, quantum haec spiritualis educatio a carnali distet, haeretici in primis, Iudei, infideles ab hoc munere omnino prohibendi sunt, ut qui in ea cogitatione et cura semper versentur, ut fidei veritatem mendaciis obscurent, atque omnem Christianam pietatem evertant.

*XXX. Quis patrinorum numerus esse debeat.*

Plures quoque ne baptizatum de baptismo suscipiant, sed ut unus tantum, sive vir sive mulier, vel ad summum unus et una, Tridentino concilio<sup>4)</sup> statutum est; tum quia disciplinae atque institutionis ordo a multitudine magistrorum perturbari poterat, tum quia providere oportebat, ne inter plures eiusmodi affinitates coniungerentur, quae impedirent, quo minus legitimo matrimonii vinculo hominum inter homines societas latius diffunderetur.

<sup>1)</sup> De eccl. hierar. l. c. <sup>2)</sup> c. 105. Dist. V. de cons. <sup>3)</sup> ib. <sup>4)</sup> Sess. 24. c. 20.

*XXXI. Baptismus ad salutem omnibus necessarius.*

Sed quum ceterarum rerum cognitio, quae hactenus expositae sunt, fidelibus utilissima habenda sit: tum vero nihil magis necessarium videri potest, quam ut doceantur, omnibus hominibus baptismi legem a Domino praescriptam esse ita, ut, nisi per baptismi gratiam Deo renascantur, in sempiternam miseriam et interitum a parentibus, sive illi fideles, sive infideles sint, procreentur. Igitur saepius a pastoribus explicandum erit, quod apud evangelistam legitur<sup>1)</sup>: „Nisi quis renatus fuerit ex aqua et Spiritu sancto, non potest introire in regnum Dei.“

*XXXII. Infantes omnino sunt baptizandi.*

Quam legem non solum de iis, qui adulta aetate sunt, sed etiam de pueris infantibus intelligendam esse, idque ab apostolica traditione ecclesiam accepisse, communis Patrum sententia et auctoritas confirmat. Praeterea credendum est, noluisse Christum Dominum baptismi sacramentum et gratiam pueris denegari, de quibus dicebat<sup>2)</sup>: „Sinite parvulos, et nolite eos prohibere ad me venire; talium est enim regnum coelorum; quos<sup>3)</sup> amplexabatur, super quos manus imponebat, quos benedicbat.“ Deinde, quum legimus<sup>4)</sup>, „totam aliquam familiam a Paulo baptizatam esse,“ satis appareat, pueros etiam, qui in illorum numero erant, salutari fonte ablutos esse. Deinde circumcisio, quae figura fuit baptismi, eum morem maxime commendat. Pueros enim octavo die circumcidi solitos nemo est qui ignoret. Ac quibus circumcisio manufacta „in expoliatione corporis“ carnis<sup>5)</sup> proderat, iisdem baptismum, qui est „circumcisio Christi non manufacta,“ prodesse<sup>6)</sup> perspicuum est. Postremo, ut Apostolus docet: „si unius delicto mors regnabit per unum: multo magis abundantiam gratiae, et donationis et iustitiae accipientes, in vita regnabunt per unum Iesum Christum.“ Quum itaque per Adae peccatum pueri ex origine noxam contraxerint, multo magis per Christum Dominum possunt gratiam et iustitiam consequi, ut regnent in vitam; quod quidem sine baptismo fieri nullo modo potest. Quare docebunt pastores, infantes omnino baptizandos, et deinde paulatim tenetram actatem Christianae religionis praeceptis ad veram pietatem informandam esse. Nam ut a Sapiente<sup>7)</sup> praeclare dictum est: „Adolescens iuxta viam suam, etiam quum senerit, non recedet ab ea.“

<sup>1)</sup> Io. 3, 5. <sup>2)</sup> Mat. 19, 14. <sup>3)</sup> Marc. 10, 16. Luc. 18, 15. <sup>4)</sup> 1. Cor. 1, 16. <sup>5)</sup> Eph. 2, 11. Col. 2, 11. <sup>6)</sup> Rom. 5, 17. <sup>7)</sup> Prov. 22, 6.

*XXXIII. Infantes in baptismo gratiam spiritualem percipiunt.*

Neque enim dubitare licet, quin fidei sacramenta, quum abluuntur, accipiant; non quia mentis suae assensione credant, sed quia parentum fide, si parentes fideles fuerint, sin minus, fide (ut D. Augustini<sup>1)</sup> verbis loquamur), universae societatis sanctorum muniuntur. Etenim ab iis omnibus recte dicimus eos baptismu offerri, quibus placet, ut offerantur, et quorum caritate ad communionem sancti Spiritus adiunguntur.

*XXXIV. Infantum baptismus non differendus.*

Hortandi autem sunt magnopere fideles, ut liberos suos, quum primum id sine periculo facere liceat, ad ecclesiam deferendos, et solemnibus caeremoniis baptizandos curent. Nam quum pueris infantibus nulla alia salutis comparanda ratio, nisi eis baptismus praebatur, relictus sit: facile intelligitur, quum gravi culpa illi sese obstringant, qui eos sacramenti gratia diutius, quum necessitas postulet, carere patientur; quum praesertim propter aetatis imbecillitatem infinita pene vitae pericula illis impendeant.

*XXXV. Adulti quo modo ante baptismum instruendi sint.*

Diversam vero rationem in iis servandam esse, qui adulta aetate sunt, et perfectum rationis usum habent, qui scilicet ab infidelibus oriuntur, antiquae ecclesiae consuetudo declarat. Nam Christiana quidem fides illis proponenda est, atque omni studio ad eam suscipiendam cohortandi, alliciendi, invitandi sunt. Quod si ad Dominum Deum convertantur, tum vero monere oportet, ne ultra tempus ab ecclesia praescriptum baptismi sacramentum differant. Nam quum scriptum sit<sup>2)</sup>: „Non tardes converti ad Dominum, et ne differas de die in diem:“ docendi sunt, perfectam conversionem in nova per baptismum generatione positam esse; praeterea, quo serius ad baptismum veniunt, eo diutius sibi carendum esse ceterorum sacramentorum usu et gratia, quibus Christiana religio colitur, quum ad ea sine baptismo nulli aditus patere possit; deinde etiam maximo fructu privari, quem ex baptismo percipimus, siquidem non solum omnium scelerum, quae antea admissa sunt, maculam et sordes baptismi aqua prorsus eluit ac tollit, sed divina gratia nos ornat, cuius ope et auxilio in posterum etiam peccata vitare possumus, iustitiamque et innocentiam tueri, qua in re summam Christianae vitae constare, facile omnes intelligunt.

<sup>1)</sup> cf. Aug. ep. 98. <sup>2)</sup> Eccl. 5, 8.

*XXXVI. Adultis baptismum differendum esse demonstratur.*

Sed quamvis haec ita sint, non consuevit tamen ecclesia baptismi sacramentum huic hominum generi statim tribuere; sed ad certum tempus differendum esse constituit. Neque enim ea dilatio periculum, quod quidem pueris imminere supra dictum est, coniunctum habet, quum illis, qui rationis usu praediti sunt, baptismi suscipiendi propositum atque consilium, et male actae vitae poenitentia satis futura sit ad gratiam et iustitiam, si repentinus aliquis casus impedit, quo minus salutari aqua ablui possint. Contra vero haec dilatio aliquas videtur utilitates afferre. Primum enim, quoniam ab ecclesia diligenter providendum est, ne quis ad hoc sacramentum factum et simulato animo accedat, eorum voluntas, qui baptismum pertinent, magis exploratur atque perspicitur. Cuius rei causa in antiquis conciliis decretum legimus, ut qui ex Iudeis ad fidem catholicam veniunt, antequam baptismus illis administretur, aliquot menses inter catechumenos essent; deinde in fidei doctrina, quam profiteri debent, et Christianae vitae institutonibus erudirentur perfectius. Praeterea maior religionis cultus sacramento tribuitur, si constitutis tantum Paschae et Pentecostes diebus solemni caeremonia baptismum suscipiant.

*XXXVII. Baptismus non semper est adultis differendus.*

Sed interdum tamen baptismi tempus iusta aliqua et necessaria de causa differendum non est, veluti si vitae periculum instare videatur, ac praesertim si illi ablundi sint, qui iam fidei mysteria plene percepient. Quod quidem Philippum et Apostolorum principem fecisse satis constat, quum alter Candacis reginae (Act. 8, 36. 10, 47.) eunuchum, alter Cornelium nulla interposita mora, sed statim, ut se fidem amplecti professi sunt, baptizavit.

*XXXVIII. Quomodo affecti esse debeant, qui sunt baptizandi.*

Docendum praeterea et populo explicandam erit, quo modo affecti esse debeant, qui baptizandi sunt. In primis itaque opus est, ut velint, propositumque illis sit, baptismum suscipere; nam quum unusquisque in baptismo peccato moratur, et novam vitae rationem et disciplinam suscipiat: aequum est, non invito cuiquam aut recusanti, sed illis tantum, qui sponte sua et libenti animo accipiunt, baptismum praeberi. Quare ex sancta traditione semper servatum animadvertisimus, ut nemini baptismus ministretur, nisi prius interrogatus fuerit, an velit baptizari. Nec vero in pueris quoque infantibus eam voluntatem deesse existimandum est, quum ecclesiae voluntas, quae pro illis spondet, obscura esse non possit.

*XXXIX. Amentes quando possint vel non possint baptizari.*

Praeterea amentes et furiosos, qui, quum aliquando compotes mentis essent, in insaniam deinde inciderunt, ut qui eo tempore nullam baptismi suscipiendi voluntatem habeant, nisi vitae periculum immineat, baptizandos non esse; quum autem in vitae discrimine versantur, si, antequam furere inciperent, eius voluntatis significationem dederunt, abluendi sunt; sin minus, a baptismi administratione abstinentendum est. Idemque iudicium de dormientibus fieri debet. Quod si in mentis potestate nunquam fuerunt, ita ut nullum rationis usum habuerint, eos in fide ecclesiae, non secus ac pueros, qui ratione carent, baptizandos esse, ecclesiae auctoritas et consuetudo satis declarat.

*XL. Quae praeterea ad baptismum suscipiendum requirantur.*

Verum praeter baptismi voluntatem fides etiam ea ratione, qua de voluntate dictum est, ad consequendam sacramenti gratiam maxime necessaria est. Etenim Dominus et Salvator noster docuit<sup>1)</sup>: „Qui crediderit et baptizatus fuerit, salvus erit.“ Deinde ut quemlibet admissorum scelerum et male actae vitae poeniteat, atque ut idem in posterum a peccatis omnibus abstinere statuat, opus est. Aliter enim, qui ita baptismum peteret, ut tamen peccandi consuetudinem nollet emendare, omnino repellendus esset. Nihil enim baptismi gratiae et virtuti tam repugnat, quam eorum mens et consilium, qui nullum unquam peccandi finem sibi constituunt. Quum itaque baptismus ob eam rem expetendus sit, ut<sup>2)</sup> Christum induamus et cum eo coniungamur: plane constat, merito a sacra ablutione reiiciendum esse, cui in vitiis et peccatis perseverare propositum est; praesertim vero, quia nihil eorum, quae ad Christum et Ecclesiam pertinent, frustra suscipiendum est, inanemque baptismum, si iustitiae et salutis gratiam spectemus, in eo futurum esse, satis intelligimus, „qui<sup>3)</sup> secundum carnem ambulare, non secundum spiritum“ cogitat; etsi, quod ad sacramentum pertinet, perfectam eius rationem sine ulla dubitatione consequitur, si modo, quum rite baptizatur, in animo habeat id accipere, quod a sancta ecclesia administratur. Quamobrem princeps Apostolorum magnae illi nominum multitudini, qui, ut ait Scriptura<sup>4)</sup>, „compuncti corde,“ ab eo et a reliquis Apostolis, quid sibi faciendum esset, quæsiverant, ita respondit: „Poenitentiam agite, et baptizetur unusquisque vestrum,“ et alio loco: „Poenitemini,“ in-

<sup>1)</sup> Marc. 16, 16. <sup>2)</sup> Gal. 3, 27. <sup>3)</sup> Rom. 8, 4. <sup>4)</sup> Act. 2, 37. seq.

quit<sup>1)</sup>), „et convertimini, ut deleanor peccata vestra.“ Item beatus Paulus, ad Romanos<sup>2)</sup> scribens, aperte ostendit, ei, qui baptizatur, omnino moriendum esse peccatis; quare nos monet<sup>3)</sup>), ne exhibeamus „membra nostra arma iniquitatis peccato,“ sed exhibeamus nos Deo, „tanquam ex mortuis viventes.“

*XLI. Quantum de his sermonem habere conferat.*

Haec vero si fideles saepe meditati fuerint, primum quidem summam Dei bonitatem vehementer admirari cogentur, qui nihil tale merentibus tam singulare et divinum baptismi beneficium sola sua misericordia adductus tribuit; deinde, quum sibi ante oculos proponent, quam aliena esse debeat ab omni crimine eorum vita, qui tanto munere ornati sunt: illud etiam in primis a Christiano homine requiri facile intelligent, ut quotidie tam sancte et religiose traducere vitam studeant, perinde ac si ea ipsa die baptismi sacramentum et gratiam consecuti essent. Quamquam ad inflammandos verae pietatis studio animos nihil magis proficiet, quam si pastores accurata oratione explicaverint, quinam sint baptismi effectus.

*XLII. Praecipuus baptismi effectus quis sit.*

De his igitur, quoniam saepe agendum est, ut fideles magis perspiciant, se in altissimo dignitatis gradu positos esse, nec se ab eo deiici ullis adversarii insidiis vel impetu ullo unquam tempore patientur: hoc primum tradere oportet, peccatum, sive a primis parentibus orgine contractum, sive a nobis ipsis commissum, quamvis etiam adeo nefarium sit, ut ne cogitari quidem posse videatur, admirabili huius sacramenti virtute remitti et condonari. Id vero multo ante ab Ezechiele praenuntiatum est, per quem Dominus Deus ita loquitur<sup>4)</sup>: „Effundam super vos aquam mundam, et mundabimini ab omnibus inquinamentis vestris.“ Et Apostolus ad Corinthios post longam peccatorum enumerationem subiecit<sup>5)</sup>: „Et haec quidem fuistis, sed abluti estis, sed sanctificati estis.“ Atque hanc doctrinam perpetuo a sancta ecclesia traditam esse, perspicuum est. Sanctus enim Augustinus in libro, quem de Baptismo parvolorum conscripsit, ita testatur: „Generante carne tantum contrahitur peccatum originale, regenerante autem spiritu non solum originalium, sed etiam voluntariorum peccatorum fit remissio.“ Et sanctus Hieronymus ad Oceanum „Omnia,“ inquit, „in baptimate condonata sunt crimina.“ Ac ne dubitare amplius ea de re cuiquam liceret, post aliorum conciliorum definitionem sacra etiam Tridentina synodus idem de-

<sup>1)</sup> Act. 3, 19. <sup>2)</sup> Rom. 6, 11. seq. <sup>3)</sup> Ib. 18. <sup>4)</sup> Ez. 36, 25 <sup>5)</sup> I. Cor. 6, 11.

claravit, quum anathema in eos decrevit, qui aliter sentire auderent, quive asseverare non dubitarent, quamvis peccata in baptismo remittantur, ea tamen prorsus non tolli aut radicitus evelli, sed quodam modo abradi, ita ut peccatorum radices animo infixae adhuc remaneant. Namque, ut eiusdem sanctae synodi verbis utamur, in renatis nihil odit Deus, quia nihil damnationis est iis, qui vere consepulti sunt cum Christo per baptismum in mortem; qui non secundum carnem ambulant, sed veterem hominem exuentes, et novum, qui secundum Deum creatus est, induentes, innocentes, immaculati, puri, innoxii ac Deo dilecti effecti sunt.

*XLIII. Concupiscentia in baptizatis an sit peccatum.*

Ac fateri quidem oportet, sicut eodem loco ipsius synodi auctoritate decretum est, in baptizatis concupiscentiam vel fomitem remanere; sed illa vere peccati rationem non habet. Nam ex divi quoque Augustini sententia<sup>1)</sup>: „In parvulis baptizatis concupiscentiae reatus absolvitur, ad agonem relinquitur.“ Atque idem alibi testatur<sup>2)</sup>: „Concupiscentiae reatus in baptimate solvitur, sed infirmitas manet.“ Concupiscentia enim, quae ex peccato est, nihil aliud est, nisi animi appetitio, natura sua rationi repugnans; qui tamen motus, si voluntatis consensum aut negligentiam coniunctam non habeat, a vera peccati natura longe abest. At quum s. Paulus inquit<sup>3)</sup>: „Concupiscentiam nesciebam, nisi lex diceret: Non concupisces:“ ex his verbis non ipsam concupiscendi vim, sed voluntatis vitium intelligi voluit. Eandem doctrinam tradit s. Gregorius ita scribens<sup>4)</sup>: „Si qui sunt, qui dicant, peccata in baptismo superficie tenus dimitti: quid est hac praedicatione infidelius? quum per fidei Sacramentum anima peccatis radicibus absoluta, soli Deo inhaereat.“ Atque ad eam rem demonstraudam Salvatoris nostri testimonio utitur, quum apud sanctum Ioannem ait<sup>5)</sup>: „Qui lotus est, non indiget, nisi ut pedes lavet, sed est mundus totus.“

*XLIV. Omnia peccata baptismo tolli iterum demonstratur.*

Quod si cui expressam huius rei figuram et imaginem libet intueri, proponat sibi ad contemplandum Naaman<sup>6)</sup> Syri leprosi historiam, qui, quum septies Iordanis aqua se abluisse, testante Scriptura ita a lepra mundatus est, ut eius caro caro pueri videretur. Quare baptismi proprius effectus est, peccatorum omnium, sive originis vitio, sive nostra culpa contra-

<sup>1)</sup> de peccat. merit. et remiss. 2, 4. <sup>2)</sup> Retract. 1, 15. <sup>3)</sup> Rom. 7, 7. <sup>4)</sup> Epist. lib. 11. ep. 45. <sup>5)</sup> Ioh. 13, 10. <sup>6)</sup> IV. Reg. 5, 1. seq.

cta sint, remissio; cuius rei causa a Domino et Salvatore nostro institutum esse, clarissimis verbis Apostolorum princeps, ut alia testimonia omittamus, explicavit, quum inquit<sup>1)</sup>: „Poenitentiam agite, et baptizetur unusquisque vestrum in nomine Iesu Christi in remissionem peccatorum.“

*XLV. Ut culpa, ita etiam poena omnis bapsismo remittitur.*

Iam vero in baptismo non solum peccata remittuntur, sed peccatorum etiam et scelerum poenae omnes a Deo benigne condonantur. Nam etsi omnibus sacramentis hoc commune est, ut per illa virtus passionis Christi Domini communicetur: de solo tamen baptismo dictum est ab Apostolo<sup>2)</sup>, nos per ipsum Christo commori et sepeliri; ex quo sancta ecclesia semper intellexit, sine maxima sacramenti iniuria fieri non posse, ut ei, qui baptismo expiandus sit, eiusmodi pietatis officia, quae usitato nomine sancti Patres opera satisfactionis vocarunt, imponantur. Nec vero, quae hoc loco traduntur, veteris ecclesiae consuetudini adversantur, quae olim Iudeis, quum baptizarentur, praecipiebat, ut quadraginta continuos dies ieunarent. Neque enim illud institutum ad satisfactionem pertinebat, sed qui baptismum percepissent, ea ratione admonebantur, ut sacramenti dignitatem venerantes, ieuniis et orationibus aliquamdiu sine intermissione operam darent.

*XLVI. Non liberatur mox baptizatus a poenis civilibus.*

Sed quamquam in baptismo poenas peccatorum condonari exploratum esse debet, ab eo tamen poenarum genere, quae civilibus iudiciis ob grave aliquod scelus persolvendae sunt, nemo liberatur ita, ut, qui morte dignus sit, per baptismum a poena, quae legibus constituta est, eripiatur; tametsi vehementer laudanda esset eorum principum religio et pietas, qui eam quoque animadversionem, ut Dei gloria in suis sacramentis illustrior fieret, sontibus remitterent ac condonarent.

*XLVII. Remittuntur in baptismo poenae, quae post hanc vitam inferri solent.*

Efficit praeterea baptismus post huius vitae curriculum poenarum omnium, quae originale peccatum consequuntur, liberationem; siquidem merito mortis Domini factum est, ut haec consequi possemus; baptismo autem, ut supra dictum est, ei commorimur. „Si enim,“ ut inquit Apostolus<sup>3)</sup>, complantati facti sumus similitudini mortis eius, simul et resurrectionis erimus.“

<sup>1)</sup> Act. 2, 38. <sup>2)</sup> Rom. 6, 3. <sup>3)</sup> Ib. 5

*XLVIII. Quare per baptismum integrae naturae status non statim reddatur.*

Quod si quaerat aliquis, cur statim post baptismum in hac etiam mortali vita his incommodis non careamus, atque ad perfectum illum vitae gradum, in quo Adam, primus humani generis parens, ante peccatum collocatus fuerat, sacrae ablutionis virtute non transferamur: id quidem duabus potissimum de causis factum esse respondebitur. Quarum prima est, quod nobis, qui per baptismum Christi corpori coniuncti, atque eius membra effecti sumus, plus aliquid dignitatis tribuendum non erat, quam ipsi capiti nostro tributum esset. Quum igitur Christus Dominus, etsi ab initio ortus sui gratiae et veritatis plenitudinem habuit, tamen humanae naturae fragilitatem, quam suscepit, non ante depositum, quam passionis tormenta et mortem pertulit, ac deinde ad immortalis vitae gloriam resurrexit: quis miretur, quum videat fideles, qui iam per baptismum coelestis iustitiae gratiam adepti sunt, adhuc tamen caduco et fragili corpore vestiri, ut, postquam multis laboribus pro Christo perfuncti, et morte obita denuo ad vitam revocati fuerint, tandem digni sint, qui cum Christo aeo semperno perfruantur? Altera vero causa, cur in nobis post baptismum infirmitas corporis, morbus, dolorum sensus, concupiscentiae motus relinquatur, illa est, ut scilicet tanquam segetem et materiam virtutis haberemus, ex qua deinde uberiorem gloriae fructum, atque ampliora praemia conquereremur. Nam quum patienti animo vitae incommoda omnia toleramus, pravasque animi nostri affectiones sub rationis imperium divina ope subiicimus, certa spe niti debemus, fore, ut, si cum Apostolo (II. Tim. 4, 7. seq.) bonum certamen certaverimus, cursum consummaverimus, fidem servaverimus, repositam quoque iustitiae coronam reddat nobis Dominus in illa die iustus iudex. Sic vero etiam cum filiis Israel videtur Dominus egisse, quos etsi ab Aegyptiorum servitute Pharaone atque eius exercitu in mare demerso liberavit: tamen non statim in beatam illam promissionis terram introduxit, sed prius in multis variisque casibus exercuit; ac deinde, quum eos in promissae terrae possessionem misisset, ceteros quidem incolas e patriis sedibus exturbavit, quasdam vero nationes reliquas fecit, quas delere non potuerunt, ut populo Dei bellicae virtutis et fortitudinis exercendae occasio nunquam decesset. Huc accedit, quod, si per baptismum, praeter dona coelestia, quibus anima ornatur, corporis etiam bona tribuerentur, dubitari merito posset, quin multi praesentis potius vitae commoda, quam futurae speratam

gloriam consecantes, ad baptismum venirent; quum tamen non falsa haec et incerta<sup>1)</sup>, quae videntur, sed vera atque aeterna, quae non videntur, bona Christiano homini semper proposita esse debeant.

*XLIX. Renati inter huius vitae miserias solida animi oblectatione non destituuntur.*

Sed interim tamen huius vitae conditio, quae miseriarum plena est, suis voluptatibus et laetiis non caret. Quid enim nobis, qui iam per baptismum veluti palmites<sup>2)</sup> insiti sumus in Christum, iucundius aut optabilius esse potest, quam, cruce in humeros nostros sublata, eum ducem sequi, nullisque aut laboribus defatigari, aut periculis retardari, quo minus ad prae-mium<sup>3)</sup> supernae vocationis Dei omni studio contendamus, alii virginitatis lauream, alii doctrinae et praedicationis coronam, alii martyrii palmam, alii alia virtutum decora a Domino accepturi? Quae quidem praeclera laudis insignia nemini darentur, nisi prius nos ipsos in huius aerumnosae vitae stadio exercuissemus, atque in acie invicti stetissemus,

*L. Quid praeter culpae et poenae remissionem baptismō homini praestetur.*

Sed ut ad baptismi effectus oratio redeat, exponendum erit, huius sacramenti virtute nos non solum a malis, quae vere maxima dicenda sunt, liberari, verum etiam eximiis bonis et muneribus augeri. Animus enim noster divina gratia repletur, qua iusti et filii Dei effecti aeternae quoque salutis haeredes instituimur. Nam, ut scriptum est<sup>4)</sup>: „Qui crediderit, et baptizatus fuerit, salvus erit;“ mundatamque ecclesiam<sup>5)</sup> lavacro aquae in verbo vitae, Apostolus testatur. Est autem gratia, quemadmodum Tridentina synodus<sup>6)</sup> ab omnibus credendum poena anathematis proposita decrevit, non solum per quam peccatorum fit remissio, sed divina qualitas in anima inhaerens, ac veluti splendor quidam et lux, quae animarum nostrarum maculas omnes delet, ipsasque animas pulchiores et splendidiores reddit. Atque id ex sacris literis aperte colligitur<sup>7)</sup>, quum gratiam effundi dicant, eamque Spiritus sancti pignus soleant appellare.

*LI. Gratiae divinae, quae baptismō infunditur, adduntur veluti pedissequae virtutes.*

Huic autem additur nobilissimus omnium virtutum comitatus, quae in animam cum gratia divinitus infunduntur. Quare

<sup>1)</sup> II. Cor. 4, 18. <sup>2)</sup> Io. 15, 5. <sup>3)</sup> Phil. 3, 14. <sup>4)</sup> Marc. 16, 16. <sup>5)</sup> Eph. 5, 26  
<sup>6)</sup> Sess. 6. de iustif. c. 11. <sup>7)</sup> Rom. 5, 5. II. Cor. 1, 22.

quum Apostolus<sup>1)</sup> ad Titum ait: „Salvos nos fecit per lavacrum regenerationis et renovationis Spiritus sancti, quem effudit in nos abunde per Iesum Christum salvatorem nostrum,“ D. Augustinus<sup>2)</sup> verba illa „abunde effudit“ explanans, „Nimirum,“ inquit, „ad remissionem peccatorum, et copiam virtutum.“

*LII. Per baptismum Christo incorporamur.*

Iam vero per baptismum etiam Christo capiti tanquam membra copulamur et connectimur. Quemadmodum igitur a capite vis manat, qua singulae corporis partes ad proprias functiones apte exsequendas moventur: ita etiam ex Christi Domini plenitudine in omnes, qui iustificantur, divina virtus et gratia diffunditur, quae nos ad omnia Christianae pietatis officia habiles reddit.

*LIII. Qui fiat, ut tot virtutibus in baptismo cumulati, adeo tarde pietatem exerceant.*

Neque vero mirum cuiquam videri debet, si, quum tanta virtutum copia instructi et ornati simus, tamen non sine magna difficultate et labore pias honestasque actiones inchoamus, vel certe absolvimus; id enim ob eam rem non evenit, quod virtutes, a quibus actiones ipsae proficiscuntur, Dei beneficio nobis donatae non sint, sed quoniam post baptismum acerrima cupiditatis pugna adversus spiritum reicta est, in qua tamen contentione animo frangi aut debilitari Christianum hominem non decet, quum Dei benignitate freti optima spe niti debeamus, fore ut quotidiana recte vivendi exercitatione, quaecumque<sup>3)</sup> pudica sunt, quaecumque iusta, quaecumque sancta, eadem etiam facilia et iucunda videantur. Haec libenter cogitemus, haec alacri animo agamus, ut Deus<sup>4)</sup> pacis sit nobiscum.

*LIV. In baptismo character indelebilis imprimitur.*

Praeterea per baptismum consignamur charactere, qui ex anima deleri nunquam potest; de quo nihil est, ut plura hoc loco dissocrantur, quum liceat ex iis, quae supra dicta sunt, quum universe de sacramentis ageretur, satis multa, quae ad hoc argumentum pertinent in hunc locum transferre.

*LV. Baptismum iterari nunquam posse demonstratur.*

Sed quoniam ex characteris vi et natura ab ecclesia definitum est, baptismi sacramentum nulla ratione iterandum esse: ea de re fideles ne aliquando in errores inducantur, saepe et diligenter a pastoribus admonendi erunt. Hoc vero docuit Apostolus, inquiens<sup>5)</sup>: „Unus Dominus, una fides, unum ba-

<sup>1)</sup> Tit. 3, 5. seq. <sup>2)</sup> Gloss. ord. ad l. c. <sup>3)</sup> Phil. 4, 8. <sup>4)</sup> II. Cor. 13, 12. <sup>5)</sup> Eph. 4, 5.

ptisma.“ Deinde quum Romanos hortatur<sup>1)</sup>, ut mortui per baptismum in Christo caverent, ne vitam, quam ab illo accepissent, amitterent, quum inquit<sup>2)</sup>: „Quod enim Christus mortuus est peccato, mortuus est semel:“ hoc videtur aperte significare, sicut ille mori iterum non potest, ita nobis denuo mori per baptismum non licere. Quare sancta etiam ecclesia se unum baptismum credere palam profitetur. Quod quidem rei naturae et rationi vehementer consentaneum esse, ex eo intelligitur, quod baptismus est quaedam spiritualis regeneratio. Quemadmodum igitur naturali virtute semel tantum generamur et in lucem edimur, atque, ut D. Augustinus<sup>3)</sup> ait, uterus non potest repeti: sic etiam una est spiritualis generatio, nec baptismus ullo unquam tempore iterandus est.

*LVI. Illi iterato non baptizantur, qui certa conditione interposita abluuntur.*

Neque vero quisquam putet, eum ab ecclesia iterari, quum adhibita huiusmodi verborum formula aliquem abluit, de quo incertum est, an baptizatus prius fuerit: „Si baptizatus es, te iterum non baptizo; si vero nondum baptizatus es, ego te baptizo in nomine Patris, et Filii et Spiritus sancti.“ Ita enim non impie iterari, sed sancte cum adiunctione baptismum administrari dicendum est.

*LVII. Baptismus conditionalis semper citra ullum discriminem usurpandus non est.*

Qua in re tamen diligenter a pastoribus aliqua providenda sunt, in quibus fere quotidie non sine maxima sacramenti iniuria peccatur. Neque enim desunt, qui nullum scelus admitti posse arbitrentur, si quemvis sine delectu cum adiunctione illa baptizent; quare si infans ad eos deferatur, nihil prorsus quaerendum putant, an is prius ablutus fuerit, sed statim ei baptismum tribuunt; quin etiam, quamvis exploratum habeant, domi sacramentum administratum esse, tamen sacram ablutionem in ecclesia adhibita solemni caeremonia cum adiunctione repetere non dubitant, quod quidem sine sacrilegio facere non possunt, et eam maculam suscipiunt, quam divinarum rerum scriptores irregularitatem vocant. Nam ea baptismi forma ex Alexandri Papae<sup>4)</sup> auctoritate in illis tantum permittitur, de quibus, re diligenter perquisita, dubium relinquitur, an baptismum aite suscepere; aliter vero nunquam fas est etiam cum adiunctione baptismum alicui iterum administrare.

<sup>1)</sup> Rom. 6, 2. seq. <sup>2)</sup> ib. 10. <sup>3)</sup> Tract. 11. in Ioann. <sup>4)</sup> c. 2. X. de bant. III. 42.

*LVIII. Quis sit postremus fructus, qui virtute baptismi hominibus confertur.*

Praeter cetera vero, quae ex baptismo consequimur, illud veluti extreum est, quo reliqua omnia videntur referri, quod scilicet coeli aditum propter peccatum prius interclusum unicuique nostrum patefacit. Haec autem, quae in nobis baptismi virtute efficiuntur, ex iis plane intelligi possunt, quae in Salvatoris baptismo contigisse evangelica auctoritas confirmavit. Etenim coeli aperti sunt, et Spiritus sanctus columbae specie in Christum Dominum descendens apparuit. Ex quo significatum est eis, qui baptizantur, divini numinis charismata impertiri, et coelorum ianuam reserari; non quidem, ut simul atque baptizati sunt, sed ut magis opportuno tempore ingrediantur in illam gloriam, quum omnium miseriarum expertes, quae in beatam vitam cadere non possunt, pro mortali conditione immortalitatem assequentur. Atque hi quidem sunt baptismi fructus; quos, si quidem sacramenti vim spectemus, aequo ad omnes pertinere dubitari non potest; sin autem, quo quisque animo affectus ad illum suscipiendum accesserit, consideremus: plus minusve coelestis gratiae et fructus ad unum aliquem, quam ad alium, pervenire, omnino fateri oportet.

*LIX. Quae sit caeremoniarum baptismi vis et utilitas.*

Restat nunc, ut quae de huius sacramenti precationibus, ritibus et caeremoniis tradenda sint, aperte et breviter expllicantur. Nam quod Apostolus (I. Cor. 14, 11.) de linguarum dono admonuit, quum inquit, sine fructu esse, si, quae aliquis loquitur, a fidelibus non intelligantur: idem fere ad ritus et caeremonias transferri potest. Imaginem enim et significacionem earum rerum prae se ferunt, quae in sacramento geruntur. Quod si illorum signorum vim et potestatem fidelis populus ignoret, non magna admodum caeremoniarum utilitas futura esse videbitur. Danda est igitur pastoribus opera, ut eas fideles intelligent, certoque sibi persuadeant, si minus necessariae sint, plurimi tamen faciendas, magnoque in honore esse oportere. Id vero tum instituentium auctoritas, qui sine controversia sancti Apostoli fuerunt, tum finis, cuius causa caeremonias adhiberi voluerunt, satis docet. Ita enim sacramentum maiori cum religione ac sanctitate administrari, ac veluti ante oculos ponи praeclara illa et eximia dona, quae in eo continentur, et in animos fidelium immensa Dei beneficia magis imprimi, perspicuum est.

*LX. Quotuplices sint baptismi ritus.*

Sed omnes caeremoniae et precationes, quibus in baptismi administratione ecclesia utitur, ad tria capita redigendae sunt, ut in iis explicandis certus ordo a pastoribus servari possit, et quae tradita ab illis fuerint, auditorum memoria facilius retineantur. Ac primum quidem illarum genus est, quae, antequam accedatur ad baptismi fontem, servantur; alterum earum, quae, quum ad ipsum fontem ventum est, adhibentur: tertium earum, quae peracto iam baptismo addi solent.

*LXI. Quo tempore aqua ad baptismum necessaria communis ritus consecranda.*

In primis igitur aqua paranda est, qua ad baptismum uti oportet. Consecratur enim baptismi fons, addito mysticæ unctionis oleo. Neque id omni tempore fieri permisum est, sed more maiorum, festi quidam dies, qui omnium celeberrimi et sanctissimi optimo iure habendi sunt, exspectantur, in quorum vigiliis sacrae ablutionis aqua conficitur, quibus etiam tantum diebus, nisi necessitas aliter facere coegisset, in veteris ecclesiae more positum fuit, ut baptismus administraretur. Sed quamvis ecclesia hoc tempore propter communis vitae pericula eam consuetudinem retinendam non iudicavit: tamen solemnes illos dies Paschæ et Pentecostes, quibus baptismi aqua consecranda est, summa cum religione adhuc observavit.

*LXII. Baptizandi cur mox in ecclesiam non admittantur.*

Post aquae consecrationem alia dinceps, quae baptismum antecedunt, explicare oportet. Afferuntur enim vel etiam adducuntur, qui baptismi initiandi sunt, ad ecclesiae fores, atque ab eius introitu omnino prohibentur, quod indigni sint, qui domum Dei ingrediantur, antequam a se turpissimæ servitutis iugum repulerint, et totos se Christo Domino eiusque iustissimo imperio addixerint.

*LXIII. Cur baptizandi, quid petant, interrogentur et instruantur.*

Tum vero sacerdos ab eis exquirit, quidnam ab ecclesia petant. Quo cognito primum eos Christianæ fidei doctrina, quam in baptismō profiteri debent, instituit; id autem catechismo efficitur, cuius institutionis morem a Domini Salvatoris pracepto manasse, nemo dubitare potest, quum ipse Apostolis iusserit (Mat. 28, 19.): „Ite in mundum universum, et docete omnes gentes, baptizantes eos in nomine Patris, et Filii et Spiritus sancti, docentes eos servare omnia, quaecunque mandavi vobis.“ Ex quo licet cognoscere, baptismum non esse administrandum, priusquam summa saltem religionis nostræ capita exponantur.

*LXIV. Quo pacto ex veteri ecclesiae instituto catechizari debeant rudiiores.*

Quoniam vero catechismi ratio ex multis interrogationibus constat, si is, qui instituitur, adulta aetate fuerit: ad ea, quae rogantur, ipse per se respondet; si autem infans sit, pro illo sponsor rite respondet, solennemque sponzionem facit.

*LXV. Quis sit exorcismi usus.*

Sequitur exorcismus, qui ad expellendum diabolum eiusque vires frangendas et debilitandas sacris et religiosis verbis ac precationibus conficitur. Proinde sacerdos ter in faciem eius, qui initiandus est, spirat, ut serpentis antiqui potestatem expellat, et amissae vitae spiraculum consequatur.

*LXVI. Cur eius, qui baptizatur, ori sal admoveatur.*

Accedunt ad exorcismum aliae caeremoniae, quarum singulae, ut quae mysticae sint, propriam atque illustrem significationem habent. Nam quum sal in illius os, qui ad baptismum adducendus est, inseritur, hoc significari perspicuum est, eum fidei doctrina et gratiae dono consecuturum esse, ut a peccatorum putredine liberetur, saporemque bonorum operum percipiat, et divinae sapientiae pabulo delectetur.

*LXVII. Quid sibi velit crucis signum multis corporis partibus adhibitum.*

Obsignantur praeterea signo crucis frons, oculi, pectus, humeri, aures; quae omnia declarant, baptismi mysterio sensus baptizandi aperiri ac roborari, ut Deum excipere, praeceptaque eius intelligere ac servare possit.

*LXVIII. Quare nares et aures baptizandi saliva liniantur.*

Postea vero illi nares et aures saliva liniuntur, statimque ad baptismi fontem mittitur, ut quemadmodum „caecus“ (Io. 9, 6.) ille evangelicus, quem Dominus iusserat oculos luto illitos Siloes aqua ablueret, lumen recuperavit: ita etiam intelligamus, sacrae ablutionis eam vim esse, ut menti ad coelestem veritatem percipiendam lumen afferat.

*LXIX. Quid doceat abrenunciatio illa Satanae, subiecta fidei professione facta ab illo, qui baptizandus offertur.*

His peractis ad baptismi fontem veniunt, ibique aliae caeremoniae et ritus adhibentur, ex quibus Christianae religionis summam licet cognoscere. Sacerdos enim ter concepit verbis eum, qui baptizandus est, interrogat: „Abrenuncias Satanae, et omnibus operibus eius, et omnibus pompis eius?“ At ille, aut eius nomine patrinus, ad singulas interrogations

respondet: „Abrenuncio.“ Igitur qui Christo nomen datus est, hoc primum sancte et religiose polliceri debet, se diabolum et mundum deserere, ac nullum unquam tempus fore, in quo utrumque veluti hostem tetterimum non detestetur.

*LXX. Oleo catechumenorum baptizandus inungitur in pectore et inter scapulas; quid velit illa inunctio.*

Post haec oleo catechumenorum baptizandus inungitur in pectore et inter scapulas. In pectore quidem, ut per Spiritus sancti donum abiiciat errorem et ignorantiam, et suscipiat fidem rectam; quia „iustus ex fide vivit.“<sup>1)</sup> Inter scapulas autem, ut Spiritus sancti gratia excutiat negligentiam et torporem, ac bonam operationem exerceat, quia<sup>2)</sup> „fides sine operibus mortua est.“

*LXXI. Quomodo baptizandus fidei suae professionem faciat.*

Deinde ad ipsum baptismi fontem consistens, interrogatur a sacerdote hoc modo: „Credis in Deum Patrem omnipotentem?“ Cui ille respondet: „Credo.“ Atque ita deinceps de reliquis symboli articulis rogatus fidem suam solemnri religione profitetur. Quibus sane duabus sponsionibus omnem Christianae legis vim et disciplinam contineri perspicuum est.

*LXXII. Cur ab eo, qui aqua salutari proxime tingendus est, petatur, num baptizari velit.*

Sed cum iam baptismum administrare oportet, quaerit sacerdos ab eo, qui baptizandus est: Num baptizari velit? quo quidem per se, vel eius nomine, si infans sit, patrino annuente, statim in nomine Patris, et Filii et Spiritus sancti salutari aqua eum abluit. Quemadmodum enim homo sua voluntate serpenti obediens merito damnatus est: ita Dominus neminem ad suorum numerum, nisi voluntarium militem adscribi voluit, ut divinis iussis sponte obtemperans aeternam salutem consequeretur.

*LXXIII. Quamobrem baptizati caput mox chrismate inungatur.*

Iam postquam baptismus absolutus est, sacerdos summum baptizati verticem chrismate perungit, ut intelligat, se ab eo die Christo capiti tanquam membrum coniunctum esse, atque eius corpori insitum, et ea re Christianum a Christo, Christum vero a chrismate appellari. Quid vero chrisma significet, ex his satis intelligi, quae tunc sacerdos orat, divus Ambrosius<sup>3)</sup> testatur.

<sup>1)</sup> Gal. 3, 11. <sup>2)</sup> Iac. 2, 26. <sup>3)</sup> de Sacram. 2, 7. et 3, 1.

*LXXIV. Quid designet vestis candida, vel album sudariolum,  
quo baptizatus donatur.*

Induit postea sacerdos baptizatum veste alba, dicens: „Accipe vestem candidam, quam immaculatam perferas ante tribunal Domini nostri Iesu Christi, ut habeas vitam aeternam.“ Infantibus vero, qui vestitu non utuntur, iisdem verbis album sudariolum datur. Quo symbolo significari sancti Patres docent tum resurrectionis gloriam, ad quam per baptismum nascimur; tum nitorem et pulchritudinem, qua, dilutis peccatorum maculis, anima in baptismo ornatur; tum innocentiam atque integritatem, quam in omni vita baptizatus servare debet.

*LXXV. Quae sit ratio ardantis cerei, qui a baptizato tenetur.*

Et deinde cereus ardens in manum traditur, qui ostendit, fidem caritate inflammatam, quam in baptismo accepit, bonorum operum studio alendam atque angendam esse.

*LXXVI. Quare, ac cuiusmodi nomen baptizato sit imponendum.*

Ad extremum vero nomen baptizato imponitur, quod quidem ab aliquo sumendum est, qui propter excellentem animi pietatem et religionem in Sanctorum numerum relatus est. Ita enim facile fiet, ut quis nominis similitudine ad virtutis et sanctitatis imitationem excitetur, ac praeterea, quem imitari studeat, eum quoque precetur, et speret, sibi advocatum ad salutem tum animi, tum corporis defendendam venturum esse. Quare reprehendendi sunt, qui gentilium nomina, et eorum praecipue, qui omnium sceleratissimi fuerunt, tam diligenter consectetur, et pueris imponunt, quum ex eo intelligi possit, quanti Christianae pietatis studium faciendum existiment, qui impiorum hominum memoria tantopere delectari videntur, ut velint fidelium aures huiusmodi profanis nominibus undique circumsonare.

*LXXVII. Summa eorum, quae de baptisci mysteriis sunt tradita.*

Hac de baptisci sacramento si a pastoribus explanata fuerint, nihil eorum fere praetermissum esse videbitur, quae ad hanc cognitionem maxime pertinere existimanda sunt. Demonstratum est enim, quid ipsum baptisci nomen significet, quae sit eius natura et substantia, tum ex quibus partibus constet. Dictum est, a quo institutus fuerit, qui ministri ad conficiendum sacramentum necessarii sint, quosve tanquam paedagogos ad sustentandam baptizati imbecillitatem adhibere oporteat. Traditum est etiam, quibus et quemadmodum animo affectis baptismus administrari debeat; quae sit eius virtus et efficientia; postremo qui ritus et caeremoniae serventur,

quantum proposita ratio postulabat, satis copiose explicatum est. Quae omnia ob eam praecipue causam docenda esse pastores meminerint, ut fideles in hac cura et cogitatione perpetuo versentur, ut in iis, quae adeo sancte et religiose spopondentur, quum baptismo initiati sunt, fidem servent, atque eam vitam instituant, quae sanctissimae Christiani nominis professioni respondeat.

### CAPUT III.

#### **De Sacramento Confirmationis.**

##### *I. Cur hodie quam maxime confirmationis virtus sit explicanda.*

Si in sacramento confirmationis explicando pastorum diligentia requirenda unquam fuit, nunc certe opus est, illud quam maxime illustrare, quum in sancta Dei ecclesia hoc sacramentum a multis omnino praetermittatur, paucissimi vero sint, qui divinae gratiae fructum, quem deberent, ex eo capere studeant. Quare fideles ita de huius sacramenti natura, vi, dignitate, tum in die Pentecostes, quo praecipue die administrari solet, tum aliis etiam diebus, quum id pastores commode fieri posse iudicaverint, docendi erunt, ut intelligent, non solum negligendum non esse, sed summa cum pietate et religione suscipiendum, ne ipsorum culpa maximoque malo eveniat, ut frustra in eos divinum hoc beneficium collatum esse videatur.

##### *II. Quare ecclesia hoc sacramentum confirmationem vocari.*

Sed ut a nomine initium sumatur, confirmationem ab ecclesia hoc sacramentum idecirco vocari docendum est, quoniam, qui baptizatus est, quum ab episcopo sacro chrismate ungitur, additis solemnibus illis verbis: „Signo te signo crucis, et confirmo te chrismate salutis, in nomine Patris, et Filii et Spiritus sancti,“ nisi aliud sacramenti efficientiam impedit, novae virtutis robore firmior, atque adeo perfectus Christi miles esse incipit.

##### *III. Confirmatio verum est novae legis ‘sacramentum.*

In confirmatione autem veram et propriam sacramenti rationem catholica ecclesia semper agnovit, quod et Melchianus<sup>1)</sup> pontifex et plures etiam alii sanctissimi et vetustissimi Pontifices aperte declarant. Ac sanctus Clemens<sup>2)</sup> eius veritatis doctrinam graviori sententia comprobare non potuit. Ait enim: „Omnibus festinandum est sine mora renasci

<sup>1)</sup> epist. ad episcop. Hispan. cap. 2. <sup>2)</sup> ep. 4. ad Iul.

Deo, et demum ab episcopo consignari, id est, septiformem gratiam Spiritus sancti percipere, quum alioqui perfectus Christianus nequaquam esse possit is, qui iniuria et voluntate, non autem necessitate compulsus, hoc sacramentum praetermisserit, ut a B. Petro accepimus, et ceteri Apostoli praecipiente Domino docuerunt.“ Hanc vero eandem fidem doctrina sua confirmarunt, qui eodem spiritu pleni pro Christo sanguinem profuderint, Urbanus, Fabianus, Eusebius, Romani Pontifices, quemadmodum ex eorum decretis licet perspicere.

*IV. Sacri doctores, qui huius sacramenti meminerunt.*

Accedit praeterea sanctorum Patrum consentiens auctoritas, inter quos Dionysius Areopagita, Athenarum episcopus, quum diceret, qua ratione hoc sacrum unguentum confidere, eoque uti oporteret, ita inquit<sup>1)</sup>: „Baptizatum sacerdotes induunt veste congrua munditia, ut ad pontificem ducant; ille vero sacro atque prorsus divino unguento baptizatum signans, sacratissimae communionis participem facit.“ Eusebius quoque Caesariensis<sup>2)</sup> tantum huic sacramento tribuit, ut dicere non dubitarit, Novatum haereticum Spiritum sanctum promoveri non potuisse, quia, quum baptizatus esset in gravi aegritudine, signaculo chrismatis non est signatus. Sed clarissima habemus huius rei testimonia tum a divo Ambrosio in eo libro, quem de iis, qui initiantur, inscripsit<sup>3)</sup>; tum a divo Augustino in libris, quos adversus Petilianos Donatistae epistolas<sup>4)</sup> edidit, quorum uterque adeo de huius sacramenti veritate nihil dubitare posse existimavit, ut eam Scripturae etiam locis doceat ac confirmet. Quare alter quidem verba illa Apostoli<sup>5)</sup>: „Nolite contristare Spiritum sanctum Dei, in quo signati estis,“ alter vero, quod in Psalmis legitur<sup>6)</sup>: „Sicut unguentum in capite, quod descendit in barbam, barbam Aaron,“ tum illud eiusdem Apostoli<sup>7)</sup>: „Caritas Dei diffusa est in cordibus nostris per Spiritum sanctum, qui datus est nobis,“ ad confirmationis sacramentum referri testatus est.

*V. Quae sit confirmationis et baptismi differentia.*

Quamvis autem a Melchiade<sup>8)</sup> dictum sit, baptismum confirmationi maxime coniunctum esse: non idem tamen sacramentum, sed ab altero longe disiunctum existimandum est. Constat enim, varietatem gratiae, quam singula sacramenta tribuunt, et rei sensibus subiectae, quae ipsam gratiam significat, efficere, ut varia quoque et diversa sacramenta sint.

<sup>1)</sup> De eccles. hier. c. 2. <sup>2)</sup> cf. Hist. Eccl. lib. 6, 43. <sup>3)</sup> cap. 7. et lib. 8. de sacram. c. 2. <sup>4)</sup> lib. 2, 104. <sup>5)</sup> Eph. 4, 30. <sup>6)</sup> Ps. 132, 2. <sup>7)</sup> Rom. 5, 5. <sup>8)</sup> ep. ad episc. Hispan.

Quum igitur baptismi gratia homines in novam vitam gignantur, confirmationis autem sacramento, qui iam geniti sunt, viri evadant, „evacuatis<sup>1)</sup>“, quae erant parvuli:“ satis intelligitur, quantum in naturali vita generatio ab incremento distat, tandem inter se differre baptismum, qui regenerandi vim habet, et confirmationem, cuius virtute fideles augescunt, et perfectum animi robur assumunt. Praeterea quoniam novum atque distinctum sacramenti genus constituendum est, ubi animus in novam aliquam difficultatem incurrit: facile perspicere potest, quemadmodum baptismi gratia ad mentem fidei informandam indigemus, ita etiam maxime conducere, fidelium animos alia gratia confirmari, ut nullo poenarum, suppliciorum, mortis periculo aut metu, a verae fidei confessione deterrentur. Quod quidem, quum sacro confirmationis chrismate efficiatur, ex eo aperte colligitur, huius sacramenti rationem a baptismo diversam esse. Quare Melchiades<sup>2)</sup> Pontifex utriusque discrimen accurata oratione persecutus, ita scribens: „In baptismate homo ad militiam recipitur, et in confirmatione coarmatur ad pugnam. In fonte baptismatis Spiritus sanctus plenitudinem tribuit ad innocentiam; confirmatione autem perfectionem ad gratiam ministrat. In baptismo regeneramur ad vitam; post baptismum ad pugnam confirmamur. In baptismo abluimur; post baptismum roboramur. Regeneratio per se salvat in pace baptismum recipientes; confirmatio armat atque instruit ad agones.“ Verum haec iam non solum ab aliis conciliis tradita, sed praecipue a sacra synodo Tridentina decreta sunt, ut iam de iis non solum aliter sentire, sed ne dubitare quidem ullo modo liceat.

#### *VI. Quis sacramenti confirmationis sit auctor.*

Quoniam vero supra demonstratum est, quam necessarium esset communiter de omnibus sacramentis docere, a quoniam ortum habuerint: idem etiam de confirmatione tradere oportet, ut fideles huius sacramenti sanctitate magis afficiantur. Igitur a pastoribus explicandum est, Christum Dominum non solum eius auctorem fuisse, sed, sancto Fabiano<sup>3)</sup> Pontifice Romano teste, chrismati ritum et verba, quibus in eius administratione catholica ecclesia utitur, praecepsisse. Quod quidem iis facile probare poterit, qui confirmationem sacramentum esse confitentur, quum sacra omnia mysteria humanae naturae vires superent, nec ab alio, quam a Deo possint institui. Iam vero, quae sint eius partes, ac primum quidem de materia dicendum est.

<sup>1)</sup> 1. Cor. 13, 11. <sup>2)</sup> in ead. ep. <sup>3)</sup> ep. 2. ad episcop. Orient.

*VII. Quae sit sacri huius mysterii materia.*

Haec autem chrisma appellatur, quo nomine a Graecis accepto etsi profani scriptores quodlibet unguenti genus significant, illud tamen, qui res divinas tradunt, communi loquendi consuetudine ad illud tantummodo unguentum accommodarunt, quod ex oleo et balsamo solemini episcopi consecratione conficitur. Quare duea res corporeae permixtae confirmationis materiam praebent; quae quidem diversarum rerum compositio, quemadmodum multiplicem Spiritus sancti gratiam, quae confirmatis tribuitur, declarat, ita etiam ipsius sacramenti excellentiam satis ostendit. Quod autem ea sit huius sacramenti materia quum sancta ecclesia et concilia<sup>1)</sup> perpetuo docuerunt, tum a sancto Dionysio<sup>2)</sup> et complurimis aliis gravissimis Patribus traditum est, in primisque a Fabiano Pontifice<sup>3)</sup>, qui Apostolos chrysatis confectionem a Domino accepisse, nobisque reliquise testatus est.

*VIII. Quid oleum in materia confirmationis signifiet.*

Neque vero ulla alia materia, quam chrysatis, aptior videtur poterat ad illud declarandum, quod hoc sacramento efficitur. Oleum enim, quod pingue sit, et natura sua manet ac diffuat, gratiae plenitudinem exprimit, quae per Spiritum sanctum a Christo capite in alios redundat atque effunditur, „sicut unguentum<sup>4)</sup>”, quod descendit in barbam Aaron, usque in oram vestimenti eius; „unxit<sup>5)</sup>” enim eum „Deus oleo laetitiae praे consortibus suis;” ac „de plenitudine<sup>6)</sup>” eius nos omnes accepimus.“

*IX. Quid balsamum oleo admixtum hic admoneat.*

Balsamum vero, cuius odoratus iucundissimus est, quid aliud significat, quam fideles, quum sacramento confirmationis perficiuntur, eam virtutem omnium suavitatem effundere, ut illud Apostoli queant dicere<sup>7)</sup>: „Christi bonus odor sumus Deo?” Habet praeterea balsamum eam vim, ut, quidquid eo circumlitum fuerit, putrescere non sinat; quod quidem ad huius sacramenti virtutem significandam valde accommodatum videtur, quum plane constet, fidelium animos coelesti gratia, quae in confirmatione tribuitur, praeparatos facile a scelerum contagione defendi posse.

*X. Cur necesse sit, chrisma ab episcopo consecrari.*

Consecratur autem chrisma solemnibus caeremoniis ab episcopo; ita enim Salvatorem nostrum docuisse in extrema coena, quum chrysatis conficiendi rationem Apostolis commendaret, Fabianus pontifex, sanctitate et martyrii gloria clarissimus,

<sup>1)</sup> concil. Laodic. c. 48. Carthagin. 2. c. 3. <sup>2)</sup> eccles. hier. c. 4. <sup>3)</sup> in ead. ep.  
<sup>4)</sup> Ps. 132, 2. 3. <sup>5)</sup> Ps. 44, 8. <sup>6)</sup> Io. 1. 16. <sup>7)</sup> Eclus. 24, 20. II. Cor 9, 15.

tradidit; quanquam, cur ita fieri debuerit, ratione etiam ostendit potest. Etenim in plerisque aliis sacramentis Christus ita eorum materiam instituit, ut sanctitatem quoque illi tribuerit; non solum enim aquam elementum baptismi esse voluit, quum inquit<sup>1)</sup>: „Nisi quis renatus fuerit ex aqua et Spiritu sancto, non potest introire in regnum Dei:“ sed, quum ipse baptizatus est, effecit, ut ea deinceps vi sanctificandi praedita esset. Quare dictum est a sancto Chrysostomo<sup>2)</sup>: „Aqua baptismi purgare peccata credentium non posset, nisi tactu dominici corporis sanctificata fuisset.“ Quoniam igitur Dominus hanc confirmationis materiam usu ipso et tractatione non sacravit, necessarium est, ut sanctis et religiosis precationibus consecretur, neque ad alium ea confectio, nisi ad episcopum pertinere potest, qui eiusdem sacramenti ordinarius minister institutus est.

#### *XI. Quae sit huius Sacramenti forma.*

Sed explicanda erit praeterea altera pars, ex qua sacramentum constituitur, forma scilicet et verba, quae ad sacramunctionem adhibentur; monendique fideles, ut in hoc sacramento suscipiendo, tunc maxime, quum ea pronunciari animadvertunt, ad pietatem, fidem et religionem animos excitent, ne quid coelesti gratiae impedimenti esse possit. His igitur verbis confirmationis forma absolvitur: „Signo te signo crucis, et confirmo te chrismate salutis, in nomine Patris, et Filii, et Spiritus sancti.“ Sed tamen, si ad veritatem rationem quoque revocemus, idem facile probari potest. Etenim sacramenti forma ea omnia continere debet, quae ipsius sacramenti naturam et substantiam explicant.

#### *XII. Hanc esse perfectam huius sacramenti formam, quo modo confirmetur.*

Atqui maxime haec tria in confirmatione observanda sunt: divina potestas, quae ut principalis causa in sacramento operatur; tum robur animi et spiritus, quod per sacram unctionem fidelibus ad salutem tribuitur; deinde signum, quo notatur is, qui in certamen Christianae militiae descensurus est. Ac primum quidem verba illa: „In nomine Patris, et Filii, et Spiritus sancti,“ quae extremo loco posita sunt; alterum ea; „Confirmo te chrismate salutis,“ quae in medio sunt; tertium, quae in principio formae locantur: „Signo te signo crucis,“ satis declarant; quamquam, si etiam ratione aliqua probari non possit, hanc esse huius sacramenti veram et absolutam formam, ecclesiae catholicae auctoritas, cuius magi-

<sup>1)</sup> Io. 3, 5. <sup>2)</sup> c. 10. Dist. IV. de cons.

sterio ita semper edocti fuimus, non patitur, nos ea de re quidquam dubitare.

*XIII. Quis sit proprius sacramenti confirmationis minister.*

Docere etiam pastores debent, quibus potissimum huius sacramenti administratio commissa sit. Nam quum multi sint, ut est apud Prophetam<sup>1)</sup>, qui currant, neque tamen mittantur: necesse est, qui veri et legitimi eius ministri sint, tradere, ut fidelis populus confirmationis sacramentum et gratiam consequi possit. Solum itaque episcopum huius sacramenti confiendi ordinariam potestatem habere, sacrae literae ostendunt. Nam in actis Apostolorum<sup>2)</sup> legimus, quum Samaria verbum Dei accepisset, Petrum et Ioannem ad eos missos esse, qui oraverunt pro ipsis, ut acciperent Spiritum sanctum; nondum enim in quemquam illorum venerat, sed baptizati tantum erant. Quo in loco licet videre, eum, qui baptizaverat, quod tantum esset diaconus, confirmandi potestatem nullam habuisse: sed munus illud perfectioribus ministris, hoc est Apostolis, reservatum esse. Quin etiam, ubicumque sacrae scripturae huius sacramenti mentionem faciunt, idem observari potest.

*XIV. Idem etiam pontificum maximorum decretis ostenditur.*

Neque ad eam rem demonstrandam desunt SS. Patrum atque Pontificum, Urbani, Eusebii, Damasi, Innocentii, Leonis, clarissima testimonia, quemadmodum ex eorum decretis perspicuum est. Divus quoque Augustinus<sup>3)</sup> graviter queritur de corrupta Aegyptiorum et Alexandrinorum consuetudine, quorum sacerdotes audebant confirmationis sacramentum administrare. Ac iure quidem hoc factum esse, ut eiusmodi munus ad epis- scopos deferretur, hac similitudine possunt pastores declarare. Ut enim in exstruendis aedificiis etsi fabri, qui inferiores ministri sunt, caementa, calcem, ligna, et reliquam materiam parant atque componunt, absolutio tamen operis ad architectum spectat: ita etiam hoc sacramentum, quo veluti spirituale aedificium perficitur, a nullo alio, nisi a summo sacerdote, administrari opus erat.

*XV. Cur in confirmatione patrini assumantur, et quae in confirmatione affinitas contrahatur.*

Additur vero etiam patrinus, quemadmodum in baptismo fieri demonstratum est. Nam si, qui gladiatorium dimicacionem subeunt, alicuius indigent, cuius arte et consilio doceantur, quibus ictibus ac petitionibus, salvis ipsis, confidere adversarium possint: quanto magis fideles, quum sacramento

<sup>1)</sup> Ier. 23, 21. <sup>2)</sup> Act. 8, 14. <sup>3)</sup> Aug. in Quaest. vet. et nov. test. p. 1. qu. 101.

confirmationis, quasi firmissimis armis tecti ac muniti in spirituale certamen, cui aeterna salus proposita est, descendunt, ducis ac monitoris indigebunt! Recte igitur ad huius quoque sacramenti administrationem patrini advocandi sunt, quibuscum eadem spiritualis affinitas coniungitur, quae legitima nuptiarum foedera impedit, ut antea docuimus, quum de patrinis ageretur, qui ad baptismum adhibendi sunt.

*XVI. Confirmationis sacramentum non est absolute necessarium, non tamen praetermittendum.*

Sed quoniam saepe evenit, ut fideles in hoc sacramento suscipiendo aut praepropera festinatione, aut dissoluta quadam negligentia et cunctatione utantur, (nam de iis, qui ad eum impietatis gradum venerunt, ut illud contemnere et aspernari audent, nihil est quod dicamus): aperiendum est etiam pastoribus, qui, qua aetate, quo pietatis studio praediti esse debeant, quibus confirmationem dare oportet. Atque illud in primis docendum est, hoc sacramentum eiusmodi necessitatem non habere, ut sine eo salvus quis esse non possit. Quamquam vero necessarium non est, a nemine tamen praetermitti debet, sed potius maxime cavendum est, ne in re sanctitatis plena, per quam nobis divina munera tam large impertiuntur, aliqua negligentia committatur. Quod enim omnibus communiter ad sanctificationem Deus proposuit, ab omnibus etiam summo studio expetendum est.

*XVII. Confirmationis sacramentum ab omnibus suscipiendum demonstratur.*

Ac sanctus quidem Lucas, quum admirabilem illam Spiritus sancti effusionem describeret, ita inquit (Act. 2, 2.): „Et factus est repente de coelo sonus, tanquam advenientis spiritus vehementis, et replevit totam domum;“ deinde paucis interiectis: „Et repleti sunt omnes Spiritu sancto.“ Ex quibus verbis licet intelligere, quoniam domus illa sanctae ecclesiae figuram et imaginem gerebat, ad omnes fideles confirmationis sacramentum, cuius initium ab eo die ductum est, pertinere. Atque id etiam ex ipsius sacramenti ratione facile colligitur; illi enim sacro chrismate confirmari debent, quibus spirituali incremento opus est, et qui ad perfectum Christianae religionis habitum perducendi sunt. At nulli id non maxime convenit; ut enim hoc spectat natura, ut qui in lucem eduntur adolescent, atque ad perfectam aetatem perveniant, etiam si interdum quod vult minus assequatur: ita communis omnium mater catholica ecclesia vehementer optat, ut in eis, quos per baptismum regeneravit, Christiani hominis forma perfecte absolvatur. Id

**a**utem, quoniam mysticae unctionis sacramento efficitur, perspicuum est, eam ad universos fideles aequae pertinere.

*XVIII. Qua aetate Christiani ad hoc Sacramentum sint admittendi.*

In quo illud observandum est, omnibus quidem post baptismum confirmationis sacramentum posse administrari, sed minus tamen expedire hoc fieri, antequam pueri rationis usum habuerint. Quare si duodecimus annus non exspectandus videatur, usque ad septimum certe hoc sacramentum differre, maxime convenit. Neque enim confirmatio ad salutis necessitatem instituta est, sed ut eius virtute optime instructi et parati inveniremur, quum nobis pro Christi fide pugnandum esset; ad quod sane pugnae genus pueros, qui adhuc usu rationis carent, nemo aptos esse iudicarit.

*XIX. Quo pacto, qui iam aetate sunt proiectiores, se ad hoc sacramentum praeparare debeant.*

Ex his igitur efficitur, ut, qui adulta iam aetate confirmandi sunt, siquidem huius sacramenti gratiam et dona consequi cupiant, eos non solum fidem et pietatem afferre, sed graviora etiam peccata, quae admiserunt, ex animo dolere oporteat. Qua in re elaborandum est, ut peccata etiam prius confiteantur, et pastorum cohortatione ad ieiunia et alia pietatis opera suscipienda incitentur, admoneanturque laudabilem illam antiquae ecclesiae consuetudinem renovandam esse, ut non nisi ieiuni hoc sacramentum susciperent. Quod quidem fidelibus facile persuaderi posse existimandum est, si huius sacramenti dona admirabilesque effectus intellexerint.

*XX. Qui sint confirmationis effectus.*

Itaque pastores docebunt, confirmationem hoc cum ceteris sacramentis commune habere, ut, nisi impedimentum aliquod ex parte eius, qui recipit, inferatur, novam gratiam tribuat. Etenim haec sacra et mystica signa eiusmodi esse demonstratum est, quae gratiam declarant atque efficiunt; ex quo sequitur, ut peccata etiam condonet ac remittat, quoniam gratiam simul cum peccato ne fingere quidem nobis licet. Sed praeter haec, quae cum aliis communia censenda sunt, primum quidem illud proprie confirmationi tribuitur, quod baptismi gratiam perficit. Qui enim per baptismum Christiani effecti sunt, quasi infantes modo geniti, teneritatem adhuc et mollietatem quandam habent, ac deinde chrismatis sacramento adversus omnes carnis, mundi et diaboli impetus robustiores fiunt, et eorum animus in fide omnino confirmatur ad confitendum

et glorificandum nomen Domini nostri Iesu Christi, ex quo etiam nomen ipsum inventum esse nemo dubitarit.

*XXI. Confirmationis nomen unde ductum sit.*

Neque enim, ut quidam non minus imperite quam impie finixerunt, confirmationis vocabulum ab eo deducitur, quod olim, qui infantes baptizati erant, quum iam adulti essent, ad episcopum adducebantur, ut fidem Christianam, quam in baptismō suscepérant, confirmarent, ita ut confirmatio nihil a catechesi differre videatur; cuius consuetudinis nullum probatum testimonium afferri potest. Sed ab eo nomen rei impositum est, quod huius sacramenti virtute Deus in nobis id confirmat, quod baptismō operari coepit, nosque ad Christianae soliditatis perfectionem adducit. Nec vero confirmat solum, sed auget etiam, de quo Melchiades ita testatur<sup>1)</sup>: „Spiritus sanctus, qui super aquas baptismi salutifero descendit illapsu, in fonte plenitudinem tribuit ad innocentiam, in confirmatione augmentum praestat ad gratiam.“ Deinde non auget modo, sed admirabili quadam ratione auget. Hoc autem pulcherrime indumenti translatione Scriptura significavit atque expressit; ait enim Dominus Salvator, quum de hoc sacramento loqueretur<sup>2)</sup>: „Sedete in civitate, quoad usque induamini virtute ex alto.“

*XXII. Virtus confirmationis ex his, quae Apostolis evenerunt, declaranda.*

Quodsi pastores voluerint divinam huius sacramenti efficientiam ostendere (hoc vero ad commovendos fidelium animos maximam vim habiturum esse dubitari non potest), satis erit, quid ipsis Apostolis evenerit, explicare. Illi enim ante passionem, vel sub ipsam passionis horam, adeo infirmi et remissi fuerunt, ut, quum Dominus comprehensus est, statim se in fugam coniecerint; Petrus vero, qui ecclesiae petra et fundamentum designatus erat, et summam constantiam excelsique animi magnitudinem prae se tulerat, unius mulierculae voce perterritus,<sup>3)</sup> se Iesu Christi discipulum esse, non semel aut iterum, sed tertio negaverit; ac post resurrectionem omnes propter metum Iudeorum<sup>4)</sup> inclusi domi se continuerint. At vero in die Pentecostes tanta Spiritus sancti virtute omnes repleti sunt, ut dum evangelium, quod eis commissum erat, non solum in Iudeorum regione, sed in universo orbe audacter et libere dispergerent, nihil sibi felicius accidere posse existimaverint, quam quod „digni“ haberentur (Act. 5, 41.), qui „pro Christi nomine contumeliam,“ vincula, tormenta, cruces perferrent.

<sup>1)</sup> Ep. ad Episc. Hisp. <sup>2)</sup> Luc. 24, 49. <sup>3)</sup> Mat. 26, 56. seq. <sup>4)</sup> Io. 20, 19.

*XXIII. Confirmatio characterem imprimit, et iterari non potest.*

Habet praeterea confirmatio eam vim, ut characterem imprimat; quo fit, ut nulla unquam ratione iterari possit, quod etiam in baptismo supra observatum est, ac de sacramento ordinis quoque suo loco planius exponetur. Haec igitur, si a pastoribus saepe et accurate explicata erunt, vix fieri poterit, quin fideles, cognita huius sacramenti dignitate atque utilitate, illud summa cum diligentia sancte et religiose suscipere studeant. Restat nunc, ut aliqua etiam de ritibus et caeremoniis, quibus in hoc sacramento administrando catholica ecclesia utitur, breviter perstringantur; quae explicatio quanto usui futura sit, pastores intelligent, si, quae antea dicta sunt, quum hic locus tractaretur, repetere voluerint.

*XXIV. Quare eorum, qui confirmantur, frons ad modum crucis inungatur.*

Qui igitur confirmantur sacro chrismate, in fronte unguntur. Nam hoc sacramento Spiritus S. in animos fidelium sese infundit, in eisque robur et fortitudinem auget, ut in spirituali certamine viriliter pugnare, et nequissimis hostibus resistere queant. Quocirca declaratur, eos nullo metu aut verecundia, quarum effectionum signa maxime in fronte solent apparere, a libera Christiani nominis confessione absterrendos esse. Praeterea nota illa, qua Christianus a ceteris, veluti miles insignibus quibusdam ab aliis, distinguitur, in illustriiori corporis parte imprimenda erat.

*XXV. Quo potissimum tempore hoc sacramentum conferatur.*

Sed illud quoque solemni religione in ecclesia Dei servatum est, ut in Pentecoste praecipue hoc sacramentum administraretur, quod hoc maxime die Apostoli Spiritus sancti virtute roborati et confirmati sint, cuius divini facti recordatione fideles admonerentur, quae quantaque mysteria in sacra unctione cogitanda essent.

*XXVI. Cur episcopus alapam infligat, et pacem confirmato imprecetur.*

Deinde vero qui unctus et confirmatus est, ut meminerit, se tanquam fortem athletam paratum esse oportere ad omnia adversa invicto animo pro Christi nomine ferenda, manu leviter in maxilla ab episcopo caeditur. Postremo autem pax ei datur, ut intelligat, se gratiae coelestis plenitudinem et pacem, „quae (Phil. 4, 7.) exsuperat omnem sensum,“ consecutum esse. Atque haec summa eorum sit, quae de chrismatis sacramento a pastoribus, non tam quidem nudis verbis et oratione, quam inflammato quodam pietatis studio explicanda sunt, ut ea in animis intimisque fidelium cogitationibus inserere videantur.

## CAPUT IV.

## De Sacramento Eucharistiae.

*I. Quare mysteria eucharistiae summa cum reverentia tractari et suscipi debeant.*

Quemadmodum ex omnibus sacris mysteriis, quae nobis tanquam divinae gratiae certissima instrumenta Dominus Salvator noster commendavit, nullum est, quod cum sanctissimo eucharistiae sacramento comparari queat: ita etiam nulla gravior alicuius sceleris animadversio a Deo metuenda est, quam si res omnis sanctitatis plena, vel potius, quae ipsum sanctitatis auctorem et fontem continet, neque sancte neque religiose a fidelibus tractetur. Id vero Apostolus et sapienter vidit, et de eo nos aperte admonuit. Nam quum declarasset, quanto illi scelere obstricti essent, qui corpus Domini non diiudicarent, statim subiecit<sup>1)</sup>: „Ideo inter vos multi infirmi, et imbecilles, et dormiunt multi.“ Ut igitur fidelis populus, quum coelesti huic sacramento divinos honores tribuendos esse intellexerit, et gratiae uberes fructus capiat, et iustissimam Dei iram effugiat, illa omnia a pastoribus diligentissime exponenda erunt, quae eius maiestatem magis illustrare posse videantur.

*II. Qua de causa et quando eucharistiae sacramentum sit institutum.*

Qua in re opus erit, ut Pauli<sup>2)</sup> Apostoli rationem secuti, qui se, quod a Domino acceperat<sup>3)</sup>, Corinthiis tradidisse professus est, in primis huius sacramenti institutionem fidelibus explicent. Ita vero gestam rem esse, ex Evangelista perspicue colligitur. „Quum enim Dominus dilexisset suos, in finem dilexit eos,“ cuius quidem amoris ut divinum aliquod atque admirabile pignus daret, sciens horam iam advenisse, ut transiret ex hoc mundo ad Patrem, ne ullo unquam tempore a suis abesset, inexplicabili consilio, quod omnem naturae ordinem et conditionem superat, perfecit. Etenim, celebrata cum discipulis agni paschalis coena, ut figura veritati, umbra corpori cederet, „panem<sup>4)</sup> accepit, Deoque gratias agens benedixit, ac fregit, deditque discipulis suis, et dixit: Accipite et manducate: Hoc est corpus meum, quod pro vobis tradetur: hoc facite in meam commemorationem. Similiter et calicem accepit, postquam coenavit, dicens: Hic calix novum testamentum est in meo sanguine. Hoc facite, quotiescumque bibetis, in meam commemorationem.“

<sup>1)</sup> 1. Cor. 11, 29. <sup>2)</sup> 1. Cor. 11, 23. <sup>3)</sup> Io. 13, 1. <sup>4)</sup> Mat. 26, 26. 28. Ius. 22, 19. seq. Marc. 14, 22. 1. Cor. 11, 24. seq.

*III. Cur hoc sacramentum eucharistia vocetur.*

Huius ergo admirabilis sacramenti dignitatem atque excellentiam, quum sacri scriptores fieri nullo modo posse inteligerent, ut uno vocabulo demonstrarent, pluribus eam nominibus exprimere conati sunt. Interdum enim eucharistiam appellant; quod verbum vel bonam gratiam, vel gratiarum actionem latine reddere possumus. Ac recte quidem bona gratia dicendum est, tum quia vitam aeternam, de qua scriptum est<sup>1)</sup>: „Gratia Dei vita aeterna,“ praesignificat; tum quia Christum Dominum, qui vera gratia atque omnium charismatum fons est, in se continet. Nec vero minus apte gratiarum actionem interpretamur; siquidem, quum hanc purissimam hostiam immolamus, immensas quotidie gratias pro universis in nos beneficiis Deo agimus, atque in primis pro eius gratiae tam excellenti bono, quam nobis hoc sacramento tribuit. Sed id ipsum etiam nomen cum iis, quae a Christo Domino gesta esse in hoc mysterio instituendo legimus, optime convenit. Etenim „panem accipiens fregit, ac gratias egit.“ David quoque, quum huius mysterii magnitudinem contemplaretur, antequam carmen illud pronunciaret<sup>2)</sup>: „Memoriam fecit mirabilium suorum misericors et miserator Dominus, escam dedit timentibus se:“ gratiarum actionem praeponendam existimavit, quum inquit<sup>3)</sup>: Confessio et magnificentia opus eius.

*IV. Quare hoc sacramentum communio, pacis et caritatis sacramentum nominetur.\**

Frequenter etiam nomine sacrificii declaratur; de quo mysterio paulo post latius dicendum erit. Vocatur praeterea communio; quod verbum ex illo Apostoli loco sumptum esse liquet, ubi ait<sup>4)</sup>: „Calix benedictionis, cui benedicimus, nonne communicatio sanguinis Christi est? et panis, quem frangimus, nonne participatio corporis Domini est?“ Nam, ut Damascenus<sup>5)</sup> explanavit, hoc sacramentum Christo nos copulat, atque eius carnis et deitatis participes efficit, nosque inter nos in eodem Christo conciliat ac coniungit, et veluti unum corpus coagmentat. Ex quo factum est, ut sacramentum etiam pacis et caritatis diceretur, ut intelligeremus, quam indigni sint Christiano nomine, qui inimicitiias exercent, odioque, dissidia et discordias, ut teterrimas fidelium pestes, omnino exterminandas esse, quum praesertim quotidiano religionis nostrae sacrificio nihil nos studiosius servare, quam pacem et caritatem profiteamur.

<sup>1)</sup> Rom. 6, 23. <sup>2)</sup> Ps. 110, 4. <sup>3)</sup> v. 3. <sup>4)</sup> I. Cor. 10, 16. <sup>5)</sup> de orthod. fide t. 4. c. 13.

*V. Qua ratione idem sacramentum viaticum et coena dicatur.*

Sed viaticum etiam frequenter a sacris scriptoribus appellatur, tum quia spiritualis cibus est, quo in huius vitae peregrinatione sustentamur, tum quia vim nobis ad aeternam gloriam et felicitatem munit. Quare ex veteri ecclesiae catholicae instituto servari videmus, ut nemo fidelium sine hoc sacramento e vita excedat. Ac vetustissimi quidem Patres, Apostoli auctoritatem secuti, „coenae“ etiam nomine sacram eucharistiam interdum vocarunt, quod in illo novissimae coenae salutari mysterio a Christo Domino sit instituta.

*VI. Eucharistia cibo aut potu sumpto confici et sumi non potest.*

Neque vero propterea a cibo aut potionе eucharistiam confidere aut sumere licet, quod ab Apostolis salutariter introducta consuetudo, quemadmodum veteres scriptores memoriae prodiderunt, perpetuo retenta ac servata est, ut a ieiunis tantum perciperetur.

*VII. Eucharistia veri nominis sacramentum est.*

Sed explicata nominis ratione docendum erit, hoc verum esse sacramentum, atque unum ex septem illis, quae sancta ecclesia semper religiose coluit ac venerata est. Nam quum calicis consecratio fit, mysterium fidei appellatur. Praeterea, ut infinita pene sacrorum scriptorum testimonia omittamus, qui hoc inter vera sacramenta numerandum esse, perpetuo censuerunt, ex ipsa ratione et natura sacramenti idem convincitur. Etenim in eo signa sunt externa et sensibus subiecta. Habet deinde gratiae significationem et efficientiam. Praeterea de Christi institutione neque Evangelistae, neque Apostolus dubitandi locum relinquunt. Quae omnia quum in unum convenient ad sacramenti veritatem confirmandam, nullis aliis argumentis opus esse perspicitur.

*VIII. Multa esse in hoc sacramento, quibus sacramenti nomen conveniat.*

Sed illud diligenter pastoribus observandum est, multa in hoc mysterio esse, quibus aliquando sacramenti nomen scriptores tribuerunt. Interdum enim et consecratio et perceptio, frequenter vero et ipsum Domini corpus et sanguis, qui in eucharistia continetur, sacramentum vocari consuevit. Ait enim D. Augustinus<sup>1)</sup> sacramentum hoc duobus constare, visibili scilicet elementorum specie, et invisibili carne et sanguine ipsius Domini nostri Iesu Christi. Atque ad eundem modum hoc sacramentum adorandum esse, nimirum cor-

<sup>1)</sup> I. c. 48. Dist. II. de cons.

pus et sanguinem Domini intelligentes, affirmamus. Verum haec omnia minus proprie sacramenta dici perspicuum est. Ipsae autem panis et vini species veram et absolutam huius nominis rationem habent.

*IX. Quomodo differat eucharistia a reliquis omnibus sacramentis.*

Sed quantum hoc sacramentum a reliquis omnibus differat, facile colligitur. Nam cetera sacramenta materiae usu perficiuntur, dum scilicet alicui administrari ea contingit. Baptismus enim sacramenti naturam tunc adipiscitur, quum re ipsa homo aqua abluitur; at vero ad eucharistiae perfectionem satis est ipsius materiae consecratio; utrumque enim sacramentum esse non desinit, quamvis in pyxide asservetur. Deinde in conficiendis aliis sacramentis nulla fit materiae atque elementi in aliam naturam mutatio; etenim baptismi aqua, aut chrismatis oleum, quum illa sacramenta administrantur, priorem aquae et olei naturam non amittunt: in eucharistia vero, quod panis et vinum ante consecrationem erat, confecta consecratione vere est corporis et sanguinis Domini substantia.

*X. Duplex eucharistiae materia duo sacramenta non constituit.*

Licet autem duo sint elementa, panis scilicet et vinum, ex quibus integrum eucharistiae sacramentum conficitur, non tamen plura sacramenta, sed unum tantum esse, ecclesiae auctoritate docti confitemur; aliter enim septenarius sacramentorum numerus, quemadmodum semper traditum, atque a conciliis Lateranensi, Florentino et Tridentino decretum est, constare non poterit. Nam quum huius sacramenti gratia unum corpus mysticum efficiatur, ut sacramentum ipsum rei, quam efficit, conveniat, unum esse oportet, atque unum quidem, non quia individuum sit, sed quia unius rei significationem habet. Nam quemadmodum cibus et potio, quae duae diversae res sunt, ad unam tantum rem adhibentur, ut scilicet vires corporis reficiantur: ita etiam duas illis diversas sacramenti species respondere consentaneum fuit, quae cibum spiritualem significarent, quo mentes sustinentur et recreantur. Quare a Domino salvatore dictum est (Io. 6, 56): „Caro mea vere est cibus, et sanguis meus vere est potus.“ Sed diligenter explicandum est, quid eucharistiae sacramentum significet, ut fideles, sacra mysteria oculis intuentes, simul etiam divinarum rerum contemplatione animum pascant.

*XI. Quarum rerum significatio hoc sacramento includatur.*

Tria vero sunt, quae nobis hoc sacramento indicantur. Primum est Christi Domini passio, quae iam praeteriit; ipse

enim docuit<sup>1)</sup>: „Hoc facite in meam commemorationem,“ et Apostolus testatus<sup>2)</sup> est: „Quotiescumque manducabis panem hunc, et calicem bibetis, mortem Domini annunciatibis, donec veniat.“ Alterum est divina et coelestis gratia, quae praesens ad animam alendam et conservandam hoc sacramento tribuitur. Quemadmodum enim baptismo in novam vitam gignimur, confirmatione reboramur, ut Satanae repugnare, et palam Christi nomen profiteri possimus: ita eucharistiae sacramento alimur ac sustentamur. Tertium est, quod futurum praenunciat, aeternae iucunditatis et gloriae fructus, quos in coelesti patria ex Dei promissione capiemus. Haec igitur tria, quae instantis, praeteriti et consequentis temporis varietate distingui perspicuum est, sacris mysteriis ita significantur, ut totum sacramentum, quamvis ex diversis speciebus constet, ad singula horum declaranda tanquam ad unius rei significationem referatur.

*XII. Quae sit huius sacramenti materia, et cuiusmodi panis sit consecrandus.*

Sed in primis cognoscenda est a pastoribus huius sacramenti materia, tum ut ipsi rite illud possint confidere, tum etiam ut fideles admoneantur, cuius rei symbolum sit, atque eius rei, quam significat, studio et desiderio exardescant. Duplex itaque est huius sacramenti materia: altera panis ex tritico confectus, de qua primo agetur; de altera postea dicendum erit. Nam, ut docent Evangelistae Matthaeus<sup>3)</sup>, Marcus<sup>4)</sup> et Lucas<sup>5)</sup>, Christus Dominus panem in manus accepit, benedixit, et fregit dicens: „Hoc est corpus meum.“ Apud Iohannem<sup>6)</sup> quoque idem Salvator noster se ipsum panem appellavit, quum inquit: „Ego sum panis vivus, qui de celo descendii.“ Quum autem varia sint panis genera, vel quia materia differunt, ut quum alius ex tritico, alius ex hordeo, aut ex leguminibus ceterisque terrae fructibus confectus est, vel quia diversis qualitatibus praediti sunt (uni enim fermentum additur, alter vero fermenti omnino expers esse potest): quod ad primum attinet, Salvatoris verba ostendunt, panem ex tritico confici oportere; communi enim loquendi consuetudine, quum panis absolute dicitur, panem ex tritico intelligi satis constat. Id etiam veteris Testamenti figura declaratur. Praeceptum enim a Domino fuerat<sup>7)</sup>, ut „panes propositionis,“ qui hoc sacramentum significabant „ex simila“ conficerentur.

<sup>1)</sup> Luc. 22, 19. <sup>2)</sup> I. Cor. 11, 26. <sup>3)</sup> Mat. 26, 26. <sup>4)</sup> Marc. 14, 22. <sup>5)</sup> Luc. 22, 19.  
<sup>6)</sup> Io. 6, 41. <sup>7)</sup> Lev. 24, 5.

*XIII. Panem, ex quo eucharistia conficitur, azymum esse conveniens est.*

Sed quemadmodum nullus panis, nisi triticeus, apta ad sacramentum materia putandus est (hoc enim apostolica traditio nos docuit, et ecclesiae catholicae auctoritas firmavit): ita etiam ex iis, quae Christus Dominus gessit, azymum esse debere, facile intelligitur. Ipse enim<sup>1)</sup> „primo azymorum die,“ quo nihil fermentati domi habere Iudeis licebat, hoc sacramentum confecit atque instituit. Quod si quis Ioannis Evangelistae auctoritatem opponat, qui haec omnia „ante festum diem Paschae<sup>2)</sup>“ acta esse commemorat: ea ratio facile dissolvi potest. Etenim quem primum azymorum diem ceteri Evangelistae appellarunt, quod feria quinta vesperi dies festi azymorum inciperent, quo tempore Salvator noster Pascha celebravit; eum ipsum diem Ioannes pridie Paschae fuisse describit, ut qui diei naturalis spatium, quod ab oriente sole inchoatur, in primis notandum existimarit. Quapropter D. etiam Chrysostomus<sup>3)</sup> primum azymorum diem interpretatur eum diem, quo ad vesperam azyma comedenda essent. Sed azymi panis consecratio quantum convenienter integritati, et mentis munditiae, quam fideles ad hoc sacramentum afferre debent, ab Apostolo docemur, quum inquit<sup>4)</sup>: „Expurgate vetus fermentum, ut sitis nova conspersio, sicut estis azymi. Etenim Pascha nostrum immolatus est Christus; itaque epulemur non in fermento veteri, neque in fermento malitia et nequitiae, sed in azymis sinceritatis et veritatis.“

*XIV. Panis azymus ad eucharistiam non omnino necessarius.*

Neque tamen ea qualitas adeo necessaria existimanda est, ut, si illa pani desit, sacramentum confici non possit; utrumque enim panis genus veram et propriam panis rationem et nomen habet, quamquam nemini licet privata auctoritate vel potius temeritate laudabilem ecclesiae suae ritum immutare. Atque eo minus id facere latinis sacerdotibus permissum est, quibus praeterea Pontifices Max.<sup>5)</sup> praeceperunt, ut ex azymo tantum sacra mysteria conficerent. Atque haec de altera huius sacramenti materia exposuisse satis sit; in quo tamen illud animadvertisendum est, quam multa materia ad sacramentum conficiendum uti oporteat, definitum non esse, quum illorum etiam certus numerus definiri nequeat, qui aut possint, aut debeant sacra mysteria percipere.

<sup>1)</sup> Mat. 26, 17. Ex. 12, 19. <sup>2)</sup> 1o. 13, 1. <sup>3)</sup> Homil. 81. in Matth. <sup>4)</sup> I. Cor. 5, 7. seq.  
<sup>5)</sup> c. 14. X. de celebr. miss. III. 41.

*XV. Quae materia sit usurpanda ad consecrationem sanguinis Domini.*

Superest, ut de altera huius sacramenti materia et elemento dicatur. Est autem vinum ex vitis fructu expressum, cui modicum aquae permistum sit. Nam Dominum Salvatorem vino in huius sacramenti institutione usum esse, catholica ecclesia semper docuit, quum ipse dixerit<sup>1)</sup>: „Non bibam amodo de hoc genimine vitis usque in diem illum.“ Quo in loco Chrysostomus: „De genimine,“ inquit<sup>2)</sup>, „vitis, quae certe vinum, non aquam produxit,“ ut tanto ante illorum haeresim, qui aquam solam in hisce mysteriis adhibendam senserunt, convellere videretur.

*XVI. Aqua in sacramento vino est admiscenda.*

Aquam vero Dei ecclesia vino semper admiscuit; primum, quod id a Christo Domino factum esse, et conciliorum auctoritate et sancti Cypriani<sup>3)</sup> testimonio comprobatur; deinde, quod sanguinis et aquae, quae ex eius latere exierunt, hac permistione memoria renovatur. Tum vero „aquaee,“ ut in Apocalypsi legimus<sup>4)</sup>, populum designant, quare aqua vino admixta fidelis populi cum Christo capite coniunctionem significat. Atque hoc ex apostolica traditione perpetuo sancta ecclesia servavit.

*XVII. Non est necessarium absolute aquam adhiberi, et minor aquae quam vini quantitas esse debet.*

Sed quamvis aquae admiscendae ita graves rationes sint, ut eam sine mortali peccato praetermittere non liceat: ea tamen si desit, sacramentum constare potest. Illud autem sacerdotibus animadvertendum est, quemadmodum in sacris mysteriis aquam vino adhibere oportet, sic etiam modicam infundendam esse. Nam, ecclesiasticorum scriptorum sententia et iudicio, aqua illa in vinum convertitur. Quare de eo Honori<sup>5)</sup> pontifex ita scribit: „Perniciosus in tuis partibus inolevit abusus, videlicet quod maior quantitas aquae in sacrificio, quam vini adhibetur; quum secundum consuetudinem rationabilem ecclesiae generalis longe plus vini quam aquae adhibendum sit.“ Huius igitur sacramenti haec duo tantum elementa sunt, ac merito pluribus decretis<sup>6)</sup> sanctum est, ne quid aliud praeter panem et vinum, quod nonnulli facere non verebantur, offerre liceat. Sed iam videndum est, haec duo panis et vini symbola quam apta sint ad eas res declarandas, quarum sacramenta esse credimus et confitemur.

<sup>1)</sup> Mat. 26, 29. Marc. 14, 25. <sup>2)</sup> hom. 82. in Matth. <sup>3)</sup> ep. 63. Conc. Trid. sess. 22. c. 7. <sup>4)</sup> Apoc. 17, 15. <sup>5)</sup> c. 13. X. de celebr. miss. III. 41. <sup>6)</sup> c. 1. de concecr. dist. 2.

*XVIII. Quot et quantas res panis et vini symbola in hoc sacramento repraesentent.*

Primum enim Christum nobis significant, ut vera est hominum vita; ipse enim Dominus ait<sup>1)</sup> „Caro mea vere est cibus, et sanguis meus vere est potus.“ Quum igitur corpus Christi Domini vitae aeternae alimentum illis praebeat, qui eius sacramentum pure et sancte suscipiunt, recte iis potissimum rebus conficitur, quibus haec vita continetur, ut fideles facile possint intelligere, pretiosi corporis et sanguinis Christi communione mentem animumque saturari. Non nihil etiam haec ipsa elementa ad id valent, ut eam cognitionem accipient homines, esse in sacramento corporis et sanguinis Domini veritatem. Nam quum panem et vinum in humanam carnem et sanguinem, quotidie vi naturae immutari animadvertisamus: facilius adduci possumus hac similitudine, ut credamus, panis et vini substantiam in veram Christi carnem, verumque eius sanguinem coelesti benedictione converti. Affert etiam aliquid adiumenti haec admirabilis elementorum mutatio ad adumbrandum quod fit in anima. Ut enim, etsi nulla extrinsecus panis et vini mutatio apparet, tamen eorum substantia in carnem et sanguinem Christi vere transit: ita etiam, tametsi in nobis nihil immutatum videtur; interius tamen ad vitam renovamur, dum veram vitam eucharistiae sacramento accipimus. Accedit ad haec, quod, quum unum Ecclesiae corpus<sup>2)</sup> ex multis membris compositum sit, nulla re magis elucet ea coniunctio, quam panis vinique elementis. Panis enim ex multis granis conficitur, et vinum ex multitudine racemorum existit; atque ita nos, quum multi simus, huius divini mysterii vinculo arctissime colligari, et tanquam unum corpus effici, declarant.

*XIX. Qua forma ad consecrandum panem uti oporteat.*

Sequitur nunc, ut de forma, qua ad consecrandum panem uti oporteat, agatur; non quidem eius rei causa, ut haec mysteria fideli populo, nisi necessitas cogat, tradantur, (eos enim, qui sacris iniciati non sunt, de his erudiri necessarium non est), sed ne formae ignoratione in sacramento confiendo a sacerdotibus turpissime peccetur. Itaque a sanctis Evangelistis<sup>3)</sup> Matthaeo et Luca, itemque ab Apostolo docemur, illam esse formam: „Hoc est corpus meum.“ Scriptum est enim: „Coenantibus illis accepit Iesus panem, et benedixit, ac fregit, deditque discipulis suis, et dixit: Accipite et manducate, hoc est corpus meum.“ Quae quidem consecrationis forma quum

<sup>1)</sup> Io. 6, 56. <sup>2)</sup> I. Cor. 10, 17. 12, 12. <sup>3)</sup> Mat. 26, 26. Lue. 22, 19. I. Cor. 11, 24.

a Christo Domino servata sit, ea perpetuo catholica ecclesia usa est. Praetermittenda sunt hoc loco sanctorum Patrum testimonia, quae infinitum esset enumerare, et Concilii Florentini decretum, quod omnibus patet, atque in promptu est; quum praesertim ex illis Salvatoris verbis<sup>1)</sup>: „Hoc facite in meam commemorationem,“ idem liceat cognoscere. Nam quod Dominus faciendum preecepit, non solum ad id, quod egerat, sed etiam ad ea, quae dixerat, referri debet; atque ad verba maxime pertinere intelligendum est, quae non minus efficiendi, quam significandi causa prolata erant. Sed ratione etiam id facile persuaderi potest. Nam forma ea est, qua illud significatur, quod in hoc sacramento efficitur. Quum autem haec verba id, quod fit, significant ac declarant, hoc est panis conversionem in verum Domini nostri corpus: sequitur, formam in illis ipsis verbis constituendam esse; in quam sententiam quod ab evangelista<sup>2)</sup> dictum est „Benedixit“ licet accipere. Perinde enim videtur intelligendum, ac si dixisset: „accipiens panem benedixit, dicens: Hoc est corpus meum.“

*XX. Non omnia verba, quae ex consuetudine ecclesiae ad consecrationem adhibentur, sunt necessaria.*

Quamvis enim Evangelista verba illa<sup>3)</sup>: „Accipite et comedite,“ praeposuerit: illis tamen non materiae consecrationem, sed usum tantummodo significari, perspicuum est. Quare a sacerdote quidem omnino proferri debent, sed ad sacramentum conficiendum necessaria non sunt; quemadmodum etiam profertur coniunctio illa „enim“ in corporis et sanguinis consecratione; aliter enim fiet, ut, si hoc sacramentum nemini administrandum sit, confici non oporteat, aut non possit quidem; quum tamen dubitare non liceat, quin sacerdos, prolatis ex more atque instituto sanctae ecclesiae verbis Domini, aptam panis materiam vere consecret, quamvis deinde contingat, ut nulli unquam sacra eucharistia administretur.

*XXI. Quae sit forma conficiendi sanguinem.*

Iam vero, quod ad vini, quae est altera huius sacramenti materia, consecrationem attinet, ob eandem causam, quam supra commemoravimus, opus est, ut sacerdos eius formam cognitam et perspectam habeat. Eam igitur his verbis comprehendendi certo credendum est: „Hic<sup>4)</sup> est enim calix sanguinis mei, novi et aeterni Testamenti, mysterium fidei, qui pro vobis et pro multis effundetur in remissionem peccatorum.“ Ex quibus

<sup>1)</sup> Luc. 22, 19. <sup>2)</sup> Mat. 26, 26. <sup>3)</sup> Mat. 26, 28. Marc. 14, 24. Luc. 22, 20.  
<sup>4)</sup> I. Cor. 2, 25.

verbis plura quidem a sacris Scripturis colliguntur, quaedam vero in ecclesia ex Apostolica traditione conservata sunt. Nam quod dicitur: „Hic est calix,“ a D. Luca et ab Apostolo scriptum est; quod vero sequitur: „Sanguinis mei,“ vel „sanguis meus novi Tastamenti, qui pro vobis et pro multis effundetur in remissionem peccatorum,“ partim a D. Luca, partim a D. Matthaeo dictum est. Verba autem illa: „aeterni“ et „mysterium fidei,“ sancta traditio, catholicae veritatis interpres et custos, nos docuit.

*XXII. Quod haec sit vera consecrationis forma ostenditur.*

Verum de hac forma nemo dubitare poterit, si, quod ante dictum est de forma consecrationis, quae ad panis elementum adhibetur, hoc etiam loco attendatur. Constat enim, iis verbis, quae vini substantiam in sanguinem Domini converti significant, huius elementi formam contineri. Quare, quum verba illa hoc aperte declarent, perspicuum est, aliam formam constituendam non esse. Exprimunt autem praeterea quosdam effusi sanguinis in passione Domini admirabiles fructus, qui ad hoc sacramentum maxime pertinent. Unus est aditus ad aeternam hereditatem, quae novi atque aeterni Testamenti iure ad nos venit. Alter est aditus ad iustitiam per mysterium fidei; Iesum<sup>1)</sup> enim per fidem in sanguine eius propitiatorem Deus proposuit, ut ipse sit iustus, et iustificans eum, qui ex fide est Iesu Christi. Tertius est remissio peccatorum.

*XXIII. Forma consecrationis sanguinis exponitur.*

Quoniam vero haec ipsa consecrationis verba plena mysteriorum sunt, aptissimeque ad rem convenientia, diligentius pendere ea oportet. Quod vero dicitur: „Hic est calix sanguinis mei,“ sic intelligendum est: Hic est sanguis meus, qui hoc calice continetur. Recte autem et apposite, dum sanguis hic, ut est fidelium potus, consecratur, calicis mentio facienda est; neque enim sanguis huiusmodi potionem satis significare videretur, nisi vase aliquo exceptus esset. Sequitur deinde: „novi Testamenti,“ quod quidem ob eam rem additum est, ut intelligeremus, Christi Domini sanguinem non figura, quemadmodum in veteri Testamento fiebat (de eo enim apud Apostolum ad Hebraeos<sup>2)</sup> legimus, „sine sanguine“ Testamentum dedicatum „non“ esse), sed vere et re ipsa hominibus tradi; quod ad novum Testamentum pertinet. Quare Apostolus inquit<sup>3)</sup>: „Ideo novi Testimenti mediator est“ Christus, „ut morte intercedente, repromotionem accipient, qui vocati sunt,

<sup>1)</sup> Rom. 3, 25. <sup>2)</sup> Hebr. 9, 18. <sup>3)</sup> Hebr. 9, 15.

aeternae hereditatis.“ Verbum vero: „aeterni,“ ad hereditatem aeternam, quae Christi Domini aeterni testatoris morte ad nos iure pervenit, referendum est. Quod subiungitur: „mysterium fidei,“ non rei veritatem excludit, sed quod occulte latet, atque ab oculorum sensu remotissimum est, certa fide credendum esse significat. Diversa vero hisce verbis sententia hoc loco subiecta est ab ea, quam habent, quum baptismo etiam tribuntur. Nam quod sanguinem Christi, sub vini specie latenter, fide cernimus, mysterium fidei dicitur. At baptismus, quoniam universam Christianae fidei professionem complectitur, a nobis fidei sacramentum, a Graecis mysterium iure appellatur. Quamquam alia etiam ratione sanguinem Domini fidei mysterium dicimus, quod scilicet in eo maxime plurimum difficultatis et negotii humana ratio experiatur, quum nobis fides credendum proponit, Christum Dominum, verum Dei Filium, simulque Deum et hominem, mortem pro nobis pertulisse; quae quidem mors sanguinis sacramento designatur.

*XXIV. Cur maxime in sanguinis consecratione mortis mentio fiat.*

Quapropter apposite hoc loco potius, quam in consecratione corporis, passio Dominica commemoratur his verbis<sup>1)</sup>: „Qui effundetur in remissionem peccatorum.“ Sanguis enim, separatim consecratus, ad passionem Domini, et mortem, et passionis genus ante omnium oculos ponendum maiorem vim et momentum habet. Sed verba illa, quae adduntur: „pro vobis et pro multis,“ a Mattheo et Luca singula a singulis sumpta sunt; quae tamen sancta ecclesia Spiritu Dei instruta simul coniunxit; pertinent autem ad passionis fructum atque utilitatem declarandam. Nam si eius virtutem inspiciamus, pro omnium salute sanguinem a Salvatore effusum esse, fatendum erit; si vero fructum, quem ex eo homines percepérint, cogitemus, non ad omnes, sed ad multos tantum eam utilitatem pervenire, facile intelligemus. Quum igitur „pro vobis“ dixit, vel eos, qui aderant, vel delectos ex Iudeorum populo, quales erant discipuli, excepto Iuda, quibuscum loquebatur, significavit. Quum autem addidit: „pro multis,“ reliquos electos ex Iudeis aut gentibus intelligi voluit. Recte ergo factum est, ut „pro universis“ non diceretur, quum hoc loco tantummodo de fructibus passionis sermo esset, quae salutis fructum delectis solum attulit. Atque hoc spectant verba illa Apostoli<sup>2)</sup>: „Christus semel oblatus est, ad multorum exaurienda peccata.“ Et quod Dominus apud Ioannem inquit<sup>3)</sup>: „Ego

<sup>1)</sup> Mat. 26, 28. <sup>2)</sup> Ilebr. 9, 28. <sup>3)</sup> Io. 17, 9.

pro eis rogo, non pro mundo rogo, sed pro his, quos dedisti mihi, quia tui sunt.“ Plurima alia in huius consecrationis verbis latent mysteria, quae pastores assidua rerum divinarum meditatione et studio ipsi per se iuvante Domino facile assequentur.

*XXV. Non expedit in hoc sacramento sensuum adhibere iudicium.*

Sed iam ad earum rerum explicationem oratio revertatur, quae, ut a fidelibus ignorentur, nullo modo committendum est. Ac quoniam Apostolus admonet, gravissimum scelus admitti ab iis, „qui (I. Cor. 11, 29.) non diiudicant corpus Domini:“ hoc in primis doceant pastores, animum atque rationem a sensibus omni studio avocandam esse. Si enim fideles ea tantum in hoc sacramento contineri sibi persuaserint, quae sensibus percipiunt, in summam impietatem adducantur necesse est, quum nihil aliud praeter panis et vini speciem oculis, tactu, odoratu, gustu sentientes, panem tantummodo ac vinum in sacramento esse iudicaverint. Curandum igitur est, ut fidelium mentes, quam maxime fieri potest, a sensuum iudicio abstrahantur, atque ad immensam Dei virtutem et potentiam contemplandam excitentur.

*XXVI. Quid mysticae consecrationis virtute in hoc sacramento potissimum efficiatur.*

Tria enim sunt maxime admiranda atque suspicienda, quae in hoc sacramento verbis consecrationis effici fides catholica sine ulla dubitatione credit ac confitetur. Primum est, verum Christi Domini corpus, illud idem, quod natum ex Virgine in coelis sedet ad dexteram Patris, hoc sacramento contineri. Alterum est, nullam in eo elementorum substantiam remanere, quamvis nihil magis a sensibus alienum et remotum videri possit. Tertium est, quod ex utroque facile colligitur, etsi verba consecrationis id maxime exprimunt; accidentia, quae aut oculis cernuntur, aut aliis sensibus percipiuntur, sine ulla re subiecta esse, mira quidem atque inexplicabili ratione. Ac panis quidem et vini accidentia omnia licet videre, quae tamen nulli substantiae inhaerent, sed per se ipsa constant; cum panis et vini substantia in ipsum Domini corpus ita mutetur, ut panis et vini substantia omnino esse desinat.

*XXVII. Certum est, idem Christi corpus, quod natum est de Maria virginе, in eucharistia contineri.*

Verum ut prius de primo agatur, conentur pastores explicare, quam perspicua et clara sint Salvatoris nostri verba, quae corporis eius veritatem in sacramento demonstrant. Nam quum inquit: „Hoc est corpus meum, hic est sanguis meus:“ nemo, qui modo sanae mentis sit, ignorare potest quid nobis

intelligendum sit, praesertim quum de humana natura sermo habeatur, quam in Christo vere fuisse, catholica fides dubitare neminem patitur; ut vir sanctissimus atque doctissimus Hilarius<sup>1)</sup> praeclare scripserit, de veritate carnis et sanguinis Christi, quum et ipsius Domini professione et fide nostra caro eius vere sit cibus, relictum non esse ambigendi locum.

*XXVIII. Quomodo item verum Christi corpus in eucharistia esse convincatur.*

Verum alter praeterea locus a pastoribus enucleandus est, ex quo aperte licet cognoscere, verum Domini corpus et sanguinem in eucharistia contineri. Nam Apostolus, posteaquam commemoravit, panem et vinum a Domino consecratum, et sacra mysteria Apostolis suis administrata esse, subiungit<sup>2)</sup>: „Probet autem se ipsum homo, et sic de pane illo edat, et de calice bibat. Qui enim manducat et bibit indigne, iudicium sibi manducat et bibit, non diuidicans corpus Domini.“ Quod si, ut haeretici dictitant, nihil aliud in sacramento venerandum esset praeter memoriam et signum passionis Christi: quid opus erat tam gravibus verbis fideles hortari, ut se ipsos probarent? Gravi enim illa iudicii voce declaravit Apostolus, nefarium aliquod scelus ab eo admitti, qui impure sumens corpus Domini, quod in eucharistia occulte latet, ab alio ciborum genere non distinguit; quod etiam supra in eadem epistola uberiori explicavit Apostolus his verbis<sup>3)</sup>: „Calix benedictionis, cui benedicimus, nonne communicatio sanguinis Christi est? et panis, quem frangimus, nonne participatio corporis Domini est?“ Quae quidem verba veram corporis et sanguinis Christi Domini substantiam demonstrant. Haec igitur Scripturae loca a pastoribus explicanda erunt, atque in primis docendum, nihil in iis dubii aut incerti relictum esse, praesertim quum haec ecclesiae Dei sacrosancta auctoritas interpretata sit.

*XXIX. Ecclesiae Christi sententia de sensu Scripturarum et veritate corporis Domini in eucharistia, quomodo sit perquirenda.*

Ad cuius sententiae cognitionem dupli via et ratione possumus pervenire. Prima est, quum Patres, qui ab initio ecclesiae atque omni deinceps aetate floruerunt, et ecclesiasticae doctrinae optimi testes sunt, consulimus. Hi vero summo consensu omnes huius dogmatis veritatem apertissime tradiderunt; quorum singula testimonia afferre quoniam operosi laboris esset, satis erit pauca notare, vel indicare potius, ex quibus iudicium de ceteris facile fieri poterit. Primus igitur

<sup>1)</sup> de Trinit. lib. 8. <sup>2)</sup> I. Cor. 11, 28. <sup>3)</sup> I. Cor. 10, 16.

D. Ambrosius fidem suam proferat, qui in libro de iis, qui initiantur mysteriis<sup>1)</sup>, testatus est, verum Christi corpus in hoc sacramento sumi, sicut verum ex Virgine sumptum est; idque certissima fide tenendum esse. Et alio loco<sup>2)</sup> docet, ante consecrationem panem ibi esse; post consecrationem autem carnem Christi. Accedat alter testis D. Chrysostomus, non minoris fidei et gravitatis, qui quidem quum multis aliis in locis hanc ipsam veritatem profitetur et docet, tum vero praecipue homilia 60. de iis, qui sacra mysteria impure sumunt; itemque homilia 44. et 45. in S. Ioannem; ait enim: „Pareamus Deo, neque contradicamus, licet vel cogitationibus vel oculis nostris videatur adversari quod dicitur; ipsius enim sermo infallibilis est, sensus noster facile seducitur.“ His vero omni ex parte consentiunt, quae D. Augustinus, acerrimus catholicae fidei propugnator, semper docuit, atque in primis titulum Psalmi 33. exponens; scribit enim: „Portare se in manibus suis homini impossibile est, solique Christo convenire potest; ferebatur enim ille in manibus suis, quando commendans ipsum corpus suum ait: Hoc est corpus meum.“ Ac Cyrillus (praetereo Iustinum, et Irenaeum) adeo aperte libro 4. in Ioannem veram Domini carnem in hoc sacramento esse affirmat, ut eius verba nullis possint fallacibus et captiosis interpretationibus obscurari. Quod si pastores alia etiam Patrum testimonia requirent, facile erit, sanctos Dionysium, Hilarium, Hieronymum, Damascenum, addere, innumerabilesque alios, quorum de hac re gravissimas sententias doctorum et piorum hominum industria et labore in unum congestas passim legimus.

*XXX. Quoties contraria opinio in conciliis ecclesiae condemnata sit.*

Altera restat via, qua sanctae ecclesiae iudicium in iis, quae ad fidem pertinent, investigare liceat, contrariae scilicet doctrinae et opinionis damnatio. At vero constat, semper corporis Christi veritatem in sancto eucharistiae sacramento ita per universam ecclesiam diffusam et disseminatam esse, et consentienti voluntate ab omnibus fidelibus receptam, ut, quum ante quingentos annos Berengarius id negare ausus esset, ibique signum tantummodo esse assereret, statim in Vercellensi Concilio, quod Leonis IX. auctoritate convocatum fuerat, omnium sententiis condemnatus ipse haeresim suam anathemati addixerit; qui postea, quum ad eandem impietatis insaniam rediisset, tribus aliis conciliis, Turonensi et duobus Romanis,

<sup>1)</sup> c. 9. <sup>2)</sup> de sacr. 4, 4.

quorum alterum Nicolaus II., alterum Gregorius VII. Pontifices maximi convocarunt, damnatus est. Eam postea sententiam Innocentius III. in concilio Lateranensi magno confirmavit; ac deinceps a Florentina et Tridentina synodis eiusdem veritatis fides apertius declarata ac stabilita est. Haec igitur si pastores diligenter exposuerint, (ut nihil dicamus de iis, qui erroribus obcaecati nihil magis quam veritatis lucem oderunt,) et infirmos confirmare, et piorum mentes summa quādā laetitia et voluptate afficere poterunt.

*XXXI. Quomodo in symbolo dogma de veritate corporis Christi in hoc sacramento includatur.*

Cum praesertim fidelibus dubitare non liceat, quin inter ceteros fidei articulos huius etiam dogmatis fides comprehendatur. Nam quum Dei summam omnium rerum potestatem credunt et confitentur, credant etiam necesse est, potestatem ei non defuisse maximi huius operis efficiendi, quod in eucharistiae sacramento admiramur et colimus. Deinde quum credunt sanctam ecclesiam catholicam: necessario sequitur, ut simul credant, eam esse, quam explicavimus, huius sacramenti veritatem.

*XXXII. Quanta sit ecclesiae militantis dignitas ex huius mysterii maiestate ostenditur.*

Sed nihil est profecto, quod ad piorum iucunditatem et fructum addi possit, quum huius altissimi sacramenti dignitatem contemplantur. Primum enim intelligunt, quanta sit evangelicae legis perfectio, cui datum est, id re ipsa habere, quod signis tantum et figuris Mosaicae legis tempore adumbratum fuerat. Quare divinitus dictum est a Dionysio<sup>1)</sup> ecclesiam nostram medium esse inter Synagogam et supremam Hierusalem, ac propterea utriusque partipem. Ac profecto satis mirari fideles nunquam poterunt sanctae ecclesiae perfectio nem, eiusque gloriae altitudinem, quum inter eam et coel stem beatitudinem unus tantum gradus interesse videatur. Hoc enim nobis cum coelitibus commune est, ut utrique Christum Deum et hominem praesentem habeamus; sed, quo uno gradu ab iis distamus, illi praesentes beata visione perfruuntur, nos praesentem et tamen ab oculorum sensu remotum, sacrorum mysteriorum admirabili integumento se occultantem, firma et constanti fide veneramur. Praeterea fideles hoc sacramento Christi Salvatoris nostri perfectissimam caritatem experiuntur; eius enim bonitatem maxime decuit, naturam, quam a nobis sumpserat, a nobis nunquam subtrahere, sed, quantum fieri

<sup>1)</sup> de eccles. hier. c. 5.

posset, esse versarique nobiscum velle; ut illud omni tempore vere et proprie dictum (Prov. 8, 31.) videretur: „Deliciae meae esse cum filiis hominum.“

*XXXIII. Ossa, nervi, et quaecunque ad hominis perfectionem pertinent, una cum divinitate hic vere adsunt.*

Iam vero hoc loco a pastoribus explicandum est, non solum verum Christi corpus, et quidquid ad veram corporis rationem pertinet, veluti ossa et nervos, sed etiam totum Christum in hoc sacramento contineri. Docere autem oportet, Christum, nomen esse Dei et hominis, unius scilicet personae, in qua divina et humana natura coniuncta sit. Quare utramque substantiam, et quae utriusque substantiae consequentia sunt, divinitatem et totam humanam naturam, quae ex anima et omnibus corporis partibus et sanguine etiam constat, complectitur, quae omnia in sacramento esse credendum est. Nam quum in coelo tota humanitas divinitati in una persona et hypostasi coniuncta sit, nefas est suspicari, corpus, quod in sacramento inest, ab eadem divinitate seiunctum esse.

*XXXIV. Sanguis, anima et divinitas non eodem modo in eucharistia, quo corpus Christi, sunt.*

In quo tamen pastores animadvertant necesse est, non omnia eadem ratione aut virtute in hoc sacramento contineri. Quaedam enim sunt, quae ex vi et efficientia consecrationis in sacramento esse dicimus; nam quum verba illa efficiant, quidquid significant, id esse in sacramento ex vi sacramenti divinarum rerum scriptores appellantur, quod verborum forma exprimitur: ita, si contingeret, ut aliquid ab aliis rebus omnino seiunctum esset, id solum, quod forma significaret, in sacramento esse, cetera non item esse docuerunt. Quaedam vero in sacramento continentur, quod illis rebus coniuncta sint, quae forma exprimuntur; nam quum forma, quae ad panem consecrandum adhibetur, corpus Domini significet, quum dicitur: „Hoc est corpus meum:“ ipsum Christi Domini corpus ex vi sacramenti in eucharistia erit. At quia corpori sanguis, anima et divinitas coniungitur: haec quoque in sacramento erunt omnia, non quidem ex consecrationis virtute, sed ut ea, quae corpori coniuncta sunt. Atque haec ex concomitantia in sacramento esse dicuntur, qua ratione totum Christum in sacramento esse perspicuum est. Si enim duo aliqua inter se re ipsa coniungantur, ubi unum sit, ibi etiam alterum esse necesse est. Sequitur itaque, totum Christum usque adeo tam in panis quam in vini specie contineri, ut, quemadmodum in panis specie non corpus modo, sed etiam sanguis, et totus

Christus vere inest, sic contra in vini specie non solum sanguis, sed corpus, et totus Christus vere insit.

*XXXV. Cur in eucharistia duplex fiat consecratio.*

Sed quamquam haec ita se habere omnibus fidelibus certum et persuasissimum esse debet, optimo tamen iure institutum est, ut separatim duae consecrationes fierent. Primo enim, ut passio Domini, in qua sanguis a corpore divisus est, magis referatur; cuius rei causa in consecratione sanguinem effusum esse meminimus. Deinde maxime consentaneum fuit, ut, quoniam sacramento ad alendam animam utendum nobis erat, tamquam cibus et potus institueretur, ex quibus perfectum corporis alimentum constare perspicuum est.

*XXXVI. Totus Christus in quavis utriusque speciei particula praesens adest.*

Neque vero illud praetermittendum, non solum in utraque specie, sed in quavis utriusque speciei particula totum Christum contineri. Sic enim Augustinus scriptum reliquit<sup>1)</sup>: „Singuli accipiunt Christum Dominum, et in singulis portionibus totus est; nec per singulos minuitur, sed integrum se praebet in singulis.“ Atque id praeterea ex Evangelistis facile colligi potest. Neque enim credendum est, singula panis frusta propria verborum forma a Domino consecrata esse, sed eadem simul omnem panem, qui ad sacra mysteria conficienda, atque Apostolis distribuenda satis futurus esset; id quod de calice factum esse appareret, quum ipse dixit<sup>2)</sup>: „Accipite et dividite inter vos.“ Hactenus quae explicata sunt, eo pertinent, ut ostendant pastores, verum Christi corpus et sanguinem in eucharistiae sacramento contineri.

*XXXVII. Post consecrationem nulla materiae huius sacramenti substantia remanet.*

Nunc, quod alterum erat propositum, docebunt etiam panis et vini substantiam in sacramento post consecrationem non remanere. Hoc vero, quamvis maximam admirationem merito habere possit, tamen cum eo, quod prius demonstratum est, necessario coniungitur. Etenim si est verum Christi corpus sub panis et vini specie post consecrationem, omnino necesse est, quum ibi antea non esset, hoc vel loci mutatione, vel creatione, vel alterius rei in ipsum conversione factum esse. At vero fieri non posse constat, ut corpus Christi in sacramento sit, quod ex uno in alium locum venerit; ita enim fieret, ut a coeli seibus abesset, quoniam nihil movetur, nisi locum deserat, a

<sup>1)</sup> cf. c. 75. 77. Dist. II. de cons. <sup>2)</sup> Luc. 22, 17.

quo movetur. Creari autem corpus Christi, minus credibile est, ac ne in cogitationem quidem cadere hoc potest. Relinquitur ergo, ut in sacramento sit corpus Domini, quod panis in ipsum convertatur; quare nulla panis substantia remaneat necesse est.

*XXXVIII. Transsubstantiatio a conciliis probata in Scripturis fundamentum habet.*

Hac ratione adducti Patres et maiores nostri in conciliis Lateranensi magno et Florentino huius articuli veritatem aper-  
tis decretis confirmarunt; a Tridentina vero synodo<sup>1)</sup> explicati-  
us ita definitum est: „Si quis dixerit, in sacrosancto eu-  
charistiae sacramento remanere substantiam panis et vini una  
cum corpore et sanguine Domini nostri Iesu Christi, anathema  
sit.“ Haec vero ex testimoniis scripturarum facile fuit colligere;  
primum quod in eius sacramenti institutione ipse Dominus di-  
xit: „Hoc est corpus meum;“ vocis enim „Hoc“ ea vis est,  
ut omnem rei praesentis substantiam demonstret. Quod si pa-  
nis substantia remaneret, nullo modo vere dici videretur:  
„Hoc est corpus meum.“ Deinde Christus Dominus apud  
Ioannem<sup>2)</sup>: „Panis,“ inquit, „quem ego dabo, caro mea est  
pro mundi vita;“ panem videlicet carnem suam vocans. Ac  
paulo post subiecit: „Nisi manducaveritis carnem filii hominis,  
et biberitis eius sanguinem, non habebitis vitam in vobis;“ et  
rursus: „Caro mea vere est cibus, et sanguis meus vere est  
potus.“ Quum ergo tam claris et perspicuis verbis carnem  
suam panem et cibum verum, sanguinem item verum potum  
nominaverit: satis videtur declarasse, nullam in sacramento  
substantiam panis et vini remanere.

*XXXIX. Quo modo Patres in hoc sacramento transsubstantia-  
tionem agnoverint.*

Atque hanc perpetuo sanctorum Patrum consentientem  
fuisse doctrinam, qui eos evolverit, facile intelliget. D. qui-  
dem Ambrosius<sup>3)</sup> ita scribit: „Tu forte dicis: Meus panis est  
usitatus; sed panis iste panis est ante verba sacramentorum;  
ubi accesserit consecratio, de pane fit caro Christi;“ quod qui-  
dem ut facilius probare posset, varia deinde affert exempla et  
similitudines. Alibi vero<sup>4)</sup>, quum verba illa interpretaretur:  
„Omnia<sup>5)</sup>, quaecumque Dominus voluit, fecit in coelo et in  
terra:“ „Licet,“ inquit, „figura panis et vini videatur, nihil tamen  
aliud, quam caro Christi et sanguis post consecrationem cre-

<sup>1)</sup> Sess. 13. de euchar. c. 2. <sup>2)</sup> Io. 6, 52. <sup>3)</sup> de sacram. l. 4. c. 4. <sup>4)</sup> cf. c. 74.  
Dist. II. de cons. <sup>5)</sup> Ps. 134, 6.

dendum est.“ Atque eisdem fere verbis eandem sententiam S. Hilarius exponens docuit, quamvis extrinsecus panis et vinum videatur, vere tamen corpus et sanguinem Domini esse.

*XL. Qua ratione eucharistia post consecrationem etiam panis dicatur.*

Sed moneant pastores hoc loco, mirandum non esse, si post consecrationem panis etiam vocetur; hoc enim nomine eucharistia appellari consuevit, tum quia panis speciem habeat, tum quia naturalem alendi et nutriendi corporis vim, quae panis propria est, adhuc retineat. Eam autem esse sacrarum literarum consuetudinem, ut res ita appellant, cuiusmodi esse videantur, satis ostendit quod in Genesi<sup>1)</sup> dictum est, „tres viros Abrahae apparuisse,“ qui tamen tres angeli erant, et „duo illi,“ qui Apostolis, ascende in coelum Christo Domino, apparuerunt, quum essent angelii, „viri“ dicuntur<sup>2)</sup>.

*XLI. Quomodo fiat tam admiranda substantiarum conversio.*

Difficillima est omnino huius mysterii explicatio, sed tamen conabuntur pastores, eis, qui magis in divinarum rerum cognitione profecerunt (nam qui adhuc imbecilliores sunt, verendum esset, ne rei magnitudine opprimerentur), conabuntur, inquam, tradere huius admirabilis conversionis modum, quae ita fit, ut tota panis substantia divina virtute in totam corporis Christi substantiam, totaque vini substantia in totam sanguinis Christi substantiam sine ulla Domini nostri mutatione convertatur. Neque enim Christus aut generatur, aut mutatur, aut augescit, sed in sua substantia totus permanet; quod mysterium quum D. Ambrosius declareret: „Vides,“ inquit<sup>3)</sup>, „quam operatorius sit sermo Christi. Si ergo tanta vis est in sermone Domini Iesu, ut inciperent esse, quae non erant, mundus scilicet: quanto magis operatorius est, ut sint ea quae erant, et in aliud commutentur?“ In quam sententiam alii etiam veteres et gravissimi Patres scriptum reliquerunt. D. quidem Augustinus<sup>4)</sup>: „Fatemur, ante consecrationem panem esse et vinum, quod natura formavit, post consecrationem vero carnem Christi et sanguinem, quod benedictio consecravit.“ Damascenus<sup>5)</sup>: „Corpus secundum veritatem coniunctum est divinitati, corpus ex sancta Virgine; non quod ipsum corpus assumptum de coelo descendat, sed quod ipse panis et vinum in corpus et sanguinem Christi transmutentur.“

<sup>1)</sup> Gen. 18, 2. <sup>2)</sup> Act. 1, 20. <sup>3)</sup> de sacram. l. 4. c. 4. <sup>4)</sup> cf. c. 41. Dist. II. de cons. <sup>5)</sup> lib. 4. c. 13. de orthod. fide.

*XLII. Stupenda huic conversioni commode nomen impositum est „transsubstantiatio.“*

Haec itaque admirabilis conversio convenienter et proprie a sancta catholica ecclesia transsubstantiatio est appellata, quemadmodum sacra Tridentina<sup>1)</sup> synodus docuit. Ut enim generatio naturalis, quod forma in ea mutatur, recte et proprie transformatio dici potest: ita enim, quod in sacramento eucharistiae tota unius rei substantia in totam alterius rei substantiam transeat, verbum transsubstaniationis recte et sapienter a maioribus nostris inventum est.

*XLIII. Modus transsubstaniationis et loci, quo Christus est in hoc sacramento curiosius non inquirendus.*

Sed illud saepissime a sanctis Patribus repetitum fideles admonendi sunt, ne curiosius inquirant, quo pacto ea mutatio fieri possit; nec enim percipi a nobis potest, nec in naturalibus mutationibus aut in ipsa rerum creatione eius rei exemplum aliquod habemus. Verum, quid hoc sit, fide cognoscendum est; quomodo fiat, curiosius non inquirendum. Non minorem vero cautionem pastores adlibeant oportet in eo etiam mysterio explicando, quomodo Christi Domini corpus vel in minimi panis particula totum contineatur; vix enim unquam eiusmodi disputationes instituendae erunt; sed tamen, quando Christiana caritas hoc postulaverit, primum quidem meminirent, fidelium animos illa voce praemunire<sup>2)</sup>: „Non erit impossibile apud Deum omne verbum.“

*XLIV. Christi corpus in eucharistia non est ut in loco.*

Deinde vero doceant, Christum Dominum in hoc sacramento ut in loco non esse; etenim locus res ipsas consequitur, ut magnitudine aliqua praeditae sunt; Christum vero Dominum ea ratione in sacramento esse non dicimus, ut magnus aut parvus est, quod ad quantitatem pertinet, sed ut substantia est. Substantia enim panis in Christi substantiam, non in magnitudinem aut quantitatem convertitur. Nemo vero dubitat, substantiam aequae in parvo atque in magno spatio contineri; nam et aeris substantia totaque eius natura sic in parva, ut in magna aeris parte, itemque tota aquae natura non minus in urnula, quam in flumine insit necesse est. Cum igitur panis substantiae corpus Domini nostri succedat, fateri oportet, ad eundem plane modum in sacramento esse, quo erat panis substantia ante consecrationem; ea vero utrum sub magna, an sub parva quantitate esset, nihil ad rem omnino pertinebat.

<sup>1)</sup> Sess. 13. Can. 4. <sup>2)</sup> Luc. 1, 37.

*XLV. In hoc sacramento nulla est substantia, cui accidentia panis et vini inhaereant.*

Tertium restat, quod in hoc sacramento maximum atque admirabile videatur, quod quidem, iam duobus aliis explicatis, facilius a pastoribus tractari posse existimandum est: panis videlicet et vini species in hoc sacramento sine aliqua re subiecta constare. Nam quum ante demonstratum sit, corpus Domini et sanguinem vere in sacramento esse, ita ut amplius nulla subsit panis et vini substantia, quoniam ea accidentia Christi corpori et sanguini inhaerere non possunt: relinquitur, ut super omnem naturae ordinem ipsa se, nulla alia re nisa, sustentent. Haec perpetua et constans fuit catholicae ecclesiae doctrina, quae etiam facile eorum testimoniorum auctoritate confirmari poterit, quibus antea planum factum est, nullam residere in eucharistia panis aut vini substantiam.

*XLVI. Quare Christus sub panis et vini specie corpus et sanguinem suum tradere voluit.*

Sed nihil magis fidelium pietati convenit, quam, omissis subtilioribus quaestionibus, huius admirabilis sacramenti maiestatem venerari et colere; ac deinde in eo summam Dei prouidentiam suspicere, quod sacrosancta mysteria sub panis et vini specie administranda instituerit. Nam cum a communi hominum natura maxime abhorreat humanae carnis esca, aut sanguinis potionē vesci: sapientissime fecit, ut sanctissimum corpus et sanguis sub earum rerum specie, panis, inquam, et vini, nobis administraretur, quorum quotidiano et communi alimento maxime delectamus. Adiunctae vero etiam sunt duae illae utilitates, quarum prima est, quod ab infidelium calumniis liberati sumus, quas facile effugere non possemus, si Dominum sub propria specie comedere videremur; altera est, quod, dum corpus et sanguinem Domini ita sumimus, ut tamen, quod vere sit, sensibus percipi non possit, hoc ad fidem in animis nostris augendam plurimum valet; quae quidem, ut S. Gregorii (hom. 26. in Evang.) sententia perulgatum est, „ibi non habet meritum, ubi humana ratio praebet experimentum.“ Haec autem, quae hactenus exposita sunt, non nisi magna adhibita cautione pro audiencem captu et temporum necessitate explicanda erunt.

*XLVII. Quid boni consequantur, qui corpori et sanguini Domini digne communicaverint.*

Verum quae de huius sacramenti admirabili virtute et fructibus dici possunt, nullum esse genus fidelium existimandum est, ad quos earum rerum cognitio non pertineat, quibusque maxime necessaria videri non debeat. Ut enim eucharistiae uti-

litatem fideles intelligant, ob eam potissimum causam, quae de hoc sacramento tam multis verbis disseruntur, cognoscenda sunt. Sed quoniam immensae eius utilitates et fructus nulla oratione explicari possunt, unus aut alter locus a pastoribus tractandus erit, ut ostendant, quanta in sacrosanctis illis mysteriis bonorum omnium copia et affluentia inclusa sit. Hoc vero aliqua ex parte ita assequentur, si, omnium sacramentorum vi atque natura patefacta, eucharistiam fonti, cetera rivulis comparaverint. Vere enim ac necessario fons omnium gratiarum dicenda est, quum fontem ipsum coelestium charismatum et donorum, omniumque sacramentorum auctorem Christum Dominum admirabili modo in se contineat; a quo, tanquam a fonte, ad alia sacramenta, quidquid boni et perfectionis habent, derivatur. Ex hoc igitur divinae gratiae fonte amplissima munera, quae nobis hoc sacramento impertiuntur, facile colligi poterunt.

**XLVIII. Quae commoda panis et vinum corpori, ea praestantiori modo eucharistia animae afferunt.**

Commode etiam fieri videbitur, si panis et vini natura, quae huius sacramenti symbola sunt, perpendatur. Nam quos usus corpori panis et vinum afferit, eos omnes animae saluti et iucunditati, ac meliori quidem ac perfectiori ratione eucharistiae sacramentum praebet. Neque enim hoc sacramentum in substantiam nostram, ut panis et vinum, mutatur; sed nos quodam modo in eius naturam convertimur, ut recte illud D. Augustini ad hunc locum transferri possit<sup>1)</sup>: „Cibus sum grandium; cresce, et manducabis me; nec tu me mutabis in te, sicut cibum carnis tuae, sed tu mutaberis in me.“

**XLIX. Quomodo per hoc sacramentum gratia conferatur.**

Quod si „gratia<sup>2)</sup> et veritas per Iesum Christum facta est,“ in animam quoque influat est necesse, quum eum pure et sancte accipit, qui de se ipso dixit<sup>3)</sup>: „Qui manducat meam carnem, et bibit meum sanguinem, in me manet, et ego in illo.“ Nam qui pietatis et religionis studio affecti hoc sacramentum sumunt, nemini dubium esse debet, quin ita Filium Dei in se admittant, ut eius corpori tamquam viva membra inserantur; siquidem scriptum est<sup>4)</sup>: „Qui manducat me, et ipse vivet propter me;“ item: „Panis, quem ego dabo, caro mea est pro mundi vita.“ Quem locum Cyrillus<sup>5)</sup> dum interpretaretur, ait: „Dei verbum uniens se ipsum propriae carni, fecit ipsam vivificativam. Eum ergo decebat miro quodam modo uniri

<sup>1)</sup> Confess. lib. 7. c. 10. <sup>2)</sup> Io. 1, 17. <sup>3)</sup> Io. 6, 57. <sup>4)</sup> ib. v. 56 et 52. <sup>5)</sup> in Io. 1, 4. c. 3.

corporibus per sacram eius carnem et pretiosum sanguinem, quae accipimus in benedictione vivificativa in pane et vino.“

*L. Homo peccatis foedatus ac mortuus eucharistiae sumptio non vivificatur, etiamsi hoc sacramentum gratiam conferre dicatur.*

Verum quod dicitur, eucharistia gratiam tribui, pastores admoneant oportet, ita intelligendum non esse, perinde ac necesse non sit, ut qui re ipsa hoc sacramentum utiliter percepturus est, gratiam antea adeptus fuerit. Constat enim, quemadmodum mortuis corporibus naturale alimentum nihil prodest, ita etiam animae, quae spiritu non vivit, sacra mysteria non prodesse; ac propterea panis et vini speciem habent, ut significetur, non quidem revocandae ad vitam animae, sed in vita conservandae causa instituta esse. Verum hoc ideo dictum est, quoniam prima etiam gratia (qua omnes praeditos esse oportet, antequam sacram eucharistiam ore contingere audeant, ne iudicium sibi manducent et bibant) nemini tribuitur, nisi hoc ipsum sacramentum desiderio et voto percipiat. Est enim omnium sacramentorum finis, et ecclesiasticae unitatis et coniunctionis symbolum; neque extra ecclesiam consequi gratiam ullus potest.

*L.I. Quo modo anima hoc spirituali cibo reficiatur et augeatur.*

Deinde quoniam, uti corpus cibo naturali non conservatur modo, sed etiam augetur, gustusque novam quotidie ex eo voluptatem et suavitatem percipit: ita etiam sacrae eucharistiae cibus non solum animam sustentat, sed vires illi addit, efficitque, ut spiritus divinarum rerum delectatione magis commoveatur. Ob eam causam fit, ut gratiam hoc sacramento tribui, recte et verissime dicatur; iure enim „manna“ comparari potest, ex quo „omnis saporis suavitas“ percipiebatur<sup>1)</sup>.

*L.II. Per eucharistiam peccata leviora dimituntur.*

Remitti vero eucharistia et condonari leviora peccata, quae venialia dici solent, non est, quod dubitari debeat. Quidquid enim cupiditatis ardore anima amisit, dum levi aliqua in re parum offendit, id totum eucharistia, eas ipsas minores culpas abstergens, restituit; quemadmodum etiam (neque enim a proposita similitudine discedendum videtur), quod innati caloris vi quotidie detrahitur ac deperit, paulatim addi et refici naturali alimento sentimus. Quare merito a D. Ambrosio<sup>2)</sup> de hoc coelesti sacramento dictum est: „Iste panis quotidianus sumitur in remedium quotidiana infirmitatis.“

<sup>1)</sup> Sap. 16, 20. <sup>2)</sup> De Sacram. 15. c. 4.

Verum haec de iis peccatis intelligenda sunt, quorum sensu et delectatione animus non permovetur.

*LIII. Per hoc item sacramentum anima a futuris malis reservatur.*

Illa praeterea in sacris mysteriis vis est, ut nos a criminibus puros et integros, atque a temptationum impetu incolumes servet, ac tanquam coelesti medicamento animam prae-paret, ne alicuius mortiferae perturbationis veneno facile infici ac corrumpi queat. Atque ob eam etiam causam, ut testatur divus Cyprianus<sup>1)</sup>, quum olim a tyrannis fideles ad tormenta et caudem propter Christiani nominis confessionem vulgo raperentur, ne illi forte dolorum acerbitate victi in salutari certamine deficerent: vetus in ecclesia catholica mos fuit, ut eis ab episcopis dominici corporis et sanguinis sacramenta praebererentur. Sed carnis etiam libidinem cohibet ac repri-mit; dum enim caritatis igne animos magis incendit, concupiscentiae ardorem restinguat necesse est.

*LIV. Quomodo per hoc sacramentum aditus ad aeternam glo-riam pateat.*

Postremo, ut uno verbo omnes huius sacramenti utilitates et beneficia comprehendantur, dicendum est, sacrae eucharistiae summam vim esse ad aeternam gloriam comparandam; scriptum est enim<sup>2)</sup>: „Qui manducat meam carnem, et bibit meum sanguinem, habet vitam aeternam, et ego resuscitabo eum in novissimo die.“ Huius videlicet sacramenti gratia fideles, dum hanc vitam degunt, summa conscientiae pace et tranquillitate perfruuntur; deinde eius virtute recreati, non secus atque Elias<sup>3)</sup>, „qui subcinericii panis fortitudine ambulavit usque ad montem Dei Horeb,“ quum ex vita emigrandi tempus advenit, ad aeternam gloriam et beatitudinem ascendant. Haec omnia a pastoribus latissime explicabuntur, si vel D. Ioannis caput 6., in quo multiplices huius sacramenti effectus aperiuntur, tractandum sumpserint; vel admiranda Christi Domini facta percurrentes, ostenderint, quum eos iure ac merito beatissimos fuisse existimamus, in quorum tecta mortalis receptus est, vel qui illius vestis aut fimbriae tactu sanitatem recuperarunt: multo nos beatores et feliciores esse, in quorum animam immortali gloria praeditus ingredi non gravetur, ut eius vulnera sanet omnia, eamque amplissimis muneribus ornatam sibi coniungat.

*LV. Quot modis corpori et sanguini Domini communicemus.*

Verum docendum est, a quibus ingentes illi sacrae eucharistiae fructus, qui modo commemorati sunt, percipi possint;

<sup>1)</sup> epist. 54. <sup>2)</sup> Io. 6, 55. <sup>3)</sup> III. Reg. 19, 8.

neque unam tantum esse communicandi rationem, ut fidelis populus discat meliora charismata aemulari. Recte igitur et sapienter maiores nostri, ut in Tridentina synodo<sup>1)</sup> legimus, tres huius sacramenti sumendi rationes distinxerunt. Alii enim sacramentum tantum accipiunt, ut peccatores, qui sacra mysteria impuro ore et corde accipere non verentur, quos Apostolus<sup>2)</sup> ait „indigne manducare et bibere corpus Domini.“ De his D. Augustinus<sup>3)</sup> ita scribit: „Qui non manet in Christo, et in quo non manet Christus, procul dubio non manducat spiritualiter eius carnem, licet carnaliter et visibiliter premat dentibus sacramenta corporis et sanguinis.“ Qui itaque hoc modo affecti sacra mysteria accipiunt, non solum ex his nullum capiunt fructum, sed, ipso Apostolo<sup>4)</sup> teste, „iudicium sibi manducant et bibunt.“ Alii vero spiritu tantummodo eucharistiam sumere dicuntur; ii sunt, qui desiderio et voto propositum coelestem illum panem comedunt, „fide“ viva incensi, „quaes<sup>5)</sup> per dilectionem operatur; „ex quo, si non omnes, maximos certe utilitatis fructus consequuntur. Alii denique sunt, qui sacramento et spiritu sacram eucharistiam percipiunt; qui quum ex Apostoli<sup>6)</sup> doctrina „prius se probaverint,“ ac veste nuptiali ornati ad divinam hanc mensam accesserint, ex eucharistia capiunt uberrimos illos, quos antea diximus, fructus. Quare perspicuum est, eos se maximis et coelestibus bonis privare, qui, quum ad corporis Domini sacramentum etiam sumendum parati esse possint, satis habent spiritu tantum sacram communionem accipere.

*LVI. Antequam quis ad Eucharistiam accedat, praeparandum animum esse, ostenditur.*

Sed iam docendum est, qua ratione praeparatos fidelium animos esse oporteat, antequam ad sacramentalem eucharistiae perceptionem veniant. Ac primum quidem ut pateat, eam praeparationem maxime necessariam esse, Salvatoris nostri exemplum proponendum est. Nam antequam Apostolis pretiosi corporis et sanguinis sui sacramenta daret<sup>7)</sup>, „quamvis iam mundi essent, pedes eorum lavit,“ ut declararet, omnem diligentiam adhibendam esse, ne quid nobis ad summam animi integritatem et innocentiam desit, cum sacra mysteria percepturi sumus. Deinde vero fideles intelligent, quemadmodum, si optime affecto et praeparato animo eucharistiam aliquis sumat, amplissimis coelestis gratiae muniberis ornatur: ita contra, si impatus accipiat, non solum nihil commodi, sed maxima etiam

---

<sup>1)</sup> Sess. 13. de euchar. c. 8. <sup>2)</sup> I. Cor. 11, 29. <sup>3)</sup> tract. 26. in Ioann. <sup>4)</sup> I. Cor. 11, 29. <sup>5)</sup> Gal. 5, 6. <sup>6)</sup> I. Cor. 11, 28. <sup>7)</sup> Io. 13, 5. seq.

incommoda et detrimenta eum accipere. Optimis enim rebus et maxime salutaribus hoc proprium est, ut, si in tempore iis utamur, vehementer prosint; si alieno tempore adhibeantur, perniciem et exitium afferant. Quare mirandum non est, ingentia quoque et praeclarissima Dei dona, quum bene constituto animo accipiuntur, ad coelestem gloriam consequendam maximo nobis adiumento esse; at vero, quum eis nos ipsos indignos praebemus, sempiternam mortem afferre. Id vero arcae Domini exemplo comprobatur. „Arca enim foederis<sup>1)</sup>,“ qua nihil praestantius Israeliticus populus habuit, cui etiam per illam maxima et innumerabilia beneficia Dominus tribuerat, „a Philisthaeis ablata“ summam illis pestem et calamitatem cum aeterno dedecore coniunctam importavit. Sic etiam cibi, qui ore accepti in stomachum bene affectum illabuntur, corpora alunt et sustentant; qui vero in stomachum vitiosis humoribus plenum infundi solent, graves morbos efficiunt.

*LVII. Quo pacto animus ad eucharistiam sit praeparandus.*

Primam itaque illam praeparationem fideles adhibeant, ut discernant mensam a mensa, hanc sacram ab aliis profanis, coelestem hunc panem a communi. Atque hoc fit, quum certo credimus, praesens esse verum corpus et sanguinem Domini, quem<sup>2)</sup> in coelo Angeli adorant; „ad<sup>3)</sup> cuius nutum columnae coeli contremiscunt et pavent; cuius<sup>4)</sup> gloria plenum est coelum et terra.“ Hoc nimurum est „diuideare<sup>5)</sup> corpus Domini,“ quod Apostolus admonuit; cuius tamen mysterii magnitudinem venerari potius oportet, quam in disputationibus eius veritatem curiosius perquirere. Altera vero illa praeparatio maxime necessaria est, ut unusquisque a se ipso quaerat, num pacem cum aliis habeat, num proximos vere atque ex animo diligat. Inquit enim Matthaeus: „Si<sup>6)</sup> ergo offeres munus tuum ad altare, et ibi recordatus fueris, quia frater tuus habet aliquid adversum te, relinque ibi munus tuum ante altare, et vade prius reconciliari fratri tuo, et tunc veniens offeres munus tuum.“ Deinde conscientiam nostram scrutari diligenter debemus, ne forte existiali aliquo peccato contaminati simus, cuius poenitere necesse sit, ut prius contritionis et confessionis medicamento illud eluatur. Definitum est enim a sancta Tridentina synodo<sup>7)</sup>, nemini licere, quem peccati mortalis conscientia stimulet, si sacerdotis facultas data sit, antequam se sacramentali confessione purgarit, quantumvis sibi contritus esse videatur, sacram eucharistiam accipere. Praeterea taciti cum animis nostris cogite-

<sup>1)</sup> I. Reg. 5, 1. seq. <sup>2)</sup> Ps. 96, 8. <sup>3)</sup> Job. 26, 11. <sup>4)</sup> Is. 6, 3. <sup>5)</sup> I. Cor. 11, 23  
<sup>6)</sup> Mat. 5, 23. 24. <sup>7)</sup> Sess. 13. de euch. can. 11.

mus, quam indigni simus, quibus divinum hoc beneficium a Domino tribuatur. Quare illud Centurionis, de quo idem ipse Salvator testatus est<sup>1)</sup>, „se non invenisse tantam fidem in Israël,“ ex animo dicendum est. „Domine, non sum dignus, ut intres sub tectum meum.“ Exquiramus etiam a nobis ipsis, an illud Petri usurpare nobis liceat<sup>2)</sup>): „Domine tu scis, quia amo te.“ Meminisse enim oportet, eum<sup>3)</sup>, „qui sine ueste nuptiali in convivio Domini accubuerat, in tenebrosum carcerem coniectum“ sempiternis poenis addictum fuisse.

*LVIII. Etiam corporis aliqua ratio communicare volenti est suscipienda.*

Neque vero animi solum, sed etiam corporis praeparatione opus est. Nam ieuni ad sacram mensam accedere debemus, ita ut saltem a dimidia antecedentis diei nocte usque ad illud temporis punctum, quo sacram eucharistiam accipimus, nihil omnino comedelerimus aut biberimus. Postulat etiam tanti sacramenti dignitas, ut, qui matrimonio iuncti sunt, aliquot dies a concubitu uxorum abstineant, „Davidis<sup>4)</sup>,“ exemplo admoniti, qui, quum „panes propositionis a sacerdote accepturus esset, purum se et pueros suos ab uxorum consuetudine tres ipsos dies esse professus est.“ Haec fere sunt, quae maxime observari a fidelibus oportet, ut se ad sacra mysteria utiliter accipienda antea parent. Reliqua enim, qua hac in re providenda esse videantur, ad haec ipsa capita facile redigi poterunt.

*LIX. Christiani omnes eucharistiam sumere saltem semel in anno tenentur.*

Sed ne forte aliqui segniores ad hoc sacramentum percipiendum reddantur, quod tantam praeparationem adhibere grave admodum et difficile ducant: fideles saepe admonendi sunt, omnibus eam legem propositum esse, ut sacram eucharistiam accipient. Praeterea constitutum est ab ecclesia, ut qui semel saltem singulis annis in Paschate non communicaverit, ab ecclesia arceatur.

*LX. Quoties et quibus temporibus percipienda sit eucharistia.*

Neque tamen fideles hoc satis habeant, se, huius decreti auctoritati obtemperantes, semel tantummodo corpus Domini quotannis accipere; verum saepius iterandam eucharistiae communionem existiment. Utrum autem singulis mensibus, vel hebdomadis, vel diebus id magis expediat, certa omnibus regula praescribi non potest. Verumtamen illa est sancti Augustini norma certissima<sup>5)</sup>: „Sic vive, ut quotidie possis su-

<sup>1)</sup> Mat. 8, 10. et 8. <sup>2)</sup> Io. 21, 17. <sup>3)</sup> Mat. 22, 11. <sup>4)</sup> I. Reg. 21, 5. <sup>5)</sup> Serm. 84. in App.

mere.“ Quare parochi partes erunt, fideles crebro adhortari, ut, quemadmodum corpori in singulos dies alimentum subministrare necessarium putant: ita etiam quotidie hoc sacramento alendae et nutriendae animae curam non abiificant; neque enim minus spirituali cibo animam, quam naturali corpus indigere perspicuum est. Vehementer autem proderit, hoc loco repetere maxima illa et divina beneficia, quae, ut antea demonstratum est, ex eucharistiae sacramentali communione consequimur. Illa etiam figura erit addenda, quum „singulis<sup>1)</sup> diebus corporis vires manna reficere oportebat;“ itemque sanctorum Patrum auctoritates, quae frequentem huius sacramenti perceptionem magnopere commendant. Neque enim unius sancti Patris Augustini ea fuit sententia: „Quotidie<sup>2)</sup> peccas, quotidie sume:“ sed, si quis diligenter attenderit, euudem omnium Patrum, qui hac de re scripserunt, sensum fuisse facile comperiet.

*LXI. Communicandi morem in ecclesia olim frequentem fuisse, demonstratur.*

Ac tempus quidem olim fuisse, quum fideles quotidie eucharistiam acciperent, ex Apostolorum Actis<sup>3)</sup> intelligimus. Omnes enim, qui tunc fidem Christianam profitebantur, vera et sincera caritate ita ardebat, ut, quum sine intermissione orationibus et aliis pietatis officiis operam darent, quotidie ad sacra dominici corporis mysteria sumenda parati invenirentur. Eam postea consuetudinem, quae intermitte videbatur, Anacletus<sup>4)</sup> sanctissimus martyr et pontifex aliqua ex parte renovavit; praecepit enim, ut ministri, qui missae sacrificio interessent, communicarent, quod ab Apostolis constitutum esse affirmaret. Diu etiam in ecclesia ille mos fuit, ut sacerdos, peracto sacrificio, quum eucharistiam sumpsisset, ad populum, qui aderat, conversus, his verbis ad sacram mensam fideles invitaret: „Venite, fratres, ad communionem;“ tunc qui parati erant, summa cum religione sacrosancta mysteria sumebant. Sed quum deinde caritas et pietatis studium adeo refrixisset, ut raro admodum ad communionem fideles accederent: sancitum est a Fabiano pontifice<sup>5)</sup>, ut ter quotannis, in Natali Domini, et Resurrectione, et Pentecoste, omnes eucharistiam sumerent; id quod postea a multis conciliis, praesertim vero ab Agathensi primo confirmatum est. Ad extremum, quum eo res adducta esset, ut non modo sancta illa et salutaris perceptio non servaretur, sed in plures etiam annos sacrae eucharistiae communio differretur: decretum est in Lateranensi concilio, ut semel ad minus singulis

<sup>1)</sup> Ex. 16, 4. seq. <sup>2)</sup> cf. serm. cit. <sup>3)</sup> Act. 2, 42. <sup>4)</sup> epist. 2. <sup>5)</sup> ep. ad Hilar. Ep.

annis in Pascha fideles omnes sacrum Domini corpus accipere-  
rent; qui vero id neglexissent, ecclesiae aditu prohiberentur.

*LXII. Pueris nondum ratione utentibus eucharistiam administrare  
non convenit.*

Verum quamvis haec lex, Dei et ecclesiae auctoritate sancita, ad omnes fideles pertineat: docendum est tamen, eos excipi, qui nondum rationis usum propter aetatis imbecillitatem habent. Hi enim neque sacram eucharistiam a profano et communi pane sciunt discernere, neque ad eam accipiendam pietatem animi et religionem afferre possunt. Atque id etiam a Christi Domini institutione alienissimum videtur; ait enim<sup>1)</sup>: „Accipite et comedite.“ Infantes autem idoneos non esse, qui accipient, et comedant, satis constat. Vetus quidem illa fuit in quibusdam locis consuetudo, ut infantibus etiam sacram eucharistiam praebarent; sed tamen tum ob eas causas, quae antea dictae sunt, tum ob alias Christianae pietati maxime consenteaneas, iam diu eiusdem ecclesiae auctoritate id fieri desiit.

*LXIII. Qua aetate pueris sacra mysteria danda sint.*

Qua vero aetate pueris sacra mysteria danda sint, nemo melius constituere poterit, quam pater, et sacerdos, cui illi confitentur peccata; ad illos enim pertinet explorare, et a pueris percunctari, an huius admirabilis sacramenti cognitio-  
nem aliquam acceperint, et gustum habeant.

*LXIV. Licet insanos aliquando ad communionem admittere.*

Amentibus praeterea, qui tunc a pietatis sensu alieni sunt, sacramenta dare minime oportet; quamvis, si, antequam in insaniam inciderint, piam et religiosam animi voluntatem prae se tulerunt, licebit eis in fine vitae, ex concilii Carthaginensis<sup>2)</sup> de-  
creto, eucharistiam administrare, modo vomitionis, vel alterius indignitatis et incommodi periculum nullum timendum sit.

*LXV. Laicis sub utraque specie communicandum non est.*

Quod vero ad communicandi ritum pertinet, doceant pa-  
rochi, sanctae ecclesiae lege interdictum esse, ne quis sine  
ipsius ecclesiae auctoritate, praeter sacerdotes corpus Domini in sacrificio conficiens, sub utraque specie sacram eucha-  
ristiam sumat. Nam, ut a Tridentina synodo<sup>3)</sup> explicatum est,  
quamvis Christus Dominus in ultima coena altissimum hoc sa-  
cramentum in panis et vini speciebus instituerit, et Apostolis tradiderit: ex eo tamen non efficitur, hanc legem a Domino Salvatore constitutam esse, ut omnibus fidelibus sacra myste-  
ria sub utraque specie administranda sint. Etenim idem Do-

<sup>1)</sup> Mat. 26, 26. <sup>2)</sup> conc. IV. c. 76. <sup>3)</sup> Sess. 21. de commun. cap. 1—3. can. 1—3.

minus noster, quum de hoc sacramento loqueretur, alterius tantum speciei saepius meminit, ut, quum inquit<sup>1)</sup>: „Si quis munducaverit ex hoc pane, vivet in aeternum,“ et: „panis, quem ego dabo, caro mea est pro mundi vita,“ et: „qui manducat hunc panem, vivet in aeternum.“

*LXVI. Rationes, ob quas ecclesia alterius tantum speciei usum concesserit.*

Multis vero et iis quidem gravissimis rationibus adductam esse ecclesiam patet, ut hanc potissimum sub altera specie communicandi consuetudinem non solum approbaret, sed etiam decreti auctoritate firmaret. Primum enim maxime cavendum erat, ne sanguis Domini in terram funderetur; quod quidem facile vitari posse non videbatur, si in magna populi multitudine eum ministrare oportuisset. Praeterea quum sacra eucharistia aegrotis praesto esse debeat, magnopere timendum erat, ne, si diutius vini species asservaretur, coacesceret. Permulti praeterea sunt, qui vini saporem, ac ne odorem quidem perferre ullo modo possint. Quare ne, quod spiritualis salutis causa dandum est, corporis valetudini noceret, prudentissime sancitum est ab ecclesia, ut panis tantummodo speciem fideles acciperent. Accedit ad alias rationes, quod in pluribus provinciis summa vini penuria laboratur, neque id aliunde sine maximis impensis, ac non nisi longissimis ac difficillimis itineribus convehi potest. Deinde, quod maxime omnium ad rem pertinet, convellenda erat eorum haeresis, qui negabant sub utraque specie totum Christum esse, sed corpus tantum exsangue sub panis, sanguinem autem sub vini specie contineri asserebant. Ut igitur fidei catholicae veritas magis ante omnium oculos poneretur, sapientissimo consilio alterius speciei, hoc est, panis communio inducta est. Sunt et aliae rationes ab iis collectae, qui de hoc arguento disserunt; quae, si opus esse videbitur, a parochis afferri poterunt. Iam de ministro, quamvis id a nemine fere ignorari possit, agendum est, ne quid praetermissum sit, quod ad huius sacramenti doctrinam pertinere videatur.

*LXVII. Proprius huius sacramenti minister est sacerdos.*

Itaque tradendum est, solis sacerdotibus potestatem datum esse, ut sacram eucharistiam conficiant, ac fidelibus distribuant. Eum autem morem in ecclesia semper servatum esse, ut fidelis populus a sacerdotibus sacramenta acciperet, sacerdotes autem sacra facientes ipsi se communicarent, sacra Tridentina synodus<sup>2)</sup> explicavit, ostenditque hanc consuetudi-

<sup>1)</sup> Io. 6, 52. 59. <sup>2)</sup> Sess. 13. de Euch. can. 10.

nem, tanquam ab Apostolica traditione profectam, religiose retinendam esse, quum praesertim huius rei illustre nobis exemplum Christus Dominus reliquerit, qui et sanctissimum corpus suum consecravit, et Apostolis suis manibus porrexit. Verum, ut quacumque ratione tanti sacramenti dignitati consuleretur, non modo eius administrandi potestas solis sacerdotibus data est, sed lege etiam ecclesia vetuit, ne quis, nisi consecratus esset, sacra vasa, linteal, et alia instrumenta, quae ad illius confectionem necessaria sunt, tractare aut tangere auderet, modo gravis aliqua necessitas non incideret.

*LXVIII. Potest eucharistia per improbos sacerdotes vel consecrari vel administrari.*

Ex quo tum sacerdotes ipsi, tum reliqui fideles intelligere possunt, quanta religione et sanctitate praeditos esse oporteat, qui ad eucharistiam vel consecrandam, vel administrandam, vel sumendam accedunt; quamquam, quod antea de ceteris sacramentis dictum est, ea non minus per improbos administrari, si quae ad illorum perfectam rationem attinent rite serventur, idem valet in eucharistiae sacramento. Neque enim haec omnia ministrorum merito niti, sed Christi Domini virtute et potestate geri credendum est. Haec sunt, quae de eucharistia, ut sacramentum est, explicanda erunt. Nunc, quod restat dicendum, ut sacrificium est, explanare oportet, ut intelligent parochi, quae potissimum de hoc mysterio, quemadmodum sancta synodus<sup>1)</sup> decrevit, dominicis et festis diebus fideli populo tradere debeant.

*LXIX. Eucharistia, peculiare novi Testamenti sacrificium, Deo est acceptissimum.*

Etenim hoc sacramentum non solum thesaurus est coelstium divitiarum, quo si bene utamur, Dei gratiam nobis conciliamus et amorem: sed in eo praincipua quaedam ratio inest, qua ei pro immensis in nos collatis beneficiis aliquam gratiam referre possimus. At vero haec victimam, si rite et legitime immoletur, quam grata et accepta Deo sit, ex hoc colligitur. Si enim veteris legis sacrificia, de quibus scriptum est<sup>2)</sup>: „Sacrificium et oblationem noluisti<sup>3)</sup>;“ et iterum: „Si voluisses sacrificium, dedissem utique: holocaustis non delectaberis,“ ita placuerunt Domino, ut Scriptura<sup>4)</sup> „Deum odoratum esse odorem suavitatis,“ id est, grata ei et accepta fuisse, testetur: quid nobis sperandum de eo sacrificio, in quo ille ipse immolatur atque offertur, de quo coelestis vox bis auditum est<sup>5)</sup>: „Hic est filius meus dilectus, in quo mihi bene compla-

<sup>1)</sup> sess. 22. cap. 8. de sacr. miss. <sup>2)</sup> Ps. 39, 7. <sup>3)</sup> Ps. 50, 18. <sup>4)</sup> Gen. 8, 21  
<sup>5)</sup> Mat. 3, 17.

cui?" Hoc igitur mysterium parochi diligenter exponent, ut, quum fideles ad rem divinam convenerint, attente et religiose sacra illa, in quibus intersunt, meditari discant.

*LXXI. Quae sint causae, ob quas eucharistia a Christo Domino instituta est.*

In primis autem docebunt, eucharistiam duabus de causis a Christo institutam esse. Altera est, ut coeleste animae nostrae alimentum esset, quo vitam spiritualem tueri et conservare possemus; altera, ut ecclesia perpetuum sacrificium haberet, quo peccata nostra expiarentur, et coelestis Pater, sceleribus nostris saepe graviter offensus, ab ira ad misericordiam, a iustae animadversionis severitate ad clementiam traduceretur. Huius rei figuram et similitudinem in agno paschali licet animadvertere, qui ut sacrificium et sacramentum a filiis Israel offerri et comedи consueverat. Nec vero, quum Salvator noster Deo Patri se ipsum in ara crucis oblatus esset, ullam suae erga nos immensaе caritatis illustriorem significationem dare potuit, quam quum nobis visibile sacrificium reliquit, quo cruentum illud semel in cruce paulo post immolandum instauraretur, eiusque memoria usque in finem saeculi quotidie summa cum utilitate ab ecclesia per universum orbem diffusa coleretur.

*LXXI. Quomodo sacramentum a sacrificio secernatur.*

Differunt autem plurimum inter se hae duae rationes; sacramentum enim consecratione perficitur; omnis vero sacrificii vis in eo est, ut offeratur. Quare sacra eucharistia, dum in pyxide continetur, vel ad aegrotum defertur, sacramenti, non sacrificii rationem habet. Deinde etiam, ut sacramentum est, eis, qui divinam hostiam sumunt, meriti causam affert, et omnes illius utilitates, quae supra commemoratae sunt; ut autem sacrificium est, non merendi solum, sed satisfaciendi quoque efficientiam continet. Nam ut Christus Dominus in passione sua pro nobis meruit ac satisfecit: sic qui hoc sacrificium offerunt, quo nobiscum communicant, dominicae passionis fructus merentur, ac satisfaciunt.

*LXXII. Quo tempore istud novi Testamenti sacrificium sit institutum.*

Iam de huius sacrificii institutione nullum ambigendi locum sancta Tridentina synodus<sup>1)</sup> reliquit; declaravit enim, in extrema coena a Christo Domino institutum esse, simulque anathemate eos damnavit, qui asserunt, verum et proprium

<sup>1)</sup> Sess. 22. cap. 1. et oan. 1. 2.

sacrificium Deo non offerri, aut offerre nihil aliud esse, quam Christum ad manducandum dari.

*LXXIII. Non licet Sanctis aut ulli creaturae sacrificium offerri.*

Nec vero illud praetermisit, quin diligenter explicaret, uni Deo sacrificium fieri. Nam etsi ecclesia interdum missas in memoriam et honorem Sanctorum celebrare consuevit: non tamen illis sacrificium, sed uni Deo, qui Sanctos immortali gloria coronavit, offerri docuit. Quare nec sacerdos unquam dicere solet<sup>1)</sup>: „offerro tibi sacrificium Petre, vel Paule;“ sed, dum uni soli Deo immolat, gratias illi agit pro beatissimorum Martyrum insigni victoria, eorumque patrocinium ita implorat, ut ipsi pro nobis intercedere dignentur in coelis, quorum memoriam agimus in terris.

*LXXIV. Unde doctrina illa sacrificii et sacerdotii novae legis hauriatur.*

Haec autem, quae de huius sacrificii veritate a catholica ecclesia tradita sunt, ex Domini verbis accepit, quum extrema illa nocte haec ipsa sacra mysteria Apostolis commendans, „Hoc facite,“ inquit<sup>2)</sup> „in meam commemorationem.“ Eos enim, quemadmodum a sancta Synodo definitum est, tunc sacerdotes instituit, praecepitque, ut ipsi, et qui eis in sacerdotali munere successuri essent, corpus eius immolarent et offerrent. Atque id etiam Apostoli verba ad Corinthios scripta satis demonstrant, quum ait<sup>3)</sup>: „Non potestis calicem Domini bibere, et calicem daemoniorum; non potestis mensae Domini participes esse, et mensae daemoniorum.“ Ut enim pro daemoniorum mensa altare, in quo eis immolabatur, intelligendum est: ita etiam (ut, quod Apostolus proponit, probabili argumentatione concludatur) mensa Domini nihil aliud, nisi altare, in quo sacrificium Domino siebat, significare potest.

*LXXV. Quibus potissimum figuris et prophetiis istud sacrificium olim significatum fuerit.*

Quod si ex veteri Testamento huius sacrificii figuratas et oracula requiramus, primum quidem de eo Malachias apertissime vaticinatus est his verbis<sup>4)</sup>: „Ab ortu solis usque ad occasum magnum est nomen meum in gentibus, et in omni loco sacrificatur et offertur nomini meo oblatio munda: quia magnum est nomen meum in gentibus, dicit Dominus exercituum.“ Praeterea hostia, tam ante quam post latam legem, variis sacrificiorum generibus praenunciata est. Etenim bona omnia, quae in iis sacrificiis significabantur, haec una victimam, tamquam

<sup>1)</sup> Conc. Trid. sess. 22. c. 3. <sup>2)</sup> I. Cor. 11, 24. seq. <sup>3)</sup> I. Cor. 10, 20. 21. <sup>4)</sup> Mal. 1, 11.

omnium perfectio et absolutio, complexa est. Verumtamen nulla in re eius imaginem magis expressam licet videre, quam in Melchisedec sacrificio.<sup>1)</sup> Ipse enim Salvator sacerdotem secundum ordinem Melchisedech se in aeternum constitutum declarans, corpus et sanguinem suum in extrema coena sub speciebus panis et vini Deo Patri obtulit.

*LXXVI. Idem sacrificium, quod in cruce fuit oblatum, in missa peragitur.*

Unum itaque et idem sacrificium esse, fatemur, et haberi debet, quod in missa peragitur, et quod in cruce oblatum est; quemadmodum una est et eadem hostia, Christus videlicet Dominus noster, qui se ipsum in ara crucis semel tantummodo cruentum immolavit. Neque enim cruenta et incruenta hostia duae sunt hostiae, sed una tantum; cuius sacrificium, postquam Dominus ita praecepit: „Hoc facite in meam commemorationem,“ in eucharistia quotidie instauratur.

*LXXVII. Est etiam unus utrinque sacerdos.*

Sed unus etiam atque idem sacerdos est, Christus Dominus; nam ministri, qui sacrificium faciunt, non suam, sed Christi personam suscipiunt, quum eius corpus et sanguinem conficiunt. Id quod et ipsius consecrationis verbis ostenditur. Neque enim sacerdos inquit: „Hoc est corpus Christi,“ sed: „Hoc est corpus meum;“ personam videlicet Christi Domini gerens, panis et vini substantiam in veram eius corporis et sanguinis substantiam convertit.

*LXXVIII. Missa, ut laudis, ita etiam propitiacionis sacrificium.*

Quae cum ita sint, sine ulla dubitatione docendum est, id quod etiam sancta synodus<sup>2)</sup> explicavit: sacrosanctum missae sacrificium esse non solum laudis et gratiarum actionis, aut nudam commemorationem sacrificii, quod in cruce factum est: sed vere etiam propitiatorium sacrificium, quo Deus nobis placatus et propitius redditur. Quare, si puro corde, et accensa fide, et intimo scelerum nostrorum dolore affecti, hanc sanctissimam hostiam imolemus et offeramus: dubitandum non est, quin „misericordiam<sup>3)</sup> a Domino consecutur simus: et gratiam in auxilio opportuno;“ huius enim victimae odore ita delectatur Dominus, ut gratiae et poenitentiae donum nobis impertiens peccata condonet. Quamobrem et solemnis est illa ecclesiae precatio<sup>4)</sup>: „Quoties huius hostiae

<sup>1)</sup> Gen. 14, 18. Ps. 109, 4. Hebr. 7, 17. <sup>2)</sup> Sess. 22. cap. 2. et can. 3. <sup>3)</sup> Hebr. 4, 16. <sup>4)</sup> Secret. Domin. IX. post Pentec.

commemoratio celebratur, toties opus nostrae salutis exercetur; "nimirum uberrimi illi cruentae hostiae fructus per hoc incruentum sacrificium ad nos manant.

*LXXIX. Pertingit etiam sacrificii missae fructus ad defunctos.*

Deinde vero huius sacrificii eam vim esse parochi docebunt, ut non solum immolanti et sumenti prospicit, sed omnibus etiam fidelibus, sive illi nobiscum in terris vivant, sive iam in Domino mortui nondum plane expiati sint. Neque enim minus, ex Apostolorum certissima traditione pro his utiliter offeruntur, quam pro vivorum peccatis, poenis, satisfactionibus, ac quibusvis calamitatibus et angustiis.

*LXXX. Nulla missa, ex communi usu ecclesiae celebrata, dicenda est privata.*

Ex quo facile perspicitur, omnes missas communes censendas esse, ut quae ad communem omnium fidelium utilitatem et salutem pertineant. (Conc. Trid. sess. 22. c. 6. can. 8.)

*LXXXI. Quonam huius sacrificii caeremoniae pertineant.*

Habet autem hoc sacrificium multos, eosque maxime insignes ac solemnes ritus, quorum nullus supervacaneus aut inanis existimandus est; verum omnes eo spectant, ut et tanti sacrificii maiestas magis eluceat, et salutaribus mysteriis intuendis ad rerum divinarum, quae in eo sacrificio occultae sunt, contemplationem fideles excitentur. Sed de his nihil est ut plura dicamus, tum quia hoc argumentum longiore explicationem postulare videtur, quam propositae institutioni conveniat, tum quia innumerabiles pene libellos et commentarios, qui de hac re a piis et doctissimis viris conscripti sunt, sacerdotes in promptu habebunt. Hactenus igitur satis fuerit, earum rerum, quae ad eucharistiam, tum qua sacramentum, tum qua sacrificium sit, pertinent, potiora capita iuvante Domino exposuisse.

## CAPUT V.

### De Poenitentiae Sacramento.

*I. Accurate ac frequenter doctrina poenitentiae Christianis auribus est inserenda.*

Quemadmodum humanae naturae fragilitas et imbecillitas omnibus nota est, eamque in se ipso quisque facile experitur: ita quantam habeat necessitatem poenitentiae sacramentum, ignorare nemo potest. Quod si diligentiam, quae a parochis in unoquoque arguento adhibenda est, ex rei, quam tractant,

magnitudine et pondere metiri oportet: omnino fatebimur, eos nunquam in huius loci explicatione adeo diligentes futuros esse, ut satis videri possit; quin etiam de hoc sacramento, quam de baptismō, eo accuratius agendum est, quod baptismus semel tantum administratur, nec iterari potest: poenitentiae vero toties necessitas imposita est, quoties post baptismum peccare contingat. Ita enim a Tridentina synodo<sup>1)</sup> dictum est, sacramentum poenitentiae non secus lapsis post baptismum, ac baptismum nondum regeneratis ad salutem necessarium esse; vulgataque illa S. Hieronymi<sup>2)</sup> sententia ab omnibus, qui deinceps rcs sacras tradiderunt, magnopere comprobatur, poenitentiam esse secundam tabulam. Ut enim confracta navi unum vitae servandae perfugium reliquum est, si forte tabulam aliquam de naufragio liceat arripere: ita post amissam baptismi innocentiam, nisi quis ad poenitentiae tabulam configiat, sine dubio de eius salute desperandum est. Haec autem non ad pastores solum, sed ad reliquos etiam fideles excitandos dicta sint, ne forte in eis rei maxime necessariae incuria reprehendatur. Primum enim communis fragilitatis memores omni studio optare debent, ut divina ope adiuti sine casu aut prolapsione aliqua in via Domini progredi possint. Quod si nonnunquam offendent, tum vero summam Dei benignitatem intuentes, qui tanquam bonus pastor ovium suarum vulnera obligare,<sup>3)</sup> eisque mederi solet, hoc saluberrimum poenitentiae medicamentum nunquam in aliud tempus differendum esse cogitabunt.

### *II. Quam varia sit verbi poenitentiae significatio.*

Ut autem rem ipsam aggrediamur, prius explicanda est varia huius nominis potestas et notio, ne aliquis ambiguitate vocis in errorem inducatur. Nonnulli enim poenitentiam pro satisfactione accipiunt. Alii, a catholicae fidei doctrina longissime remoti, quum arbitrentur, poenitentiam nullam temporis praeteriti rationem habere, nihil aliud, quam novam vitam esse definiunt. Docendum est igitur, multiplicem esse huius nominis significationem. Primum enim poenitentia de iis dicitur, quibus aliquid displicet, quod ante placuerit, nulla habita ratione huius cogitationis, bonumne an malum fuerit. Sic omnes poenitet, quorum tristitia secundum saeculum est, non secundum Deum; cuiusmodi poenitentia<sup>4)</sup> non salutem affert, sed mortem. Altera est poenitentia, quum quis ex

<sup>1)</sup> Sess. 6. de iustif. cap. 14. et Sess. 14. de poenit. cap. 2. Mat. 18, 22. <sup>2)</sup> in cap. 3. Isai. Luc. 13, 5. <sup>3)</sup> Ez. 34, 16. Io. 10, 11. <sup>4)</sup> II. Cor. 7, 10.

scelere admisso, quod quidem antea placebat, dolorem non Dei, sed sui ipsius causa concipit. Tertia est, quum non solum admissi sceleris causa intimo animi sensu dolemus, vel eius doloris externum etiam aliquod signum damus, verum unius Dei causa in eo moerore sumus. Ac singulis quidem poenitentiae generibus, quae commemorata sunt, poenitentiae vox proprie convenit. Nam quum in sacris literis<sup>1)</sup> „Deum poenitere“ legimus, id per translationem dici perspicuum est; eo enim loquendi genere, quod ad hominum mores accommodatum est, sacrae literae utuntur, quum Deum mutare aliquid constituisse declarant; quod non aliter facere videatur, quam homines, quos si alicuius rei poeniteat, eam commutare omni studio laborant. Sic ergo scriptum est: „Poenituisse<sup>2)</sup> eum, quod hominem fecisset;“ et alio loco<sup>3)</sup>, „quod Saul regem constituisset.“

### *III. Quodnam sit inter poenitentiae significaciones discrimen.*

Verum inter has poenitentiae significaciones magnum discrimen observare oportet. Prima enim in vitio ponenda est; altera est quaedam commoti et perturbati animi affectio; tertiam quum ad virtutem pertinere, tum sacramentum esse dicimus; quae significatio huius loci propria est. Ac primum quidem de ipsa, ut virtutis parte, agendum est; non solum, quia fidelis populus ad omne virtutis genus a pastoribus institui debet, sed etiam quia huius virtutis actiones tanquam materiam praebent, in qua poenitentiae sacramentum versatur; ac nisi prius, quae sit poenitentiae virtus, recte intelligitur, sacramenti etiam vim ignorari necesse est.

### *IV. Quid sit interior poenitentia.*

Quare in primis monendi hortandique sunt fideles, ut omni contentione et studio in intima animi poenitentia, quam virtutem dicimus, elaborent; sine qua ea, quae extrinsecus adhibetur, parum admodum profutura est. Intima autem poenitentia est illa, quum ad Deum nos ex animo convertimus, et commissa a nobis sclera detestamur et odio habemus; simulque illud nobis certum et deliberatum est, malam vitae consuetudinem corruptosque mores emendare non sine spe veniae a Dei misericordia consequendae. Hanc vero dolor et tristitia, quae perturbatio et affectio est, et passio a multis vocatur, consequitur veluti comes peccatorum detestationi adiuncta. Quamobrem apud complures ex sanctis Patribus poenitentiae definitio huiusmodi animi cruciatu declaratur.

<sup>1)</sup> Ps. 105, 45. Ier. 26, 3. 13. <sup>2)</sup> Gen. 6, 6. <sup>3)</sup> I. Reg. 15, 11.

*V. Fides poenitentiae pars non est.*

Verum in eo, quem poenitet, fides poenitentiam antecedat necesse est; neque enim potest quisquam se ad Deum convertere, qui fide careat. Ex quo fit, ut nullo modo poenitentiae pars recte dici possit. (Conc. Trid. sess. 14. c. 3. can. 4. de poen.)

*VI. Intima animi poenitentia virtus est censenda.*

Quod autem intima haec poenitentia, ut antea diximus, ad virtutem pertineat, aperte ostendunt multa, quae de poenitentia tradita sunt, pracepta. Lex enim de iis tantum actionibus, quae suscipiuntur cum virtute, praecipit. Negare praeterea nemo potest, quin dolere, quando, quo modo, et quatenus oportet, virtutis sit. Hoc autem ut recte fiat, poenitentiae virtus praestat. Interdum enim evenit, ut ex admisis sceleribus minorem, quam par est, dolorem homines capiant; quin etiam, ut a Salomone<sup>1)</sup> scriptum est, nonnulli sunt, qui, quum male fecerint, laetantur: rursus vero alii ita se moerori animi et aegritudini dedunt, ut de salute etiam prorsus desperent; qualis fortasse Cain videri potest, qui ait<sup>2)</sup>: „Maior est iniquitas mea, quam ut veniam merear;“ et qualis certe Iudas fuit<sup>3)</sup>, qui „poenitentia ductus,“ suspendio vitam et animam amisit. Ut igitur modum in dolore tenere possumus, poenitentiae virtute adiuvamur.

*VII. Quomodo is, quem vere poenitet, affectus esse debeat.*

Sed idem etiam ex iis rebus colligi potest, quas sibi tamquam finem proponit is, quem vere peccati poenitet. Primum autem hoc ei propositum est, ut peccatum aboleat, omnemque animae culpam et maculam abstergat. Alterum est, ut pro sceleribus admisis Deo satisfaciat; quod quidem ad iustitiam referri perspicuum est. Nam etsi inter Deum et homines propria iustitiae ratio intercedere non potest, quum tam longo intervallo inter se distent: aliquam tamen esse iustitiam constat, cuiusmodi est inter patrem et filios, inter dominum et servos. Tertium est, ut homo in Dei gratiam redeat, in cuius offenditionem et odium propter peccati foeditatem incurrit. Haec vero omnia satis declarant, poenitentiam ad virtutem spectare.

*VIII. Quibus veluti gradibus ad divinam illam poenitentiae virtutem ascendatur.*

Sed docendum est etiam, quibus gradibus ad hanc divinam virtutem liceat ascendere. Primum itaque Dei misericordia nos praevenit, cordaque nostra ad se convertit; quod quum precaretur Propheta<sup>4)</sup>: „Converte,“ inquit, „nos Domine ad

<sup>1)</sup> Prov. 2, 14. <sup>2)</sup> Gen. 4, 13. <sup>3)</sup> Mat. 27, 9. <sup>4)</sup> Thren. 5, 21.

te, et convertemur.<sup>1)</sup> Deinde hoc lumine illustrati, per fidem ad Deum animo tendimus. „Credere enim oportet accedentem ad Deum,“ ut Apostolus<sup>2)</sup> testatur, „quia est, et inquirentibus se remunerator sit.“ Praeterea motus timoris consequitur, et suppliciorum acerbitate proposita, animus a peccatis revocatur. Atque hoc videntur spectare illa Isaiae<sup>3)</sup> verba: „Sicut ut quae concipit, quum appropinquaverit ad partum, dolens clamat in doloribus suis: sic facti sumus.“ Huc deinde accedit spes impetranda a Deo misericordiae, qua erecti vitam et mores emendare constituimus. Postremo caritate corda nostra accenduntur, ex qua liberalis ille timor probis et ingenuis filiis dignus oritur; atque ita unum illud veriti, ne qua in re Dei maiestatem laedamus, peccandi consuetudinem omnino deserimus. Hisce igitur quasi gradibus ad hanc praestantisimam poenitentiae virtutem pervenitur.

*IX. Quis sit praecipuus virtutis poenitentiae fructus.*

Quae prorsus divina et coelestis virtus existimanda est, cui scilicet regnum coelorum sacrae literae pollicentur. Nam apud S. Matthaeum<sup>4)</sup> scriptum est: „Poenitentiam agite appropinquavit enim regnum coelorum;“ et apud Ezechielem<sup>5)</sup>: „Si impius egerit poenitentiam ab omnibus peccatis suis, quae operatus est, et custodierit omnia praecepta mea, et fecerit iudicium et iustitiam, vita vivet;“ tum alio loco<sup>5)</sup>: „Nolo mortem impii, sed ut convertatur impius a via sua, et vivat.“ Quod quidem de aeterna et beata vita intelligendum esse, plane constat.

*X. Quid de externa poenitentia sentiendum sit, quaque de causa Christus eam in numerum sacramentorum referri voluerit.*

De externa vero poenitentia docendum est, eam esse, in qua sacramenti ratio consistit, habereque externas quasdam res sensibus subiectas, quibus declarantur ea, quae interius in anima fiunt. In primis autem explanandum fidelibus vide tur, quare factum sit, ut Christus Dominus poenitentiam in numerum sacramentorum referri voluerit. Huius autem rei illa omnino causa fuit, ut nobis de remissione peccatorum, quam Deus pollicitus est, quum ait: „Si impius egerit poenitentiam, etc.“ minus dubitare nobis liceret. Vehementer enim pendere animo de intima poenitentia opus esset, quum de suo cuique iudicio in iis, quae agit, merito timendum sit. Ut igitur Dominus huic nostrae sollicitudini subveniret, poenitentiae sacramentum instituit, quo per sacerdotis absolutionem peccata nobis remissa esse confideremus, conscientiaeque nostrae ob

<sup>1)</sup> Hebr. 11, 6. <sup>2)</sup> Is. 26, 17. <sup>3)</sup> Mat. 4, 17. <sup>4)</sup> Ez. 18, 21. <sup>5)</sup> Ez. 33, 11.

fidem, quae sacramentorum virtuti merito habenda est, pacatores redderentur. Neque enim aliter accipienda est vox sacerdotis peccata nobis legitime condonantis, quam Christi Domini, qui ait paralytico<sup>1)</sup>: „Confide fili, remittuntur tibi peccata tua.“ Deinde vero quum nemo salutem, nisi per Christum eiusque passionis beneficio, consequi possit: consentaneum nobisque utilissimum fuit, eiusmodi sacramentum institui, cuius vi et efficientia Christi sanguis ad nos defluens peccata post baptismum admissa elueret, atque ita reconciliationis beneficium illi uni Salvatori nostro acceptum referre profiteremur.

*XI. Quo pacto poenitentia verum sit novae legis sacramentum.*

Quod vero poenitentia sacramentum sit, pastores ita facile ostendent. Ut enim baptismus sacramentum est, quia peccata omnia, ac praesertim quod origine contractum fuit, delet: eadem ratione poenitentia, quae peccata omnia post baptismum voluntate vel actione suscepta tollit, vere et proprie sacramentum dicendum est. Deinde, quod caput est, quum illa, quae extrinsecus tum a poenitente, tum a sacerdote fiunt, declarant ea, quae interius efficiuntur in anima: quis neget poenitentiam vera et propria sacramenti ratione praeditam esse? siquidem sacramentum sacrae rei signum est, peccator autem, quem poenitet, rerum et verborum notis plane exprimit, se animum a peccati turpitudine abduxisse; itemque ex iis, quae a sacerdote geruntur et dicuntur, misericordiam Dei peccata ipsa remittentis facile cognoscimus. Quanquam hoc aperte indicant illa Salvatoris verba<sup>2)</sup>: „Tibi dabo claves regni coelorum —, et quocunque solveris super terram, erit solutum et in coelis.“ Absolutio enim, sacerdotis verbis enunciata, remissionem illam peccatorum signat, quam in anima efficit.

*XII. Poenitentiae sacramentum iterari potest.*

Neque vero solum fideles docendi sunt, poenitentiam in numero sacramentorum habendam esse, sed eorum etiam, quae iterari possunt. Quaerenti enim Petro, num septies venia peccati danda esset, Dominus respondit<sup>3)</sup>: „Non dico tibi usque septies, sed usque septuagies septies.“ Quare si cum eiusmodi hominibus agendum sit, qui summae Dei bonitati et clementiae diffidere videantur: confirmandus erit illorum animus, atque ad spem divinae gratiae erigendus. Quod quidem facile consequentur, tum huius loci et aliorum tractatione, qui in sacris literis permulti occurrent, tum vero iis rationibus et argumen-

<sup>1)</sup> Mat. 9, 2. <sup>2)</sup> Mat. 16, 19. Cone. Trid. sess. 14. c. 1 can. 1. de poen. <sup>3)</sup> Mat. 8, 22.

tis, quae ex sanctorum Chrysostomi libro de lapsis et Ambrosii libris de poenitentia petere licebit.

*XIII. Materia poenitentiae quae et qualis.*

Iam quoniam nihil fideli populo notius esse debet, quam huius sacramenti materia: docendum est, in eo maxime hoc sacramentum ab aliis differre, quod aliorum sacramentorum materia est res aliqua naturalis vel arte effecta; sacramenti vero poenitentiae quasi materia sunt actus poenitentis, nempe contritio, confessio et satisfactio, ut a Tridentina synodo<sup>1)</sup> declaratum est; qui quatenus in poenitente ad integratatem sacramenti, et plenam ac perfectam peccatorum remissionem ex Dei institutione requiruntur, hac ratione partes poenitentiae dicuntur. Neque vero hi actus „quasi materia“ a sancta synodo appellantur, quia verae materiae rationem non habeant; sed quia eius generis materia non sint, quae extrinsecus adhibeat, ut aqua in baptismo et chrisma in confirmatione. Quod autem ab aliis dictum est, peccata ipsa huius sacramenti materiam esse, nihil plane diversum dici videbitur, si diligenter attendamus. Ut enim ignis materiam ligna esse dicimus, quae vi ignis consumuntur: ita peccata, quae poenitentia delentur, recte huius sacramenti materia vocari possunt.

*XIV. Quae sit sacramenti poenitentiae forma.*

Sed formae etiam explicatio pastoribus praetermittenda non est, quod eius rei cognitio excitet fidelium animos ad percipiendam summa cum religione huius sacramenti gratiam. Est autem forma: „Ego te absolvo;“ quam non solum ex illis verbis licet colligere<sup>2)</sup>: „Quaecumque solveritis super terram, erunt soluta et in coelis:“ sed ex eadem Christi Domini doctrina ab Apostolis tradita accepimus. Ac quoniam sacramenta id significant, quod efficiunt, et illa verba: „Ego te absolvo,“ ostendunt peccatorum remissionem huius sacramenti administratione effici; planum est, hanc esse ponitentiae perfectam formam. Sunt enim peccata tanquam vincula,<sup>3)</sup> quibus constrictae animae tenentur, et ex quibus poenitentiae sacramento laxantur. Quod quidem non minus vere de illo etiam homine sacerdos pronunciat, qui prius ardentissimae contritionis vi, accedente tamen confessionis voto, peccatorum veniam a Deo consecutus sit.

*XV. Quo fructu ad formam sacramenti preces aliae adiificantur.*

Adduntur praeterea complures preces non quidem ad formam necessariae, sed ut ea removeantur, quae sacramenti vim et efficientiam illius culpa, cui administratur, impedire possent.

<sup>1)</sup> Ses. 14. de poenit. cap. 3. can. 4. <sup>2)</sup> Mat. 18. 18. <sup>3)</sup> Is. 5. 18.

*XVI. Quantum differat potestas sacerdotum Christi in diiudicanda peccati lepra a potestate sacerdotum veteris legis.*

Quamobrem peccatores Deo ingentes gratias agant, qui tam amplam potestatem in ecclesia sacerdotibus tribuerit. Neque enim, ut olim in veteri lege, sacerdotes testimonio suo aliquem a lepra liberatum esse duntaxat renunciabant<sup>1)</sup>: ita nunc in ecclesia ea tantum potestas sacerdotibus facta est, ut aliquem peccatis esse absolutum declarent, sed vere tanquam Dei ministri absolvunt; id quod Deus ipse, gratiae et iustitiae auctor ac parens, efficit.

*XVII. Quo habitu, quibusve ritibus suam actionem commendare poenitentes debeant.*

Diligenter vero ritus etiam, qui ad hoc sacramentum adhibentur, fideles observabunt; ita enim fiet, ut animo magis haereant quae hoc sacramento consecuti sunt, nimirum se tanquam servos clementissimo Domino, vel filios potius optimo parenti, reconciliatos esse, et simul facilius intelligent, quid eos facere oporteat, qui velint (velle autem omnes debent) se tanti beneficii gratos et memores probare. Nam quem peccatorum poenitet, is se humili ac demisso animo ad pedes sacerdotis deicet, ut, quum se tam humiliter gerat, facile possit agnoscere, superbiae radices evellendas esse, a qua omnia scelerata, quae deflet, ortum habuerint et enata sint. In sacerdote autem, qui in eum legitimus iudex sedet, Christi Domini personam et potestatem veneratur. Sacerdos enim, quemadmodum in aliis, ita in poenitentiae sacramento administrando Christi munus exsequitur. Deinde peccata sua poenitens ita enumerat, ut se maxima et acerbissima animadversione dignum esse fateatur, supplexque delictorum veniam petit. Quae sane omnia vetustatis suae certissima testimonia a sancto Dyonymio<sup>2)</sup> habent.

*XVIII. Quos praecipue fructus ex sacramento poenitentiae homines capiant.*

Sed nihil profecto tam proderit fidelibus, nihilque maiorem illis alacritatem poenitentiae suscipiendae afferet, quam si a parochis saepe explicatum fuerit, quantam ex ea utilitatem capiamus. Vere enim de poenitentia illud dici posse intelligent, eius quidem radices amaras, fructus vero suavissimos esse. Poenitentiae itaque omnis in eo vis est, ut nos in Dei gratiam restituat, cum eoque summa amicitia coniungat. Hanc vero reconciliationem interdum in hominibus piis, qui hoc sacramentum sancte et religiose percipiunt, maxima conscientiae

<sup>1)</sup> Lev. 13. 3. <sup>2)</sup> cf. Dion. Ar. ep. 8. §. 1.

pax et tranquillitas cum summa spiritus iucunditate consequi solet. Nullum est enim tam grave et nefarium scelus, quod poenitentiae sacramento, non quidem semel, sed iterum et saepius non deleatur. Qua de re ita Dominus per Prophetam<sup>1)</sup> inquit: „Si impius egerit poenitentiam ab omnibus peccatis suis, quae operatus est, et custodierit praecepta mea, et fecerit iudicium et iustitiam: vita vivet, et non morietur; omniū iniquitatum eius, quas operatus est, non recordabor.“ Et sanctus Ioannes<sup>2)</sup>: „Si confiteamur peccata nostra, fidelis est, et iustus, ut remittat nobis peccata nostra,“ et paulo post<sup>3)</sup>: „Si quis peccaverit,“ inquit, nullum videlicet peccati genus excipiens, „advocatum habemus apud Patrem, Iesum Christum iustum; et ipse est propitiatio pro peccatis nostris; non pro nostris autem tantum, sed etiam pro totius mundi.“

*XIX. Qua ratione quaedam peccata dicantur remitti non posse.*

Quod autem in Scripturis legimus, quosdam a Domino misericordiam non esse consecutos, quamvis eam vehementer imploraverint: id vero idecirco factum esse intelligimus, quod eos vere atque ex anima delictorum non poenitebat. Quare quum eiusmodi sententiae in sacris literis, vel apud SS. Patres occurunt, quibus videntur affirmare, aliqua peccata remitti non posse: ita eas interpretari oportet, ut difficilem admodum esse veniae impetrationem intelligamus. Ut enim morbus aliquis ea re insanabilis dicitur, quod aegrotus ita affectus sit, ut salutaris medicinae vim oderit: sic quoddam est peccati genus, quod non remittitur nec condonatur, propterea quod proprium salutis remedium, Dei gratiam, repellit. In hanc sententiam a D. Augustino<sup>4)</sup> dictum est: „Tanta labes est illius peccati, quum post agnitionem Dei per gratiam Christi oppugnat aliquis fraternitatem, et adversus ipsam gratiam invidiae facibus agitatur, ut deprecandi humilitatem subire non possit, etiamsi peccatum mala conscientia agnosceret et annunciare cogatur.“

*XX. Nullus condonationem peccatorum citra poenitentiam obtinere potest.*

Sed ut ad poenitentiam revertamur, haec adeo propria eius vis est, ut peccata deleat, ut sine poenitentia remissionem peccatorum impetrare aut ne sperare quidem ullo modo liceat. Scriptum est enim<sup>5)</sup>: „Nisi poenitentiam habueritis, omnes similiter peribitis.“ Quod quidem de gravioribus et mortiferis peccatis dictum a Domino est, etsi aliquo etiam

<sup>1)</sup> Ez. 18, 21. seq. <sup>2)</sup> I. Io. 1, 9. <sup>3)</sup> ib. 2, 1. seq. <sup>4)</sup> lib. 1. de serm. Dom. in monte c. 22. <sup>5)</sup> Luc. 13, 3.

poenitentiae genere indigent leviora peccata, quae venialia vocantur. Sanctus enim Augustinus<sup>1)</sup> inquit: „Quum quaedam sit poenitentia, quae quotidie in ecclesia pro peccatis venialibus agitur, illa sane frustra esset, si peccata venialia absque poenitentia dimitti possent.“

*XXI. Quot sint partes integrales poenitentiae.*

Sed quoniam de iis rebus, quae aliquo modo in actionem cadunt, non satis est universe loqui: curabunt pastores singulatim ea tradere, ex quibus verae et salutaris poenitentiae ratio a fidelibus percipi queat. Est autem huius sacramenti proprium, ut praeter materiam et formam, quae omnibus sacramentis communia sunt, partes etiam, ut antea diximus, illas habeat, quae tanquam totam integrumque poenitentiam constituant, contritionem scilicet, confessionem et satisfactionem; de quibus D. Chrysostomus<sup>2)</sup> his verbis loquitur: „Poenitentia cogit peccatorem omnia libenter sufferre; in corde eius contritio, in ore confessio, in opere tota humilitas vel fructifera satisfactio.“ Hae autem partes ex earum partium genere esse dicuntur, quae ad aliquid totum constituendum necessariae sunt, quoniam, quemadmodum hominis corpus ex pluribus membris constat, manibus, pedibus, oculis et aliis huiusmodi partibus, quarum aliqua si desit, merito imperfectum videatur, perfectum vero, si nulla desideretur: eodem etiam modo poenitentia ex hisce tribus partibus ita constituitur, ut, quamvis, quod ad eius naturam attinet, contritio et confessio, quibus homo iustus efficitur, satis sit: tamen nisi tertia etiam pars, id est satisfactio, accedat, aliquid ei omnino ad perfectionem desit necesse sit. Quare adeo inter se hae partes connexae sunt, ut contritio confitendi et satisfaciendi consilium et propositum inclusum habeat, confessionem contritio et satisfaciendi voluntas, satisfactionem vero dueae reliquae antecedant.

*XXII. Quomodo hae tres poenitentiae partes colligantur.*

Harum autem trium partium eam rationem afferre possumus, quod animo, verbis et re ipsa peccata in Deum committantur. Quare consentaneum fuit, ut nos ipsos ecclesiae clavibus subiicientes, quibus rebus Dei sanctissimum numen a nobis violatum esset, iisdem etiam eius iram placare, et peccatorum veniam ab eo impetrare conaremur. Sed idem etiam alio argumento confirmari potest. Etenim poenitentia est veluti quedam delictorum compensatio, ab eius voluntate profecta, qui deliquit, ac Dei arbitrio, in quem peccatum com-

<sup>1)</sup> cf. Aug. ep. 265. serm. 351. c. 3. <sup>2)</sup> serm. 1. de poenitentia.

missum est, constituta. Quare et voluntas compensandi requiritur, in quo maxime contritio versatur, et poenitens sacerdotis iudicio, ut qui Dei personam gerit, se subiicit necesse est, ut pro scelorum magnitudine poenam constituere in eum possit; ex quo tum confessionis, tum satisfactionis ratio et necessitas perspicitur.

*XXIII. Quid in hac materia proprie sit contritio.*

Quoniam vero harum partium vim et naturam tradere fidelibus oportet: prius incipiendum est a contritione, eaque diligenter explicanda; neque enim ad ullum temporis punctum, quum in memoriam praeterita peccata redeunt, vel quum aliquid offendimus, contritione animus debet vacare. Hanc Patres in concilio Tridentino<sup>1)</sup> ita definiunt: „Contritio est animi dolor ac detestatio de peccato commisso cum proposito non peccandi de cetero.“ Et paulo post de contritionis motu subiicitur: „Ita demum praeparat ad remissionem peccatorum, si cum fiducia divinae misericordiae et voto praestandi reliqua coniunctus sit, quae ad rite suscipiendum hoc sacramentum requiruntur.“ Ex hac itaque definitione intelligent fideles, contritionis vim in eo tantum positam non esse, ut quis peccare desinat, aut propositum ei sit, novum vitae genus instituere, aut ipsum iam instituat: sed in primis male actae vitae odium et expiationem suscipiendam esse. Id vero maxime confirmant illi sanctorum Patrum clamores, quos in sacris literis frequenter profusos esse legimus. „Laboravi,“ inquit David<sup>2)</sup>, „in gemitu meo; lavabo per singulas noctes lectum meum,“ et: „Exaudivit Dominus vocem fletus mei;“ et rursus alias<sup>3)</sup>: „Recognitabo tibi omnes annos meos in amaritudine animae meae.“ Quas certe et alias huiusmodi voces vehemens quoddam antea vitae odium et peccatorum detestatio expressit.

*XXIV. Cur contritio dolor a patribus concilii nominata sit.*

Quod autem contritio dolore definita est, monendi sunt fideles, ne arbitrentur, eum dolorem corporis sensu percipi. Contritio enim est voluntatis actio. Et sanctus Augustinus<sup>4)</sup> testatur, dolorem poenitentiae comitem esse, non poenitentiam. Verum peccati detestationem et odium doloris vocabulo Patres significarunt; tum quia sacrae literae ita utuntur, ait enim David<sup>5)</sup>: „Quamdiu ponam consilia in anima mea, dolorem in corde meo per diem?“ tum quia dolor in inferiori animae parte, quae vim concupiscendi habet, ex ipsa contritione oritur, ut

<sup>1)</sup> Sess. 14. de poen. c. 4. <sup>2)</sup> Ps. 6, 7. 9. <sup>3)</sup> Is. 38, 15. <sup>4)</sup> Serm. 351. c. 1.  
<sup>5)</sup> Ps. 12, 2.

non incommode contritio dolore definita fuerit, quod<sup>1)</sup> dolorem efficiat, ad eumque declarandum poenitentes vestem etiam mutare soliti sint. De quo Dominus apud sanctum Matthaeum<sup>1)</sup> inquit: „Vae tibi Corozain! vae tibi Bethsaida! quia si in Tyro et Sidone factae essent virtutes, quae factae sunt in vobis, olim in cilicio et cinere poenitentiam egissent.“

*XXV. Quare peccati detestatio vulgo a theologis contritio appetetur.*

Recte autem contritionis nomen peccati detestationi, de qua loquimur, ad significandam vim doloris impositum est; ducta similitudine a rebus corporeis, quae minutatim saxo aut duriore aliqua materia confringuntur, ut eo vocabulo declararetur, corda nostra, quae superbia obdurerunt, poenitentiae vi contundi atque conteri. Quare nullus alius dolor vel ex parentum et filiorum obitu, vel cuiusvis alterius calamitatis causa susceptus, hoc nomine appellatur, sed illius tantum doloris proprium est nomen, quo ex amissa Dei gratia atque innocentia afficimur.

*XXVI. Quibus praeterea vocabulis eadem peccati detestatio declarari soleat.*

Verum aliis quoque vocabulis eadem res declarari solet; nam et contritio cordis dicitur, quia cordis nomen frequenter sacrae literae pro voluntate usurpant.<sup>2)</sup> Ut enim a corde motionum corporis principium sumitur: ita voluntas reliquas omnes animae vires moderatur ac regit. Vocatur etiam a sanctis Patribus cordis compunctio, qui libros de contritione conscriptos de compunctione cordis inscribere maluerunt. Etenim quemadmodum ferro tumida ulceræ secantur, ut inclusum virus possit erumpere: ita corda quasi scalpello contritionis adhibito inciduntur, ut peccati mortiferum virus queant eiicere; quare et scissio cordis a Ioele<sup>3)</sup> Propheta appellata est: „Convertimini,“ inquit, „ad me in toto corde vestro, in ieunio et in fletu et in planctu; et scindite corda vestra.“

*XXVII. Cur dolor de peccatis, vocabulo contritionis inclusus, maximus et vehementissimus esse debeat.*

Summum vero et maximum dolorem ex peccatis, quae commissa sunt, suscipiendum esse, ita ut nullus maior excogitari possit, facile erit hisce rationibus demonstrare. Nam quum perfecta contritio sit caritatis actio, quae ab eo timore, qui filiorum est, proficiscitur: patet eundem caritatis et contritionis modum statuendum esse. At quoniam caritas, qua Deum diligimus, perfectissimus est amor: hinc fit, ut contritio

<sup>1)</sup> Mat. 11, 21. <sup>2)</sup> Iob 1, 5. Ps. 4, 3. Mat. 5, 28. <sup>3)</sup> Ioei 2, 12. 13.

vehementissimum animi dolorem coniunctum habeat. Ut enim maxime diligendus est Deus, ita quae nos a Deo alienant, maxime detestari debemus. In quo etiam illud observandum est, eodem loquendi genere caritatis et contritionis magnitudinem in sacris literis significari. De caritate dictum est<sup>1)</sup>: „Diliges Dominum Deum tuum ex toto corde tuo.“ Rursus, quod ad contritionem attinet, clamat Dominus per Prophetam<sup>2)</sup>: „Convertimini in toto corde vestro.“ Praeterea si, uti Deus summum bonum est inter omnia, quae diligenda sunt, ita etiam peccatum sumnum est malum inter omnia, quae odisse homines debent: illud sequitur, ut quam ob causam Deum summe diligendum esse confitemur, ob eandem rursus peccati sumum odium nos capiat necesse sit. Omnibus vero rebus Dei amorem anteponendum esse, ita ut ne vitae quidem conservandae causa peccare liceat, aperte nos docent illa Domini verba<sup>3)</sup>: „Qui amat patrem aut matrem plus quam me, non est me dignus;“ et<sup>4)</sup>: „Qui voluerit animam suam salvam facere, perdet eam.“ Sed illud etiam animadvertisendum est, ut, quemadmodum sancto Bernardo<sup>5)</sup> teste nullus finis et modus caritati praescribitur, (modus enim, inquit ille, diligendi Deum, est ipsum diligere sine modo): ita peccati detestationi nullus modus definiatur. Sit praeterea non solum maxima, sed vehementissima atque adeo perfecta, omnemque ignaviam et socordiam excludat. Etenim in Deuteronomio<sup>6)</sup> scriptum est: „Quum quaeviseris Dominum Deum tuum, invenies eum; si tamen toto corde quaeviseris, et tota tribulatione animae tuae;“ et apud Ieremiam<sup>7)</sup>: „Quaeveris me, et invenietis, quum quaeviseritis me in toto corde vestro; et inveniar a vobis, ait Dominus.“

**XXVIII. Contritio vera esse non desinit, etiamsi sensibilis dolor de peccatis non fuerit absolutus.**

Quamquam si id minus consequi nobis liceat, ut perfecta sit, vera tamen et efficax contritio esse potest. Saepe enim usu venit, ut, quae sensibus subiecta sunt, magis quam spiritualia nos afficiant. Quare nonnulli interdum maiorem ex filiorum obitu, quam ex peccati turpitudine doloris sensum capiunt. Idem etiam iudicium faciendum est, si lacrymae doloris acerbitatem non consequantur; quae tamen in poenitentia summopere optandae et commendandae sunt. Praeclara est enim ea de re S. Augustini<sup>8)</sup> sententia. „Non sunt,“ inquit, „in te Christianae caritatis viscera, si luges corpus, a quo

---

<sup>1)</sup> Deut. 6, 5. <sup>2)</sup> Ioh 2, 12. <sup>3)</sup> Mat. 10, 37. <sup>4)</sup> id. 16, 25. <sup>5)</sup> lib. de dilig. Deo. 1. <sup>6)</sup> Deut. 4, 29. <sup>7)</sup> Ier. 29, 13. 14. <sup>8)</sup> serm. 65 o. 6.

recessit anima, animam vero, a qua recessit Deus, non luges.“ Atque hoc spectant illa Salvatoris nostri verba, quae supra allata sunt<sup>1)</sup>: „Vae tibi Carozain, vae tibi Bethsaida! quia si in Tyro et Sidone factae essent virtutes, quae factae sunt in vobis, olim in cinere et cilicio poenitentiam egissent.“ Tametsi ad eam rem comprobandum satis esse debent clarissima Ninivitarum, Davidis, Peccatricis, Apostolorum principis, exempla, qui omnes plurimis lacrymis Dei misericordiam implorantes peccatorum veniam impetrarunt.

*XXIX. Peccata capitalia singillatim in contritione detestanda sunt.*

Maxime autem hortandi et monendi sunt fideles, ut ad singula mortalia crimina proprium contritionis dolorem adhibere studeant. Ita enim Ezechias<sup>2)</sup> contritionem describit, quum ait: „Recogitabo tibi omnes annos meos in amaritudine animae meae.“ Etenim recognoscere omnes annos, est singillatim peccata excutere, ut ea ex animo doleamus. Sed apud Ezechielem<sup>3)</sup> quoque scriptum legimus: „Si impius egerit poenitentiam ab omnibus peccatis suis, vita vivet.“ Atque in hanc sententiam sanctus Augustinus inquit<sup>4)</sup>: „Consideret peccator qualitatem criminis in loco, in tempore, in varietate, in persona.“

*XXX. Sufficit universe quandoque peccata sua detestari.*

Neque tamen hac in re desperent fideles de summa Dei bonitate et clementia; is enim, quum nostrae salutis cupidissimus sit, nullam moram ad tribuendam nobis veniam interponit, sed peccatorem paterna caritate complectitur, simul atque ille se collegerit, et universe peccata sua detestatus, quae deinde alio tempore, si facultas erit, singula in memoriam reducere ac detestari in animo habeat, ad Dominum se converterit. Ita enim nos per Prophetam iubet sperare, quum inquit<sup>5)</sup>: „Impietas impi non nocebit ei, in quacunque die conversus fuerit ab impietate sua.“

*XXXI. Quae ad veram contritionem sint in primis necessaria.*

Ex his igitur colligi poterunt quae ad veram contritionem maxime sunt necessaria; de quibus fidelem populum accurate oportebit docere, ut quisque intelligat, qua ratione comparare eam possit, regulamque habeat, qua diiudicet, quantum absit ab eius virtutis perfectione. Primum enim necesse est, peccata omnia, quae admisisimus, odisse et dolere, ne, si quaedam tantum doleamus, ficta et simulata, neque salutaris poenitentia a nobis suscipiatur. Nam ut a S. Iacobo<sup>6)</sup> Apostolo dictum

<sup>1)</sup> Mat. 11, 21. <sup>2)</sup> Is. 38, 15. <sup>3)</sup> Ez. 18, 21. <sup>4)</sup> lib. de vera et falsa poenitentia 14. <sup>5)</sup> Ez. 33, 12. <sup>6)</sup> Iac. 2, 10.

est: „Quicunque totam legem servaverit, offendit autem in uno: factus est omnium reus.“ Alterum est, ut ipsa contritio confitendi et satisfaciendi voluntatem coniunctam habeat; de quibus postea suo loco agetur. Tertium est, ut poenitens vitae emendandae certam et stabilem cogitationem suscipiat. Hoc vero Propheta aperte his verbis nos docuit<sup>1)</sup>: „Si impius egerit poenitentiam ab omnibus peccatis suis, quae operatus est, et custodierit omnia praecpta mea, et fecerit iudicium et iustitiam: vita vivet, et non morietur; omnium iniquitatum eius, quas operatus est, non recordabor;“ et paulo post<sup>2)</sup>: „Quum averterit se impius ab impietate sua, quam operatus est, et fecerit iudicium et iustitiam; ipse animam suam vivificabit;“ ac paucis interiectis<sup>3)</sup>: „Convertimini,“ inquit, „et agite poenitentiam ab omnibus iniquitatibus vestris, et non erit vobis in ruinam iniquitas; proicite a vobis omnes praevaricationes vestras, in quibus praevaricati estis, et facite vobis cor novum et spiritum novum.“ Idem etiam Christus Dominus mulieri, quae in adulterio reprehensa est, praescripsit; „Vade,“ inquit<sup>4)</sup>, „et iam amplius noli peccare.“ Item paralytico illi, quem ad probaticam piscinam curaverat, „Ecce,“ ait<sup>5)</sup>, „sanus factus es; iam noli peccare.“

*XXXII. Dolorem praeteritae culpae, et cavenda in posterum propositum contritioni necessarium esse ostenditur.*

Sed natura quoque ipsa et ratio plane ostendunt, duo illa ad contritionem esse in primis necessaria; dolorem scilicet peccati admissi, et propositum cautionemque, ne quid huiusmodi in posterum committatur. Nam qui amico reconciliari velit, quem iniuria aliqua affecerit, et doleat oportet, quod in eum iniuriosus et contumeliosus fuerit, et diligenter reliquo tempore provideat, ne qua in re amicitiam laesisse videatur; quae duo obedientiam adiunctam habeant necesse est. Hominem enim legi, sive naturali et divinae, sive humanae, quibus subiectus est, parere convenit. Quare si quid poenitens alteri per vim aut per fraudem abstulit, restituat oportet; itemque alicuius aut commodi aut officii compensatione illi satisficiat, cuius dignitatem aut vitam dicto factove violavit. Tritum enim est omnium sermone, quod apud S. Augustinum<sup>6)</sup> legimus: „Non remittitur peccatum, nisi restituatur ablatum.“

*XXXIII. Indulgendum est aliis, si nobis volumus indulgeri.*

Neque vero inter cetera, quae ad contritionem maxime pertinent, minus diligenter et necessario curandum est, ut,

<sup>1)</sup> Ez. 18, 21, 22. <sup>2)</sup> v. 27. <sup>3)</sup> v. 30, 31. <sup>4)</sup> Io. 8, 11. <sup>5)</sup> Io. 5, 14. <sup>6)</sup> ep. 153. c. 6.

quidquid iniuriarum ab altero acceperis, id totum remittatur ac condonetur. Ita enim Dominus et Salvator noster monet atque denunciat<sup>1)</sup>: „Si dimiseritis hominibus peccata eorum, dimittet et vobis Pater vester coelestis delicta vestra; si autem non dimiseritis hominibus, nec Pater vester dimittet vobis peccata vestra.“ Haec sunt, quae fidelibus in contritione observanda sunt. Cetera, quae ad hanc rem colligi a pastoribus facile poterunt, efficient quidem, ut in suo genere contritio sit magis perfecta et absoluta; verum adeo necessaria existimanda non sunt, ut sine his verae et salutaris poenitentiae ratio constare non possit.

#### *XXXIV. Quae sit propria contritionis vis et utilitas.*

Sed quoniam non satis esse pastoribus debet, si doceant, quae ad salutem videntur pertinere, nisi etiam omni cura et industria laborent, ut fideles ad eam ipsam rationem, quae illis praescripta est, vitam actionesque suas dirigant: vehementer proderit, contritionis vim et utilitatem saepius propondere. Nam quum pleraque alia pietatis studia, veluti beneficentia in pauperes, ieiunia, preces et alia id genus sancta et honesta opera, hominum culpa, a quibus proficiscuntur, a Deo interdum repudientur: ipsa certe contritio nunquam illi grata et accepta esse non potest. Nam inquit Propheta<sup>2)</sup>: „Cor contritum et humiliatum, Deus, non despicies.“ Quin etiam statim, ut eam mentibus nostris concepimus, peccatorum remissionem nobis a Deo tribui, alio loco eiusdem Prophecae verba illa declarant<sup>3)</sup>: „Dixi, confitebor adversum me iniustitiam meam Domino; et tu remisisti impietatem peccati mei.“ Atque eius rei figuram in „decem leprosis“<sup>4)</sup> animadvertisimus, qui a Salvatore nostro ad sacerdotes missi, antequam ad illos pervenirent, a lepra liberati sunt. Ex quo licet cognoscere, verae contritionis, de qua supra dictum est, eam vim esse, ut illius beneficio omnium delictorum veniam statim a Domino impetremus.

#### *XXXV. Qua ratione ad perfectionem contritionis veniatur.*

Plurimum etiam valebit ad fideliū mentes excitandas, si pastores rationem aliquam tradiderint, qua se quisque ad contritionem exercere possit. Monere autem oportet, ut omnes conscientiam suam frequenter excutientes videant, num quae a Deo sive ecclesiasticis sanctionibus praecepta sunt, servaverint. Quod si quis alicuius sceleris reum se esse cognoverit, statim se ipsum accuset, supplexque a Domino veniam exposcat, et spatium tum confitendi, tum satisfaciendi sibi dari

<sup>1)</sup> Mat. 6, 14. 15. Mare. 11, 26. <sup>2)</sup> Ps. 50, 19. <sup>3)</sup> Ps. 31, 5. <sup>4)</sup> Luc. 17, 14.

postulet, in primis que divinae gratiae praesidio se adiuvari petat, ne in posterum eadem illa peccata admittat, quae admisso vehementer poenitet. Curandum erit praeterea pastoribus, ut in peccata summum fidelium odium concitetur, tum quia summa est illorum foeditas et turpitudo, tum quia gravissima damna et calamitates nobis afferunt. Nam Dei benevolentiam, a quo maxima bona accepimus, longeque maiora exspectare et consequi licebat, a nobis abalienat, et summorum dolorum cruciatibus perpetuo afficiendos sempiternae morti nos addicit. Hactenus de contritione; nunc ad confessionem, quae est altera poenitentiae pars, veniamus.

*XXXVI. Quae sit confessionis praestantia, quamque fuerit ad Christianorum salutem necessaria eius institutio.*

Quantum vero curae et diligentiae in ea explicanda ponere pastores debeant: ex eo facile intelligent, quod omnibus fere piis persuasum est, quidquid hoc tempore sanctitatis, pie-tatis et religionis in ecclesia summo Dei beneficio conservatum est, id magna ex parte confessioni tribuendum esse, ut nulli mirandum sit, humani generis hostem, quum fidem catholicam funditus evertere cogitat, per ministros impietatis suae et satellites hanc veluti Christianae virtutis arcem totis viribus oppugnare conatum esse. Primum itaque docendum est, confessionis institutionem nobis summopere utilem atque adeo necessariam fuisse. Ut enim hoc concedamus, contritione peccata deleri: quis ignorat, illam adeo vehementem, acrem et incensam esse oportere, ut doloris acerbitas cum scelerum magnitudine aequari conferique possit? At quoniam pauci admodum ad hunc gradum pervenirent, fiebat etiam, ut a paucissimis hac via peccatorum venia speranda esset. Quare necesse fuit, ut clementissimus Dominus faciliori ratione communi hominum saluti consuleret; quod quidem admirabili consilio effecit, quum claves regni coelestis ecclesiae tradidit.

*XXXVII. Confessio contritionem perficit.*

Etenim ex fidei catholicae doctrina omnibus credendum et constanter affirmandum est; si quis ita animo affectus sit, ut peccata admissa doleat, simulque in posterum non peccare constituat, etsi eiusmodi dolore non afficiatur, qui ad impenitandam veniam satis esse possit, ei tamen, quum peccata sacerdoti rite confessus fuerit, vi clavum scelera omnia remitti ac condonari, ut merito a sanctissimis viris, Patribus nostris, celebratum sit, ecclesiae clavibus aditum in coelum aperiri. De quo nemini dubitare fas est, quum a concilio Flo-

rentino<sup>1)</sup>) decretum legamus, poenitentiae effectum esse abso-  
lutionem a peccatis. Verum ex eo practerea licet cognoscere,  
quantam afferat confessio utilitatem, quod iis, quorum est cor-  
rupta vitae consuetudo, nihil tam prodesse ad mores emen-  
dandos experimur, quam si interdum occultas animi sui cogi-  
tationes, facta dictaque omnia prudenti et fideli amico pate-  
faciant, qui eos opera et consilio iuvare possit. Quare ad  
eandem rationem maxime salutare existimandum est iis, qui  
scelerum conscientia agitantur, ut sacerdoti, tanquam Christi  
Domini vicario, cui perpetui silentii severissima lex proposita  
est, animae suae morbos et vulnera aperiant; statim enim pa-  
rata sibi medicamenta invenient, quae non solum praesentis  
aegritudinis sanandae, verum ita praeparandae animae coelestem  
quandam vim habeant, ut deinceps facile futurum non sit, in  
eiusmodi morbi et vitii genus recidere. Neque vero illa confes-  
sionis utilitas praetermittenda, quae ad vitae societatem et con-  
iunctionem magnopere pertinet. Constat enim, si sacramentalem  
confessionem e Christiana disciplina exemeris, plena omnia oc-  
cultis et nefandis sceleribus futura esse, quae postea, et alia  
etiam multo graviora, homines, peccati consuetudine depravati,  
palam committere non verebuntur. Etenim confitendi vere-  
cundia delinquendi cupiditati et licentiae tanquam frenos iniicit,  
et improbitatem coercet. Sed iam confessionis utilitate expo-  
sita, quae sit eius natura et vis, pastoribus tradendum erit.

### *XXXVIII. Confessionis sacramentalis descriptio et natura.*

Eam igitur definunt esse peccatorum accusationem, quae  
ad sacramenti genus pertinent, eo susceptam, ut virtute clav-  
ium veniam impetremus. Recte autem accusatio dicitur, quod  
peccata ita commenoranda non sunt, quasi scelera nostra  
ostentemus, ut ii faciunt, qui laetantur, quum malefecerint;  
aut omnino enarranda, ut rem aliquam gestam otiosis auditori-  
bus delectandi causa exponamus. Verum accusatorio animo  
ita enumeranda sunt, ut ea etiam in nobis vindicare cupiamus.  
Veniae autem impetrandae causa peccata confitemur, quoniam  
hoc iudicium longe dissimile est forensibus capitalium rerum  
quaestionibus, in quibus confessioni poena et supplicium, non  
culpae liberatio et errati venia constituta est. In eandem fere  
sententiam, quamvis aliis verbis, sanctissimi Patres videntur  
confessionem definitisse; veluti quum S. Augustinus inquit<sup>2)</sup>:  
„Confessio est, per quam morbus latens spe veniae aperitur;“  
et S. Gregorius<sup>3)</sup>: „Confessio est peccatorum detestatio;“

<sup>1)</sup> in decreto Eugenii IV. <sup>2)</sup> cf. Aug. serm. 29. c. 5. <sup>3)</sup> cf. Greg. hom. 40. in Ev.

quarum utraque, quod in superiori definitione continetur, facile ad eam referri poterit.

**XXXIX. Qua ex causa, et quando instituta sit a Christo confessio.**

Sed iam, quod omnium maximi faciendum est, docebunt parochi, ac sine ulla dubitatione fidelibus tradent, hoc sacramentum a Christo Domino, qui bene omnia et unius salutis nostrae causa fecit, ob eius summam bonitatem et misericordiam institutum esse. Apostolis enim post resurrectionem unum in locum congregatis insufflavit, dicens<sup>1)</sup>: „Accipite Spiritum sanctum; quorum remiseritis peccata, remittuntur eis, et quorum retinueritis, retenta sunt.“

**XL. Ex quibus aliis Scripturae locis confessionem a Christo institutam esse colligatur.**

Atque idem significare visus est Dominus, quem Apostolis id negotii dedit<sup>2)</sup>), ut Lazarum, a mortuis excitatum, a vinculis solverent, quibus constrictus erat. Nam S. Augustinus eum locum ita explanat<sup>3)</sup>: „Ipsi,“ inquit, „sacerdotes plus iam possunt proficere, plus confitentibus parcere, quibus crimen remittunt. Dominus scilicet per ipsos Apostolos Lazarum, quem iam suscitaverat, obtulit discipulis solvendum, ostendens, potestatem solvendi esse concessam sacerdotibus.“ Quo etiam pertinet, quod iis, qui a lepra in itinere curati sunt, praeceperat<sup>4)</sup>, ut „sacerdotibus se ostenderent,“ illorumque iudicium subirent.

**XLI. Quo modo ex verbis Domini necessario confessio sacerdoti facienda colligatur, et quod sint iudices Apostolorum successores.**

Cum igitur Dominus potestatem remittendi et retinendi peccata sacerdotibus tribuerit: perspicuum est, ipsos etiam ea de re iudices constitutos fuisse. At quoniam, ut S. Tridentina synodus<sup>5)</sup> sapienter admonuit, de qualibet re verum iudicium fieri, atque in repetendis criminum poenis iustitiae modus teneri non potest, nisi plane cognita et perspecta causa fuerit: ex eo sequitur, ut poenitentium confessione singillatim peccata omnia sacerdotibus patefacienda sint. Haec igitur pastores docebunt, quae a S. Tridentina synodo decreta, ac perpetuo a catholica ecclesia tradita sunt. Si enim sanctissimos Patres attente legimus, nusquam non apertissima testimonia occurrent, quibus confirmetur, hoc sacramentum a Christo Domino institutum esse, et confessionis sacramentalis legem, quam illi exomologesin et exagoreusin graeco vocabulo appellant, tanquam evangelicam accipiendam esse. Quod si etiam veteris Testa-

<sup>1)</sup> Io. 20, 22. 23. <sup>2)</sup> Io. 11, 44. <sup>3)</sup> Lib. de vera et falsa poenitent. c. 10. <sup>4)</sup> Luc. 17. 14. <sup>5)</sup> Sess. 14. de poenitent. cap. 5.

menti figuras exquirimus, sine dubio ad peccatorum confessionem videntur pertinere varia illa sacrificiorum genera, quae ad expianda diversi generis peccata a sacerdotibus fiebant.

*XLII. Quo fructu ad sacramentalem confessionem ecclesia certas quasdam caeremonias adiunxerit.*

Sed quemadmodum, confessionem a Domino Salvatore institutam esse, fideles docendi sunt, ita etiam monere eos oportet, quosdam ritus et solemnes caeremonias ecclesiae auctoritate additas esse; quae etsi ad sacramenti rationem non spectant, eius tamen dignitatem magis ante oculos ponunt, et confitentium animos pietate accensos ad Dei gratiam facilius consequendam praeparant. Quum enim aperto capite ad pedes sacerdotis abiecti, demisso in terram vultu, supplices manus tendentes, aliaque huiusmodi Christianae humilitatis signa dantes, quae ad sacramenti rationem necessaria non sunt, peccata contemperantur: ex his perspicue intelligimus, tum in sacramento coelestem vim agnoscendam, tum a nobis divinam misericordiam summo studio requirendam atque efflagitandam esse.

*XLIII. Salutem citra confessionem recuperare non possunt, qui peccatis sunt obnoxii capitalibus.*

Iam vero nemo existimet confessionem a Domino quidem institutam, sed ita tamen, ut eius usum necessarium esse non edixerit. Etenim sic statuant fideles, oportere eum, qui mortali scelere premitur, confessionis sacramento ad spiritualem vitam revocandum esse; quod quidem pulcherrima translatione a Domino aperte significatum videmus, quum huius sacramenti administrandi potestatem clavem regni coelorum appellavit. Ut enim locum aliquem ingredi nemo potest, sine eius opera, cui claves commissae sunt: sic intelligimus, neminem in coelum admitti, nisi fores a sacerdotibus, quorum fidei claves Dominus tradidit, aperiantur. Aliter enim nullus plane clavium usus in ecclesia esse videbitur, ac frustra is, cui clavium potestas data est, quempiam coeli aditu prohibebit, si tamen alia via introitus patere queat. Hoc vero praecclare a S. Augustino<sup>1)</sup> cognitum est, quum inquit: „Nemo sibi dicat, — occulite ago apud Dominum poenitentiam; novit Deus, qui mihi ignoscat, quid in corde ago. Ergo sine causa dictum: Quae solveritis in terra, soluta erunt in celo? ergo sine causa claves datae sunt ecclesiae Dei?“ Atque in eandem sententiam S. Ambrosius<sup>2)</sup> in libro de poenitentia scriptum reliquit, quum Novatianorum haeresim convelleret, qui soli Domino potestatem

<sup>1)</sup> serm. 392. c. 3. <sup>2)</sup> de poen. I. 2.

remittendi peccata reservandam asserebant: „Ecquis Deum,“ inquit, „magis veneratur; quine mandatis illius obtemperat, an qui resistit? Deus nobis iussit, eius ministris obtemperare; quibus quum pareamus, honorem soli Deo deferimus.“

*XLIV. Quo aetatis et anni tempore confitendum sit.*

Sed cum minime dubitari possit, confessionis legem ab ipso Domino latam et constitutam esse: sequitur, ut videndum sit, quinam, quo aetatis et anni tempore, ei parere debeant. Primum itaque ex concilii Lateranensis canone, cuius initium est<sup>1)</sup>: „Omnis utriusque sexus,“ perspicitur, neminem confessionis lege adstrictum esse ante eam aetatem, qua rationis usum habere potest. Neque tamen ea aetas certo aliquo annorum numero definita est, sed illud universe statuendum videtur: ab eo tempore confessionem puero indictam esse, quum inter bonum et malum discernendi vim habet, in eiusque mentem dolus cadere potest. Nam quum ad id vitae tempus quisque pervenerit, in quo de salute aeterna deliberandum est, tum primum sacerdoti peccata confiteri debet, quum aliter salutem sperare nemini liceat, qui scelerum conscientia premitur. Quo vero potissimum tempore confiteri oporteat, eo canone, de quo antea diximus, sancta ecclesia decrevit; iubet enim semel saltem quotannis fideles omnes peccata sua confiteri.

*XLV. Quoties Christiani hoc beneficio uti debeant.*

Verum si, quid salutis nostrae ratio postulet, considemus, profecto, quoties vel mortis periculum imminet, vel aliquam rem tractare aggredimur, cuius tractatio homini peccatis contaminato non conveniat, veluti quum sacramenta administramus, aut percipimus: toties confessio praetermittenda non est. Atque idem omnino servare oportet, quum veremur, ne nos alicuius culpae, quam admiserimus, oblivio capiat. Neque enim peccata confiteri possumus, quae non meminimus, neque peccatorum veniam a Domino impetramus, nisi ea poenitentiae sacramentum per confessionem deleat.

*XLVI. Omnia peccata singillatim in confessione aperienda.*

Sed quoniam multa in confessione observanda sunt, quorum alia ad sacramenti naturam pertinent, alia non item necessaria sunt: de his accurate agendum erit. Neque enim desunt libelli et commentarii, ex quibus facile est horum omnium explicationem depromere. Illud autem in primis doceant parochi, in confessione curandum esse, ut integra et absoluta sit; et enim omnia mortalia peccata sacerdoti aperire oportet. Nam

<sup>1)</sup> conc. Lat. IV. c. 21.

venialia peccata, quae nos a Dei gratia non divellunt, et in quae frequentius labimur, tametsi recte atque utiliter, quod piorum usus demonstrat, confitemur: tamen sine culpa praetermitti, multisque aliis rationibus expiari possunt. At mortifera peccata, ut iam diximus, singula enumeranda sunt, quamvis etiam occultissime lateant et eius generis sint, quae duobus tantum extremis Decalogi capitibus interdicuntur. Saepe enim evenit, ut ea gravius animam vulnerent, quam illa, quae aperte ac palam peccare homines solent. Ita vero a sancta Tridentina synodo definitum, atque a catholica ecclesia semper traditum est, quemadmodum sanctorum Patrum testimonia declarant. Est enim apud sanctum Ambrosium<sup>1)</sup> in hunc modum: „Non potest quis iustificari a peccato, nisi confessus fuerit peccatum.“ Sanctus etiam Hieronymus<sup>2)</sup> in Ecclesiaste idem plane confirmat; ait enim: „Si quem serpens diabolus occule momor derit, et nullo conscientia eum peccati veneno infecerit, si tacuerit, et poenitentiam non egerit, nec vulnus suum fratri vel magistro voluerit confiteri: magister, qui linguam habet ad curandum, prodesse non poterit.“ Praeterea S. Cyprianus in sermone de lapsis apertissime hoc docet his verbis: „Quamvis nullo sacrificii aut libelli facinore constricti sint, quoniam tamen de eo cogitaverunt, id ipsum apud sacerdotes Dei dolenter et simpliciter confitentes, exomologesin conscientiae faciunt, animi sui pondus exponunt, salutarem medelam parvis licet et modicis vulneribus exquirunt.“ Denique haec omnium ecclesiae doctorum communis vox est atque sententia.

*XLVII. Peccatorum circumstantiae, dum quis confitetur, sunt patefaciendae.*

Sed in confessione summa illa cura et diligentia adhibenda est, quam in rebus gravissimis ponere solemus, omneque studium ita eo conferendum, ut sanemus animae vulnera, et peccati radices evellamus. Neque vero solum peccata gravia narrando explicare oportet: verum etiam illa, quae unumquodque peccatum circumstant, et pravitatem valde augent vel minuunt. Quaedam enim circumstantiae adeo graves sunt, ut peccati mortiferi ratio ex illis tantum constet; quare haec omnia confiteri semper oportet. Si quis enim hominem interemerit, explicandum est, utrum ille sacris initiatus, an profanus fuerit; itemque si cum muliere concubuit, matrimonii lege libera, aut alterius uxore, aut propinquua, aut alicuius voti sponsione Deo consecrata, aperiat necesse est. Haec enim diversa pec-

<sup>1)</sup> lib. de parad. c. 14. <sup>2)</sup> cap. 10.

catorum genera constituant, ita ut primum quidem simplex fornicatio, alterum adulterium, tertium incestus, quartum sacrilegium, a divinarum rerum doctoribus appelleatur. Furtum etiam in peccatis numerandum est; verum si quis aureum nummum furetur, levius omnino peccat, quam is, qui centum, vel ducentos, vel ingentem aliquam auri vim, praesertim vero, qui sacram pecuniam abstulit. Quae etiam ratio ad locum et ad tempus pertinet, quorum exempla notiora sunt ex multorum libris, quam ut a nobis commemoretur. Haec igitur, ut diximus, enumeranda sunt; quae vero pravitatem rei magnopere non augent, sine crimen omitti possunt.

*XLVIII. Confessio, in qua sponte aliquid gravius reticetur, iteranda est.*

Sed ad confessionem adeo necessarium est, ut, quod antea diximus, integra sit et absoluta, ut, si quis dedita opera alia quidem ex iis, quae explicari debent, praetermittat, alia vero tantummodo confiteatur: non solum ex ea confessione is commodum nullum consequatur, sed etiam novo scelere se obstrin-gat. Neque eiusmodi peccatorum enumeratio confessionis nomine, in qua sacramenti ratio insit, appellanda est; quin potius poenitenti confessionem repetere est necesse, seque ipsum illius peccati reum facere, quod sacramenti sanctitatem simulatione confessionis violaverit.

*XLIX. Confessio, in qua per oblivionem, vel incuriam levem ali- quid omissum est, non iteranda.*

At vero si alia de causa confessioni aliquid defuisse videatur, vel quia poenitens nonnulla crimina oblitus fuerit, vel quia conscientiae suae latebras non ita accurate perquisierit, quum tamen illud in animo haberet, ut integre omnia peccata confiteretur: nihil ei opus erit confessionem iterare; satis autem habebit, si quando peccata, quae oblitus erat, in memoriam reduxerit, ea sacerdoti alio tempore confiteri. In quo tamen animadvertisendum est, ne forte nimis dissolute et remisse conscientiam nostram scrutati simus, adeoque negligenter peccata admissa memoria repetere studuerimus, ut ea ne recordari quidem voluisse, merito videri possimus; id enim si factum fuerit, confessionem iterare omnino oportebit.

*L. Nuda, simplex et aperta debet esse confessio.*

Praeterea curandum est, ut confessio nuda, simplex et aperta sit, non artificiose composita, quod a nonnullis fit, qui potius vitae suae rationem exponere, quam peccata confiteri videntur; ea enim confessio esse debet, quae nos tales sacerdoti aperiat, quales nos ipsos novimus, certaque pro certis, ac

dubia pro dubiis demonstret. Quod si vel peccata non recensentur, vel alieni a re, quam tractamus, sermones inseruntur: perspicuum est, confessionem hac virtute carere.

*L1. Prudens et verecunda debet esse confessio.*

Vehementer etiam commendandi sunt, qui prudentiam et verecundiam in explicandis rebus adhibent. Neque enim nimis multis verbis agendum est, sed, quae ad cuiusque peccati naturam et rationem pertinent, brevi oratione, quae modestiam coniunctam habeat, aperienda sunt.

*LII. Confessio per internuncium aut per literas fieri non potest.*

Illud vero tum confitenti, tum sacerdoti maxime laborandum est, ut eorum sermo in confessione secreto habeatur. Quare fit, ut nemini omnino, neque per nuncium, neque per literas, quoniam ea ratione nihil iam occulre agi potest, peccata confiteri liceat.

*LIII. Expedit homini Christiano saepius confiteri.*

Sed nulla res fidelibus adeo curae esse debet, quam ut frequenti peccatorum confessione animam studeant expiare; et enim, quum aliquis mortifero scelere urgetur, nihil ei magis salutare esse potest ob multa, quae impendent, vitae pericula, quam statim peccata sua confiteri; nam, ut sibi quisque diuturnum vitae spatium polliceri queat, turpe profecto est, quum in eluendis corporis aut vestium sordibus tam diligentia simus, non eadem saltem diligentia curare, ne animae splendor turpis simis peccati maculis obsolescat.

*LIV. Quotupli potestate minister praeditus esse debeat.*

Sed iam de ministro huius sacramenti dicendum est. Eum autem sacerdotem esse, qui ordinariam aut delegatam absolvendi potestatem habeat, ex ecclesiasticis sanctionibus satis apparent; habeat enim oportet non solum ordinem, verum etiam iurisdictionis potestatem, qui hoc munere fungi debet. Illustreret vero huius ministerii testimonium praebent illa Domini verba apud sanctum Ioannem (20, 23.): „Quorum remiseritis peccata, remittuntur eis; et quorum retinueritis, retenta sunt;“ neque enim omnibus, sed Apostolis tantum haec dicta fuisse constat, quibus in hac functione sacerdotes succedunt. Idque etiam maxime consentaneum est; nam quum omne gratiae genus, quae hoc sacramento tribuitur, a Christo capite ad membra derivetur: merito debent corpori Christo mystico, id est fidelibus, illud administrare, qui soli verum eiusdem corpus conficiendi potestatem habent, quum praesertim fideles hoc ipso poenitentiae sacramento ad sacram eucharistiam sumendam apti idoneique reddantur. Verum quanta olim religione in antiquissima ecclesia

ius ordinarii sacerdotis conservatum fuerit, ex veteribus Patrum decretis facile intelligitur, quibus cautum est, ne quis episcopus aut sacerdos in alterius parochia aliquid gerere auderet, sine ipsius auctoritate, qui illi praeesset, aut nisi magna necessitas cogere videretur. Ita vero ab Apostolo<sup>1)</sup> sancitum est, quum Tito praecepit, ut in singulis civitatibus sacerdotes constitueret, qui scilicet doctrinae et sacramentorum coelesti pabulo fideles alerent et educarent.

*LV. Potest quivis sacerdos quemcunque peccatorem in necessitate absolvere.*

Quamquam si mortis periculum imminet, et proprii sacerdotis facultas non datur, ne hac occasione aliquis pereat, in ecclesia Dei custoditum fuisse, concilium Tridentinum<sup>2)</sup> docet, ut unicuique sacerdoti liceret non solum omni peccatorum genere, cuiuscunque potestatis sit, illa condonare, sed etiam ab excommunicationis vinculo solvere.

*LVI. Qualis cuique de sua salute sollicito diligendus sit confessionis minister.*

Iam praeter ordinis et iurisdictionis potestatem, quae prorsus necessaria sunt, in primis opus est, ut huius sacramenti minister tum scientia et eruditione, tum prudentia praeditus sit; iudicis enim et medici simul personam gerit. Ac, quod ad primum attinet, satis constat, non vulgarem scientiam necessariam esse, qua et peccata investigare, et ex variis peccatorum generibus, quae gravia, quae levia sint, pro cuiusque hominis ordine et genere iudicare possit. Ut autem medicus est, summa quoque prudentia indiget. Etenim diligenter providendum est, ut ea remedia aegroto adhibeantur, quae ad illius animam sanandam, et in posterum contra morbi vim muniendam aptiora esse videantur. Ex quo poterunt fideles intelligere, cuvis maximo studio curandum esse, ut eum sibi sacerdotem deligat, quem vitae integritas, doctrina, prudens iudicium commendet; qui et quantum in eo officio, cui praest, ponderis ac momenti sit, et quae cuique sceleri poena conveniat, et qui vel solvendi vel ligandi sint, optime noverit.

*LVII. Nunquam, quae inter confitendum sunt audita, verbo aut signo patefacere licet.*

Sed quoniam nemo est, qui non vehementer cupiat, sceleram et turpitudinem suam occultari: monendi sunt fideles, nihil esse, quod timeant, ne ea, quae ipsi confessione patefecerint, a sacerdote ulli unquam indicentur, neve aliquod ex ea periculi

<sup>1)</sup> Tit. 1, 5. <sup>2)</sup> de poenitent. Sess. 14. c. 7.

genus sibi ullo tempore creari possit. Sacrae enim sanctiones gravissime in eos sacerdotes animadverti voluerunt, qui peccata omnia, quae aliquis eis confessus fuerit, perpetuo et religioso silentio compressa non tenuerint. Quare in concilio Lateranensi magno ita legimus: „Caveat omnino sacerdos, ne verbo, vel signo, vel alio quovis modo, prodat aliquatenus peccatorem.“

*LVIII. Quae sint praecipue observanda sacerdoti, aliorum confessiones excipienti.*

Sed iam rerum ordo postulat, quum de ministro dictum sit, ut quaedam praecipua capita explicitentur, quae ad confessionis usum et tractationem non parum sunt accommodata. Magna enim fidelium pars, quibus vulgo nihil longius videri solet, quam ut dies illi, qui ecclesiastica lege confessioni praefiniti sunt, efflant, tantum absunt a Christiana perfectione, ut vix peccatorum suorum meminerint, quae sacerdoti patefacienda essent, nedum cetera diligenter curent, quae ad divinam gratiam conciliandam vim habere maximam perspicuum est. Quare quum illorum saluti omni studio succurendum sit, hoc primum sacerdotes in poenitente diligenter observabunt: si veram peccatorum suorum contritionem habeat, certumque illi sit ac deliberatum, in posterum a peccatis abstinere. Quod si ita animo affectum esse animadverterint, moneant, et vehementer hortentur, ut pro tanto et tam singulari beneficio maximas gratias Deo agat, ab eoque coelestis gratiae praesidium petere nunquam desinat, quo munitus ac tectus facile poterit pravis cupiditatibus resistere ac repugnare. Docendus est etiam, ut nullum patiatur esse diem, quin aliquid de passionis Domini nostri mysteriis meditetur, ad eumque imitandum et summa caritate amandum ipse se excitet atque inflammet. Hac enim meditatione assequetur, ut ab omnibus daemonis temptationibus in dies se tutiorum esse sentiat. Neque enim ulla alia est causa, cur tam cito vel leviter ab hoste impugnati animo et viribus succumbamus, quam quod ex coelestium rerum meditatione divini amoris ignem concipere non studemus, quo mens recreari atque erigi possit. Sin autem sacerdos intellexerit, eum, qui velit confiteri, adeo peccata sua non dolere, ut vere contritus dicendus sit: conetur magno contritionis desiderio eum afficere, ut deinde, huius praecleari doni cupiditate incensus, illud a Dei misericordia petere et efflagitare in animum inducat.

*LIX. Quomodo se gerere debeat confessarius erga eos, qui sua peccata excusant.*

In primis autem reprimenda est quorundam superbia, qui scelera sua excusatione aliqua vel defendere, vel minora facere

nituntur. Nam exempli causa, quum aliquis fateatur, se ira vehementius commotum fuisse: statim huius perturbationis causam in alium confert, a quo prius sibi iniuriam factam esse queritur. Monendus itaque est, hoc elati animi et hominis peccati sui magnitudinem vel despicientis, vel plane ignorantis signum esse; tum vero eiusmodi excusationis genus ad augendum potius, quam ad minuendum peccatum pertinere. Nam qui ita factum suum probare contendit, hoc videtur profiteri, se tunc patientia usurum esse, quum a nemine iniuria laedetur; quo quidem nihil homine Christiano indignius esse potest. Et enim quum illius vicem maxime dolere debuerit, qui iniuriam fecit: tamen non peccati pravitate commovetur, sed fratri irascitur, ac, quum ei praeclera occasio oblata fuerit, ut Deum patientia colere, et fratrem mansuetudine sua corrigere possit, salutis materiam ad perniciem suam convertit.

*LX. Quomodo his consulet confessarius, qui peccata sua confiteri erubescunt, vel imparati eum adeunt.*

Perniciosior autem est illorum culpa existimanda, qui stulta quadam verecundia impediti, peccata confiteri non audent. Iis igitur hortando animos addere oportet; monendique sunt, nihil esse, quod vitia sua aperire vereantur, nullique mirum videri debere, si intelligat homines peccare; qui quidem communis est omnium morbus, et in humanam imbecillitatem proprie cadit. Alii sunt, qui, vel quod raro peccata sua confiteri solent, vel quod nullam curam et cogitationem in pvestigandis suis sceleribus posuerunt, nec commissa confessione expedire, nec unde eius officii initium ducendum sit, satis sciunt; quos certe acrius obiurgare opus est, atque in primis docere, priusquam ad sacerdotem aliquis aдеat, omni studio curandum esse, ut peccatorum suorum contritione commoveatur; id vero praestari nullo modo posse, nisi ea reminiscendo singillatim recognoscere studeat. Quare si sacerdos huiusmodi homines prorsus imparatos esse cognoverit, humanissimis verbis a se demittet, hortabiturque, ut ad cogitanda peccata aliquod spatium sumant, ac deinde revertantur. Quod si forte affirmaverint, se in eam rem omne studium et diligentiam suam contulisse, (quoniam sacerdoti maxime verendum est, ne semel dimissi amplius non redeant:) audiendi erunt, praesertim vero, si emendandae vitae studium aliquod prae se ferant, adducique possint, ut negligentiam suam accusent, quam se alio tempore diligenti et accurata meditatione compensaturos promittant; in quo tamen magna cautio adhibenda est. Si enim audita confessione iudicaverit, neque in enumerandis peccatis diligentiam, neque in detestandis do-

lorem poenitenti omnino defuisse, absolví poterit. Sin autem utrumque in eo desiderari animadverterit, auctor illi et suasor erit, ut maiorem curam, quod antea dictum est, in excutienda conscientia adhibeat, hominemque, ut blandissime poterit, tractatum dimittet.

*LXI. Pudori quorundam quomodo consulendum.*

Sed quoniam interdum contingit, ut mulieres, alicuius sceleris in priori confessione oblita, iterum ad sacerdotem non audeant redire, quod vereantur, ne vel in suspicionem magnae improbitatis populo veniant, vel singularis religionis laudem quaerere existimentur: saepe tum publice, tum privatum docendum est, neminem tanta memoria esse, qui omnia sua facta, dicta et cogitata meminisse queat; quapropter fideles nulla re deterrendos esse, quominus ad sacerdotem revertantur, si in memoriam alicuius criminis redierint, quod antea fuerit praetermissum. Haec igitur, atque alia huius generis multa in confessione a sacerdotibus observanda erunt. Nunc ac tertiam poenitentiae partem, quae satisfactio appellatur, veniendum est.

*LXII. Quid in genere, quidque in materia confessionis significet satisfactio.*

Primum itaque satisfactionis nomen et vis exponenda est. Hinc enim catholicae ecclesiae hostes amplam occasionem dissidi et discordiae cum maxima Christiani populi pernicie arripuerunt. Est autem satisfactio rei debitae integra solutio; nam quod satis est, ei nihil videtur deesse. Quare quum de gratiae conciliatione loquimur, idem satisfacere significat, quod alteri tantum praestare, quantum irato animo ad ulciscendam iniuriam satis esse possit. Atque ita satisfactio nihil aliud est, quam iniuriae alteri illatae compensatio. Quod autem ad hunc locum pertinet, satisfactionis nomen divinarum rerum doctores ad declarandam eam compensationem usurparunt, quum homo pro peccatis commissis Deo aliquid persolvit.

*LXIII. Quot sint gradus eius satisfactionis, quae compensationem aliquam peccati includit.*

Quo in genere quoniam multi gradus esse possunt, hinc fit, ut satisfactio varie accipiatur; ac prima quidem et praestantissima illa est, qua pro scelerum nostrorum ratione, etiamsi Deus summo iure nobiscum velit agere, quidquid a nobis debeatur, cumulate persolutum est. Haec vero eiusmodi esse dicitur, quae nobis Deum propitium et placatum reddidit, eamque uni Christo Domino acceptam ferimus, qui in cruce, pretio pro peccatis nostris soluto, plenissime Deo satisfecit. Neque

enim ulla res creata tanti esse potuit, quae nos tam gravi debito liberaret, atque, ut S. Ioannes testatur<sup>1)</sup>, „ipse est propitiatio pro peccatis nostris; non pro nostris autem tantum, sed etiam pro totius mundi.“ Haec igitur plena et cumulata est satisfactio, scelerum omnium rationi, quae in hoc saeculo commissa sunt, pariter aequaliterque respondens; cuius pondere hominum actiones apud Deum plurimum valent, ac sine eo nulla prorsus aestimatione dignae haberentur. Atque huc Davidis verba videntur spectare, qui postquam secum ipse reputans illud protulisset<sup>2)</sup>: „Quid retribuam Domino pro omnibus, quae retribuit mihi?“ nihil praeter hanc satisfactionem, quam calicis nomine expressit, dignum tot tantisque beneficiis invenire potuit; quare subiecit: „Calicem salutaris accipiam, et nomen Domini invocabo.“ Alterum satisfactionis genus ea est, quae et canonica appellatur, et certo temporis spatio definita perficitur. Quare antiquissimae ecclesiae usu receptum est, ut, quum poenitentes a peccatis solvuntur, poena aliqua eis irrogetur, cuius poenae solutio satisfactio vocari consuevit. Eodem vero nomine quodlibet etiam poenae genus significatur, quam pro peccatis, non quidem a sacerdote constitutam, sed sponte nostra suscepitam, atque a nobis ipsis repetitam sustinemus.

*LXIV. Quid sit haec satisfactio, quae ad sacramentum poenitentiae pertinet.*

Verum haec ad poenitentiam, ut sacramentum est, minime pertinet, sed illa tantum sacramenti pars censenda est, quam diximus ex praecepto sacerdotis Deo pro peccatis dependi; hoc adiuncto, ut statutum cum animo et deliberatum habeamus, peccata in posterum omni studio vitare. Ita enim nonnulli definierunt: Satisfacere est Deo debitum honorem impendere. Quod autem nemo debitum honorem Deo possit tribuere, nisi qui peccata omnino vitare constituat, satis appareat. Et satisfacere est causas peccatorum excidere, et eorum suggestioni aditum non indulgere. In quam sententiam alii senserunt, satisfactionem esse purgationem, qua eluitur, quidquid sordium propter peccati maculam in anima resedit, atque a poenis tempore definitis, quibus tenebamur, absolvimur. Quae quum ita sint, facile erit fidelibus persuadere, quam necessarium sit, ut poenitentes in hoc satisfactionis studio se exerceant.

*LXV. Non semper cum remissione poenae aeternae, quae consequitur condonationem culpe, poena temporalis remittitur.*

Docendi enim sunt, duo esse, quae peccatum consequuntur, maculam et poenam; ac quamvis semper culpa dimissa simul

<sup>1)</sup> I. Io. 2, 2. <sup>2)</sup> Ps. 115, 12. 13.

etiam mortis aeternae supplicium apud inferos constitutum condonetur: tamen non semper contingit, quemadmodum a Tridentina synodo<sup>1)</sup> declaratum est, ut Dominus peccatorum reliquias, et poenam certo tempore definitam, quae peccatis debetur, remittat. Cuius rei perspicua sunt exempla in sacris literis, Genesis tertio capite (v. 17.) Num. 12, 14. et 20, 12., et aliis permultis locis. Sed illud Davidis clarissimum et maxime illustre intuemur; cui etsi Nathan dixerat<sup>2)</sup>: „Dominus quoque transtulit peccatum tuum; non morieris:“ is tamen gravissimas poenas ultro subiit, Dei misericordiam his verbis dies noctesque implorans<sup>3)</sup>: „Amplius lava me ab iniuitate mea, et a peccato meo munda me; quoniam iniuitatem meam ego cognosco, et peccatum meum contra me est semper.“ Quibus verbis illud petitum est a Domino, ut non solum crimen, sed poenam etiam criminis debitam condonaret, atque a peccati reliquiis purgatum in pristinum decoris et integritatis statum restitueret. Atque haec quum summis precibus peteret, eum tamen Dominus tum filii ex adulterio suscepti, tum Absalonis, quem unice diligebat, defectione et morte multavit, aliisque poenis et calamitatibus affecit, quas illi antea intentarat. In Exodo etiam<sup>4)</sup>, etsi Dominus, Moysis precibus exoratus, populo idololatrae pepercera, tamen minatus est, se tanti flagitiis graves poenas repetitum esse; ipseque Moyses testatus est, fore ut illud Dominus severissime in tertiam et quartam usque generationem ulcisceretur. Haec vero a sanctis Patribus in ecclesia catholica semper tradita esse, ipsorum auctoritate apertissime comprobatur.

*LXVI. Quare non tantum indulget Deus homini per sacramentum poenitentiae, quantum per baptismum.*

Verum qua de causa factum sit, ut poena omnis poenitentiae sacramento, aequa ac baptismo, non condonetur, praecclare a sancta Tridentina synodo<sup>5)</sup> explicatum est his verbis: „Divinae iustitiae ratio exigere videtur, ut aliter ab eo in gratiam recipientur, qui ante baptismum per ignorantiam deliquerint; aliter vero qui semel a peccati et daemonis servitute liberati et accepto Spiritus sancti dono, scientes templum Dei violare,<sup>6)</sup> et Spiritum sanctum contristare non formidaverint. Et divinam clementiam decet, ne ita nobis absque ulla satisfactione peccata dimittantur, ut, occasione accepta, peccata leviora putantes, velut iniurii et contumeliosi Spiritui sancto in graviora labamur,<sup>7)</sup> thesaurizantes nobis iram in die irae. Procul dubio enim magnopere a peccato revocant, et quasi freno quodam

<sup>1)</sup> Sess. 14. de poenit. c. 8. can. 12. et 15. <sup>2)</sup> II. Reg. 12, 13. <sup>3)</sup> Ps. 50, 4. 5.  
⁊ Ex. 32, 14. 31. <sup>4)</sup> Sess. 14. c. 8. <sup>6)</sup> I. Cor. 3, 17. Eph. 4, 30. <sup>7)</sup> Rom. 2, 5.

coercent hae satisfactoriae poenae, cautioresque et vigilantiores in posterum poenitentes efficiunt.<sup>1)</sup> Accedit, ut tanquam testificationes quaedam sint doloris, quem ex peccatis commissis capimus; qua ratione ecclesiae fit satis, quae nostris sceleribus graviter offensa est. Nam, ut sanctus Augustinus<sup>2)</sup> ait: „Cor contritum et humiliatum Deus non spernit. Verum quia plerumque dolor alterius cordis occultus est alteri, neque in aliorum notitiam per verba, vel alia quaecumque signa procedit: recte ab iis, qui ecclesiae praesunt, tempora poenitentiae constituantur, ut ecclesiae, in qua peccata ipsa remittuntur, satisfiat.“

*LXVII. Quo modo ex poenis nobis inflictis alii iuventur.*

Praeterea poenitentiae nostrae exempla alios docent, quomodo ipsi vitam instituere, et pietatem sequi debeant. Quum enim poenas nobis pro peccatis irrogatas ceteri homines iuentur: et summam cautionem sibi in omni vita adhibendam, et mores pristinos corrigendos esse intelligent. Quare sapientissime illud ab ecclesia observatum est, ut, quum ab aliquo publice flagitium commissum esset, publica etiam poenitentia ei indicetur, ut ceteri timore perterriti deinceps peccata diligentius vitarent; quod etiam in occultis criminibus, quae graviora essent, interdum fieri solitum erat. Sed, ut diximus, in publicis hoc perpetuum fuit, ut, qui ea commiserant, antequam publicam poenitentiam suscepissent, non absolverentur. Interim vero pastores pro illorum salute Deum rogabant, atque, ut ipsi etiam poenitentes idem facerent, eos hortari non desinebant. Quo in genere summa fuit S. Ambrosii cura et sollicitudo<sup>3)</sup>, cuius lacrymis fertur, quamplurimos, qui duro animo ad poenitentiae sacramentum accesserant, ita emollitos esse, ut verae contritionis dolorem conceperint. Verum postea tantum de veteris disciplinae severitate remissum est, atque ita caritas refixit, ut iam plerique ex fidelibus ad peccatorum veniam impetrandam nullum intimum animi dolorem atque gemitum cordis necessarium putent, sed illud satis esse arbitrentur, si speciem tantum dolentis habeant.

*LXVIII. Per poenitentiam Christo assimilamur.*

Deinde vero huiusmodi poenarum perpessione consequimur, ut capit is nostri Iesu Christi, in quo passus<sup>4)</sup> est ipse et tentatus, similitudinem et imaginem geramus. Nihil enim tam deforme videri potest, ut a S. Bernardo dictum est<sup>4)</sup>, quam sub spinoso capite delicatum esse membrum. Nam teste

<sup>1)</sup> Enchir. c. 65. <sup>2)</sup> Paulin. in vita S. Ambr. <sup>3)</sup> Hebr. 2, 18. <sup>4)</sup> sermone 5. de omnibus Sanctis.

Apostolo<sup>1)</sup> „coheredes“ sumus „Christi; si tamen compatimur; et quod alio loco scripsit<sup>2)</sup>: „Si commortui sumus, et convivemus; si sustinebimus, et conregnabimus.“

*LXIX. Quo modo post Dei misericordiam in peccato iustitiae locus sit.*

Divus etiam Bernardus<sup>3)</sup> duo affirmat in peccato reperiri: maculam animae et plagam; ac turpitudinem quidem ipsam Dei misericordia tolli, verum sanandis peccatorum plagis valde necessariam esse eam curam, quae in remedio poenitentiae adhibetur. Quemadmodum enim sanato vulnere cicatrices quedam remanent, quae et ipsae curandae sunt: ita in anima, culpa condonata, supersunt reliquiae purgandae. Idem plane D. Chrysostomi<sup>4)</sup> sententia confirmat, quum ait: „Non satis est sagittam e corpore extrahi, sed plaga quoque, a sagitta inficta, sananda est: sic etiam in anima post acceptam peccati veniam poenitentia curanda est plaga relicta.“ Frequentissime enim a S. Augustino<sup>5)</sup> docemur, duo haec in poenitentia anima advertenda esse: Dei misericordiam et iustitiam; misericordiam, qua peccata et poenas aeternas illi debitas condonat; iustitiam, qua poenis tempore definitis hominem punit.

*LXX. Per poenitentiam poenas a Deo nobis praeparatas effugimus.*

Postremo poenitentiae poena a nobis suscepta Dei animadversionem suppliciaque in nos constituta antevertit. Ita enim docet Apostolus<sup>6)</sup>, quum ait: „Si nos metipsos diiudicaremus, non utique iudicaremur; dum iudicamur autem, a Domino corripimur, ut non cum hoc mundo damncemur.“ Quae quum fidelibus explicata fuerint, vix fieri poterit, quominus ad poenitentiae opera maxime excitentur.

*LXXI. Unde nostra opera sint tum meritoria, tum etiam satisfactoria.*

Eius autem quanta vis sit, ex eo colligitur, quod tota a Christi Domini passionis merito pendet. A quo etiam honestis actionibus duo illa maxima bona consequimur: alterum est, ut immortalis gloriae praemia mereamur, ita ut<sup>7)</sup> calix etiam aquae frigidae, quam in eius nomine dederimus, mercede non caret; alterum, ut pro peccatis nostris satisficiamus.

*LXXII. Christi satisfactionem et meritum nostra satisfactio non obscurat.*

Neque vero id perfectissimam et cumulatissimam Christi Domini satisfactionem obscurat, sed illud potius contra evenit,

<sup>1)</sup> Rom. 8, 17. <sup>2)</sup> II. Tim. 2, 11. 12. <sup>3)</sup> Serm. de coena Dom. <sup>4)</sup> hom. 80. ad pop. Antioch. <sup>5)</sup> in Ps. 50. <sup>6)</sup> I. Cor. 11, 31. sq. <sup>7)</sup> Mat. 10, 42. Marc. 9, 40.

ut multo clariorem et illustriorem reddat. Eo enim copiosior Christi gratia videtur esse, quod non solum ea nobiscum communicantur, quae ipse solus, sed illa etiam quae tanquam caput in membra suis sanctis et iustis hominibus promeruit ac persolvit. Qua ratione fieri perspicuum est, ut iustae et honestae piorum actiones tantum ponderis et dignitatis habeant. Christus enim Dominus, tanquam<sup>1)</sup> caput in membra, et vitis in palmites, gratiam suam in eos, qui sibi per caritatem coniuncti sunt, continenter diffundit. Quae quidem gratia bona opera nostra semper antecedit, comitatur et consequitur; et sine qua mereri aut satisfacere Deo nullo modo possumus. Atque ita fit, ut iustis nihil deesse videatur, quum operibus, quae Dei virtute efficiunt, et divinae legi pro humana mortalique conditione satisfacere, et vitam aeternam, quam scilicet, si Dei gratia ornati e vita decesserint, consequentur, mereri possint. Nota est enim illa Salvatoris<sup>2)</sup> vox: „Qui autem biberit ex aqua, quam ego dabo ei, non siet in aeternum; sed aqua, quam ego dabo ei, fiet in eo fons aquae salientis in vitam aeternam.“

*LXXIII. Ad hoc ut opus aliquod veram vim satisfaciendi habeat, quae sint potissimum necessaria.*

Sed duo praecipue in satisfactione requiruntur. Primum est, ut is, qui satisfacit, iustus sit, ac Dei amicus; opera enim quae sine<sup>3)</sup> fide et caritate fiunt, nullo modo Deo grata esse possunt. Alterum, ut eiusmodi opera suscipiantur, quae natura sua dolorem et molestiam afferant; quum enim praeteritorum scelerum compensationes sint, atque, ut S. Martyr Cyprianus<sup>4)</sup> ait, redemptrices peccatorum: omnino necesse est, ut aliquid acerbitudinis habeant. Quanquam non semper illud consequitur, ut, qui se in illis molestis actionibus exercent, doloris sensum habeant. Saepe enim vel patiendi consuetudo, vel accensa in Deum caritas efficit, ut, quae perpessu gravissima sunt, ne sentiantur quidem. Neque tamen idcirco fit, quominus ea ipsa opera satisfaciendi vim habeant; siquidem hoc proprium est filiorum Dei, ita eius amore et pietate inflammari, ut acerbissimis laboribus cruciati, aut nihil fere incommodi sentiant, aut omnia laetissimo animo perferant.

*LXXIV. Quot sint opera satisfactionis.*

Verum omne satisfactionis genus pastores docebunt ad haec tria praecipue conferendum esse: orationem, ieunium et eleemosynam, quae quidem tribus bonis animae, corporis, et iis, quae externa commoda dicuntur, quae omnia a Deo acce-

<sup>1)</sup> Eph. 4, 16. Io. 15, 4. seq. <sup>2)</sup> Io. 4, 13. <sup>3)</sup> I. Cor. 13, 3. Hebr. 11, 6. <sup>4)</sup> ep. 55.

pimus, respondent. Nihil vero aptius et convenientius ad extirpandas omnium peccatorum radices esse potest. Nam quum „omne<sup>1)</sup>“, quod est in mundo, concupiscentia carnis“ sit, „oculorum, aut superbia vitae,“ nemo non videt, hisce tribus morbi causis totidem medicinas, priori scilicet ieiunium, alteri eleemosynam, tertiae orationem rectissime opponi. Praeterea si eos etiam, qui peccatis nostris offenduntur, spectemus, facile erit intelligere, cur ad haec tria potissimum omnis satisfactionio referatur. Hi vero sunt Deus, proximus, nos ipsi. Quare Deum oratione placamus, proximo eleemosyna satisfacimus, nos ipsos vero ieiunio castigamus.

*LXXV. Afflictiones, quae extrinsecus hominibus immittuntur, suntne satisfactoriae?*

Sed quoniam multae variaeque aerumnæ et calamitates, dum in hac vita sumus, nos premunt: illud maxime fideles docendi sunt, eos,<sup>2)</sup> qui patienti animo quidquid laboriosi et incommodi Deus immiserit, ferant, amplam satisfaciendi et merendi materiam nactos esse; qui autem inviti et repugnantes poenam huiusmodi sustineant, omni satisfactionis fructu privari; sed Dei tantum, peccata iusto iudicio ulciscentis, animadversionem et supplicium perferre.

*LXXVI. Unus pro alio satisfacere, non autem confiteri aut conferre potest.*

In eo vero summa Dei bonitas et clementia maximis lantibus et gratiarum actionibus praedicanda est, qui humanae imbecillitati hoc condonavit, ut unus posset pro altero satisfacere; quod quidem huius partis poenitentiae maxime proprium est. Ut enim, quod ad contritionem et confessionem attinet, nemo pro altero dolere aut confiteri potest: ita qui divina gratia praediti sunt, alterius nomine possunt quod Deo debetur persolvere. Qua re fit, ut quodam pacto „alter<sup>3)</sup>“ alterius onera portare“ videatur. Nec vero de hoc cuiquam fidelium dubitandi locus relictus est, qui in Apostolorum symbolo Sanctorum communionem confitemur. Nam quum omnes eodem baptismo abluti Christo renascamur, eorundem sacramentorum participes simus, in primis vero eiusdem corporis et sanguinis Christi Domini cibo et potu recreemur: hoc aperi- tissime demonstrat, nos omnes esse eiusdem corporis membra. Quemadmodum igitur neque pes suae tantum, sed etiam oculorum utilitatis causa munere suo fungitur; neque rursus, quod oculi videant, ad illorum propriam, sed ad communem omnium

<sup>1)</sup> I. Io. 2, 16. <sup>2)</sup> Conc. Trid. sess. 14. c. 9. can. 19. de poen. <sup>3)</sup> Gal. 6, 2.

membrorum utilitatem referendum est: ita communia inter nos satisfactionis officia existimari debent.

*LXXVII. Non omnis satisfactionis virtus aliis communicari potest.*

Neque tamen id sine ulla exceptione verum est, si comoda omnia, quae ex ea capiuntur, spectemus; nam satisfactionis opera, medicinae etiam et curationes quaedam sunt, quae poenitenti ad sanandos pravos animi affectus praescribuntur; quo quidem utilitatis fructu eos, qui per se non satisfaciunt, prorsus carere perspicuum est. Haec igitur de tribus poenitentiae partibus, contritione, confessione et satisfactione, copiose et dilucide explicanda erunt.

*LXXVIII. Illi impendenda non est absolutio, qui rem ablatam restituere non promittit.*

Sed illud in primis a sacerdotibus observari oportet, ut, audita peccatorum confessione, antequam poenitentem a peccatis absolvant, diligenter current, ut si quid ille forte de re aut de existimatione proximi detraxerit, cuius peccati damnandus merito esse videatur, cumulata satisfactione compenset; nemo enim absolvendus est, nisi prius quae cuiusque fuerint restituere polliceatur. At quoniam multi sunt, quibus, etsi prolixe pollicentur, se officio satis esse facturos, tamen certum est ac deliberatum, nunquam promissa exsolvore: omnino ii cogendi sunt, ut restituant; saepeque illud Apostoli (Eph. 4, 28.) eis inculcandum est, ut, „qui furabatur, iam non furetur; magis autem laboret, operando manibus suis quod bonum est, ut habeat, unde tribuat necessitatem patienti.“

*LXXIX. Cuiusmodi satisfactione poenitenti sit imponenda.*

In irroganda autem satisfactionis poena sacerdotes nihil sibi suo arbitratu statuendum esse, sed omnia iustitia, prudenter et pietate dirigenda existimabunt. Atque ut hac regula peccata metiri videantur, et poenitentes scelerum suorum gravitatem magis agnoscant: operae pretium erit, interdum eis significare, quae poenae quibusdam delictis ex veterum canonicum praescripto, qui poenitentiales vocantur, constitutae sint. Igitur universae satisfactionis modum culpae ratio temperabit. Sed ex omni satisfactionum genere maxime convenit poenitentibus praecipere, ut certis aliquot et definitis diebus orationi vacent, ac pro omnibus, et praesertim pro iis, qui ex hac vita in Domino decesserunt, preces Deo faciant. Hortari vero etiam eos oportet, ut saepe eadem satisfactionis opera, a sacerdote indicta, ultro suscipiant ac repeatant, atque ita mores suos componant, ut iis omnibus, quae ad poenitentiae

sacramentum pertinent, diligenter absolutis, tamen virtutis poenitentiae studia nunquam intermittant; quod si interdum etiam ob publicam offensionem publica poenitentia praescribenda fuerit, quamvis eam poenitens refugiat ac deprecetur, non erit facile audiendus: verum persuadere ei oportebit, ut quae tum sibi, tum aliis salutaria futura sunt, libenti et alacri animo suscipiat. Haec de poenitentiae sacramento singulisque eius partibus ita docenda erunt, ut non solum ea fideles perfecte intelligent, sed etiam iuvante Domino re ipsa pie et religiose praestare animum inducant.

## CAPUT VI.

### De Sacramento extremae Unctionis.

*I. Quare pastores animarum saepius ad populum de extremae unctionis sacramento agere debeant.*

Cum sancta Scripturarum oracula ita doceant (Eclus. 7, 40.): „In omnibus operibus tuis memorare novissima tua, et in aeternum non peccabis:“ tacite parochi admonentur, nullum tempus praetermittendum esse, fidelem populum cohortandi, ut in assidua mortis meditatione versetur. Quoniam autem extremae unctionis sacramentum non potest supremi illius diei memoriam coniunctam non habere: facile intelligitur, de eo saepe agendum esse, non solum ob eam causam, quod illarum rerum mysteria, quae ad salutem pertinent, aperire et explicare maxime convenient, sed etiam, quia fideles, moriendi necessitatem omnibus propositam esse animo repetentes, pravas cupiditates coercebunt; quare fiet, ut in ipsa mortis expectatione minus se perturbari sentiant, sed immortales Deo gratias agant, qui, ut baptismi sacramento aditum nobis ad veram vitam patefecit, ita etiam, ut ex hac mortali vita decedentes, expeditiorem ad coelum viam haberemus, extremae unctionis sacramentum instituit.

*II. Quamobrem istud sacramentum extrema unctio appelletur.*

Ut igitur, quae ad eam explicationem magis necessaria sunt, eodem fere ordine, qui in aliis sacramentis servatus est, exponantur: primum illud tradendum erit, hoc sacramentum idcirco extrema unctionem appellatum esse, quod haec omnium sacrarum unctionum, quas Dominus Salvator noster ecclesiae suae commendavit, ultima administranda sit. Quare haec ipsa unctio a maioribus nostris sacramentum etiam unctionis infirmorum, et

sacramentum exeuntium dicta est; quibus vocabulis fideles in memoriam novissimi illius temporis facile redire possunt.

*III. Quo modo extremae unctioni propria sacramenti ratio conveniat.*

Quod autem extremae unctioni propria sacramenti ratio conveniat, in primis explanandum est. Id vero maxime perspicuum fiet, si verba, quibus S. Iacobus<sup>1)</sup> Apostolus huius sacramenti legem promulgavit, attendamus: „Infirmatur quis in vobis?“ inquit, „inducat presbyteros ecclesiae, et orent super eum, ungentes eum oleo in nomine Domini; et oratio fidei salvabit infirmum, et alleviabit eum Dominus, et si in peccatis sit, remittentur ei.“ Nam quod peccata condonari Apostolus affirmat, in eo declarat sacramenti vim et naturam. Hanc vero catholicae ecclesiae de extrema unctione perpetuam doctrinam fuisse, cum alia plura concilia testantur, tum a Tridentina synodo hoc ita declaratum est, ut in eos omnes anathematis poenam constituerit, qui aliter docere aut sentire audeant. Ac Innocentius<sup>2)</sup> quoque primus hoc sacramentum fidelibus maxime commendat.

*IV. Quum hic plures fiant unctiones, an plura etiam ibidem dici debeant sacramenta.*

Constanter itaque docendum est a pastoribus, verum sacramentum esse, nec plura, sed unum, quamvis per plures unctiones administretur; quarum singulis propriae preces, ac peculiaris forma adhibenda est. Unum vero est, non partium continuatione, quae dividi non possint, sed perfectione; cuiusmodi sunt cetera omnia, quae ex pluribus rebus constant. Nam quemadmodum dominus, quae ex multis et diversis partibus composita est, una tantum forma perficitur: ita hoc sacramentum, etsi ex pluribus rebus et verbis constituitur, unum tamen signum est, et unius rei, quam significat, efficientiam habet. Docebunt praeterea parochi, quae sint huius sacramenti partes; elementum, inquam, et verbum; haec enim a S. Iacobo praetermissa non sunt<sup>3)</sup>; in quibus singulis sua mysteria licet animadvertere.

*V. Quae sit extremae unctionis materia.*

Eius igitur elementum sive materia, quemadmodum concilia, ac praeceps Tridentinum<sup>4)</sup> decrevit, est oleum ab episcopo consecratum; liquor scilicet non ex quavis pingui et crassa materia, sed ex olearum baccis tantummodo expressus. Aptissime autem haec materia illud significat, quod vi sacramenti interius in anima efficitur; nam ut oleum ad mitigandos

<sup>1)</sup> Iac. 5, 14. 15. <sup>2)</sup> ep. 1. c. 8. <sup>3)</sup> Iac. 5, 14. <sup>4)</sup> Sess. 14. de Extr. Unct. cap. 1.

corporis dolores magnopere proficit: ita sacramenti virtus animae tristitiam ac dolorem minuit. Oleum praeterea sanitatem restituit, hilaritatem affert, et lumini tanquam pabulum praebet; tum vero ad recreandas defatigati corporis vires maxime accommodatum est. Quae omnia, quid in aegroto divina virtute per huius sacramenti administrationem efficiatur, declarant.. Haec de materia satis sint.

*VI. Qua forma perficiatur hoc sacramentum.*

Forma vero sacramenti est verbum et solemnis illa precatio, quam sacerdos ad singulas unctiones adhibet, quum inquit: „Per istam sanctam unctionem indulgeat tibi Deus quidquid oculorum, sive narium, sive tactus vitio deliquisti.“ Quod autem haec vera sit et propria huius sacramenti forma, sanctus Iacobus Apostolus (5, 14. 15.) significat, quum ait: „et orent super eum, et oratio fidei salvabit infirmum.“ Ex quo licet cognoscere, formam precationis modo proferendam esse; tametsi, quibus potissimum verbis concipienda sit, Apostolus non expresserit. Verum hoc ad nos fideli Patrum traditione permanavit, ita ut omnes ecclesiae eam formae rationem retineant, qua omnium mater et magistra, sancta ecclesia Romana utitur; nam etsi aliqui nonnulla verba immutant, quum pro: „Indulgeat tibi Deus,“ ponunt: „Remittat,“ vel „Parcat,“ interdum etiam: „Sanet,“ quidquid commisisti: tamen quia nulla fit sententiae immutatio, constat eandem ab omnibus formam religiose servari.

*VII. Cur huius sacramenti forma precationis modo contineatur.*

Nec vero quisquam miretur, cur factum sit, ut aliorum sacramentorum forma vel absolute significet, quod efficit, ut quum dicimus: „Ego te baptizo,“ aut: „Signo te signo crucis,“ vel tanquam ab imperantibus pronuncietur, ut quum in sacramento ordinis administrando dicitur: „Accipe potestatem;“ haec una vero extremae unctionis forma precatione quadam absolvatur. Id enim optimo iure constitutum est; nam quum hoc sacramentum propterea adhibeatur, ut praeter spiritualem gratiam, quam tribuit, sanitatem etiam restituat aegrotis: tamen, quia non semper sequitur, ut aegri a morbis convalescant, ob eam causam precatione forma conficitur, ut a Dei benignitate id impetremus, quod sacramenti vis constanti et perpetuo ordine efficere non solet. Adhibentur autem ritus proprii in huius quoque sacramenti administratione, sed eorum maxima pars precationes continet, quibus sacerdos ad aegroti salutem impletandam utitur; nullum enim est aliud sacramentum, quod pluribus precibus conficiatur, ac recte quidem, quoniam eo potis-

simum tempore fideles piis obsecrationibus adiuvandi sunt. Quare et alii omnes, quos tum adesse contigerit, et praecipue parochi, debent orare Deum ex animo, et eius misericordiae laborantis vitam et salutem omni studio commendare.

*VIII. Quisnam huius sacramenti sit auctor.*

Verum quum demonstratum sit, extremam unctionem vere et proprie in sacramentorum numero habendam esse: illud etiam sequitur, eius institutionem a Christo Domino profectam esse; quae postea a sancto Iacobo Apostolo fidelibus proposita et promulgata est. Quanquam idem Salvator huius unctionis specimen quoddam deditis visus est, quum discipulos suos binos et binos ante faciem suam misit; de illis enim apud Evangelistam (Marc. 6, 12.) ita scriptum est: „Exeuntes praedicabant, ut poenitentiam agerent; et daemonia multa eiiciebant, et ungebant oleo multos aegros; et sanabant.“ Quam quidem unctionem non ab Apostolis inventam, sed a Domino praeceptam, non naturali aliqua virtute praeditam, sed mysticam, potius ad sanandos animos, quam ad corpora curanda institutam fuisse, credendum est. Quam rem sancti Dionysius, Ambrosius, Chrysostomus et Gregorius Magnus asserunt, ut nullo modo dubitandum sit, quin hoc unum ex septem catholicae ecclesiae sacramentis summa cum religione accipere oporteat.

*IX. Extrema unctionis quibus administranda sit.*

Sed docendi sunt fideles, quamvis hoc sacramentum ad omnes pertineat, quaedam tamen hominum genera excipi, quibus administrandum non sit. Ac primum excipiuntur, qui sano et firmo corpore sunt; iis enim extremam unctionem tribuendam non esse, et Apostolus docet, quum inquit: „Infirmatur quis in vobis?“ et ratio ostendit; siquidem ob eam rem instituta est, non modo ut animae, sed etiam ut corpori medicinam afferat. Quum igitur illi tantum, qui morbo laborant, curatione indigeant: idcirco iis etiam, qui adeo periculose aegrotare videntur, ut, ne supremus illis vitae dies instet, metuendum sit, hoc sacramentum praebéri debet. In quo tamen gravissime peccant, qui illud tempus aegroti ungendi observare solent, quum iam, omni salutis spe amissa, vita et sensibus carere incipiatur; constat enim, ad uberiorem sacramenti gratiam percipiendam plurimum valere, si aegrotus, quum in eo adhuc integra mens et ratio viget, fidemque et religiosam animi voluntatem afferre potest, sacro oleo liniatur. Quare parochis animadvertisendum est, ut eo potissimum tempore coelestem medicinam adhibeant, illam quidem semper vi sua ad-

modum salutarem, quum eorum etiam pietate et religione, qui curandi sunt, magis profuturam intellexerint. Nemini igitur, qui gravi morbo affectus non sit, sacramentum unctionis dare licet, tametsi vitae periculum adeat, vel quia periculosa navigationem paret, vel quia praelium initurus sit, a quo certa mors illi impendeat; vel etiam si capit is damnatus ad supplicium raperetur. Omnes praeterea, qui rationis usus carent, ad hoc sacramentum suscipiendum apti non sunt; et pueri, qui nulla peccata admittunt, quorum reliquias sanare huius sacramenti remedio opus sit; amentes item et furiosi, nisi interdum rationis usum haberent, et eo potissimum tempore pii animi significationem darent, peterentque, ut sacro oleo ungerentur. Nam qui ab ipso ortu nunquam mentis et rationis compos fuit, ungendus non est; secus vero si aegrotus, quum mente adhuc integra huius sacramenti particeps fieri voluisse, postea in insaniam et furorem incidit.

*X. Quae corporis partes hic debeant inungi.*

Non sunt autem omnes corporis partes ungendae, sed eae tantum, quas veluti sensuum instrumenta natura homini attribuit; oculi propter visionem, aures propter auditum, nares propter odoratum, os propter gustum vel sermonem, manus propter tactum; qui tametsi toto corpore aequabiliter fusus est, in ea tamen parte maxime viget. Hunc autem ungendi ritum universalis ecclesia retinet, atque etiam huius sacramenti naturae optime convenit; medicamenti enim est instar. Ac quoniam in corporis morbis, quamvis universum corpus male affectum sit, tamen illi tantum parti curatio adhibetur, a qua, tanquam a fonte et origine, morbus manat: idcirco non totum corpus, sed ea membra, in quibus potissimum sentiendi vis eminent, renes etiam, veluti voluptatis et libidinis sedes, unguntur; tum pedes, qui nobis ingressus et ad locum movendi principium sunt.

*XI. Extrema unctione iterari potest.*

In quibus illud observare oportet, in una eademque aegrotatione, quum aeger in eodem vitae periculo positus est, semel tantum ungendum esse. Quod si post susceptam hanc unctionem aeger convaluerit: quoties postea in id vitae discrimen inciderit, toties eiusdem sacramenti subsidium ei poterit adhiberi. Ex quo patet, in eorum sacramentorum numero, quae iterari solent, reponendam esse.

*XII. Qua religione et præparatione debeat istud sacramentum suscipi.*

Quoniam vero omni sudio curare oportet, ne quid sacramenti gratiam impedit, ei vero nihil magis adversatur, quam

alicuius peccati mortiferi conscientia: servanda est catholicae ecclesiae perpetua consuetudo, ut ante extremam unctionem poenitentiae et eucharistiae sacramentum administretur. Ac deinde acgroto persuadere parochi studeant, ut ea fide se ungendum sacerdoti praebeat, qua olim, qui ab Apostolis sanandi erant, se ipsos offerre consueverant. In primis autem animae salus, deinde corporis valetudo, cum illa adjunctione: „si ea ad aeternam gloriam profutura sit,“ expetenda est. Nec vero dubitare fideles debent, quin sanctae illae et solemnes preces a Deo audiantur, quibus sacerdos non suam, sed ecclesiae et Domini nostri Iesu Christi personam gerens utitur. Qua una maxime re cohortandi sunt, ut huius saluberrimi olei sacramentum sancte et religiose sibi administrandum current, quum et acrior pugna instare, et vires quum animi, tum corporis deficere videantur.

*XIII. Quo ministrante hoc sacramentum percipiendum sit.*

Iam vero quis extremae unctionis minister sit, ab eodem Apostolo, qui Domini legem promulgavit, didicimus; ait enim: „Inducat Presbyteros;“ quo nomine non eos significat, qui aetate proiectiores sunt, quemadmodum sapienter Tridentina synodus (Sess. 14. de extr. Unct. cap. 3. can. 4.) exposuit, aut qui in populo principem locum obtinent: sed sacerdotes, qui ab ipsis episcopis per manuum impositionem rite ordinati sunt. Sacerdoti igitur huius sacramenti administratio commissa est. Neque tamen ex sanctae ecclesiae decreto cuivis sacerdoti, sed proprio pastori, qui iurisdictionem habeat, sive alteri, cui ille cius muneric fungendi potestatem fecerit, hoc sacramentum administrare licet. Illud vero maxime animadvertisendum est, sacerdotem in ea administratione, quemadmodum etiam in aliis sacramentis fit, Christi Domini nostri et sanctae ecclesiae, eius sponsae, personam sustinere.

*XIV. Qui fructus ex huius sacramenti usu ad homines redeant.*

Explicandae etiam sunt accuratius utilitates, quas ex hoc sacramento capimus, ut, si nihil aliud fideles ad eius usum possit allicere, ipsa saltem utilitate ducantur, quum ita comparatum sit, ut omnia fere nostris commodis metiamur. Doccebunt igitur pastores, hoc sacramento gratiam tribui, quae peccata, et in primis quidem leviora, et, ut communis nomine appellantur, venialia, remittit; exitiales enim culpae poenitentiae sacramento tolluntur. Neque enim hoc sacramentum primo loco ad graviorum criminum remissionem institutum est, sed baptismus tantum et poenitentia vi sua hoc efficiunt. Al-

tera est sacrae unctionis utilitas, quod animam a languore et infirmitate, quam ex peccatis contraxit, et a ceteris omnibus peccati reliquiis liberat. Tempus autem huic curationi opportunitissimum existimandum est, quum gravi morbo afflictamur, ac vitae periculum impendet. Etenim homini natura insitum est, ut nihil in rebus humanis aequa mortem pertimescat; auget autem magnopere hunc timorem praeteritorum scelerum memoria, quum praesertim gravissima conscientiae nostrae accusatio nos urgeat; ut enim scriptum est (*Sap. 4, 20.*): „Veniunt in cogitatione peccatorum suorum timidi, et traducent illos ex adverso iniquitates ipsorum.“ Deinde illa cura et cogitatio vehementer angit, quod paulo post stare oporteat ante tribunal Dei, a quo de nobis iustissima pro eo, ac meriti fuerimus, sententia ferenda sit. Saepe autem evenit, ut fideles, hoc terrore perculti, se miris modis exagitari sentiant. Nihil autem ad mortis tranquillitatem magis conductus, quam si tristitiam abiiciamus, et laeto animo Domini adventum exspectemus, paratiisque simus depositum nostrum, quandocunque illud a nobis repetere voluerit, libenter reddere. Ut igitur hac sollicitudine fidelium mentes liberentur, animusque pio et sancto gaudio repleatur, extremae unctionis sacramentum efficit.

*XV. Quo modo in animae exitu daemones nobis insidientur.*

Praeterea aliud etiam, quod merito omnium maximum videri potest, ex eo consequimur. Nam etsi humani generis hostis, quoad vivimus, nunquam desinit de interitu et exitio nostro cogitare: nullo tamen tempore, ut nos omnino perdat, ac, si fieri possit, spem nobis divinae misericordiae eripiat, vehementius omnes nervos contendit, quam quum supremum vitae diem appropinquare animadverterit. Quamobrem fidelibus arma et vires hoc sacramento subministrantur, quibus adversarii vim et impetum frangere et illi fortiter repugnare possint; allevatur enim et erigitur animus divinac bonitatis spe, eaque confirmatus morbi incommoda omnia fert levius, ac ipsius daemonis calcaneo insidiantis artificium et calliditatem facilius eludit.

*XVI. Quo modo ex hoc sacramento possit corpori sanitas accedere.*

Accedit postremo, si quidem profutura sit, etiam corporis sanitas. Quod si aegroti hoc tempore eam minus consequuntur, id quidem non sacramenti vitio, sed ob eam potius causam evenire credendum est, quod eorum magna pars, vel qui sacro oleo perunguntur, vel a quibus administratur, fides infirmior

est. Testatur enim Evangelista<sup>1)</sup>, Dominum apud suos multas virtutes non fecisse „propter incredulitatem illorum.“ Quanquam etiam recte dici potest, Christianam religionem, ex quo altius tanquam radices egit in animis hominum, minus iam huiusmodi miraculorum adminiculis indigere, quam olim nascientis ecclesiae initio necessaria esse viderentur. Sed tamen hoc loco fides magnopere excitanda erit, utcunque enim, quod ad corporis valetudinem attinet, Dei consilio et voluntate ceciderit, certa spe niti fideles debent, se huius sacri olei virtute spiritualem sanitatem consecuturos esse, futurumque, ut, si eos vita decedere contingat, paeclarae illius vocis fructum percipient, qua scriptum est<sup>2)</sup>: „Beati mortui, qui in Domino moriuntur.“ Haec de extremae unctionis sacramento breviter quidem dicta sunt, verum si haec ipsa rerum capita a pastoribus latius, et ea, qua decet, diligentia explanata erunt: dubitandum non est, quin fideles ex hac doctrina maximum pietatis fructum percipient.

## CAPUT VII.

## De Sacramento Ordinis.

*I. Cur parochi magna diligentia sacramenti ordinis doctrinam populo exponere debeant.*

Si quis aliorum sacramentorum naturam et rationem diligenter considerarit, facile perspiciet, ea omnia ab ordinis sacramento ita pendere, ut sine illo partim confici et administrari nullo modo queant, partim solemni caeremonia et religioso quodam ritu ac cultu carere videantur. Quare necesse est, ut pastores, institutam sacramentorum doctrinam persequentes, eo diligentius de ordinis etiam sacramento sibi agendum arbitrentur. Proderit autem maxime haec explicatio, primum quidem illis ipsis; deinde aliis, qui ecclesiasticae vitae rationem ingressi sunt; postremo etiam fidi populo. Ipsi, quod, dum in huius argumenti tractatione versantur,<sup>3)</sup> ad eam gratiam excitandam, quam hoc sacramento adepti sunt, magis commoventur; aliis, qui in sortem Domini vocati sunt, partim, ut eodem pietatis studio afficiantur, partim vero, ut earum rerum cognitionem percipient, quibus instructi viam sibi ad ulteriores gradus facilius munire possint; reliquis autem fidelibus, primum quidem, ut intelligent, quo honore digni-

<sup>1)</sup> Mat. 13, 58. <sup>2)</sup> Apoc. 14, 13. <sup>3)</sup> II. Tim. 1, 6.

sint Ecclesiae ministri, deinde quoniam saepe contingit, ut multi adsint, vel qui spe liberos suos adhuc infantes ecclesiae ministerio destinarent, vel qui sua sponte et voluntate illud vitae genus sequi velint; quos certe ignorare minime aequum est, quae praecipue ad hanc rationem pertinent.

*II. Nulla dignitas sacerdotii ordine in terris excellentior.*

Primum itaque fidelibus tradendum est, quanta sit huius instituti, si summum eius gradum, hoc est sacerdotium spectemus, nobilitas et excellentia. Nam quum episcopi et sacerdotes tanquam Dei interpres et internuncii quidam sint, qui eius nomine divinam legem et vitae praecepta homines edocent, et ipsius Dei personam in terris gerunt: perspicuum est, eam esse illorum functionem, qua nulla maior excogitari possit; quare merito non solum angeli, sed dii etiam, quod Dei immortalis vim et numen apud nos teneant, appellantur. Quamvis autem omni tempore summam dignitatem obtinuerint, tamen Novi Testamenti sacerdotes ceteris omnibus honore longe antecellunt; potestas enim tum corpus et sanguinem Domini nostri conficiendi et offerendi, tum peccata remittendi, quae illis collata est, humanam quoque rationem atque intelligentiam superat, nedum ei aliquid par et simile in terris inveniri queat.

*III. Qui divinitus ad sacerdotium ministeriaque ecclesiastica vocati censeantur.*

Deinde vero, quemadmodum Salvator noster a Patre, Apostoli autem ac discipuli in universum mundum a Christo Domino missi sunt: ita quotidie sacerdotes eadem, qua illi, potestate praediti, „ad<sup>1)</sup> consummationem sanctorum, in opus ministerii, in aedificationem corporis Christi,“ mittuntur. Huius igitur tanti officii onus nemini temere imponendum est, sed iis tantum, qui illud vitae sanctitate, doctrina, fide, prudentia sustinere possint. Nec vero quisquam sumat sibi honorem, sed „qui<sup>2)</sup>“ vocatur a Deo tanquam Aaron.« Vocari autem a Deo dicuntur, qui a legitimis ecclesiae ministris vocantur; nam qui in hoc ministerium se ipsos arroganter inferunt atque intrudunt, de his Dominum intellexisse docendum est, quum inquit<sup>3)</sup>: „Non mittebam Prophetas, et ipsi currebant,“ quo quidem hominum genere nihil infelicius ac miserius, nihil ecclesiae Dei calamitosius esse potest.

*IV. Quinam iudicandi sint perperam ad ordines sacros accedere, et aliunde in ecclesiam ingredi.*

Sed quoniam in omni actione suscipienda magnopere refert, quem sibi quisque finem constituat (optimo enim fine po-

<sup>1)</sup> Eph. 4, 12. <sup>2)</sup> Hebr. 5, 4. <sup>3)</sup> Ier. 23, 21.

sito recte omnia consequuntur): de hoc in primis, qui sacris initiari volunt, admonendi sunt, ut nihil sibi tanto munere indignum proponant; qui quidem locus eo diligentius tractandus erit, quo gravius hoc tempore ea in re peccare fideles solent. Alii enim eo consilio ad hanc vivendi rationem se convertunt, ut, quae ad victimum vestitumque necessaria sunt, parent; ita ut praeter quaestum nihil aliud in sacerdotio, quemadmodum vulgo ceteri homines in quovis sordidi artificii genere, spectare videantur. Quamvis enim ex Apostoli<sup>1)</sup> sententia natura et divina lex iubeat, ut, qui altari servit, ex altari vivat: tamen quaestus et lucri causa ad altare accedere maximum sacrilegium est. Alios honorum cupiditas et ambitio ad sacerdotalem ordinem dicit; alii vero, ut divitiis affluant, initiari volunt. Cuius quidem rei illud argumento est, quod nisi opulentum aliquod ecclesiasticum beneficium eis deferatur, nullam sacri ordinis cogitationem habent. Hi vero sunt, quos Salvator noster „mercenarios“<sup>2)</sup> appellat, et quos Ezechiel<sup>3)</sup> dicebat „semetippos, et non oves pascere;“ quorum turpitudo et improbitas non solum sacerdotali ordini magnas tenebras offudit ita, ut iam nihil fere a fideli populo haberi possit contemptius et abiectius: verum etiam efficit, ut ipsi nihil amplius ex sacerdotio consequantur, quam Iudas ex apostolatus munere, quod illi sempiternum exitium attulit. Illi autem<sup>4)</sup> ostio in ecclesiam introire merito dicuntur, qui a Deo legitime vocati ecclesiastica munera eius unius rei causa suscipiunt, ut Dei honori inserviant.

*V. Qui per ordines sacros se ecclesiae dedicarunt, qua parte certos e populo superare et excellere debeant.*

Neque tamen hoc ita accipiendum est, quasi eadem lex aequae omnibus non sit imposta. Homines enim ob cam rem conditi sunt, ut Deum colant; quod praecipue fideles, qui baptismi gratiam consecuti sunt, ex toto corde, ex tota anima et ex totis viribus praestare debent. Verum qui ordinis sacramento initiari volunt, hoc sibi proponant opus est, ut non solum Dei gloriam in omnibus rebus quaerant (quod quidem cum omnibus, tum maxime fidelibus commune esse constat): sed etiam, ut alicui certo ecclesiae ministerio addicti,<sup>5)</sup> in sanctitate et iustitia illi serviant. Nam ut in exercitu omnes quidem milites imperatoris legibus parent, sed inter eos tamen alius centurio, alius praefectus est, alii alia munera obeunt: ita, quamvis omnes fideles pietatem et innocentiam sectari omni studio debeant, quibus rebus maxime Deus colitur, eos

<sup>1)</sup> 1. Cor. 9, 13. <sup>2)</sup> Io. 10, 13. <sup>3)</sup> Ez. 34, 2. 3. <sup>4)</sup> Io. 10, 1. sq. <sup>5)</sup> Luc. 1, 75.

tamen, qui ordinis sacramento sunt initiati, praecipua quae-dam munera et functiones in ecclesia exsequi oportet. Nam et sacra pro se ipsis, et pro omni populo faciunt, et divinae legis vim tradunt, ad quamque prompto et alacri animo servandam fideles hortantur et instituunt, et Christi Domini sacra menta, quibus omnis gratia impertitur et augetur, adminis-trant, et, ut uno verbo complectamur, a reliquo populo se-gregati, in omnium longe maximo et praestantissimo ministerio se exercent. His igitur explicatis, accident parochi ad ea tradenda, quae propria huius sacramenti sunt, ut intelligent fideles, qui in ecclesiasticum ordinem cooptari volunt, ad quodnam officii genus vocentur, quantaque ipsi ecclesiae eiusque ministris potestas divinitus tributa sit.

*VI. Quotuplex sit potestas ecclesiastica.*

Ea autem duplex est: ordinis et iurisdictionis. Ordinis potestas ad verum Christi Domini corpus in sacrosancta eucaristia refertur. Iurisdictionis vero potestas tota in Christi corpore mystico versatur. Ad eam enim spectat, Christianum populum gubernare et moderari, et ad aeternam coelestemque beatitudinem dirigere.

*VII. Ordinis potestas ad quae se extendat.*

Verum ordinis potestas non solum consecrandae eucharistiae vim et potestatem continet, sed ad eam accipiendam hominum animos praeparat et idoneos reddit, ceteraque omnia complectitur, quae ad eucharistiam quovis modo referri possunt. Eius vero plura ex sacris literis testimonia afferri possunt, sed illa praelata et gravissima sunt, quae apud sanctos Ioannem<sup>1)</sup> et Matthaeum<sup>2)</sup> leguntur; ait enim Dominus: „Sicut misit me Pater, et ego mitto vos. — Accipite Spiritum sanctum; quorum remiseritis peccata, remittuntur eis, et quorum retinueritis, retenta sunt;“ et: „Amen dico vobis, quaecumque alli-gaveritis super terram, erunt ligata et in coelo, et quaecumque solveritis super terram, erunt soluta et in coelo.“ Quae qui-dem loca a pastoribus ex sanctorum Patrum doctrina et auctoritate explanata, maximum veritati lumen afferre poterunt.

*VIII. Christi sacerdotium legis naturae vel etiam Moysis sacer-dotio sublimius est.*

Haec autem potestas plurimum illi praestat, quae in natu-rae lege certis hominibus, qui res sacras curarent, tributa est. Nam et illa aetas, quae scriptam legem antecessit, suum sacer-dotium, suamque potestatem spiritualem habuerit necesse est,

<sup>1)</sup> Io. 20, 21—23. <sup>2)</sup> Mat. 18, 18.

quum legem habuisse satis constet. Haec duo enim ita coniuncta esse testatur Apostolus<sup>1)</sup>, ut eorum altero translato, simul etiam alterum transferri necesse sit. Quum igitur naturali instinctu homines agnoscerent, Deum colendum esse: consequens erat, ut in quavis republica aliqui sacerorum et divini cultus procurationi praeficerentur, quorum potestas aliquo modo spiritualis diceretur. Eadem etiam potestate populus Israeliticus non caruit; quae tametsi dignitate superior fuit, quam illa, qua in lege naturae sacerdotes praediti erant, longe tamen inferior, quam legis evangelicae spiritualis potestas existimanda est. Haec enim coelestis est, omnemque angelorum etiam virtutem superat; neque a sacerdotio Mosaico, sed a Christo Domino, qui „non secundum Aaron<sup>2)</sup> sacerdos fuit, sed secundum ordinem Melchisedec,“ ortum habet. Is enim, qui summa potestate gratiam tribuendi et peccata remittendi praeditus fuit, hanc potestatem, quamvis virtute definitam et sacramentis adstrictam, ecclesiae suae reliquit, quare ad eam exercendam certi ministri instituti sunt, et solemni religione consecrati; quae quidem consecratio ordinis sacramentum, vel sacra ordinatio vocatur.

*IX. Quid sit ordo, et cur functio ecclesiastica ordo vocetur.*

Placuit autem sanctis Patribus hoc vocabulo uti, quod latissimam significationem habet, ut dignitatem et excellentiam ministrorum Dei indicarent. Est enim ordo, si propriam eius vim et notionem accipiamus, dispositio superiorum et inferiorum rerum, quae inter se ita aptae sunt, ut una ad alteram referratur. Quum itaque in hoc ministerio multi sint gradus et variae functiones, omnia vero certa ratione distributa sint et colligata, recte et commode ordinis nomen ei impositum videtur.

*X. Ordo veri nominis est sacramentum.*

Quod autem inter cetera ecclesiae sacramenta sacra ordinatio numeranda sit,<sup>3)</sup> sancta Tridentina synodus ratione illa, quae saepius repetita est, comprobavit; nam quum sacramentum sit rei sacrae signum, id vero, quod hac consecratione extrinsecus fit, gratiam et potestatem significet, quae illi tribuitur, qui consecratur: omnino sequi perspicuum est, ordinem vere ac proprie sacramentum dicendum esse; quare episcopus ei calicem cum vino et aqua, et patenam cum pane porrigenus, qui sacerdos ordinatur, inquit: — „Accipe potestatem offerendi sacrificium, etc.“ Qūibus verbis semper docuit ecclesia, dum materia exhibetur, potestatem consecrandae eucharistiae characterē

<sup>1)</sup> Hebr. 7, 12. <sup>2)</sup> Ps. 109, 4. Hebr. 7, 11. <sup>3)</sup> Conc. Trid. sess. 23. c. 1. et 3. de ord.

animo impresso tradi, cui gratia adiuncta sit, ad illud munus rite et legitime obeundum; quod Apostolus his verbis declarat<sup>1)</sup>: — „Admoneo te, ut resuscites gratiam Dei, quae est in te, per impositionem manuum mearum; non enim dedit nobis Deus Spiritum timoris, sed virtutis et dilectionis et sobrietatis.“

*XI. Quare in ecclesia plures sint instituti ministrorum ordines.*

Iam vero, ut sacrae synodi<sup>2)</sup> verbis utamur, quum divina res sit tanti sacerdotii administratio, consentaneum fuit, quo dignius et maiori cum veneratione exerceri posset, ut in ecclesiae ordinatissima dispositione plures essent et diversi ministrorum ordines, qui sacerdotio ex officio deservirent, atque hi quidem ita distributi, ut, qui iam clericali tonsura insigniti essent, per minores ad maiores ascenderent.

*XII. Quot sint ordines ministrorum ecclesiae, quaque ratione communiter distribuantur.*

Docendum igitur erit, hosce omnes ordines septenario numero contineri, semperque ita a catholica ecclesia traditum esse; quorum nomina haec sunt: ostiarius, lector, exorcista, acolythus, subdiaconus, diaconus, sacerdos. Hunc autem ministrorum numerum recte ita definitum esse, probari potest propter ea ministeria, quae ad sacrosanctum missae sacrificium, et eucharistiam vel conficiendam vel administrandam, cuius causa praecipue sunt instituta, necessaria videntur. Ex his alii maiores, qui etiam sacri dicuntur, alii minores sunt. Maiores vel sacri sunt: ordo sacerdotalis, diaconatus et subdiaconatus; ad minores referuntur: acolythi, exorcistae, lectores, ostiarii; de quorum singulis pauca dicenda sunt, ut habeant pastores, unde eos potissimum instituant, quos noverint aliquo ordine initiandos esse.

*XIII. Quid clericalis tonsura, clericique nomen sibi velint.*

Incipiendum est autem a prima tonsura, quam quidem docere oportet, quandam præparationem esse ad ordines accipiendos. Ut enim homines ad baptismum exorcismis, ad matrimonium sponsalibus præparari solent: ita, quum tonso capillo Deo dedicantur, tanquam aditus ad ordinis sacramentum illis aperitur. Declaratur enim, qualis esse debeat, qui sacris imbui cupit; nam clerici nomen, quod ei tunc primum imponitur, ab eo deductum est, quod Dominum sortem et hereditatem suam habere incipiat, veluti qui in Hebraeorum populo divino cultui mancipati erant; quibus vetuit Dominus aliquam agrorum partem in terra promissionis distribui, quum inquit<sup>3)</sup>:

<sup>1)</sup> II. Tim. 1, 6. 7. <sup>2)</sup> Sess. 23. de ord. cap. 2. <sup>3)</sup> Num. 18, 20.

„Ego pars et hereditas tua.“ Ac quamvis id omnibus fidelibus commune sit, praecipua tamen ratione iis conveniat nescesse est, qui se Dei ministerio consecrarunt.

*XIV. Quare clericci rotunda corona in capite insigniantur.*

Tondentur vero capilli ad coronae speciem et similitudinem, quam perpetuo conservare oportet, et ut quisque in altiori deinceps ordinis gradu collocatur, sic eius orbis forma latior circumscribi debet; quod quidem ex Apostolorum traditione acceptum esse, docet ecclesia, quum de huiusmodi tondendi more sancti Dionysius Areopagita, Augustinus, Hieronymus, vetustissimi et gravissimi Patres, meminerint. Primum autem omnium ferunt Apostolorum principem eam consuetudinem induisse ad memoriam coronae, quae ex spinis contexta Salvatoris nostri capiti fuit imposita, ut, quod impii ad Christi ignominiam et cruciatum excogitarunt, eo Apostoli ad decus et gloriam uterentur, simulque significarent, curandum esse a ministris ecclesiae, ut omnibus in rebus Christi Domini nostri speciem et figuram gerant. Quamquam nonnulli assertant, hac nota regiam dignitatem declarari, quae iis maxime, qui in sortem Domini vocati sunt, videtur convenire. Quod enim Petrus Apostolus fideli populo tribuit (I. Petr. 2, 9.): „Vos genus electum, regale sacerdotium, gens sancta,“ pecuniali quadam et magis propria ratione ad ecclesiasticos ministros pertinere facile intelligimus; etsi non desunt, qui vel perfectioris vitae professionem a clericis susceptam circuli figura, quae omnium perfectissima est, significari existiment, vel externalium rerum contemplationem, animique ab omnibus humanis curis vacuitatem declarari putent, quod capilli, supervacaneum quiddam in corpore, tondantur.

*XV. Quae sit ostiariorum functio.*

Post primam tonsuram ad ostiarii ordinem primus gradus fieri consuevit. Eius munus est, templi claves et ianuam custodire, et aditu templi arcere eos, quibus ingredi interdictum erat. Ad sanctum etiam missae sacrificium assistebat, curatus, ne quis proprius, quam par esset, ad sacram aram accederet, et sacerdotem rem divinam facientem interpellaret. Alia etiam ministeria illi commissa erant, ut ex ritibus, qui in eius consecratione adhibentur, perspici potest. Nam episcopus claves, ex altari acceptas, ei tradens, quem ostiarium vult instituere, „Sic age,“ inquit, „quasi redditurus Deo rationem pro iis rebus, quae his clavibus recluduntur.“ Magnam autem in antiqua ecclesia huius ordinis dignitatem

fuisse ex eo intelligitur, quod his temporibus in ecclesia servari animadvertisimus. Nam thesaurarii officium, qui erat idem sacrarii custos, quod ad ostiarios pertinebat, inter honestiores ecclesiae functiones etiam nunc habetur.

*XVI. Quodnam sit in ecclesia lectoris officium.*

Secundus ordinis gradus est lectoris munus. Ad eum pertinet in ecclesia veteris et novi Testamenti libros clara voce et distincte recitare; praesertim vero eos, qui inter nocturnam psalmodiam legi solent. Eius quoque partes erant, prima religionis Christianae rudimenta fidelibus tradere. Episcopus itaque praesente populo, in eius ordinatione librum, quo descripta sunt quae ad hanc functionem pertinent, illi tradens, inquit: „Accipe, et esto verbi Dei relator, habiturus, si fideliiter et utiliter impleveris officium tuum, partem cum iis, qui verbum Dei bene ministrarunt ab initio.“

*XVII. Exorcistis quid ex officio incumbat.*

Tertius est ordo exorcistarum, quibus potestas data est nomen Domini invocandi in eos, qui ab immundis spiritibus obsidentur; quare episcopus, quem eos instituit, librum, in quo exorcismi continentur, eis porrigit, usus ea formula verborum: „Accipe, et commenda memoriae, et habe potestatem imponendi manus super energumenos, sive baptizatos, sive catechumenos.“

*XVIII. Quae sint Acolythi partes.*

Acolythorum quartus est gradus, et ultimus eorum omnium, qui minores et non sacri appellantur. Eorum munus est, ministros maiores, subdiaconos et diaconos, in altaris ministerio assectari, eisque operam dare. Praeterea lumina deferunt et asservant, quem missae sacrificium celebratur, praecipue vero quem evangelium legitur; ex quo et ceroferarii alio nomine vocati sunt. Quum itaque ordinantur, hic ritus ab episcopo servari consuevit. Primum quidem, postquam eos officii sui diligenter admonuit, lumina eorum singulis tradit in hunc modum: „Accipe ceroferarium cum cereo, et scias te ad accendenda ecclesiae luminaria mancipari in nomine Domini.“ Deinde etiam urceolos vacuos, quibus aqua et vinum in sacrificio ministratur: „Accipe urceolos, ad sugerendum vinum et aquam in eucharistiam sanguinis Christi in nomine Domini.“

*XIX. Quodnam sit subdiaconi ministerium, ac cuiusmodi ritus in eius consecratione adhibeantur.*

A minoribus ordinibus, iisdemque non sacris, de quibus hactenus dictum est, ad maiores et sacros legitimus aditus et ascensus patet. In eorum primo gradu subdiaconus colloca-

tur, cuius munus est, ut nomen ipsum declarat, diacono ad altare inservire; sacra enim linteia, vasa, panem et vinum, ad sacrificii usum necessaria, parare debet. Nunc episcopo et sacerdoti aquam praebet, quum manus in missae sacrificio abluunt. Epistolam etiam, quae olim a diacono in missa recitabatur, subdiaconus legit, ac tanquam testis ad sacrum assistit, prohibetque, ne sacerdos sacra faciens a quopiam perturbari possit. Haec autem, quae ad subdiaconi ministerium spectant, ex solemibus caeremoniis, quae in illius consecratione adhibentur, licet cognoscere. Primum enim episcopus legem perpetuae continentiae huic ordini impositam esse admonet, editique, neminem in subdiaconorum ordinem cooptandum esse, cui ultro hanc legem accipere non sit propositum; deinde, post solemnum litaniarum precationem, quae subdiaconi munera et functiones sint, enumerat atque exponit. His peractis eorum singuli, qui ordinantur, ab episcopo quidem calicem et sacram patenam accipiunt, ab archidiacono vero, ut intelligatur subdiaconum diaconi officio subservire, urceolos vino et aqua plenos, una cum lebete et linteolo, quo manus absterguntur, dicente episcopo: „Videte, cuiusmodi ministerium vobis traditur; ideo vos admoneo, ut ita vos exhibeat, ut Deo placere possitis.“ Adduntur praeterea aliae preces. Ad extreum, quum episcopus sacris vestibus subdiaconum ornavit, ad quarum singulas propria verba et caeremoniae adhibentur, tradit ei epistolarum librum, ac dicit: „Accipe librum epistolarum, et habe potestatem legendi eas in ecclesia sancta Dei tam pro vivis quam pro defunctis.“

#### *XX. Quod sit diaconi munus.*

Secundum autem sacrorum ordinum gradum diaconus obtinet, cuius ministerium latius patet, sanctiusque semper habitum est; ad eum enim pertinet, episcopum perpetuo sequi, concionantem custodire, eique et sacerdoti sacra facienti vel alia sacramenta administranti praesto esse, et in missae sacrificio evangelium legere. Olim vero fidelium animos saepius excitabat, ut sacra attenderent; sanguinem etiam Domini ministrabat, in quibus ecclesiis ea consuetudo erat, ut fideles eucharistiam sub utraque specie sumerent. Diacono praeterea ecclesiasticorum bonorum dispensatio commissa erat, ut unicuique necessaria ad victimum subministraret. Ad diaconum etiam attinet, tanquam episcopi oculum, pervestigare, quinam in urbe pie et religiose, quive secus vitam traducant, qui ad sacrificium et concionem statis temporibus convenient, qui rursus non convenient, ut quum de omnibus episcopum certiorem

fecerit, ille vel privatum unumquemque hortari, admonere, vel palam corrigere et obiurgare possit, uti se magis profecturum esse intellexerit. Catechumenorum etiam nomina recitare debet, et eos, qui ordinis sacramento initiandi sunt, ante Episcopum statuere. Licit ei praeterea, si absit episcopus et sacerdos, evangelium explanare, non tamen e superiori loco, ut intelligatur, hoc eius proprium munus non esse.

*XXI. Quales diaconi eligendi sint.*

Quanta vero diligentia adhibenda sit, ne quis eo munere indignus ad hunc ordinis gradum ascendat, Apostolus ostendit, quum ad Timotheum<sup>1)</sup> „diaconi“ mores, virtutem et integritatem exposuit. Hoc idem satis etiam declarant ritus et solemnes caeremoniae, quibus ab episcopo consecratur. Pluribus enim et sanctoribus precibus ad diaconi, quam ad subdiaconi ordinationem utitur episcopus, et alia addit sacramentorum vestium ornamenta. Praeterea manus ei imponit. Quod quidem ab Apostolis<sup>2)</sup> factitatum esse legimus, quum primos diaconos instituerunt. Denique evangeliorum librum ei tradit his verbis: „Accipe potestatem legendi evangelium in ecclesia Dei tam pro vivis quam pro defunctis, in nomine Domini.“

*XXII. Quae sit dignitas et amplitudo sacerdotii.*

Tertius omniumque sacrorum ordinum summus gradus est sacerdotium. Qui vero illo praediti sunt, eos veteres Patres duobus nominibus vocare solent; interdum enim „presbyteros“ appellant, quod graece „seniores“ significat, non solum propter aetatis maturitatem, quae huic ordini maxime necessaria est, sed multo magis propter morum gravitatem, doctrinam et prudentiam; ut enim scriptum est<sup>3)</sup>: „Senectus venerabilis est, non diurna, neque annorum numero computata; cani autem sunt sensus hominis, et aetas senectutis vita immaculata.“ Interdum vero „sacerdotes“ vocant, tum quia Deo consecrati sunt, tum quia ad eos pertinet sacramenta administrare, sacrasque res et divinas tractare.

*XXIII. Quicunque sit tum novae, tum veteris Legis sacerdotium.*

Sed quoniam duplex sacerdotium in sacris literis describitur, alterum interius, externum alterum: utrumque distinguendum est, ut, de quo hoc loco intelligatur, a pastoribus explicari possit. Quod igitur ad interius sacerdotium attinet, omnes fideles, postquam salutari aqua abluti sunt, sacerdotes dicuntur; praecipue vero iusti, qui spiritum Dei habent, et divinae gratiae beneficio Iesu Christi summi sacerdotis viva

<sup>1)</sup> I. Tim. 3, 8—10. <sup>2)</sup> Act. 6, 6. <sup>3)</sup> Sap. 4, 8. 9.

membra effecti sunt; hi enim fide, quae caritate inflammatur, in altari mentis suae spirituales Deo hostias immolant; quo in genere bonae omnes et honestae actiones, quas ad Dei gloriam referunt, numerandae sunt. Quare in Apocalypsi ita legimus<sup>1)</sup>: „Christus lavit nos a peccatis nostris in sanguine suo, et fecit nos regnum et sacerdotes Deo et Patri suo.“ In quam sententiam ab Apostolorum principe dictum est<sup>2)</sup>: „Ipsi tanquam lapides viri superaedificamini, domus spirituales, sacerdotium sanctum, offerentes spirituales hostias, acceptabiles Deo per Iesum Christum.“ Et Apostolus nos hortatur<sup>3)</sup>: „ut exhibeamus corpora nostra hostiam viventem, sanctam, Deo placentem, rationabile obsequium nostrum.“ David item multo ante dixerat<sup>4)</sup>: „Sacrificium Deo spiritus contribulatus, cor contritum et humiliatum Deus non despicies.“ Quae omnia ad interius sacerdotium spectare, facile intelligitur.

*XXIV. Praeter internum sacerdotium aliud esse externum demonstratur.*

Externum vero sacerdotium non omnium fidelium multitudini, sed certis hominibus convenit, qui legitima manuum impositione, solemnibusque sanctae ecclesiae caeremoniis instituti et Deo consecrati, ad aliquod proprium, sacrumque ministerium adscribuntur. Hoc sacerdotii discriminem in veteri etiam lege observari potest; nam de interiori Davidem locutum esse, paulo ante demonstratum est; externi vero nemo ignorare potest, quam multa Dominus Moysi et Aaroni praecepta dederit. Praeterea universam Leviticam tribum ministerio templi adscripsit, ac lege cavit, ne quis ex alia tribu in eam functionem se inferre auderet; quare Ozias rex<sup>5)</sup> lepra a Domino percussus, quod sacerdotale munus usurpasset, arrogantiae et sacrilegii sui gravissimas poenas dedit. Quia igitur eandem sacerdotii distinctionem in lege evangelica licet animadvertere: docendi erunt fideles, nunc de sacerdotio externo agi, quod certis hominibus attributum est; hoc enim tantummodo ad ordinis sacramentum pertinet.

*XXV. Quae sint sacerdotum propriae functiones.*

Sacerdotis igitur munus est, Deo sacrificium facere, et ecclesiastica sacramenta administrare, quemadmodum ex consecrationis ritibus perspicitur. Nam episcopus, quem aliquem sacerdotem instituit, primum quidem manus ei una cum omnibus sacerdotibus, qui adsunt, imponit, deinde stolam humeris aptans, eam ante pectus in crucis formam componit; quo qui-

<sup>1)</sup> Apoc. 1, 5. 6. <sup>2)</sup> I. Petr. 2, 5. <sup>3)</sup> Rom. 12, 1. sq. <sup>4)</sup> Ps. 50, 19. <sup>5)</sup> II. Par. 26, 19.

dem declaratur, sacerdotem virtute indui ex alto, qua possit crucem Christi Domini, et<sup>1)</sup> iugum suave divinae legis perferre, eamque non verbis solum, sed vitae sanctissime et honestissime actae exemplo tradere. Postea manus sacro oleo inungit, tum vero calicem cum vino et patenam cum hostia tradit, dicens: „Accipe potestatem offerendi sacrificium Deo, missasque celebrandi tam pro vivis quam pro defunctis.“ Quibus caeremoniis et verbis interpres ac mediator Dei et hominum constituitur, quae praecipua sacerdotis functio existimanda est. Ad extremum vero manibus iterum eius capiti impositis: „Accipe,“ inquit, „Spiritum sanctum; quorum remiseris peccata, remittuntur eis, et quorum retinueris, retenta sunt; eique coelestem illam, quam Dominus discipulis suis dedit,<sup>2)</sup> peccata retinendi ac remittendi potestatem tribuit. Haec vero sunt sacerdotalis ordinis propria et praecipua munera.

*XXVI. Quamvis unus sit sacerdotii ordo, non tamen unus est sacerdotum gradus.*

Qui tametsi unus est, varios tamen dignitatis et potestatis gradus habet. Primus est eorum, qui sacerdotes simpliciter vocantur, quorum functiones hactenus declaratae sunt. Secundus est episcoporum, qui singulis episcopatibus praepositi sunt, ut non solum ceteros ecclesiae ministros, sed fidelem populum regant, et eorum saluti summa cum vigilantia et cura prospiciant. Quare in sacris literis pastores ovium saepe appellantur, quorum munus et officium Paulus descripsit, ut in Apostolorum Actis<sup>3)</sup> legimus, in ea concione, quam ad Ephesios habuit; itemque a Petro<sup>4)</sup> Apostolorum principe divina quaedam episcopalis ministerii regula tradita est, ad quam si episcopi actiones suas dirigere studeant, dubitandum non erit, quin pastores boni et sint, et habeantur. Sed iidem episcopi et pontifices dicuntur, accepto ab ethnicis nomine, qui principes sacerdotum pontifices appellare consueverunt. Tertius gradus est archiepiscoporum, qui pluribus episcopis praesunt, qui metropolitani etiam vocantur, quod illarum urbium antistites sint, quae tanquam matres habeantur illius provinciae. Quare superiorem, quam episcopi, locum et ampliorem potestatem habent, tametsi ab episcopis ordinatione nihil differunt. In quarto gradu patriarchae collocantur, id est primi supremique patres.

*XXVII. De sedibus antiquis patriarcharum.*

Olim in universa ecclesia, praeter summum Romanum pontificem, quatuor tantum patriarchae numerabantur, neque omnes

<sup>1)</sup> Luc. 24, 49. Mat. 11, 30. <sup>2)</sup> Io. 20, 23. <sup>3)</sup> Act. 20, 28. <sup>4)</sup> I. Petr. 5, 2.

tamen dignitate pares; nam Constantinopolitanus, etsi ad eum post omnes alios hic honos delatus est, tamen ob imperii maiestatem altiorem locum obtinuit. Proximus est Alexandrinus, cuius ecclesiam Marcus Evangelista iussu principis Apostolorum fundavit. Tertius Antiochenus, ubi Petrus sedem primo locavit. Extremum gradum habet Hierosolymitanus, quam eccliam Iacobus frater Domini rexit.

*XXVIII. Romanus pontifex omnium est episcoporum maximus, idque iure divino.*

Praeter hos omnes catholica ecclesia Romanum Pontificem Maximum, quem in Ephesina synodo Cyrillus Alexandrinus archiepiscopum, totius orbis terrarum patrem et patriarcham appellat, semper venerata est. Quum enim in Petri Apostolorum principis cathedra sedeat, in qua usque ad vitae finem sedisse constat: summum in eo dignitatis gradum et iurisdictionis amplitudinem, non quidem ullis synodis aut aliis humanis constitutionibus, sed divinitus datam agnoscit. Quamobrem omnium fidelium et episcoporum, ceterorumque antistitum, quocumque illi munere et potestate praediti sint, pater ac moderator, universalis ecclesiae, ut Petri successor, Christique Domini verus et legitimus vicarius praesidet. Ex his itaque pastores docebunt, et quae sint ecclesiasticorum ordinum ac graduum praecipua munera et functiones, et quis huius sacramenti minister sit.

*XXIX. Quis sit legitimus sacramenti ordinis minister.*

Constat enim, ad episcopum eam administrationem pertinere, quod etiam sanctorum literarum auctoritate, certissima traditione, omnium Patrum testimonio, conciliorum decretis, sanctae ecclesiae usu et consuetudine, facile erit comprobare. Quamvis autem nonnullis abbatibus permisum sit, ut minores et non sacros ordines interdum administrent, tamen hoc proprium episcopi munus esse nemo dubitat; cui uni ex omnibus, praeterea nemini, licet reliquis ordinibus, qui maiores et sacri dicuntur, initiare. Nam subdiaconos, diaconos et sacerdotes unus tantum episcopus ordinat; episcopi ex Apostolorum traditione, quae perpetuo in ecclesia custodita est, a tribus episcopis consecrantur.

*XXX. Cur in promovendis ad ordines singularis probitas requiratur.*

Sequitur nunc, ut explicetur, quinam ad hoc sacramentum, inprimisque ad sacerdotalem ordinem apti sint, et quae in eis potissimum requirantur; ex hoc enim difficile non erit statuere, quid in aliis ordinibus dandis pro cuiusque officio et

dignitate observare oporteat. Maximam autem in hoc sacramento cautionem adhibendam esse, ita colligitur, quod cetera gratiam ad illorum sanctificationem et usum tribuant, a quibus percipiuntur; at vero qui sacris initiantur, ob eam rem coelestis gratiae participes flunt, ut eorum ministerio ecclesiae atque adeo omnium hominum saluti consulatur; ex quo factum esse intelligimus, ut statim tantummodo diebus, quibus etiam solemnia ieunia ex vetustissimo catholicae ecclesiae more indicuntur, ordinationes fiant, ut scilicet fidelis populus eiusmodi sacrarum rerum ministros piis et sanctis precationibus a Deo impetrat, qui ad tanti ministerii potestatem recte et cum ecclesiae utilitate gerendam aptiores esse videantur.

*XXXI. Quanta vitae et morum integritas in ordinando requiratur.*

Primum itaque in eo, qui sacerdos creandus est, vitae et morum integritas commendetur magnopere oportet, non solum quia, si alicuius mortiferi peccati conscius se initiari curet vel etiam patiatur, novo se et maximo scelere obstringit, sed etiam, quia virtutis et innocentiae lumen aliis praeferre debet. Ea de re, quid Apostolus Tito et Timotheo<sup>1)</sup> praecipiat, pastoribus declarandum erit, et simul illud docendum, ea corporis vitia, quae in veteri lege ex Domini praeescriptione aliquem ab altaris ministerio excludebant, in evangelica lege ad animae vitia praecipue transferenda esse. Quare sanctam illam consuetudinem in ecclesia servari animadvertisimus, ut, qui sacris initiandi sunt, prius poenitentiae sacramento conscientiam purgare diligenter studeant.

*XXXII. In sacerdote quae et quanta doctrina requiratur.*

Praeterea in sacerdote non solum ea cognitio requirenda est, quae ad sacramentorum usum et tractationem pertinet, sed etiam sacrarum literarum scientia ita instructum esse oportet, ut populo Christianae fidei mysteria et divinae legis pracepta tradere, ad virtutem et pietatem incitare, a vitiis revocare fideles possit. Sacerdotis enim duo sunt munera, quorum alterum est, ut sacramenta rite conficiat et administret, alterum, ut populum, fidei suae commissum, iis rebus et institutis, quae ad salutem necessaria sunt, erudiat. Malachias enim ita testatur<sup>2)</sup>: „Labia sacerdotis custodient scientiam, et legem requirent ex ore eius, quia angelus Domini exercituum est.“ Ut igitur in horum altero, si mediocri cognitione sit ornatus, praestare quod debet possit: alterum certe non vulgarem, sed exquisitam potius doctrinam desiderat; quamvis aequa ab omni-

<sup>1)</sup> Tit. 1, 7. 1. Tim. 3, 8. <sup>2)</sup> Mal. 2, 7.

bus sacerdotibus summa reconditarum rerum scientia non exigitur, sed quae ad suscepti officii et ministerii functionem unicuique satis esse possit.

*XXXIII. Quinam ad sacerdotii dignitatem non sint admittendi.*

Pueris autem et furiosis vel amentibus, quod usu rationis careant, hoc sacramentum dandum non est; quamvis, si iis quoque administraretur, sacramenti characterem in eorum animam imprimi, certo credendum sit. Qui vero aetatis annus in singulis ordinibus sit exspectandus, ex sacri Tridentini concilii<sup>1)</sup> decretis facile erit cognoscere. Excipiuntur etiam servi; neque enim divino cultui dedicari debet, qui non sui iuris, sed in alterius potestate est. Viri praeterea sanguinum et homicidae, quia ecclesiastica lege repelluntur, aequo irregulares sunt. Spurii quoque, et ii omnes, qui ex legitimis nuptiis non sunt procreati. Decet enim, ut, qui sacris addicuntur, nihil in se habeant, quo ab aliis merito contemnui ac despici posse videantur. Ad extremum etiam admitti non debent, qui aliquo insigni corporis vitio deformes aut manci sunt; ea enim foeditas et debilitatio tum offensionem habet, tum vero sacramentorum administrationem impedit necesse est.

*XXXIV. Qui sint praecipui huius sacramenti effectus.*

Sed iam his rebus expositis superest, ut pastores doceant, qui sint huius sacramenti effectus. Constat vero, quamvis ordinis sacramentum, ut antea dictum est, maxime ad ecclesiae utilitatem et pulchritudinem spectet, tamen in eius quoque anima, qui sacris iniciatur, sanctificationis gratiam efficere; qua idoneus habilisque ad recte munus suum fungendum sacramentaque administranda reddatur; quemadmodum etiam baptismi gratia quilibet ad alia sacraenta percipienda aptus efficitur. Aliam quoque gratiam hoc sacramento tribui perspicuum est: praecipuam videlicet potestatem, quae ad sanctissimum eucharistiae sacramentum refertur; in sacerdote quidem plenam et perfectam, ut qui Domini nostri corpus et sanguinem unus potest conficere; in aliis vero inferiorum ordinum ministris maiorem minoremve, quo quisque ministerio suo magis minusve ad altaris sacraenta accedit. Atque haec etiam character spiritualis dicitur, quod, qui sacris imbuti sunt, interiori quadam nota animae impressa ab aliis fidelibus distinguuntur, ac divino cultui mancipentur; ad quam Apostolus videtur spectasse, quum ad Timotheum ait<sup>2)</sup>: „Noli neglere gratiam, quae in te est, quae data est tibi per prophete-

<sup>1)</sup> Sess. 23. cap. 12. de reform. <sup>2)</sup> I. Tim. 4, 14.

tiam, cum impositione manuum presbyterii.<sup>1)</sup> Et alibi<sup>1)</sup>: „Admoneo te, ut resuscites gratiam Dei, quae est in te, per impositionem manuum mearum.“ Haec de Ordinis sacramento satis dicta sint; potiora enim tantum rerum capita pastoribus tradere professi sumus, ut illis fidelis populi docendi et in Christiana pietate erudiendi argumenta suppeditarent.

## CAPUT VIII.

### **De Matrimonii Sacramento.**

#### *I. Cur parochi sedulo invigilare, ut populus Christianus matrimonii naturam et sanctitatem cognitam habeat.*

Quoniam pastoribus beata et perfecta Christiani populi vita proposita esse debet, iis quidem maxime optandum esset, quod Apostolus se cupere ad Corinthios<sup>2)</sup> scribebat his verbis: „Volo omnes homines esse, sicut me ipsum,“ nimirum, ut omnes continentiae virtutem sectarentur; nihil enim beatius in hac vita fidelibus potest contingere, quam ut animus nulla mundi cura distractus, sedataque et restincta omni carnis libidine, in uno pietatis studio et coelestium rerum cogitatione conquiescat. Sed quoniam, ut idem Apostolus testatur, „unusquisque proprium donum habet ex Deo; alius quidem sic, alius vero sic,“ et matrimonium magnis et divinis bonis ornatum est ita, ut inter alia catholicae ecclesiae sacramenta vere et proprie numeretur, ac Dominus<sup>3)</sup> nuptiarum celebritatem praesentia sua honestarit: satis apparet, eius doctrinam tradendam esse, quum praesertim licet animadvertere, tum sanctum Paulum, tum<sup>4)</sup> Apostolorum Principem, quae non solum ad dignitatem, sed etiam ad officia matrimonii pertinebant, pluribus locis accurate scripta reliquerunt. Divino enim Spiritu afflati optime intelligebant, quanta et quam multa commoda ad Christianam societatem pervenire possent, si fideles matrimonii sanctitatem cognitam haberent, et inviolatam servarent; contra vero, ea ignorata vel neglecta, plurimas maximasque calamitates et detimenta in ecclesiam importari. Primum itaque matrimonii natura et vis explicanda est; nam quum vitia saepe honesti similitudinem gerant, cavere oportet, ne fideles falsa matrimonii specie decepti turpitudine et nefariis libidinibus animam commaculent; cuius rei declarandae causa a nominis significatione ordiendum est.

<sup>1)</sup> II. Tim. 1, 6. <sup>2)</sup> I. Cor. 7, 7. <sup>3)</sup> Io. 2, 2. <sup>4)</sup> Eph. 5, 22. I. Pet. 3, 1.

*II. Quapropter sancta illa copula matrimonii, coniugii aut nuptiarum nominibus exprimatur.*

„Matrimonium“ ab eo dicitur, quod femina idcirco maxime nubere debeat, ut mater fiat; vel quia prolem concipere, parere, educare, matris munus est. „Coniugium“ quoque a coniungendo appellatur, quod legitima mulier cum viro quasi uno iugo adstringatur. Praeterea „nuptiae,“ quia, ut inquit sanctus Ambrosius<sup>1)</sup>, pudoris gratia puellae se obnuberent; quo etiam declarari videbatur, viris obedientes subiectasque esse oportere.

*III. Quid sit matrimonium.*

Ita vero ex communi Theologorum sententia definitur: „Matrimonium est viri et mulieris maritalis coniunctio inter legitimas personas, individuam vitae consuetudinem retinens.“ Cuius definitionis partes ut planius intelligantur, docendum est, quamvis haec omnia in perfecto matrimonio insint, consensus videlicet interior, pactio externa verbis expressa, obligatio et vinculum, quod ex ea pactione efficitur, et coniugum copulatio, qua matrimonium consummatur: nihil horum tamen matrimonii vim et rationem proprie habere, nisi obligationem illam et nexus, qui coniunctionis vocabulo significatus est. Additur vero „maritalis,“ quoniam alia pactionum genera, quibus viri et mulieres obligantur, ut sibi mutuam operam praestent vel pretii vel alterius rei causa, prorsus aliena sunt a matrimonii ratione. Sequitur deinde „inter legitimas personas,“ quoniam, qui a nuptiarum coniunctione legibus omnino exclusi sunt, ii matrimonium inire non possunt, neque si ineantur, ratum est. Exempli enim gratia, qui intra quartum gradum propinquitate coniuncti sunt, puerque ante decimum quartum annum, aut puella ante duodecimum, quae aetas legibus constituta est, ad matrimonii iusta foedera ineunda apti esse non possunt. Quod vero extremo loco positum est: „individuam vitae consuetudinem retinens,“ indissolubilis vinculi naturam declarat, quo vir et uxor colligantur.

*IV. Ubi praincipia vis matrimonii consistat.*

Ex his igitur patet matrimonii naturam et rationem in vinculo illo consistere. Nam quod aliae clarissimorum virorum definitiones hoc videntur consensui tribuere, ut, quum dicunt, coniugium esse consensum maris et feminae: hoc ita accipendum est, consensum ipsum matrimonii causam effectricem esse; quod Patres in concilio Florentino<sup>2)</sup> docuerunt. Etenim obligatio et nexus oriri non potest, nisi ex consensu et pactione.

<sup>1)</sup> lib. 1. de Abraham, c. 9. <sup>2)</sup> Eug. IV. in conc. Flor.

*V. Qualis in matrimonio requiratur consensus, quaque ratione sit declarandum.*

Sed illud maxime necessarium est, ut consensus verbis, quae praesens tempus significant, exprimatur: neque enim matrimonium est simplex donatio, sed mutua pactio; atque ita fit, ut consensus alterius tantum ad matrimonium coniungendum satis esse non possit, sed duorum inter se mutuum esse oporteat. Atqui ad declarandum mutuum animi consensum verbis opus esse, perspicuum est; si enim ex interiori tantum consensu sine aliqua externa significazione matrimonium constare posset: illud etiam sequi videretur, ut, quum duo, qui disiunctissimis et maxime diversis in locis essent, ad nuptias consentirent, antequam alter alteri voluntatem suam vel literis, vel nunciis declarasset, veri et stabilis matrimonii lege coniungerentur; quod tamen a ratione et sanctae ecclesiae consuetudine et decretis alienum est.

*VI. Mutuus consensus, verbis futuri temporis expressus, matrimonium non efficit.*

Recte autem dicitur, oportere, ut consensus verbis exprimatur, quae praesentis temporis significacionem habeant; nam, quae futurum tempus indicant, matrimonium non coniungunt, sed spondent. Deinde, quae futura sunt, nondum esse perspicuum est; quae vero non sunt, parum vel nihil firmi aut stabilis habere existimandum est. Quare nondum connubii ius in eam mulierem quisquam habet, quam se in matrimonium ducturum esse pollicetur; neque statim ab eo impletum est, quod se facturum promisit, tametsi fidem praestare debet; quod si non faciat, violatae fidei reus esse convincitur. At vero qui matrimonii foedere alteri iungitur, quamvis postea poeniteat, tamen quod factum est mutare irritumve et infectum reddere non potest. Quum itaque coniugii obligatio nuda promissio non sit, sed eiusmodi abalienatio, qua re ipsa vir mulieri, et vicissim mulier viro corporis sui potestatem tradit: idcirco necesse est, verbis, quae praesens tempus designant, matrimonium contrahi; quorum verborum vis, postquam etiam enunciata sunt, permanet, virumque et uxorem indissolubili vinculo constrictos tenet.

*VII. Si pudore aut alio impedimento consensus verbis non exprimatur, nutus et signa verborum locum habent.*

Sed verborum loco tum nutus et signa, quae intimum consensum aperte indicent, satis ad matrimonium esse possunt, tum ipsa etiam taciturnitas, quum puella propter verecundiam non respondet, sed pro ea parentes loquuntur.

*VIII. Ad verum matrimonium concubitus non requiritur.*

Ex iis igitur parochi fidelibus tradent, matrimonii naturam et vim in vinculo et obligatione sitam esse, ac praeter consensum, eo, quo dictum est, modo expressum, ut verum matrimonium existat, concubitum necessario non requiri; nam et primos parentes ante peccatum, quo tempore nulla inter eos carnis copula intercesserat, ut patres testantur, vero matrimonio iunctos fuisse, plane constat. Quare a sanctis Patribus dictum est, matrimonium non concubitu, sed consensu existere; quod etiam a sancto Ambrosio<sup>1)</sup> in libro de Virginibus repetitum legimus.

*IX. Quotuplex sit matrimonii consideratio.*

Iam vero hisce explicatis illud docendum erit, matrimonium duplarem rationem habere. Nam, vel ut naturalis coniunctio, (coniugium enim non ab hominibus inventum, sed a natura,) vel ut sacramentum, cuius vis naturalium rerum conditionem superat, considerandum est. Ac quoniam gratia naturam perficit (neque „prius<sup>2)</sup> quod spirituale est, sed quod animale, deinde quod spirituale“): rei ordo postulat, ut de matrimonio, ut natura constat, et ad naturae officium pertinet, prius agendum sit; tum vero, quae illi, ut sacramentum est, conveniunt, explananda erunt.

*X. Quis matrimonii, ut officium naturae significat, sit auctor.*

In primis itaque docendi sunt fideles, matrimonium a Deo institutum esse; scriptum est enim in Genesi<sup>3)</sup>: „Masculum et feminam creavit eos, benedixitque illis Deus, et ait: „Crescite et multiplicamini;“ et<sup>4)</sup>: „Non est bonum hominem esse solum; faciamus ei adiutorium simile sibi;“ ac paulo post<sup>5)</sup>: „Adae vero non inveniebatur adiutor similis eius. Immisit ergo Dominus Deus soporem in Adam, quumque obdormisset, tulit unam de costis eius, et replevit carnem pro ea. Et aedificavit Dominus Deus costam, quam tulerat de Adam, in mulierem, et adduxit eam ad Adam. Dixitque Adam: Hoc nunc os ex ossibus meis, et caro de carne mea; haec vocabitur virago, quoniam de viro sumpta est. Quamobrem relinquit homo patrem suum et matrem, et adhaerebit uxori suea; et erunt duo in carne una.“ Quae ipso Domino auctore apud sanctum Matthaeum<sup>6)</sup> ostendunt, matrimonium divinitus institutum esse.

*XI. Matrimonium, ut naturae officium consideratum, et maxime ut sacramentum, dissolvi non potest.*

Neque vero Deus matrimonium tantummodo instituit, verum, ut sancta Tridentina synodus<sup>7)</sup> declarat, perpetuum

<sup>1)</sup> c. 6. <sup>2)</sup> L. Cor. 15, 46. <sup>3)</sup> Gen. 1, 27. 28. <sup>4)</sup> Gen. 2, 18. <sup>5)</sup> ib. 20. sq. <sup>6)</sup> Mat. 19, 4. sq. <sup>7)</sup> Sess. 24. in princ.

etiam et indissolubilem nodum ei addidit; siquidem Salvator ait<sup>1)</sup>; „Quod Deus coniunxit homo non separet.“ Quamvis enim matrimonio, quatenus naturae est officium, conveniat, ut dissolvi non possit: tamen id maxime fit, quatenus est sacramentum; qua ex re etiam in omnibus, quae naturae lege eius propria sunt, summam perfectionem consequitur. Tamen et prolixus educandae studio, et aliis matrimonii bonis repugnat, ut eius vinculum dissolubile sit.

*XII. Omnibus hominibus lex contrahendi non est imposita.*

Quod vero a Domino dictum est<sup>2)</sup>: „Crescite et multiplicamini,“ id eo spectat, ut cuius rei causa matrimonium institutum erat, declarat, non ut singulis hominibus necessitatem imponat; nunc enim, aucto iam humano genere, non solum ulla lex uxorem ducere aliquem non cogit, sed potius virginitas summopere commendatur, et unicuique in sacris literis suadetur, ut quae matrimonii statu praestantior sit, maioremque in se perfectionem et sanctitatem contineat. Dominus enim Salvator noster ita docuit<sup>3)</sup>: „Qui potest capere, capiat;“ et Apostolus<sup>4)</sup> ait: „De virginibus praeceptum Domini non habeo; consilium autem do, tanquam misericordiam consecutus a Domino, ut sim fidelis.“

*XIII. Vir et mulier coniungi cur debeant.*

Sed quibus de causis vir et mulier coniungi debeant, explicandum est. Prima igitur est haec ipsa diversi sexus naturae instinctu expedita societas, mutui auxilii spe conciliata, ut alter alterius ope adiutus vitae incommoda facilius ferre, et senectutis imbecillitatem sustentare queat. Altera est, procreationis appetitus non tam quidem ob eam rem, ut bonorum et divitiarum heredes relinquuntur, quam ut verae fidei et religionis cultores eduentur; quod quidem maxime sanctis illis patriarchis, quum uxores ducerent, propositum fuisse, ex sacris literis satis appareat. Quare Angelus, quum Tobiam admoneret, quo pacto mali daemonis vim posset repellere: „Ostendam,“ inquit<sup>5)</sup>, „tibi, qui sunt, quibus praevalere potest daemonium. Hi namque, qui coniugium ita suscipiunt, ut Deum a se et a sua mente excludant, et sua libidini ita vaccent, sicut equus et mulus, quibus non est intellectus, habet potestatem daemonium super eos.“ Deinde subiecit: „Accipies virginem cum timore Domini, amore filiorum magis, quam libidine ductus, ut in semine Abrahae benedictionem in filiis consequaris.“ Atque una etiam haec causa fuit, cur Deus ab

<sup>1)</sup> Mat. 19, 6. <sup>2)</sup> Gen. 1, 28. <sup>3)</sup> Mat. 19, 12. <sup>4)</sup> I. Cor. 7, 25. <sup>5)</sup> Tob. 6, 16. 17. 22.

initio matrimonium constituerit. Quare fit, ut illorum sit sce-  
lus gravissimum, qui matrimonio iuncti medicamentis vel con-  
ceptum impediunt, vel partum abigunt; haec enim homicidarum  
impia conspiratio existimanda est.

*XIV. Post peccatum cur matrimonium institutum fuerit.*

Tertia est, quae post primi parentis lapsum ad alias causas  
accessit, quum propter iustitiae, in qua homo conditus erat,  
amissionem, appetitus rectae rationi repugnare coepit; ut sci-  
licet, qui sibi imbecillitatis suae conscientis est, nec carnis pugnam  
vult ferre, matrimonii remedio ad vitanda libidinis peccata uta-  
tur. De quo ita Apostolus scribit (I. Cor. 7, 2.): „Propter  
fornicationem unusquisque suam uxorem habeat, et unaquaeque  
suum virum habeat.“ Ac paulo post, quum docuisset, interdum  
orationis causa a matrimonii debito abstinentem esse, subiecit:  
„Et iterum revertimini in id ipsum, ne tentet vos satanas pro-  
pter incontinentiam vestram.“ Hae igitur sunt causae, quarum  
aliquam sibi proponere quisque debet, qui pie et religiose, ut  
sanctorum filios decet, nuptias velit contrahere. Quod si ad eas  
causas alia etiam accedant, quibus homines inducti matrimonium  
ineant, atque in habendo uxoris delectu illi paeponant,  
ut heredis relinquendi desiderium, divitiae, forma, generis splen-  
dor, morum similitudo: huiusmodi sane rationes damndandae  
non sunt, quum matrimonii sanctitati non repugnant. Neque  
enim in sacris literis Iacob Patriarcha reprehenditur, quod Ra-  
chelem, eius pulchritudine illectus, Liae praetulerit. Haec de  
matrimonio, ut naturalis coniunctio est, docenda erunt.

*XV. Cur matrimonium sacramenti dignitate per Christum sit  
auctum.*

Ut autem sacramentum est, explicare oportebit, eius na-  
turam multo praestantiorem esse, et omnino ad altiorem finem  
referri. Quemadmodum enim matrimonium, ut naturalis con-  
iunctio, ad propagandum humanum genus ab initio institutum  
est: ita deinde, ut populus ad veri Dei et Salvatoris nostri,  
Christi cultum et religionem procrearetur atque educaretur, sa-  
cramenti dignitas illi tributa est. Quum enim Christus Dominus  
vellet arctissimae illius necessitudinis, quae ei cum ecclesia in-  
tercedit, suaque erga nos immensae caritatis certum aliquod  
signum dare: tanti mysterii dignitatem hac potissimum maris et  
feminae sancta coniunctione declaravit. Quod quidem aptissime  
factum esse, intelligi ex eo potest, quod ex omnibus humanis  
necessitatibus nulla inter se homines magis quam matrimonii  
vinculum constringit, maximaque inter se vir et uxor caritate  
et benevolentia devincti sunt; atque idcirco fit, ut frequenter

sacrae literae nuptiarum similitudine divinam hanc Christi et ecclesiae copulationem nobis ante oculos proponant.

*XVI. Quomodo matrimonium sit verum evangelicae legis sacramentum.*

Iam vero matrimonium sacramentum esse, ecclesia, apostoli auctoritate confirmata, certum et exploratum semper habuit; ita enim ad Ephesios scribit<sup>1)</sup>: „Viri debent diligere uxores suas, ut corpora sua. Qui suam uxorem diligit, se ipsum diligit; nemo enim unquam carnem suam odio habuit, sed nutrit et foveat eam, sicut et Christus ecclesiam; quia membra sumus corporis eius, de carne eius et de ossibus eius. Propter hoc relinquet homo patrem et matrem suam, et adhaerabit uxori suae; et erunt duo in carne una. Sacramentum hoc magnum est; ego autem dico in Christo et in ecclesia.“ Nam quod inquit: „Sacramentum hoc magnum est,“ nemini dubium esse debet, ad matrimonium referendum esse; quod scilicet viri et mulieris coniunctio, cuius Deus auctor est, sanctissimi illius vinculi, quo Christus Dominus cum ecclesia coniungitur, sacramentum, id est sacrum signum sit.

*XVII. Quomodo matrimonium sacramentum esse, ex S. Pauli verbis convincatur.*

Atque hanc esse eorum verborum veram et propriam sententiam, veteres sancti Patres, qui eum locum interpretati sunt, ostendunt; idemque sancta Tridentina synodus<sup>2)</sup> explicavit. Constat ergo, virum Christo, uxorem ecclesiae ab Apostolo comparari; virum<sup>3)</sup> esse caput mulieris, ut est Christus ecclesiae; eaque ratione fieri, ut vir uxorem diligere, et vicissim uxor virum amare et colere debeat. Christus enim dilexit ecclesiam, et pro ea semetipsum tradidit; rursus vero, ut idem Apostolus docet, ecclesia subiecta est Christo. Sed gratiam quoque hoc sacramento significari et tribui, in quo maxime ratio sacramenti inest, ea synodi verba declarant: „Gratiam vero, quae naturalem illum amorem perficeret, et indissolubilem unitatem confirmaret, coniugesque sanctificaret, ipse Christus, venerabilium sacramentorum iustitor atque perfector, sua nobis passione promeruit.“ Quare docendum est, huius sacramenti gratia effici, ut vir et uxor, mutuae caritatis vinculo coniuncti, alter in alterius benevolentia conquiescat, alienosque et illicitos amores et concubitus non quaerat, sed in omnibus sit „honorable<sup>4)</sup> connubium et torus immaculatus.“

<sup>1)</sup> Eph. 5, 28—32. <sup>2)</sup> Sess. 24. de Matr. in princ. et can. I. <sup>3)</sup> Eph. 5, 23. 25. 24. <sup>4)</sup> Hebr. 13, 4.

*XVIII. Quantum matrimonium evangelii a legis naturae vel Moysis matrimonio differat.*

Sed quantum matrimonii sacramentum iis matrimoniis praestet, quae ante vel post legem iniri solebant, ex eo licet cognoscere, quod, etsi gentes matrimonio divini aliquid inesse arbitrabantur, atque ob eam rem vagos concubitus a naturae lege alienos esse, itemque stupra, adulteria, et alia libidinis genera vindicanda esse iudicabant: tamen eorum connubia nullam prorsus sacramenti vim habuerunt. Apud Iudeos vero religiosius omnino nuptiarum leges servari consueverant, neque dubitandum, quin eorum matrimonia maiori sanctitate praedita essent. Quum enim promissionem accepissent, fore aliquando, ut omnes gentes in semine Abrahæ benedicentur<sup>1)</sup>: magnæ apud eos pietatis officium merito esse videbatur, filios procreare, electi populi sobolem, ex qua Christus Dominus Salvator noster, quod ad humanam naturam attinet, ortum habiturus esset, propagare; sed illæ quoque coniunctiones vera sacramenti ratione caruerunt.

*XIX. Matrimonium in lege naturae post peccatum aut in lege Moysis originis suae, quam ex Deo habuit, decorum non retinuit.*

Huc accedit, quod sive naturae post peccatum, sive Moysis legem spectemus, facile animadvertisimus, matrimonium a primi ortus sui deore et honestate decidisse. Dum enim naturae lex vigebat, multos ex antiquis Patribus fuisse compemus, qui plures simul uxores ducerent. Deinde vero in lege Moysis permisum erat, dato repudii libello<sup>2)</sup>, si causa fuisse, divortium cum uxore facere; quorum utrumque ab evangelica lge<sup>3)</sup> sublatum, matrimoniumque in pristinum statum restitutum est. Nam quod polygamia a matrimonii natura aliena esset (etsi aliqui ex priscis Patribus accusandi non sunt, quod non sine Dei indulgentia plures uxores ducerent), Christus Dominus ostendit illis verbis<sup>4)</sup>: „Propter hoc dimittet homo patrem et matrem, et adhaerebit uxori suae; et erunt duo in carne una.“ Ac deinde adiungit: „Itaque iam non sunt duo, sed una caro.“ Quibus verbis planum fecit, matrimonium ita a Deo institutum esse, ut duorum tantum, non plurium coniunctione definiretur. Quod etiam alibi apertissime docuit; ait enim<sup>5)</sup>: „Quicumque dimiserit uxorem suam, et aliam duxerit, adulterium committit super eam; et si uxor dimiserit virum suum, et alii nupserit, moechatur.“ Nam si viro liceret plures uxores ducere, nulla omnino causa esse vi-

<sup>1)</sup> Gen. 22. 18. <sup>2)</sup> Deut. 24. 1. <sup>3)</sup> Mat. 19. 9. <sup>4)</sup> Mat. 19. 5. 6. <sup>5)</sup> Marc. 10. 11. 12.

deretur, cur magis adulterii reus dicendus esset, quod praeter eam uxorem, quam domi haberet, aliam duceret, quam quod priore dimissa cum alia coniungeretur. Atque ob eam rem fieri intelligimus, ut, si infidelis quispiam gentis suae more et consuetudine plures uxores duxisset, quum ad veram religionem conversus fuerit, iubeat eum ecclesia ceteras omnes relinquere, ac priorem tantum iustae et legitimae uxoris loco habere.

*XX. Vinculum matrimonii divortio disrupti non potest.*

Verum eodem Christi Domini testimonio facile comprobatur, nullo divortio vinculum matrimonii dissolvi posse. Si enim post libellum repudii mulier a viri lege soluta esset, licet ei sine ullo adulterii crimine alteri viro nubere. Atqui Dominus aperte denunciat<sup>1)</sup>: „Omnis, qui dimittit uxorem suam, et alteram ducit, moechatur.“ Quare coniugii vinculum nulla re, nisi morte, dirumpi perspicuum est; quod quidem Apostolus etiam confirmat, quum inquit<sup>2)</sup>: „Mulier alligata est legi, quanto tempore vir eius vivit; quod si dormierit vir eius, liberata est a lege; cui vult nubat, tantum in Domino;“ et rursus<sup>3)</sup>, „His, qui matrimonio iuncti sunt, praecipio, non ego, sed Dominus, uxorem a viro non discedere; quod si discesserit, manere innuptam, aut viro suo reconciliari.“ Eam vero optionem Apostolus mulieri, quae iusta de causa virum reliquisset, detulit, ut aut innupta maneat, aut viro suo reconcilietur. Neque enim sancta ecclesia viro et uxori permittit, ut sine gravioribus causis alter ab altero discedat.

*XXI. Cur nulla ratione dissolvi matrimonium expediatur.*

Ac ne forte alicui videatur durior matrimonii lex, quod nulla unquam ratione dissolvi possit: docendum est, quae sint cum ea utilitates coniunctae. Primum enim homines in coniungendis matrimonii virtutem potius et morum similitudinem, quam divitias et pulchritudinem spectandam esse, intelligent; qua quidem re communi societati maxime consuli nemo dubitare potest. Praeterea si divortio matrimonium dissolveretur, vix unquam dissidendi causae hominibus, quae iis ab antiquo pacis et pudicitiae hoste quotidie obiicerentur, deessent. Nunc vero, quum fideles secum cogitant, quamvis etiam coniugii convictu et consuetudine careant, se tamen matrimonii vinculo constrictos teneri, omnemque alterius uxoris ducendae spem sibi praecisam esse: ea re fit, ut ad iracundiam et dissidia tardiores esse consueverint. Quod si interdum etiam divortium

<sup>1)</sup> Mat. 19, 9. Luec. 16, 18. <sup>2)</sup> I. Cor. 7, 39. <sup>3)</sup> ib. v. 10. 11. Con. Trid. sess. 24. can. 5. 7.

faciant, et diutius coniugis desiderium ferre non possint, et facile per amicos reconciliati ad eius convictum redeunt.

*XXII. Per libellum repudii separati, possunt rursus coniungi.*

Sed hoc loco praetermittenda non erit pastoribus sancti Augustini<sup>1)</sup>) salutaris admonitio; is enim ut ostenderet fidelibus, haud gravate faciendum esse, ut cum uxoribus, quas adulterii causa dimisissent, si eas delicti poeniteret, in gratiam reducerentur: „Cur,“ inquit, „vir fidelis non recipiet uxorem, quam recipit ecclesia? aut cur uxor viro adultero, sed poenitenti, non ignoscat, cui etiam ignovit Christus?“ Nam quod Scriptura<sup>2)</sup>) „stultum“ vocat, „qui tenet adulteram:“ de ea sentit, quae, quum deliquerit, poenitere et a coepita turpitudine desistere recusat. Ex iis itaque perspicuum est, fidelium coniugia perfectione et nobilitate tum gentilium, tum Iudeorum matrimoniis longe praestare.

*XXIII. Quae sint bona, quae ex hoc sacramento ad coniugatos redeunt.*

Docendi praeterea sunt fideles, tria esse matrimonii bona: prolem, fidem, sacramentum; quorum compensatione illa incommoda leniuntur, quae Apostolus<sup>3)</sup>) indicat his verbis: „Tribulationem carnis habebunt huiusmodi,“ efficiturque, ut coniunctiones corporum, quae extra matrimonium merito damnandae essent, cum honestate coniunctae sint. Primum igitur bonum est „proles,“ hoc est liberi, qui ex iusta et legitima suscipiuntur uxore; id enim tanti fecit Apostolus, ut diceret<sup>4)</sup>): „Salvabitur“ mulier „per filiorum generationem.“ Nec vero hoc de procreatione solum, sed de educatione etiam et disciplina, qua filii ad pietatem erudiuntur, intelligendum est. Sic statim subdit Apostolus: „Si in fide permanserint.“ Monet enim Scriptura<sup>5)</sup>): „Fili tibi sunt? erudi illos, et curva illos a pueritia illorum.“ Idem etiam Apostolus docet<sup>6)</sup>), eiusque institutionis pucherrima exempla Tobias, Iob et alii sanctissimi Patres in sacris literis praebent. Quae vero sint parentum et filiorum officia, in quarto pracepto latius explicabuntur.

*XXIV. Fides in matrimonio quid sit, et quomodo servanda.*

Sequitur „fides,“ quod est alterum matrimonii bonum; non ille virtutis habitus, quo imbuimur, quum baptismum percipimus; sed fidelitas quaedam, qua mutuo vir uxori, et uxor viro ita se obstringit, ut alter alteri sui corporis potestatem tradat, sanctumque illud coniugii foedus nunquam se violatu-

<sup>1)</sup> de adult. lib. 2. c. 6. et 9. <sup>2)</sup> Prov. 18, 22. <sup>3)</sup> I. Cor. 7, 28. <sup>4)</sup> I. Tim. 2, 15.  
<sup>5)</sup> Eccl. 7, 25. <sup>6)</sup> Eph. 6, 4. Tob. 4, 1. seq. Iob 1, 5.

rum pollicetur. Id facile colligitur ex illis verbis, quae a primo parente enunciata sunt<sup>1)</sup>, quum Evam uxorem suam accepit; quae deinde Christus Dominus in Evangelio<sup>2)</sup> comprobavit: „Quare relinquet homo patrem et matrem, et adhaeret uxori sua, et erunt duo in carne una;“ item ex eo Apostoli<sup>3)</sup> loco: „Mulier sui corporis potestatem non habet, sed vir; similiter autem et vir sui corporis potestatem non habet, sed mulier.“ Quare optimo iure gravissimae animadversiones a Domino in adulteros, quod hanc maritalem fidem frangant, in veteri lege constitutae erant. Postulat praeterea matrimonii fides, ut vir et uxor singulari quodam sanctoque et puro amore coniuncti sint, neque ut adulteri inter se ament, sed ut Christus dilexit ecclesiam; hanc enim Apostolus regulam praescripsit, quum ait<sup>4)</sup>: „Viri, diligite uxores vestras, sicut et Christus dilexit ecclesiam,“ quam certe immensa illa charitate, non sui comodi gratia, sed sponsae tantum utilitatem sibi proponens, complexus est.

*XXV. Quid sit Sacramentum, dum inter matrimonii bona numeratur.*

Tertium bonum „sacramentum“ appellatur, vinculum scilicet matrimonii, quod nunquam dissolvi potest; nam, ut est apud Apostolum<sup>5)</sup>: „Dominus“ praecepit, „uxorem a viro non discedere; quod si discesserit, manere innuptam, aut viro suo reconciliari: et vir uxorem non dimittat.“ Si enim matrimonium, ut sacramentum est, Christi coniunctionem cum ecclesia signat: necesse est, ut Christus se ab ecclesia nunquam disiungit, ita uxorem a viro, quod ad matrimonii viculum attinet, separari non posse. Verum ut haec sancta societas sine querela facilius conservetur, viri et uxoris officia, quae a S. Paulo et a principe Apostolorum Petro descripta sunt, tradenda erunt.

*XXVI. Quae sint praecipua mariti officia.*

Ergo viri munus est, uxorem liberaliter et honorifice tractare; qua in re meminisse oportet, Evam ab Adamo sociam appellatam esse, quum inquit<sup>6)</sup>: „Mulier quam dedisti mihi sociam;“ cuius rei causa aliqui Patres factum esse docuerunt, ut ea non ex pedibus, sed ex latere viri formaretur; quemadmodum etiam ex capite condita non est, ut se viri dominam non esse intelligeret, sed viro potius subiectam. Decet praeterea virum in alicuius honestae rei studio semper occupatum esse, tum ut ea suppeditet, quae ad familiam sustentandam

<sup>1)</sup> Gen. 2, 24. <sup>2)</sup> Mat. 19, 5. Eph. 5, 31. <sup>3)</sup> I. Cor. 7, 4. <sup>4)</sup> Lev. 20, 10. Deut. 22, 22. Eph. 5, 25. <sup>5)</sup> I. Cor. 7, 10. 11. <sup>6)</sup> Gen. 3, 12.

necessaria sunt, tum ne inertio otio languescat, a quo vitia fere omnia fluxerunt; deinde vero familiam recte constituere, omnium mores corrigere, singulos in officio continere.

*XXVII. Uxoris officium quid requirat.*

Rursus autem uxoris partes sunt, quas Apostolorum princeps enumerat, quum inquit<sup>1)</sup>: „Mulieres subditae sint viris suis, ut et si qui non credunt verbo, per mulierum conversationem sine verbo lucrifiant, considerantes in timore castam conversationem vestram. Quarum non sit extrinsecus capillatura, aut circumdatio auri, aut indumenti, vestimentorum cultus; sed qui absconditus est cordis homo, in incorruptibilitate quieti et modesti spiritus, qui est in conspectu Dei locuples. Sic enim aliquando et sanctae mulieres, sperantes in Deo, orabant se, subiectae propriis viris, sicut Sara obediebat Abraham<sup>2)</sup>, dominum eum vocans.“ Earum quoque praecipuum studium sit, filios in religionis cultu educare, domesticas res diligenter curare. Domi vero libenter se contineant, nisi necessitas exire cogat; idque sine viri permisso facere nunquam audeant. Deinde, in quo maxime maritalis coniunctio sita est, meminerint semper, secundum Deum, magis quam virum, neminem diligendum, eove pluris faciendum esse neminem; cui etiam omnibus in rebus, quae Christianae pietati non adversantur, morum gerere et obtemperare summa cum alacritate animi oporteat.

*XXVIII. Quid de matrimonii ritibus sentiendum sit.*

Harum rerum explicationi consequens erit, ut pastores ritus etiam doceant, qui in matrimonio contrahendo servari debent; de quibus non est expectandum, ut hoc loco praecepta tradantur, quum a sancta Tridentina synodo<sup>3)</sup>, quae hac in re maxime observanda sint, copiose et accurate constituta fuerint, neque illud decretum a pastoribus ignorari possit. Satis igitur est eos admonere, ut, quae ad hanc partem attinent, e sacri concilii doctrina cognoscere studeant, eaque fidelibus diligenter exponant.

*XXIX. Clandestina matrimonia rata non sunt.*

In primis autem ne adolescentes et puellae, cui aetati inest maxima imbecillitas consilii, falso nuptiarum nomine decepti, turpium amorum foedera incaute ineant: saepissime decebunt, ea neque vera, neque rata matrimonia habenda esse, quae praesente parocho, vel alio sacerdote de ipsius parochi vel ordinarii licentia, certoque testium numero non contrahantur.

<sup>1)</sup> I. Petr. 3, 1. sq.; <sup>2)</sup> Gen. 18, 12. <sup>3)</sup> Sess. 24. decret. de reform. Matr.

*XXX. Tradere etiam matrimonii impedimenta decet.*

Sed quae matrimonium etiam impediunt explicanda erunt; in quo argumento plerique graves et doctissimi viri, qui de vitiis et virtutibus conscripserunt, adeo diligenter versati sunt, ut facile omnibus futurum sit, quae illi scriptis suis tradiderunt, in hunc locum transferre; quum praesertim necesse habeant pastores, eos ipsos libros nunquam fere a manibus deponere. Itaque tum illas praeceptiones, tum quae a sancta synodo<sup>1)</sup> sancita sunt de impedimento, quod vel a cognatione spirituali, vel a iustitia publicae honestatis, vel a fornicatione oritur, attente legent, et tradenda fidelibus curabunt.

*XXXI. Quo animo affecti esse debeant qui ad matrimonium accedunt.*

Ex quibus perspici potest, quo animo affectos esse oporteat fideles quum matrimonium contrahunt; neque enim se humnam aliquam rem aggredi, sed divinam putare debent, in qua singularem mentis integratatem et pietatem adhibendam esse, Patrum veteris legis exempla satis ostendunt; quorum matrimonia, tametsi sacramenti dignitate praedita non erant, ea tamen maxima semper cum religione et sanctimonia collenda esse existimarunt.

*XXXII. Parentum consensus ad matrimonii soliditatem requirendus.*

Inter cetera autem maxime hortandi sunt filii familias, ut parentibus et iis, in quorum fide et potestate sunt, eum honorem tribuant, ut ipsis inscientibus, nedum invitis et repugnantibus, matrimonia non inceant. Nam in veteri Testamento licet animadvertere<sup>2)</sup>, filios a patribus semper in matrimonium collocatos esse; qua in re plurimum illorum voluntati deferendum esse, Apostolus etiam videtur iis verbis indicare<sup>3</sup>): „Qui matrimonio iungit virginem suam, bene facit; et qui non iungit, melius facit.“

*XXXIII. Quidnam de actu coniugali sit praecipiendum.*

Extrema illa restat pars, quae ad matrimonii usum pertinet, de quibus ita agendum est a pastoribus, ut nullum ex eorum ore verbum excidat, quod fidelium auribus indignum esse videatur, aut pias mentes laedere, aut risum movere queat. Ut enim eloquia Domini eloquia casta sunt<sup>4)</sup>: ita etiam maxime decet Christiani populi doctorem eiusmodi orationis genere uti, quod singularem quandam gravitatem et mentis integratatem prae se ferat. Quare duo illa maxime docendi

<sup>1)</sup> Ib. cap. 2—4. <sup>2)</sup> Gen. 24, 3. seq. 28, 2 seq. <sup>3)</sup> I. Cor. 7, 38. <sup>4)</sup> Ps. 11, 7.

sunt fideles: primum quidem, non voluptatis aut libidinis causa matrimonio operam dandam esse, sed eo utendum intra illos fines, qui, ut supra demonstravimus, a Domino praescripti sunt. Meminisse enim convenit, quod Apostolus hortatur<sup>1)</sup>: „Qui habent uxores, tanquam non habentes sint,“ tum vero a S. Hieronymo dictum esse<sup>2)</sup>: „Sapiens vir iudicio debet amare coniugem, non affectu; reget impetus voluptatis, nec praeceps feretur ad coitum. Nihil est foedius, quam uxorem amare quasi adulteram.“

*XXXIV. Coniugibus aliquando ab officio matrimonii abstinendum.*

Sed quoniam bona omnia sanctis precationibus a Deo impetranda sunt, alterum est quod fideles docere oportet, ut Deum orandi et obsecrandi causa a matrimonii officio interdum abstineant; imprimisque id sibi observandum sciant, tribus saltem diebus, antequam sacram eucharistiam percipient, saepius vero, quum solemnia quadragesimae ieunia celebrantur, quemadmodum Patres nostri recte et sancte praeceperunt. Ita enim fiet, ut ipsa matrimonii bona maiori in dies divinae gratiae cumulo augeri sentiant, et pietatis studia sectantes non modo hanc vitam tranquille et placide traducant, sed aeternae etiam Dei benignitate consequendae vera et stabili spe, quae „non confundit<sup>3)</sup>,“ nitantur.

## CATECHISMI PARS TERTIA.

### CAPUT I.

#### De Dei praceptoribus in Decalogo contents.

##### *I. Decalogum omnium praceptorum summam esse demonstratur.*

Decalogum legum omnium summam et epitomen esse sanctus Augustinus<sup>4)</sup> literis commendavit. Nam „quum multa locutus sit Dominus, duae tamen tantum tabulae dantur Moysi lapideae, quae dicuntur tabulae testimonii futuri in arca; nimirum cetera omnia, quae praecipit Deus, ex illis decem praecepsit, quae duabus tabulis conscripta sunt, pendere intelliguntur (si diligenter quaerantur, ut recte intelligantur), quomodo haec ipsa rursus decem praecpta, nituntur duobus illis, dilectionis scilicet Dei et proximi, in quibus tota lex pendet et prophetae<sup>5)</sup>.“

<sup>1)</sup> I. Cor. 7, 29. <sup>2)</sup> contra Iovin. 1, 49. <sup>3)</sup> Rom. 5, 5. <sup>4)</sup> Aug. sup. Exod. q. 140.  
<sup>5)</sup> Mat. 22, 40.

*II. Cur pastores maxime decalogum diserte tenere et explanare conveniat.*

Itaque quum sit totius legis summa, pastores oportet in eius contemplatione die noctuque versari, non ut vitam suam modo ad hanc normam componant: sed etiam ut populum sibi creditum in lege Domini erudiant. Nam „labia<sup>1)</sup> sacerdotis custodient scientiam, et legem requirent ex ore eius; quia angelus Domini exercituum est;“ quod ad pastores novae legis maxime pertinet, qui Deo propiores „a claritate<sup>2)</sup> in claritatem“ transformari debent, „tanquam a Domini Spiritu;“ et quum eos lucis nomine nuncupavit Christus Dominus, propriae sunt illorum partes, ut sint lumen<sup>3)</sup> eorum, qui in tenebris sunt, eruditores insipientium, magistri infantium, et, si<sup>4)</sup> quis praeoccupatus fuerit in aliquo delicto, ipsi, qui spirituales sunt, huiusmodi instruant. In confessionibus etiam iudicis personam sustinent, ac pro genere et modo peccatorum sententiam ferunt; quare, nisi suam sibi insciam, nisi aliis etiam esse fraudi velint, in eo sint necesse est quam vigilantissimi, et in divinorum praceptorum interpretatione exercitatissimi, ut ad hanc divinam regulam de quacunque et actione et offici praetermissione iudicium facere possint, et, ut est apud Apostolum<sup>5)</sup>, „sanam doctrinam“ tradant, id est, quae nullum contineat errorem, et animorum morbis, quae sunt peccata, medeat, ut sit populus Deo acceptus, sectator bonorum operum. Iam vero in huiuscmodi tractationibus ea pastor sibi et aliis proponat, quibus legi parendum esse persuadeat.

*III. Quis decalogi et legis naturae auctor sit.*

Inter cetera autem, quae animos hominum ad huius legis iussa servanda possunt impellere, illud maximam vim habet, Deum esse huius legis auctorem. Quamvis enim „per<sup>6)</sup> angelos data“ esse dicatur, nemo tamen dubitare potest, ipsum Deum esse legis auctorem; cuius rei satis amplum testimonium praebent non solum ipsius legislatoris verba, quae paulo post explicabuntur, sed infinita pene Scripturarum loca, quae pastoribus facile occurrent. Nemo enim est, quin sibi a Deo legem in animo insitam esse sentiat, qua bonum a malo, honestum a turpi, iustum ab iniusto possit secernere; cuius vis et ratio legis, quum ab ea, quae scripta est, diversa non sit, quis est, qui, ut intimae, sic scriptae legis auctorem Deum negare audeat? Hanc igitur divinam lucem, pene iam pravis moribus et diuturna perversitate obscuratam, quum Deus Moysi

<sup>1)</sup> Malach. 2, 7. <sup>2)</sup> 1 Cor. 3, 18. <sup>3)</sup> Rom. 2, 19. sq. <sup>4)</sup> Gal. 6, 1. <sup>5)</sup> II. Tim. 4, 3. <sup>6)</sup> Gal. 3, 19.

legem dedit, eam potius illustriorem reddidisse, quam novam tulisse docendum est, ne forte, quum populus audit, legi Moysis derogatum esse, putet his legibus se non teneri. Certissimum enim est, non propterea his praeceptis parendum esse, quod per Moysen data sunt: sed quod omnium animis ingenita, et per Christum Dominum explicata sunt et confirmata.

*IV. Quo modo ad legem servandam ab ipso legis auctore populus excitari possit.*

Iuvabit tamen plurimum, et ad persuadendum magnum habebit momentum illa cogitatio, Deum esse, qui legem tulit; de cuius sapientia et aequitate dubitare non possumus, neque eius infinitam vim atque potentiam effugere. Quare quum per Prophetas Deus iuberet servari legem, dicebat se Dominum Deum esse, et in ipso decalogi exordio<sup>1)</sup>: „Ego sum Dominus Deus tuus,“ et alibi<sup>2)</sup>: „Si Dominus ego sum, ubi est timor meus?“

*V. Quantum sit beneficium legem a Deo accepisse.*

Non solum autem excitabit fidelium animos ad servanda Dei praecepta, sed ad gratiarum etiam actionem, quod suam Deus, quae salutem nostram contineret, voluntatem explicarit. Quare non uno loco Scriptura maximum hoc beneficium declarans, populum commonefacit, ut suam dignitatem, ac Domini beneficentiam cognoscat; veluti in Deuteronomio<sup>3)</sup>: „Haec est,“ inquit, „vestra sapientia et intellectus coram populis, ut audientes universi praecepta haec, dicant: En populus sapiens et intelligens, gens magna;“ et rursus in psalmo<sup>4)</sup>: „Non fecit taliter omni nationi et iudicia sua non manifestavit eis.“

*VI. Quare tanta maiestate legem suam Israelitis olim Deus trahere voluerit.*

Verum si parochus rationem praeterea latae legis ex Scripturae auctoritate demonstrarit, facile intelligent fideles, quam pie ac suppliciter acceptam Dei legem colere oporteat; triduo enim antequam ferretur lex<sup>5)</sup>, Dei iussu dictum est omnibus, ut vestimenta lavarent, uxores non attingerent, quo sanctiores ac paratiores essent ad accipiendo legem; ut „ad diem tertium“ adessent. Deinde quum ad montem essent adducti, unde Dominus illis per Moysem legem erat latus, uni Moysi dictum est, ut in montem ascenderet; quo Deus maxima cum maiestate venit, et locum tonitruis, fulgoribus, igne densisque nebulis circumfudit, ac loqui cum Moyse coepit, eique leges dedit; quod divina sapientia nullam aliam ob causam factum voluit, nisi nos ut moneret, casto humilique animo legem Do-

<sup>1)</sup> Ex. 20, 2. <sup>2)</sup> Malach. 1, 6. <sup>3)</sup> Deut. 4, 6. <sup>4)</sup> Ps. 147, 20. <sup>5)</sup> Ex. 19, 9. sq.

mini accipiendam esse; quod si paecepta negligeremus, paratas nobis a divina iustitia poenas imminere.

*VII. Quomodo lex, tanto terrore promulgata, ab hominibus impleri possit, et quod nihil amore facilius sit.*

Quin etiam legis iussa difficultatem non habere ostendat parochus; quod vel una hac ratione ex S. Augustino docere poterit, quum dicit: „Qui, quaeso, dicitur impossibile esse homini amare; amare, inquam, creatorem beneficum, patrem amantissimum, dcinde etiam et carnem suam in fratribus suis? At vero, „qui<sup>1)</sup> diligit . . . legem implevit.“ Quare Ioannes<sup>2)</sup> apostolus paecepta Dei gravia non esse aperte testatur; nihil enim iustius, nihil cum maiore dignitate, nihil maiore cum fructu ab homine teste D. Bernardo<sup>3)</sup> exigi potuisse. Quamobrem summam Dei benignitatem admiratus est Augustinus<sup>4)</sup> sic ipsum Deum affatus: „Quid tibi sum ipse, ut amari te iubeas a me? et nisi faciam irasceris mihi et mineris ingentes miserias? Parvane ipsa est, si non amem te?“. Quod si quis eam afferat excusationem, impediri se, quominus Deum amet, infirmitate naturae: docendum est, Deum, qui amorem requirit, amoris vim inserere<sup>5)</sup> cordibus per Spiritum sanctum suum; hic autem Spiritus bonus potentibus<sup>6)</sup> a Patre coelesti datur, ut merito S. Augustinus<sup>7)</sup> precatus sit: „Da quod iubes, et iube quod vis.“ Quia igitur Dei auxilium praesto nobis est, maxime post Christi Domini mortem, per quam princeps huius mundi electus est foras: non est, quod quisquam rei difficultate deterreatur; nihil enim est amanti difficile.

*VIII. Teneantur omnes homines necessario ad legis observationem.*

Praeterea ad eandem rem persuadendum plurimum valebit, si explicabitur, necessario legi obtemperandum esse; praesertim quum nostris temporibus non defuerint, qui, sive facilis sive difficilis sit lex, ad salutem tamen nequaquam necessariam esse, impie et magno ipsorum malo dicere non veritisunt. Quorum nefariam impianque sententiam sacrae Scripturae testimonis parochus confutabit; eiusdem maxime Apostoli, cuius illi auctoritate impietatem suam tueri conantur. Quid igitur ait Apostolus<sup>8)</sup>: „Non paeputium, non circumcisionem quidquam esse, sed observationem mandatorum Dei?“ Quod vero candem sententiam alibi repetit<sup>9)</sup>, et novam creaturam in Christo tantum dicit valere: intelligimus plane, eum „novam creaturam in Christo“ dicere, qui mandata Dei obser-

<sup>1)</sup> Rom. 13, 8. <sup>2)</sup> I. Io. 5, 3. <sup>3)</sup> de dil. Deo c. 1. <sup>4)</sup> Confess. lib. 1. c. 5. <sup>5)</sup> Rom 5, 5. <sup>6)</sup> Luc. 11, 13. <sup>7)</sup> de don. pers. c. 53. <sup>8)</sup> I. Cor. 7, 19. <sup>9)</sup> Gal. 6, 15.

vat. Is enim, qui habet mandata Dei ac servat, diligit Deum, Domino ipso teste apud Ioannem<sup>1)</sup>: „Si quis diligit me, sermonem meum servabit.“ Nam etsi iustificari potest homo, et ex impiο fieri pius, antequam singula legis praecepta externis actionibus impleat: tamen fieri non potest, ut, qui per aetatem ratione uti queat, ex impiο fiat iustus, nisi animum habeat paratum ad omnia praecepta Dei servanda.

*IX. Quos fructus consequantur, qui legem divinam observant.*

Ad extreum vero ne quid praetermittat parochus, quo fidelis populus adducatur, ut legem servet: quam sint eius uberes suavesque fructus demonstrabit; quod facile poterit ex iis, quae psalmo decimo octavo scripta sunt, probare; in eo enim legis Dei laudes celebrantur, quarum haec est vel maxima, quae Dei gloriam et maiestatem multo amplius explicat, quam decoro suo atque ordine faciant ipsa coelestia corpora, quae ut omnes quamvis barbaras nationes in sui admirationem rapiunt, ita efficiunt, ut rerum omnium opificis et conditoris gloriam, sapientiam ac potentiam agnoscant. Ac lex quidem Domini<sup>2)</sup> convertit animas ad Deum; agnoscentes enim vias eius et Dei sanctissimam voluntatem per legem, convertimus pedes nostros in vias Domini. At quia soli timentes Deum vere sapientes sunt, hoc illi deinceps tribuit; ut sapientiam praestet parvulis. Hinc veris gaudiis, et mysteriorum divinorum cognitione, ingentibus praeterea voluptatibus et praemiis et in hac vita et in futuro saeculo illi cumulantur, qui Dei legem observant.

*X. Quum omnia Dei voluntatem faciant, hominem eandem voluntatem sequi aequissimum ostenditur.*

Nec vero tam nostrae utilitatis gratia, quam Dei causa nobis est servanda lex, qui suam hominum generi in lege voluntatem aperuit; quam quum ceterae creaturae sequantur, hominem ipsum eandem sequi multo est aequius. Ne id quidem silentio praetercundum est, vel in hoc maxime suam in nos Deum clementiam et summae bonitatis divitias ostendisse; quod, quum sine ullo praemio nos potuisset, ut suae gloriae serviremus, cogere, voluit tamen suam gloriam cum utilitate nostra coniungere, ut, quod homini utile, idem esset Deo gloriosum. Quoniam igitur id maximum et praeclarissimum est, docebit parochus, ut a Propheta ultimo loco<sup>3)</sup> dictum est: „in custodiendis illis retributionem multam esse.“ Non enim tantum illae nobis benedictiones promissae sunt, quae ad terrenam magis felicitatem spectare videbantur, ut bene-

<sup>1)</sup> Io. 14, 21. <sup>2)</sup> Ps. 18, 8. <sup>3)</sup> Ps. 18, 12.

dicti<sup>1)</sup> simus in civitate, benedicti in agro, „sed<sup>2)</sup> copiosa merces in coelis,“ et „mensura bona<sup>3)</sup>, conferta, coagitata, et superfluens“ proposita est, quam piis et iustis actionibus meremur, divinae misericordiae adiumento.

*XI. Quo pacto lex Moysis omnium actatum homines obliget, quaque occasione Israelitis promulgata fuerit.*

Quamvis haec lex Iudeis in monte a Domino data fuerit, tamen, quoniam natura omnium mentibus multo ante impressa et consignata erat, atque ob eam rem Deus universos homines illi perpetuo parere voluit: plurimum proderit, verba illa, quibus Moyse ministro atque interprete Hebraeis promulgata est, et populi Israelitici historiam, quae mysteriorum est plena, diligenter explicare. Principio narrabit parochus, ex omnibus nationibus, quae sub coelo erant, unam Deum delegisse, quae ortum habuit ab Abraham, quem peregrinum esse voluit in terra Chanaan; cuius possessionem quum ei pollicitus esset, tamen et ille et posteri eius amplius quadringentos annos vagi fuerunt, antequam promissam terram incolerent; in qua quidem peregrinatione nunquam eorum curam dimisit. Trausibant quidem illi<sup>4)</sup> „de gente in gentem et de regno ad populum alterum,“ sed nullam unquam illis iniuriam fieri passus est; immo vero iu reges animadvertisit. Priusquam autem in Aegyptum descenderent, virum praecepit, cuius prudentia et illi et Aegyptii fame liberarentur. In Aegypto vero ea illos benignitate complexus est, ut repugnante et incumbente ad illorum perniciem Pharaone mirum in modum augerentur; et quum valde affligerentur, ac tanquam servi durissime tractarentur, ducem Moysem excitavit, qui eos in manu potenti educeret. Huius praecipue liberationis initio legis meminit Dominus his verbis<sup>5)</sup>: „Ego sum Dominus Deus tuus, qui eduxi te de terra Aegypti, de domo servitutis.“

*XII. Cur Iudaei in populum a Deo delecti fuerint.*

Ex his vero illud maxime parocho animadvertendum est: unam ex universis nationibus a Deo delectam esse, quam populum vocaret suum, et cui se cognoscendum et colendum praeberet; non quod ceteras iustitia aut numero vinceret, quemadmodum Hebraeos monet Deus<sup>6)</sup>, sed quod ipsi Deo sic placuit, potius ut gentem exiguum et inopem augeret et locupletaret, quo eius potentia et bonitas notior apud omnes esset, et illustrior. Quum igitur ea esset illorum hominum conditio, iis „conglutinatus<sup>7)</sup> est, et hos amavit“ ita, ut, quum esset Do-

<sup>1)</sup> Deut. 28, 3. <sup>2)</sup> Mat. 5, 12. <sup>3)</sup> Luc. 6, 38. <sup>4)</sup> Ps. 104, 13. I. Par. 16, 21.  
<sup>5)</sup> Ex. 20, 2. — Ex. 1, 12. 3. 9. <sup>6)</sup> Deut. 7, 7. <sup>7)</sup> Deut. 10, 15.

minus coeli et terrae, non confunderetur vocari Deus eorum, quo ceteras gentes ad aemulationem provocaret, ut perspecta Israelitarum felicitate omnes homines ad veri Dei cultum sese conferrent; quemadmodum etiam Paulus<sup>1)</sup> testatur, se gentium felicitate proposita, et vera Dei cognitione, qua eas instruxerat, ad aemulationem carnem suam provocare.

*XIII. Cur Hebraei diu multumque vexati sint, antequam legem acciperent.*

Deinde fideles docebit, Deum Hebraeos patres diu peregrinari passum esse, posteros etiam durissima servitute premi divexarique permisisse ob eam rem, uti doceremur, amicos Dei fieri non nisi mundi inimicos ac peregrinos in terris, itaque in Dei familiaritatem filius recipi, si nihil omnino nobis sit commune cum mundo; tam vero, ut ad Dei cultum translati intelligeremus, quanto feliciores demum sint ii, qui Deo, quam qui mundo serviunt, cuius rei nos Scriptura commonet; ait enim<sup>2)</sup>: „Verumtamen servient ei, ut sciant distantiam servitutis meae, et servitutis regni terrarum.“ Praeterea explicabit, post amplius quadringentis annis Deum promissa praestitisse, ut ille populus fide ac spe aleretur. Alumnos enim suos Deus a se perpetuo pendere vult, atque in eius bonitate omnem spem suam collocare, ut in primi praecepti explanatione dicetur.

*XIV. Cur tali loco et tempore lex data fuerit.*

Postremo locum ac tempus notabit, quibus hanc legem populus Israel a Deo accepit; nempe postquam eductus ex Aegypto, in desertum venit, ut beneficii recentis memoria allactus, et loci asperitate, in quo versabatur, deterritus, ad accipiendam legem aptior redderetur. Homines enim iis maxime devinciuntur, quorum beneficentiam experti sunt, atque ad Dei praesidium configiunt, quem se omni spe humana destitutos esse vident. Ex quo licet intelligere, fideles ad complectendam coelestem doctrinam eo propensiores esse, quo se magis a mundi illecebris, et carnis voluptatibus abstraxerint; sicut per Prophetam<sup>3)</sup> scriptum est: „Quem docebit scientiam? et quem intelligere faciet auditum? ablactatos a lacte, avulsos ab uberibus.“

---

<sup>1)</sup> Rom. 11, 14. <sup>2)</sup> II. Par. 12, 8. <sup>3)</sup> Is. 28, 9.

## CAPUT II.

## De primo Praecepto.

I. Quod sibi istud exordium velit, et quaenam in eo continetur mysteria.

Enitatur itaque parochus, et, quantum potest, efficiat, ut fidelis populus haec verba semper in animo habeat: „Ego sum Dominus Deus tuus;“ ex quibus intelligent, legislatorem se crearem habere, a quo et conditi sunt, et conservantur, iureque illud usurpent<sup>1)</sup>: „Ipse est Dominus Deus noster, et nos populus pascuae eius, et oves manus eius.“ Quorum verborum vehemens et frequens admonitio eam vim habebit, ut ad legem colendam fideles promptiores reddantur, et a peccatis abstineant. Quod autem sequitur: „qui eduxi te de terra Aegypti, de domo servitutis,“ etsi Iudeis tantum videtur convenire Aegyptiorum dominatu liberatis: tamen, si interiorem salutis universae rationem spectemus, multo magis ad Christianos homines pertinet, qui non ex Aegyptiaca servitate, sed ex peccati regione et potestate<sup>2)</sup> tenebrarum a Deo erepti, atque in regnum filii dilectionis suae translati sunt. Cuius beneficij magnitudinem intuens Ieremias, praedixit illud<sup>3)</sup>: „Ecce dies veniunt, dicit Dominus, et non dicetur ultra: Vivit Dominus, qui eduxit filios Israel de terra Aegypti; sed: vivit Dominus, qui eduxit filios Israel de terra Aquilonis, et de universis terris, ad quas eieci eos; et reducam eos in terram suam, quam dedi patribus eorum. Ecce ego mittam piscatores multos, dicit Dominus, et piscabuntur eos,“ et quae sequuntur. Pater enim indulgentissimus per Filium suum filios, qui erant dispersi, congregavit in unum, ut iam non ut servi peccato, sed iustitiae, „serviamus<sup>4)</sup> illi in sanctitate et iustitia coram ipso, omnibus diebus nostris.“

II. Quo modo ex principio huius decalogi fideles affici debeant.

Quare fideles omnibus temptationibus tanquam clypeum opponent illud Apostoli<sup>5)</sup>: „Qui mortui sumus peccato, quomodo adhuc vivemus in illo?“ iam non sumus nostri, sed eius, qui pro nobis mortuus est et resurrexit; ipse est Dominus Deus noster, qui nos suo sanguine sibi acquisivit; quomodo peccare poterimus in Dominum Deum nostrum, ipsumque iterum cruci affigere? Ut igitur vere liberi, et ea quidem libertate, qua nos Christus liberavit, sicut<sup>6)</sup> exhibueramus membra nostra servire iniustitiae, ita exhibeamus servire iustitiae in sanctificationem.

<sup>1)</sup> Ps. 94, 7. <sup>2)</sup> Col. 1, 13. <sup>3)</sup> Ier. 16, 14. seq. <sup>4)</sup> Luc. 1, 74. 75. <sup>5)</sup> Rom. 6, 2. II. Cor. 5, 15. <sup>6)</sup> Rom. 6, 19. Gal. 4, 31. Hebr. 6, 6.

Non habebis Deos alienos coram me.

*III. Quid hoc primum praeceptum observandum fugiendumque complectatur.*

Priorem in decalogo locum obtinere, quae ad Deum pertinent, posteriorem vero, quae ad proximum, docebit parochus, quia eorum, quae proximo praestamus, causa Deus est; tum enim ex Dei pracepto proximum diligimus, quum propter Deum diligimus; ea vero sunt in priori tabula descripta. Secundo loco, in verbis iis, quae proposita sunt, duplex contineri praeceptum ostendet; quorum alterum iubendi, alterum prohibendi vim habet. Nam quod dicitur: „Non habebis Deos alienos coram me,“ eam habet sententiam coniunctam: Me verum Deum coles, alienis Diis cultum non adhibebis.

*IV. Quo modo hoc praecetto fides, spes et caritas continuantur.*

In priori autem continetur praeceptum fidei, spei et caritatis. Nam quum Deum dicimus immobilem, incommutabilem, perpetuo eundem manentem; fidelem recte sine ulla iniuritate confitemur; ex quo eius oraculis assentientes omnem ipsi fidem et auctoritatem tribuamus necesse est. Qui vero omnipotentiam, clementiam, et ad benefaciendum facilitatem ac propensionem illius considerat: poteritne spes omnes suas non in illo collocare? At si bonitatis ac dilectionis ipsius effusas in nos divitias contempletur, illumne poterit non amare? Hinc est illud prooemium, hinc illa conclusio, qua in praecipiendo, mandandoque in Scriptura utitur Deus: „Ego Dominus.“

*V. Praeceptum hoc, ut negativum est, exponitur.*

Altera autem praecetti pars, illa est: „Non habebis Deos alienos coram me;“ qua loquendi formula legislator usus est, non quod satis explicata non esset haec sententia affirmatione praecetti in hunc modum: Me unum Deum coles; si enim Deus est, unus est: sed propter caecitatem plurimorum, qui olim Deum verum se colere profitebantur, mutitudinem tamen deorum venerabantur; cuiusmodi inter Hebraeos ipsos permulti fuerunt, qui, ut Helias eis obiiciebat (III. Reg. 18, 21.) „in duas partes claudicabant;“ quod et Samaritae fecerunt, qui Deum Israelis, et Deos gentium colebant. (IV. Reg. 17, 29.)

*VI. Quo modo hoc praeceptum omnium maximum censendum sit.*

His explicatis addendum erit, hoc esse praeceptum omnium primum et maximum, non ordine tantum ipso, sed ratione, dignitate et praestantia. Debet enim obtainere Deus apud nos infinitis partibus maiorem, quam domini, quam regis, caritatem et auctoritatem. Ipse nos creavit, idem gubernat, ab eo in utero

matris nutriti, atque inde in hanc lucem educti sumus; ipse nobis ad vitam victumque res suppeditat necessarias.

*VII. Qui praecipue sint rei violati huius praecepti.*

Peccant autem in hoc praeceptum, qui fidem, spem et caritatem non habent; quorum peccatum latissime patet. Sunt enim in hoc numero, qui in haeresim labuntur, qui non credunt ea, quae sancta mater ecclesia credenda proponit; qui somniis, auguriis ceterisque vanissimis rebus fidem habent; qui de sua salute spem abiiciunt, nec divinae bonitati confidunt; qui divitiis tantum, qui corporis valetudine ac viribus nuntuntur; quae fusi ab iis explicata sunt, qui de vitiis et peccatis conscriperunt.

*VIII. Non adversatur huic praecepto cultus, qui ex recepto ecclesiae usu sanctis tribuitur.*

Verum illud etiam in huius praecepti explicatione accurate docendum est, venerationem et invocationem sanctorum angelorum ac beatarum animarum, quae coelesti gloria perfruuntur, aut etiam corporum ipsorum, sanctorumque cinerum cultum, quem semper catholica ecclesia adhibuit, huic legi non repugnare. Quis enim adeo deimens est, qui, edicente rege, ne se pro rege quisquam gerat, aut regio cultu atque honore affici patiatur, continuo putet, nolle regem suis ut magistratibus honos deferatur? Etsi enim angelos Christiani adorare dicuntur, exemplo sanctorum veteris Testamenti: non eam tamen illis venerationem adhibent, quam Deo tribuunt. Quod si legimus interdum angelos recusasse, ne se homines venerarentur, eo fecisse intelligendum est, quod sibi eum honorem haberi nolebant, qui soli Deo deberetur.

*IX. Quo modo sanctos Angelos colere liceat, ex Scripturis ostenditur.*

Spiritus enim sanctus, qui ait (I. Tim. 1, 17.): „Soli Deo honor et gloria;“ idem praecepit, ut honore parentes et seniores afficeremus. Sancti praeterea viri, qui Deum unum colebant, „Reges“ tamen, ut est in divinis literis, „adorabant,“ id est, supplices venerabantur. Quod si reges, per quos Deus mundum gubernat, tanto honore afficiuntur: angelicis spiritibus, quos Deus ministros suos esse voluit, et quorum opera non modo ad ecclesiae suae, sed etiam ad reliquarum rerum gubernationem utitur, quorumque ope maximis tum animae, tum corporis periculis quotidie liberamur, etiamsi se nobis in conspectum non dent, tanto maiorem honorem non habebimus, quanto beatae illae mentes dignitate regibus ipsis antecellant? Adde caritatem, qua nos diligunt, qua ducti pro iis provin-

ciis, quibus praesunt, ut ex Scriptura facile intelligitur, preces fundunt; quod etiam praestare iis, quorum sunt ipsi custodes, ne dubitandum quidem est; nostras enim preces Deo offerunt, et lacrymas. Quamobrem in Evangelio docuit Dominus: pusilios scandalizandos non esse, „quod<sup>1)</sup> angeli eorum in coelis semper vident faciem Patris, qui in coelis est.“

*X. Invocando esse sanctos Angelos, ex Scripturis probatur.*

Invocandi itaque sunt, quod et perpetuo Deum intuentur, et patrocinium salutis nostrae sibi delatum libentissime suscipiunt. Exstant divinae Scripturae testimonia huius invocationis. Iacob<sup>2)</sup> enim ab angelo, quicum luctatus fuerat, petit, ut sibi benedicat, immo etiam cogit; se enim non dimissurum illum profitetur, nisi benedictione accepta, neque eam solum sibi ab eo tribui, quem intuebatur, sed ab eo etiam, quem minime videbat, tum quem dixit<sup>3)</sup>: „Angelus, qui eruit me de cunctis malis, benedicat pueris istis.“

*XI. Sanctorum invocatione et reliquiarum veneratione nihil honori Dei detrahitur.*

Ex quibus etiam colligi poterit, tantum abesse, ut sanctis, qui in Domino dormierunt, honore afficiendis atque invocandis et sacris eorum reliquiis cineribusque venerandis Dei gloria minuatur: ut eo maxime augeatur, quo magis hominum spem excitat, confirmat, et ad sanctorum imitationem cohortatur; quod officium Nicaeno altero, et Gangrensi, ac Tridentino conciliis, et sanctorum Patrum auctoritate comprobatur.

*XII. Quibus potissimum argumentis Sanctorum invocatio stabilienda sit.*

Quo autem sit ad refutandos eos instructior parochus, qui huic veritati adversantur: SS. Hieronymum contra Vigilantium, et Damascenum potissimum legat; ad quorum rationem, quod caput est, accedit consuetudo ab Apostolis accepta, et in ecclesia Dei perpetuo retenta et conservata; cuius rei quis firmius aut clarius requirat argumentum divinae Scripturae testimonio, quae sanctorum laudes celebrat admirabiliter? Exstant enim quorundam sanctorum divinae praecognitiae<sup>4)</sup>. Quorum laudes quem sacris literis celebrentur, quid est, quod illis singularem honorem non habeant homines? Etsi ob eam causam magis etiam colendi et invocandi sunt, quod pro salute hominum preces assidue faciunt, multaque eorum merito et gratia in nos Deus confert beneficia. Si enim „gaudium<sup>5)</sup> est in coelo super uno peccatore poenitentiam agente,“ nonne etiam coelestes cives

<sup>1)</sup> Mat. 18, 10. <sup>2)</sup> Gen. 32, 26. <sup>3)</sup> Gen. 48, 16. <sup>4)</sup> Eccl. cap. 44—50. <sup>5)</sup> Luc. 15, 7.

*Dec. I*  
poenitentes adiuvabunt? nonne rogati peccatorum veniam et impetrabunt, et conciliabunt nobis Dei gratiam?

*XIII. Illam Sanctorum invocationem ex quadam auxilii divini diffidentia, fideique imbecillitate non proficisci, demonstratur.*

Quodsi dicatur, ut a nonnullis dicitur, supervacaneum esse sanctorum patrocinium, quod Deus sine interprete precibus nostris occurrat: has impiorum voces illud sancti Augustini<sup>1)</sup> facile convincit: multa Deum non concedere, nisi mediatoris ac deprecatoris opera et officium accesserit. Quod illustribus Abimelech et Iob amicorum confirmatur exemplis, quorum peccata non nisi Abraham et Iob precibus condonavit. Si vero etiam asseratur, fieri inopia et imbecillitate fidei, ut sanctos internuncios et patronos adhibeamus: quid ad illud respondebunt centurionis<sup>2)</sup> exemplum, qui vel in singulari illo fidei praeconio, quod ei Dominus Deus impertivit, seniores tamen Iudeorum ad Salvatorem misit, ut laboranti puero salutem impetrarent?

*XIV. Doctrina de uno mediatore Christo non tollit Sanctorum invocationem.*

Quare si fatendum est, unum nobis mediatorem propositum Christum Dominum, qui scilicet unus nos per sanguinem Patri coelesti reconciliavit, et qui, „aeterna<sup>3)</sup>“ redemptione inventa, semel in sancta ingressus pro nobis interpellare non cessat: ex eo tamen nullo modo sequi potest, quo minus ad sanctorum gratiam confugere liceat. Nam si propterea subsidiis sanctorum uti non liceat, quod unum patronum habemus Iesum Christum: nunquam id commisisset Apostolus, ut se Deo tanto studio fratrum viventium precibus adiuvari vellet; neque enim minus vivorum preces, quam eorum, qui in coelis sunt, sanctorum deprecatione, Christi mediatoris gloriam et dignitatem imminuerent.

*XV. Unde reliquiarum virtus confirmetur, et quanta sit earum vis et efficacia, demonstratur.*

Sed cui fidem non faciant et honoris, qui sanctis debetur, et patrocinii, quod nostri causa suscipiunt, mirabiles effectae res ad eorum sepulchra, et oculis, et manibus, membrisque omnibus captis, in pristinum statum restitutis, mortuis ad vitam revocatis, ex corporibus hominum electis daemoniis? quae non audisse, ut multi, non legisse, ut plurimi gravissimi viri, sed vidisse, testes locupletissimi SS. Ambrosius et Augustinus litteris tradiderunt. Quid multa? si vestes, sudaria, si umbra sanctorum, priusquam e vita migrarent, depulit morbos, vires-

<sup>1)</sup> q. 149. sup. Exod. <sup>2)</sup> Mat. 8, 10. Luc. 7, 3. <sup>3)</sup> Hebr. 9, 12. 1. Tim. 2, 5.

que restituit: quis tandem negare audeat, Deum per sacros cineres, ossa, ceterasque sanctorum reliquias, eadem mirabiliter efficere? Declaravit id cadaver illud, quod forte illatum in sepulchrum Elisaei<sup>1)</sup>), eius tacto corpore, subito revixit.

*XVI. Verba sequentia non alterum, sed unum cum praecedentibus praeceptum constituunt.*

Quod vero sequitur: „Non facies tibi sculptile, neque omnem similitudinem, quae est in coelo desuper, et quae in terra deorsum, nec eorum, quae sunt in aquis sub terra. Non adorabis ea, neque coles:“ quidam hoc alterum praeceptum existimantes, duo postrema ipsa unius praecepti vi contineri voluerunt; at S. Augustinus<sup>2)</sup>), illa extrema dividens, haec ipsa verba ad primum praeceptum pertinere voluit; quam sententiam, quia in ecclesia celebris est, libenter sequimur. Etsi in promptu ratio est illa verissima, consentaneum fuisse, primum et poenam cuiusque cum primo praecepto coniungi.

*XVII. Adversus hoc praeceptum non pugnat receptus in ecclesia imaginum usus.*

Nec vero quis existimet, omnino pingendi, fingendi, aut sculpendi artem hoc praecepto prohiberi; nam in Scripturis iussu Dei simulacula et imagines effectas legimus, „Cherubim<sup>3)</sup>), serpentis aenei<sup>4)</sup>).“ Superest igitur, ut imagines ob eam rem vetitas interpretetur, ne quid simulacris, quasi diis, colendis de vero Dei cultu detraheretur.

*XVIII. Quibus praesertim modis per imagines divinum numen violari possit.*

Duplici autem potissimum ratione, quod ad hoc praeceptum attinet, Dei maiestatem vehementer laedi perspicuum est: altera, si idola et imagines tanquam Deus colantur, aut credatur inesse aliqua in his divinitas vel virtus, propter quam sint colendae, vel quod ab eis aliquid sit petendum, vel quod fiducia in imaginibus sit figenda, veluti olim fiebat a gentibus, quae in idolis spem suam collocabant, quod passim sacrae litterae reprehendunt. Altera, si quis conetur, divinitatis formam aliquo artificio effingere, quasi corporeis oculis conspici, vel coloribus aut figuris exprimi possit. „Quis enim Deum,“ ut inquit Damascenus<sup>5)</sup>), „qui sub aspectum non cadit, qui corporis expers est, qui nullis terminis circumscribi, nec ulla figura describi queat, possit exprimere?“ Quae res in altera Nicaena synodo uberius explicatur. Praeclare igitur Apostolus eos

<sup>1)</sup> Act. 5, 15, 19, 12. IV. Reg. 18, 21. <sup>2)</sup> in Exod. qu. 71. <sup>3)</sup> Ill. Reg. 6, 23.  
<sup>4)</sup> Num. 21, 9. <sup>5)</sup> Is. 10, 10. 40, 15, Act. 17, 29. <sup>6)</sup> de orthod. fide lib. 4. c. 16.

mutasse „Dei incorruptibilis gloriam<sup>1)</sup> in similitudinem corruptibilis hominis et volucrum, quadrupedum ac serpentum<sup>2)</sup> dixit; haec enim omnia tanquam Deum venerabantur, quum illi harum rerum imagines ponerent. Quocirca Israelitae, qui ante vituli simulacrum clamabant<sup>3)</sup>: „Hi sunt dii tui Israel, qui te eduxerunt de terra Aegypti,“ idololatiae sunt appellati, quia „mutaverunt<sup>3)</sup> gloriam suam in similitudinem vituli comedentis foenum.“

*XIX. Quis sit posterioris istius partis praecepti sensus.*

Cum igitur Dominus deos alienos coli prohibuisset, ut penitus idolatriam tolleret, imaginem divinitatis ex aere duci, aut alia quavis materia fieri prohibuit; quod Isaias<sup>4)</sup> declarans, inquit: „Cui ergo similem fecistis Deum, aut quam imaginem ponetis ei?“ Atque in hoc praecepto hanc sententiam contineri, praeter sanctorum Patrum scripta, qui eam, quemadmodum in septima synodo expositum est, sic interpretantur, illa etiam Deuteronomii<sup>5)</sup> verba satis declarant, ubi Moyses, populum avertere ab idolatria quum vellet, aiebat: „Non vidi- stis aliquam similitudinem in die, qua locutus est vobis Dominus in Horeb de medio ignis.“ Quod sapientissimus legislator ideo dixit, ne quo errore ducti divinitatis imaginem fingerent, Deoque debitum honorem rei creatae tribuerent.

*XX. Hoc praeceptum, qui Trinitatis personas effingunt, non violant.*

Nemo tamen propterea contra religionem Deique legem quidquam committi putet, quum sanctissimae Trinitatis aliqua persona quibusdam signis exprimitur, quae tam in veteri quam in<sup>6)</sup> novo Testamento apparuerunt; nemo enim tam rudis est, ut illa imagine divinitatem credit exprimi, sed illis declarari doceat pastor proprietates aliquas, aut actiones, quae Deo tribuuntur; veluti quum ex Daniele<sup>7)</sup> pingitur „antiquus dierum“ in throno sedere, ante quem „libri aperti sunt,“ Dei aeternitas et infinita sapientia significatur, qua omnes hominum et cogitationes et actiones, ut de iis iudicium ferat, intuetur.

*XXI. Angeli qua ratione pingantur.*

Angelis etiam tum humana species, tum alae affinguntur, ut intelligent fideles, quam propensi sint in humanum genus, et tamquam parati ad ministeria Domini exequenda. „Omnes enim<sup>8)</sup> administratorii spiritus sunt propter eos, qui hereditatem capiunt salutis.“

<sup>1)</sup> Rom. 1, 23. <sup>2)</sup> Ex. 32, 8. <sup>3)</sup> Ps. 105, 20. <sup>4)</sup> Is. 40, 18. <sup>5)</sup> Deut. 4, 15. <sup>6)</sup> Gen. 18, 2. Mat. 3, 16. 17, 5. <sup>7)</sup> Dan. 7, 9, 10. <sup>8)</sup> Hebr. 1, 14.

*XXII. De columba, in qua Spiritus sanctus depingitur.*

„Columbae“ vero „species, et linguae tanquam ignis,“ in Evangelio et Actis Apostolorum, quas Spiritus sancti proprietates significant, multo notius est, quam ut oporteat pluribus verbis explicari.

*XXIII. Christi et Sanctorum imagines pingi et honorari debent.*

At vero quum Christus Dominus, eiusque sanctissima et purissima Mater, ceterique omnes sancti, humana praediti natura, humanam speciem gesserint: eorum imagines pingi atque honorari, non modo hoc praecepto interdictum non fuit, sed etiam sanctum et grati animi certissimum argumentum semper habitum est; quod et apostolicorum temporum monumenta, et oecumenicae synodi, et tot sanctissimorum doctissimorumque Patrum inter se consentientium scripta confirmant.

*XXIV. Quis sit legitimus in ecclesia imaginum usus.*

Non solum autem licere in ecclesia imagines habere, et illis honorem et cultum adhibere, ostendet parochus, quum honos, qui eis exhibetur, referatur ad prototypa: verum etiam maximo fidelium bono ad hanc usque diem factum declarabit, ut ex Damasceni libro, quem de imaginibus edidit, et septima synodo, quae est secunda Nicaena, intelligitur. Verum quia sanctissimum quodque institutum hostis humani generis suis fraudibus et fallaciis depravare contendit, si quid forte populo hac in re peccatum fuerit, parochus, Tridentini concilii decretum secutus, quoad eius fieri poterit, studebit corrigere, ac decretum<sup>1)</sup> quidem ipsum, quum res tulerit, populo interpretabitur; tum rudes, et qui imaginum ipsarum institutum ignorant, docebit, imagines factas ad utriusque Testamenti cognoscendam historiam, atque eius memoriam identidem renovandam, qua rerum divinarum memoria excitati, ad colendum atque amandum ipsum Deum vehementius inflammemur. Sanctorum quoque imagines in templis positas demonstrabit, ut et colantur, et exemplo moniti, ad eorum vitam ac mores nos ipsos conformemus.

Ego<sup>2)</sup> sum Dominus Deus tunc, fortis, zelotes, visitans iniquitatem patrum in filios, in tertiam et quartam generationem eorum, qui oderunt me; et faciens misericordiam in millia iis, qui diligunt me, et custodiunt praecepta mea.

*XXV. Non pertinet haec appendix dumtaxat ad primum praeceptum.*

Duo sunt in extrema parte huius praecepti diligenter explicanda: primum est, quod etsi ob summum scelus praevari-

<sup>1)</sup> Sess. 25.

*fecit,*

cationis primi praecepti, atque hominum ad id committendum propensionem apte hoc loco poena proponitur, communis tamen est omnium appendix praceptorum; omnis enim lex ad praecpta servanda homines poena et praemio inducit. Hinc illae tam frequentes in sacris literis et crebrae Dei promissiones. Ut enim innumerabilia pene Testamenti veteris testimonia praetermittamus: in Evangelio scriptum est<sup>1)</sup>: „Si vis ad vitam ingredi, serva mandata;“ et alibi<sup>2)</sup>: „Qui facit voluntatem Patris mei, qui in coelis est, ipse intrabit in regnum coelorum;“ tum illud<sup>3)</sup>: „Omnis arbor, quae non facit fructum bonum, excidetur, et in ignem mittetur;“ et<sup>4)</sup>: „Omnis qui irascitur fratri suo, reus erit iudicio;“ atque alibi<sup>5)</sup>: „Si non dimiseritis hominibus, nec Pater vester dimittet vobis peccata vestra.“

*XXVI. An eodem modo poena, praevericatoribus hic intentata, carnalibus et perfectis inculcanda sit.*

Alterum est, quod longe alia ratione perfecti, alia carnales homines hanc appendicem edocendi sunt. Perfectis enim, qui Spiritu Dei aguntur, eique prompto et alaci animo parent, instar est cuiusdam laetissimi nuncii, et magnum argumentum propensae in eos divinae voluntatis; agnoscent enim sui amantissimi Dei curam, qui nunc praemiis, nunc poenis ad sui cultum et venerationem homines prope compellat; agnoscent eius immensam in se benevolentiam, qui sibi imperare, suaque opera ad divini nominis gloriam uti velit; neque solum agnoscent, sed magna in spe sunt, illum, quem quod vult iubeat, etiam daturum vires, quibus legi ipsius parere possint. At carnalibus, qui nondum spiritu servitutis liberati sunt, magisque metu poenarum, quam amore virtutis abstinent a peccatis, eius appendicis sensus gravis et acerbus est. Quamobrem sunt piis exhortationibus sublevandi, et quo lex spectat, quasi manu deducendi. Parochus autem, quoties alicuius explicandi praecipi occasio inciderit, eadem haec sibi habeat proposita.

*XXVII. Quid verba illa: Ego sum Deus fortis, meditandum proponant.*

Carnalibus perinde tamen ac spiritualibus duo in primis quasi aculei sunt admovendi, qui ad legem observandam hac ipsa in appendice positi, homines maxime incitent. Nam quod Deus „fortis“ dicitur, ideo diligentius est explicandum, quod caro saepe, quae terroribus divinae comminationis minus comovetur, varias sibi ipsa rationes fingit, quibus iram Dei effugere, ac propositam poenam vitare possit; cui autem certo

<sup>1)</sup> Mat. 19, 17. <sup>2)</sup> ib. 7, 21. <sup>3)</sup> ib. 3, 10. <sup>4)</sup> ib. 5, 22. <sup>5)</sup> ib. 6, 15.

persuasum est, Deum fortem esse, illud magni Davidis usurpat<sup>1)</sup>: „Quo ibo a Spiritu tuo? et quo a facie tua fugiam?“ Eadem quoque divinis interdum diffusa promissis, tantas hostium vires esse credit, ut ad sustinendum minime parem sese esse existimet. At firma et stabilis fides nihil titubans, quum divina vi ac virtute nitatur, homines contra recreat atque confirmat; ait enim<sup>2)</sup>: „Dominus illuminatio mea, et salus mea; quem timebo?“

*XXVIII. Quid sibi velit, quod Deus se etiam dicat zelotem.*

Alter vero aculeus zelus ipse divinus est. Nonnunquam enim homines putant Deum humana non curare, ne illud quidem, legem ipsius servemus, an negligamus. Ex quo sequitur magna vitae confusio. Quum autem Deum zelotem credimus, eius rei meditatio facile nos in officio continet.

*XXIX. Cuiusmodi zelus Deo sit attribuendus.*

Zelus vero, qui Deo tribuitur, nullam animi significat perturbationem, sed divinum illum amorem et caritatem, qua Deus nullam a se animam patitur impune fornicari; quotquot autem ab eo fornicantur, perdit. Est itaque zelus Dei tranquillissima eius sincerissima iustitia, qua anima, falsis opinionibus pravisque cupiditatibus corrupta, repudiatur, et a Dei coniugio tanquam adultera removetur. At vero zelum hunc Dei suavissimum ac dulcissimum experimur, quum summa eius atque incredibilis in nos voluntas zelo ipso demonstratur. Nec enim aut amor ardentior inter homines, aut maior arctiorque coniunctio, quam eorum, qui coniugio copulati sunt, reperitur. Igitur quam nos valde diligat, ostendit Deus, quum crebro se vel sposo, vel marito comparans, zelotem vocat. Quamobrem doceat parochus hoc loco, sic divini cultus atque honoris cupidos homines esse debere, ut zelantes potius, quam amantes iure dici possint, illius exemplo, qui de se ipse: „Zelo,“ inquit<sup>3)</sup>, „zelatus sum pro Domino Deo exercituum;“ immo vero Christum ipsum imitentur, cuius illud est<sup>4)</sup>: „Zelus domus tuae comedit me.“

*XXX. Quae sit comminationis hic intentatae sententia.*

Est autem comminationis explicanda sententia, non inultos peccatores passurum Deum, sed eos vel tanquam parentem castigaturum, vel tanquam iudicem acriter ac severe in eos animadversurum. Quod alio in loco significans Moyses<sup>5)</sup>: „et scies,“ inquit, „quia Dominus Deus tuus ipse est Deus

<sup>1)</sup> Ps. 138, 7. <sup>2)</sup> Iac. 1, 6. Ps. 23, 1. <sup>3)</sup> III. Reg. 19, 14. <sup>4)</sup> Ps. 68, 10. Io. 2, 17. <sup>5)</sup> Deut. 7, 9.

Acc. I.

fortis et fidelis, custodiens pactum et misericordiam diligentibus se, et his, qui custodiunt praecepta eius, in mille generationes; et reddens odientibus se statim;<sup>1)</sup> et Iosue<sup>2)</sup>: „Non poteritis,“ inquit, „servire Domino; Deus enim sanctus et fortis aemulator est, nec ignoscet sceleribus vestris atque peccatis. Si dimiseritis Dominum, et servieritis diis alienis, convertet se, et affliget vos, atque subvertet.“

*XXXI. Quomodo Deus visitet peccata patrum in filios, in tertiam et quartam generationem.*

Docendus autem populus est, comminationis poenam ad tertiam quartamque impiorum et facinorosorum generationem pertinere, non quod posteriores maiorum scelerum poenas semper luant, sed licet illi liberique eorum impune tulerint, non omnis tamen eorum posteritas iram Dei vel poenam vitabit. Qnod Iosiae regi accidit<sup>2)</sup>). Huic enim propter singularem pietatem quum pepercisset Deus, dedissetque, ut in pace in sepulcrum maiorum suorum inferretur, ne videret consequentium temporum mala, quae propter Manassis avi impietatem Iudee et Hierusalem erant eventura: eo mortuo posteros eius est ultio Dei consecuta<sup>3)</sup>), sic, ut ne filiis quidem Iosiae pepercera.

*XXXII. Quomodo haec verba cum verbis Ezechielis convenient.*

Qua autem ratione haec legis verba sententiae illi, quae est apud Prophetam non adversentur<sup>4)</sup>): „Anima, quae peccaverit, ipsa morietur,“ sancti Gregorii<sup>5)</sup> auctoritas, cum reliquis omnibus antiquis Patribus consentiens, aperte ostendit; ait enim: Quisquis pravi parentis iniquitatem imitatur, etiam ex eius delicto constringitur; quisquis autem parentis iniquitatem non imitatur, nequaquam delicto illius gravatur; unde fit, ut iniquus filius iniqui patris non solum sua, quae addidit, sed etiam patris peccata persolvat, quum vitiis patris, quibus iratum Dominum non ignorat, etiam suam adhuc malitiam adiungere non formidat. Et iustum est, ut qui sub districto iudice vias parentis iniqui non timet imitari, cogatur in vita prae-senti etiam culpas parentis iniqui persolvere. Commemorabit deinde parochus, quantum Dei iustitiam superet eiusdem bonitas ac misericordia. Irascitur tertiae quartaque generationi Deus, misericordiam vero in millia impertit.

*XXXIII. Quinam divinarum legum praevaricatores Deum odisse censeantur.*

In eo autem, quod dictum est: „eorum qui oderunt me,“ peccati magnitudo ostenditur. Quid enim flagitosius ac dete-

<sup>1)</sup> Ios. 24, 19. 20. <sup>2)</sup> II. Par. 34, 28. <sup>3)</sup> IV. Reg. 23, 26. <sup>4)</sup> Ez. 18, 4. <sup>5)</sup> Moral. 15, 21.

stabilius, quam summam ipsam bonitatem, summam veritatem odisse? Hoc vero ad omnes peccatores idcirco pertinet, quod quemadmodum „qui habet<sup>1)</sup> mandata“ Dei, „et servat ea,“ Deum „diligit:“ ita, qui legem Domini contemnit, et mandata eius non servat, Deum odisse merito dicendus est.

*XXXIV. Quid sit illud: Faciens misericordiam his, qui diligunt me.*

Quod vero extreum est: „et iis, qui diligunt me,“ servandae legis modum ac rationem docet; necesse est enim, eos, qui legem Dei servant, eadem caritate atque amore, quo in Deum sunt, ad eius obedientiam adduci; quae deinceps in singulis praceptis commemorabuntur.

### CAPUT III.

#### De secundo Praecepto.

Non<sup>2)</sup> assumes nomen Domini Dei tui in vanum.

*I. Cur Deus hanc legem de suo ipsius nomine honorando speciatim ferre voluerit.*

Quamquam primo divinae legis pracepto, quo Deum pie sancteque colere iubemur, hoc, quod secundo loco sequitur, necessario continetur, (nam qui sibi honorem tribui vult, idem postulat, se ut summo verborum honore prosequamur, prohibetque contraria; quod et illa Domini apud Malachiam verba aperte indicant<sup>3)</sup>): „Filius honorat patrem, et servus dominum suum; si ergo pater ego sum, ubi est honor meus?“: Deus tamen pro rei magnitudine hanc de suo ipsius divino et sanctitatis plenissimo nomine honorando legem separatim ferre, idque nobis disertis et perspicuis verbis praescribere voluit.

*II. Quantum niti parochi debeant in huius pracepti explicatione.*

Quod sane parocco ipsi arguento in primis esse debet, nequaquam satis fore, si hac de re generatim loquatur: sed eiusmodi locum hunc esse, in quo ipse diutius commorari et quaecunque ad hanc tractationem pertinent, distinete, dilucide accurateque apud fideles explicare necesse sit. Neque vero nimia haec diligentia censenda est, quum non desint, qui adeo errorum tenebris obcaecati sint, ut quem angeli glorificant, ei maledicere non vereantur. Neque enim lege semel lata deterrentur, quo minus Dei maiestatem quotidie immunuere, immo singulis pene horis ac momentis impudentissime

<sup>1)</sup> Io. 14, 21. <sup>2)</sup> Ex. 20, 7. Deut. 5, 11. <sup>3)</sup> Mal. 1, 6.

*J.C. M.*

audeant. Quis enim non videat, omnia iureiurando affirmari? omnia imprecationibus et exsecrationibus referta esse? usque adeo, ut nemo fere vel vendat aliquid, vel emat, vel negotium aliquod gerat, qui non iurisiurandi religionem interponat, Deique sanctissimum nomen millies vel in re levissima et inani temere non usurpet? quo maior parocho cura et diligentia adhibenda est, ut saepe fideles admoneat, quam grave hoc scelus sit et detestabile.

*III. Quid secundum istud praeceptum imperet vel prohibeat.*

Iam vero in huius praecepti explicatione id primum constet, cum eo, quod lex fieri prohibet, earum etiam rerum praeceptionem coniunctam esse, quas praestare homines debent. Utrumque autem separatim docendum est; primum quidem, ut ea, quae tradenda sunt, facilius exponantur, quid iubeat lex; mox etiam quid vetet. Nam quae imperat, illa sunt: nomen Dei esse honorandum, ac per illud sancte iurandum. Haec rursus, quae prohibit: nemo divinum nomen contemnat, nemo illud in vanum assumat, neve per ipsum aut false, aut frustra, aut temere iuret.

*IV. Quid Dei nomine hic intelligatur.*

In ea itaque parte, qua iubemur divino nomini honorem tribuere, parochus fidelibus praecipiat, Dei nomen, ipsius, inquam, literas et syllabas, aut omnino per se nudum verbum tantummodo, attendendum non esse, sed in eam cogitationem venientium, quid valeat illa vox, quae omnipotentem ac sempiternam maiestatem unius et trini numinis significat. Ex his autem facile colligitur, inanem esse nonnullorum Iudaeorum superstitionem, qui quod scriberent Dei nomen, pronunciare non auderent; quasi in quatuor illis literis, non in re, divina vis esset. Sed quamvis singulari numero prolatum sit: „Non assumes nomen Dei:“ id non de uno aliquo nomine, sed de omnibus, quae Deo tribui solent, intelligendum est; multa enim Deo imposita sunt nomina, ut Domini, Omnipotens, Domini exercituum, Regis regum, Fortis, et alia id genus, quae in Scripturis leguntur, quae parem eandemque venerationem habent omnia. Deinde docendum est, quomodo divino nomini debitus honor adhibeatur; neque enim Christiano populo, cuius ore Dei laudes assidue celebrandae sunt, rem utilissimam et pernecessariam ad salutem ignorare est fas.

*V. Qua ratione divinum nomen venerari aut honorare censemur.*

Quamvis autem multiplex sit ratio laudandi divini nominis, tamen in iis, de quibus deinceps hic dicetur, vis et pondus

omnium videtur esse. Primum igitur laudatur Deus, quem in omnium conspectu Deum ac Dominum nostrum fidenter confitemur, Christumque salutis nostraræ auctorem, quemadmodum agnoscimus, ita etiam praedicamus. Itemque quum verbo Dei, quo voluntas eius enunciatur, sancte et diligenter operam damus, in eius meditatione assidue versamur, studiose illud addiscimus, aut legendō, aut audiendo, perinde ut cuiusque personae et muneri aptum et consentaneum est. Deinde divinum nomen veneramur et colimus, quum officii et religionis causa divinas laudes celebramus, ac de omnibus rebus, tum prosperis, tum adversis, illi singulares gratias agimus. Ait enim Propheta<sup>1</sup>): „Benedic anima mea Domino, et noli oblivisci omnes retributions eius.“ Exstantque plurimi David psalmi, quibus egregia quadam erga Deum pietate illius divinas laudes suavissime decantat. Exstat admirabile illud patientiae exemplum Iob, qui, quum in maximas illas horribilesque calamitates incidisset, Deum tamen excelso et invicto animo laudare nunquam intermisit. Nos itaque, quum animi corporisque doloribus cruciamur, quum miseriis et aerumnis torquemur, statim ad Deum laudandum omue studium et animi nostri vires convertamus, illud Iob dicentes<sup>2</sup>): „Sit nomen Domini benedictum.“

#### *VI. Quo modo huic item praecepto alias pareamus.*

Neque vero minus Dei nomen honoratur, si fidenter opem eius imploramus, quo scilicet aut nos ab illis liberet, aut ad eadem fortiter preferenda constantiam et robur largiatur. Hoc enim fieri vult Dominus: „Invoca,“ inquit<sup>3</sup>), „me in die tribulationis: eruam te, et honorificabis me;“ cuius imploratio-  
nis cum multis aliis in locis, tum praecipue in Psalmis 16.  
43. 118. illustria reperiuntur exempla. Praeterea Dei nomen honore prosequimur, quum fidei facienda causa testamur Deum; qui modus a superioribus valde differt. Nam quae supra memoravimus, ita suapte natura bona sunt atque expe-  
tenda, ut nihil beatius, nihil homini optabilius possit esse, quam si in illis sedulo exsequendis se ipsum dies noctesque exerceat. „Benedicam,“ inquit David<sup>4</sup>), „Dominum in omni tempore: semper laus eius in ore meo.“ At iusurandum, licet bonum sit, eius tamen frequens usus minime est laudabilis.

#### *VII. Quare iurisiurandi frequentior usus non sit probandus.*

Huius autem discriminis ratio in eo posita est, quod iusurandum ea tantum de causa institutum est, ut esset tan-  
quam remedium quoddam humanae imbecillitatis, et ad pro-

<sup>1</sup>) Ps. 102, 2. <sup>2</sup>) Iob. 1, 21. 2, 10. Ps. 71, 17. <sup>3</sup>) Ps. 49, 15. <sup>4</sup>) Ps. 33, 2.

bandum, quod dicimus, necessarium instrumentum. Ut enim corpori medicamenta adhibere non expedit, nisi necesse sit, eorundem vero frequentatio perniciosa est: ita etiam, nisi quum gravis et iusta causa subest, iureiurando uti non est salutare. Quod si saepius adhibeatur, tantum abest, ut prosit, ut magnum detrimentum afferat. Quamobrem paeclare docet sanctus Chrysostomus<sup>1)</sup>, non nascente, sed iam adulto mundo, quum mala longe lateque propagata universum terrarum orbem occupassent, nihilque suo loco et ordine consisteret, sed perturbata et permixta omnia sursum deorsum magna rerum confusione ferrentur, et, quod malorum omnium gravissimum est, mortales fere omnes in foedam idolorum servitutem se ipsos abieccissent: tum denique longo sane intervallo iusiurandum in hominum consuetudinem irrepssisse. Nam quum in tanta hominum perfidia et iniquitate nemo facile ad credendum adduceretur, Deum testem invocabant.

#### VIII. In quo consistat iuramenti ratio; quidque proprie sit iurare.

Verum quum in hac praecepsi parte praecipua sit illa ratio docendi fideles, quomodo iusiurandum pie sancteque adhibere debeant: primum dicendum est, „iurare“ nihil aliud esse, nisi Deum testari, quacumque id verborum forma et conceptione fiat. Nam et: „Testis est mihi Deus,“ et: „per Deum,“ idem sunt. Est etiam illud iusiurandum, cum ad faciendam fidem per res creatas iuramus, ut per sacra Dei Evangelia, per crucem, per sanctorum reliquias et nomen, et cetera id genus. Neque enim haec ipsa per se iureiurando auctoritatem aut robur aliquod afferunt: sed Deus ipse hoc praestat, cuius divinae maiestatis splendor illis in rebus elucescit. Ex quo sequitur, ut per Evangelium iurantes per Deum ipsum iurent, cuius veritas Evangelio continetur et declaratur; similiter et per sanctos<sup>2)</sup>, qui templa Dei sunt, quique evangeliae veritati crediderunt, eamque omni observantia coluerunt, et per gentes et nationes latissime disseminarunt.

#### IX. De ea iurisiurandi forma, quae per execrationem fit.

Eadem ratio est illius iurisiurandi, quod per execrationem profertur; quale est illud S. Pauli<sup>3)</sup>: „Ego testem Deum invoco in animam meam;“ etenim hoc pacto aliquis Dei iudicio tanquam mendacii ulti subiicitur. Neque propterea negamus, nonnullas ex hisce formulis ita accipi posse, quasi iurisiurandi vim non habent: sed tamen utile est, quae de iureiurando dicta sunt, in his etiam servare, atque ad eandem prorsus normam et regulam dirigere.

<sup>1)</sup> in Act. hom. 9. <sup>2)</sup> I. Cor. 8, 16. <sup>3)</sup> II. Cor. 1, 23.

*X. Quotuplex sit iuramentum.*

Duo autem sunt iurandi genera: primum quidem, quod assertorium appellatur; nimirum quum aliquid de re praesenti aut praeterita religiose affirmamus, ut Apostolus in epistola ad Galatas<sup>1)</sup>: „Ecce coram Deo, quia non mentior.“ Alterum vero promissorium dicitur, ad quod etiam comminationes referuntur, futurum tempus spectans, quum aliquid ita fore pro certo pollicemur et confirmamus; cuiusmodi est illud Davidis<sup>2)</sup>, qui Bersabeae coniugi iurans „per Dominum Deum“ suum, promisit Salomonem eius filium regni heredem fore, atque in ipsis locum successorum.

*XI. Quot sint ad legitimum iuramentum requisita.*

Verum enim vero licet ad iusiurandum satis sit Deum testem adhibere, tamen ut rectum sanctumque sit, multo plura requiruntur, quae sunt diligenter explicanda. Ea vero breviter, teste divo Hieronymo, Ieremias enumerat, cum inquit: „Iurabis: vivit Dominus, in veritate, et in iudicio et in iustitia<sup>3)</sup>,“ quibus sane verbis illa breviter summatimque complexus est, quibus omnis iuriurandi perfectio continetur, veritatem, inquam, iudicium et iustitiam.

*XII. Quomodo iuramentum praestetur in veritate.*

Primum itaque in iureiurando locum „veritas“ habeat; nimirum ut quod asseritur, et ipsum verum sit, et qui iurat, id ita esse arbitretur, non quidem temere aut levi conjectura adductus, sed certissimis argumentis. Alterum vero iuriurandi genus, quo aliquid promittimus, eodem plane modo veritatem requirit; nam qui aliquid pollicetur, ita animatus esse debet, ut, quum tempus advenerit, id re ipsa praestet, et promissum exsolvat. Neque enim vir probus id unquam se facturum recipiet, quod sanctissimis Dei praeceptis et voluntati adversari putet; sed quidquid promittere et iurare licuerit, id semel promissum nunquam mutabit; nisi fortasse, commutata rerum conditione, tale esse incepit, ut iam, si fidem servare et promissis stare velit, Dei odium et offenditionem subiret. Veritatem autem in iureiurando necessariam esse, David quoque indicat illis verbis<sup>4)</sup>: „Qui iurat proximo suo, et non decipit.“

*XIII. Quis dicatur iurare in iudicio, quamque ob causam pueris iuramentum non sit deferendum.*

Sequitur secundo loco „iudicium;“ neque enim iusiurandum temere et inconsiderate, sed consulto et cogitato adhiberi debet. Itaque iuraturus primum quidem consideret, utrum

<sup>1)</sup> Gal. 1, 20. <sup>2)</sup> III. Reg. 1, 30. <sup>3)</sup> Ier. 4, 2. <sup>4)</sup> Ps. 14, 4.

See. II.

necessitate cogatur, nec ne; remque totam accurate expendat, an eiusmodi sit, ut iureiurando indigere videatur. Tempus praeterea spectet, locum attendat, aliaque permulta, quae rebus adiuncta sunt, circumspiciat; non odio, non amore, aut animi perturbatione aliqua impellatur, sed ipsius rei vi et necessitate. Etenim, nisi haec consideratio et diligens animadversio antecesserit, sane iusiurandum praeceps et temerarium erit. Cuiusmodi et illorum irreligiosa affirmatio, qui in re levissima et inani, nulla ratione aut consilio, sed prava quadam consuetudine iurant. Id vero passim quotidie a vendoribus et emptoribus fieri videmus; nam illi ut quam plurimo vendant, hi rursus ut quam minimo emant, res venales vel laudare, vel vituperare iureiurando non dubitant. Quum itaque iudicio et prudentia opus sit, pueri vero ita acute perspicere ac distinguere nondum per aetatem possint, idcirco constitutum est a S. Cornelio<sup>1)</sup> Pontifice, ne a pueris ante pubertatem, hoc est, ante 14. annum, iusiurandum exigatur.

*XIV. Quo pacto in iustitia iuretur.*

Reliqua est iustitia, quae maxime in promissis requiritur; quare si quis iniustum aliquid et in honestum promittit, et iurando peccat, et missis faciendis scelus scelere cumulat. Exstat huius rei in Evangelio exemplum Herodis regis, qui, temerario iureiurando obstrictus, puellae saltatrici caput Ioannis Baptiste<sup>2)</sup> tanquam saltationis praemium dedit. Tale etiam fuit Iudeorum iusiurandum, qui se ipsos, ut est in Actis Apostolorum<sup>3)</sup>, ea conditione devoverunt, nihil gustaturos, donec Paulum occidissent.

*XV. Quibus praecipue rationibus intelligatur iusiurandum esse aliquando licitum.*

His ita explicatis nulla plane dubitatio relinquitur, quin illi tuto iurare liceat, qui haec omnia servaverit, quique hisce conditionibus tanquam praesidiis quibusdam iusiurandum munierit. Sed et multis argumentis id probare facile est. Nam „lex Domini,“ quae „immaculata“<sup>4)</sup> est et sancta, hoc praecipit: „Dominum,“ inquit<sup>5</sup>), „Deum tuum timebis, et illi soli serbies; ac per nomen illius iurabis;“ et a Davide scriptum est<sup>6)</sup>: „Laudabuntur omnes, qui iurant in eo.“ Praeterea sacrae literae indicant, ipsa ecclesiae lumina sanctissimos Apostolos iureiurando aliquando usos esse; idque ex Apostoli epistolis apparent. Adde quod et angeli ipsi interdum iurant; nam a

<sup>1)</sup> c. 16. C. XXII. qu. 5. <sup>2)</sup> Marc. 6, 23. <sup>3)</sup> Act. 23, 12. <sup>4)</sup> Ps. 18, 8. <sup>5)</sup> Deut. 6, 13. <sup>6)</sup> Ps. 62, 12.

sancto Ioanne Evangelista in Apocalypsi<sup>1)</sup> scriptum est, angelum iurasse „per viventem in saecula.“ Quin etiam et Deus ipse iurat angelorum dominus; et in veteri Testamento multis in locis Deus promissiones suas iureiurando confirmat; ut Abraham<sup>2)</sup> et Davidi, qui illud de Dei iureiurando prodidit: „Iuravit,“ inquit<sup>3)</sup>, „Dominus, et non poenitebit eum; tu es sacerdos in aeternum secundum ordinem Melchisedec.“

*XVI. Iusiurandum rite praestitum, esse in laude reponendum, probatur.*

Neque vero obscura est ratio ad explicandum, cur iusiurandum laudabile sit, si quis attentius totam rem consideret, et ipsius ortum finemque intueatur. Etenim iusiurandum a fide originem dicit, qua homines credunt Deum totius veritatis esse auctorem, qui nec decipi unquam possit, nec alios decipere; „cuius<sup>4)</sup> oculis nuda sunt omnia et aperta;“ qui denique universis rebus humanis admirabili providentia consultit, mundumque administrat. Hac igitur fide homines imbuti Deum veritatis testem adhibent, cui fidem non habere impium ac nefarium erit.

*XVII. Iurisiurandi finis est controversiarum et litium finis.*

Quod vero ad finem attinet, eo tendit iusiurandum, atque id omnino spectat, ut hominis iustitiam et innocentiam probet, finemque litibus et controversiis imponat; quod etiam Apostolus in epistola ad Hebreos<sup>5)</sup> docet.

*XVIII. Quo modo Christus iuramentum prohibuerit.*

Neque huic sententiae verba illa Salvatoris nostri apud S. Matthaeum repugnant<sup>6)</sup>: „Audistis, quia dictum est antiquis: Non periurabis; reddes autem Domino iuramenta tua. Ego autem dico vobis, non iurare omnino; neque per coelum, quia thronus Dei est, neque per terram, quia scabellum pedum eius, neque per Hierosolymam, quia civitas est magni regis; neque per caput tuum iuraveris, quia non potes unum capillum album facere, aut nigrum. Sit autem sermo vester: est, est; non, non; quod autem his abundantius est, a malo est.“ His enim verbis iusiurandum generatim universeque damnari, non est dicendum, quum iam supra viderimus, Dominum ipsum Apostolosque frequenter iurasse; sed perversum Iudeorum iudicium redarguere Dominus voluit, quo sibi in animum inducerant, nihil in iureiurando cavendum esse, praeter mendacium. Itaque de rebus levissimis et nullius momenti et ipsi iurabant saepissime, et ab aliis iusiurandum exigebant. Hunc morem

<sup>1)</sup> Apoo. 10, 6. Dan. 12, 7. <sup>2)</sup> Hebr. 6, 17. <sup>3)</sup> Ps. 109, 4. <sup>4)</sup> Hebr. 4, 13. Sap. 8, 1. <sup>5)</sup> Hebr. 6, 16. <sup>6)</sup> Mat. 5, 33–37. Iac. 5, 12.

*Dec. II.*

Salvator reprehendit atque improbat, docetque omnino a iure-iurando abstinendum esse, nisi id flagitet necessitas.

*XIX. Quo modo Christus dixerit, illud, quod ad simplicem veritatis assertionem accedit, esse a malo.*

Nam propter humanam imbecillitatem iusiurandum institutum est, et revera a malo provenit, quando quidem aut iurantis inconstantiam indicat, aut illius, cuius causa iuramus, contumaciam, qui, ut credat, aliter adduci non potest. Sed tamen iurandi necessitas excusationem habet. Et quidem, dum inquit Salvator<sup>1)</sup>: „Sit sermo vester: est, est; non, non“: hac loquendi formula satis declarat, se iurandi consuetudinem in colloquiis familiarium et levium rerum prohibere. Quamobrem illud praecipue a Domino admonemur, ne faciles nimium et propensi ad iurandum simus, idque sedulo docendum erit, et fidelium auribus inculcandum. Infinita enim fere mala ex nimia iurandi consuetudine emanare, et sacrarum literarum auctoritate, et sanctissimorum Patrum testimonis comprobatur. In Ecclesiastico scriptum est<sup>2)</sup>: „Iurationi non assuecat os tuum; multi enim casus in illa.“ Item: „Vir multum iurans implebitur iniuriae, et non discedet a domo illius plaga.“ Plura hac de re legi possunt apud sanctos Basilium<sup>3)</sup> et Augustinum in libris contra mendacium. Et hactenus de iussis; nunc de vetitis dicatur.

*XX. Cur iuramentum falsum et temerarium sit tam grande peccatum.*

Vetamur divinum nomen in vanum assumere; apparet enim, eum gravi peccato se obstringere, qui non consilio, sed temeritate ad iurandum fertur. Gravissimum autem delictum hoc esse, illa etiam verba declarant: „Non assumes nomen Domini Dei tui in vanum,“ quasi rationem afferret, cur hoc facinus scelestum adeo ac nefarium sit; nimirum propterea, quod eius maiestas minuitur, quem nos Deum et Dominum nostrum esse profitemur. Hoc igitur praecepto prohibetur, ne homines falsum iurent. Nam qui a tanto scelere non refugit, ut Deum falso testetur, hic insignem Deo iniuriam facit; quippe qui aut illi inscitiae notam inurit, dum ipsum alicuius rei veritatem latere arbitratur, aut certe improbitatis et pravi affectus, qui mendacium testimonio velit confirmare.

*XXI. Quo modo peierent illi, qui iurant esse verum, quod verum est.*

Iurat autem falso, non is solum, qui, quod falsum scit, verum esse iurando affirmat, sed ille etiam, qui iureiurando

<sup>1)</sup> Mat. 5, 37. <sup>2)</sup> Eclus. 23, 9. 12. 27, 15. <sup>3)</sup> hom. in Ps. 14.

id asserit, quod quum verum sit, tamen ipse falsum putat. Nam quum mendacium ea re mendacium sit, quod contra mentem et animi sententiam profertur: perspicuum est, hunc plane mentiri et periurum esse.

*XXII. Iurans falsum, quod verum esse putat, quo modo peccet.*

Simili quoque ratione peierat, qui id iurat, quod verum existimat, et tamen revera falsum est, nisi quantum potuit, curam et diligentiam adhibuerit, ut totam rem compertam atque exploratam haberet. Quamvis enim ipsius oratio mente consentiat, tamen huius praecepti reus est.

*XXIII. Qui non servat quod iuravit, aut vovit se facturum, ut peccet.*

Eiusdem vero peccati reus censendus est, qui se aliquid iureiurando facturum promittit, quum tamen aut promissum implere in animo non fuerit, aut, si fuit, quod promisit re ipsa non praestat. Quod etiam ad eos pertinet, qui, cum se voti sponsione Deo obligarunt, non praestant.

*XXIV. Peccatum mortiferum iurans, vel contra consilium evangelicum, ut peccet.*

Praeterea in hoc praeceptum peccatur, si desit iustitia, quae ex tribus iurisiurandi comitibus una est. Itaque si quis iuret se peccatum aliquod mortiferum commissurum, exempli causa caedem hominis, huius praecepti reus est, licet ille serio atque ex animo dicat, et iusiurandum veritatem habeat, quam primo loco requiri declaravimus. His adiungi debent illa iurandi genera, quae a contemptu quodam profiscuntur, quum quis iurat, se non obtemperaturum evangelicis consiliis, cuiusmodi sunt, quae ad coelibatum et paupertatem hortantur; quamvis enim nemo ea necessario sequi debeat, si quis tamen iuret, nolle se illis parere consiliis, is eo iureiurando divina consilia contemnit et violat.

*XXV. Levibus coniecturis adductus iurans, peccat.*

Praeterea hanc legem is violat, et iudicio peccat, qui quod verum est iurat, idque ita se habere existimat, levibus quibusdam coniecturis adductus et longe petitis; nam etsi huiusmodi iusiurandum veritas comitatur, subest tamen aliquo modo falsum; nam qui sic negligenter iurat, in magno peierandi periculo versatur.

*XXVI. Qui per falsos deos iurat, graviter peccat.*

Falso praeterea iurat, qui per falsos deos iurat. Quid enim est a veritate alienius, quam mendaces et fictitious deos tanquam verum Deum testari?

*Dec. II.*  
XXVII. *Dei verbum inhonorsans, vel male interpretando, vel ad vana convertendo, peccat.*

Verum quoniam Scriptura, quum peririum interdixit, inquit<sup>1)</sup>: „Nec pollues nomen Dei tui,“ neglectio prohibetur, quae fugienda est in reliquis, quibus ex huius praecepti auctoritate honor debetur; quale est verbum Dei, cuius maiestatem non solum pii, sed interdum etiam impii reverentur, ut in Iudicum historiā<sup>2)</sup> de Eglon Moabitarum rege memoriae traditum est. Dei autem verbum summa iniuria afficit, quicunque sacram Scripturam a recta et germana eius sententia ad impiorum dogmata et haereses flectit; cuius sceleris admonet nos princeps Apostolorum verbis illis<sup>3)</sup>: „Sunt quaedam difficultia intellectu, quae indocti et instabiles depravant, sicut et ceteras scripturas, ad suam ipsorum perditionem.“ Praeterea foedis et inhonestis maculis S. Scriptura contaminatur, quum eius verba et sententias, quae omni veneratione colenda sunt, ad profana quaeque nefarii homines torquent; ad scurilia scilicet, fabulosa, vana, assentationes, detractiones, sortes, libellos famosos, et si qua sunt alia id genus; in quod peccatum sacra Tridentina synodus<sup>4)</sup> animadverti iubet.

XXVIII. *Qui Deum in suis calamitatibus non invocant, ut peccent.*

Deinde ut ii Deum honorant, qui eius opem atque auxilium in suis calamitatibus implorant: ita debitum Deo honorem ii negant, qui illius subsidium non invocant; quos redarguit David, quum inquit<sup>5)</sup>: „Deum non invocaverunt; illic trepidaverunt timore, ubi non erat timor.“

XXIX. *Gravissima omnium horum peccatorum est in Deum eiusque sanctos blasphemia.*

At vero longe magis detestabili scelere se ipsos adstringunt, qui sacrosanctum Dei nomen, ab omnibus creaturis benedicendum et summis laudibus extollendum, aut etiam sanctorum nomen cum Deo regnantium, impuro et contaminato ore blasphemare atque execrari audent; quod quidem peccatum usque adeo atrox atque immane est, ut interdum sacrae literae, si de blasphemia sermo incidat, „benedictionis“ nomine utantur<sup>6)</sup>.

XXX. *Cur huic praecepto suo quaedam minae sint subiectae.*

Quoniam vero poenae et supplicii terror peccandi licentiam vehementer coercere solet: idcirco parochus, ut hominum animos magis permoveat, atque ad hoc praeceptum ser-

<sup>1)</sup> Levit. 19, 12. <sup>2)</sup> Iud. 3, 20. <sup>3)</sup> II. Petr. 3, 16. <sup>4)</sup> Sess. 4, de ed. et usu sacr. Ibr. <sup>5)</sup> Ps. 13, 5. <sup>6)</sup> III. Reg. 21, 13. Iob. 1, 11. 2, 9.

vandum facilius impellat, alteram illius partem et quasi appendicem diligenter explicabit<sup>1</sup>): „Nec enim habebit insontem Dominus eum, qui assumpserit nomen Domini Dei sui frustra.“ Ac primum quidem doceat, summa ratione factum esse, ut huic praeecepto minae adiungerentur; quo quidem et peccati gravitas, et in nos Dei benignitas agnoscat, qui, quum hominum perditione non delectetur<sup>2</sup>), ne ipsius iram et offenditionem subeamus, hisce salutaribus minis nos deterret, nimirum, ut illum benevolum potius, quam iratum experiamur. Urget hunc locum pastor, instetque summo studio, ut populus scleris gravitatem agnoscat, et illud detestetur vehementius, et in eo evitando maiorem diligentiam et cautionem adhibeat. Ostendat praeterea, quanta sit hominum proclivitas ad hoc peccatum committendum, ut non satis fuerit legem ferre, nisi etiam minae adderentur. Incredibile enim est, quantum haec cognitio utilitatis habeat; nam ut nihil aequa nocet, atque incauta quaedam animi securitas: ita propriae imbecillitatis cognitio plurimum prodest. Tum illud etiam declaret, nulluna a Deo certum supplicium constitutum fuisse, sed tantum universe minari, quicumque se hoc scelere adstrinxerit, non impune laturum. Quapropter diversa supplicia, quibus quotidie affligimur, huius peccati admonere nos debent. Hinc enim facile licet coniicere, homines ea re in maximas calamitates incidere, quod huic praeecepto non obtemperent. Quibus sibi propositis cautiiores eos in posterum fore verisimile est. Fideles itaque sancto timore perterriti, omni studio peccatum hoc fugiant; nam si omnis verbi otiosi in extremo iudicio redenda ratio est<sup>3</sup>), quid de gravissimis sceleribus dicendum, quae magnam divini nominis despicientiam pree se ferunt?

## CAPUT IV.

### *De tertio Praecepto.*

**Memento**<sup>4</sup>) ut diem sabbati sanctifices. Sex diebus operaberis et facies omnia opera tua; septima autem die sabbatum Domini Dei tui est; non facies omne opus in eo tu, et filius tuus, et filia tua, servus tuus, et ancilla tua, iumentum tuum, et advena, qui est intra portas tuas. Sex enim diebus fecit Dominus coelum et terram, mare, et omnia, quae in eis sunt, et requievit in die septima; idcirco benedixit Dominus diei sabbati, et sanctificavit eum.

<sup>1</sup>) Ex. 20, 7. <sup>2</sup>) Tob. 8, 22. <sup>3</sup>) Mat. 12, 36. <sup>4</sup>) Ex. 20, 8—11. Deut. 5, 12.

*I. Quid tertio hoc paecepto fidelibus imperetur.*

Hoc legis paecepto externus ille cultus, qui Deo a nobis debetur, recte atque ordine praescribitur; est enim hic veluti quidam prioris paecepti fructus, quoniam quem intimis sensibus pie colimus, fide et spe adducti, quam in eo positam habemus, non possumus eum non externo cultu venerari, eidemque gratias agere. Et quoniam haec ab iis, qui humanarum rerum occupationibus detinentur, non facile paeestari possunt: certum tempus statutum est, quo ea commode effici queant.

*II. Cur paecepue danda opera sit parocho, ut, quod hic pae- scribitur, perpetua fidelium memoria retineatur.*

Itaque quum hoc paeceptum eiusmodi sit, ut fructum utilitatemque admirabilem afferat: maximi interest parochi, summam in eo explicando diligentiam adhiberi. Ad eius autem inflammandum studium, magnam vim habet primum illud paecepti verbum: „Memento.“ Nam quemadmodum fideles tale paeceptum meminisse debent, sic pastoris est, in eorum memoriam illud et monendo et docendo saepe redigere. Quantum vero fidelium referat, hoc paeceptum colere, ex eo percipitur, quod eo diligenter colendo ad reliqua legis iussa servanda facilius adducentur. Quum enim inter cetera, quae diebus festis paeestare debent, necesse habeant, verbi Dei audiendi causa ad ecclesiam convenire: quum edocti fuerint divinas iustificationes, illud etiam consequentur, ut ex toto corde custodiant legem Domini. Quamobrem saepissime „sabbati celebritas cultusque“ paecepit in SS. literis, ut in Exodo, Levitico, Deuteronomio, apud Isaiam, Ieremiam item, et Ezechielem Prophetas videre licet; quibus omnibus in locis hoc de sabbati cultu traditum est paeceptum.

*III. Quo modo principes ad ecclesiae pae sidibus opitulandum hortandi sint.*

Monendi vero et hortandi sunt principes et magistratus, ut in iis maxime, quae ad hunc cultum Dei retinendum atque augendum pertinent, ecclesiae pae sides auctoritate sua iuvent, iubeantque populum sacerdotum paeceptis obtemperare. Quod autem ad huius paecepti explanationem attinet, danda opera est, ut fideles doceantur, quibus rebus hoc paeceptum cum ceteris conveniat, quibusve differat ab eis. Hoc enim pacto causam illi rationemque cognoscent, quare non sabbatum, sed diem dominicum colamus sanctumque habeamus.

*IV. Qua ratione hoc paeceptum a ceteris decalogi legibus discrepet.*

Certa igitur illa differentia videtur, quod reliqua decalogi paecepta naturalia sunt et perpetua, neque ulla ratione immutari

possunt; quo factum est, ut quamvis lex Moysis abrogata sit, omnia tamen praecpta, quae duabus tabulis continentur, populus Christianus servet; quod ideo fit, non quia Moyses ita iusserit, sed quod naturae convenient, cuius vi homines ad illa servanda impelluntur. Hoc autem de sabbati cultu praecptum, si statutum tempus spectatur, non fixum et constans est, sed mutabile, neque ad mores, sed ad caeremonias pertinet, neque naturale, quoniam non a natura ad id docti aut instituti sumus, ut illo die potius, quam alio, externum cultum Deo tribuamus, sed ex tempore, quo populus Israeliticus a Pharaonis est servitute liberatus, diem sabbati coluit.

*V. Tempore mortis Christi legis caeremoniis sublati, etiam sabbatum, qua parte fuit caeremoniale, sublatum est.*

Tempus autem, quo sabbati cultus tollendus erat, illud idem est, quo ceteri Hebraici cultus caeremoniaeque antiquandae erant; morte scilicet Christi. Nam quum illae caeremoniae sint quasi adumbratae imagines lucis et veritatis, illud utique necesse erat, ut lucis ac veritatis, quae Iesus Christus est, adventu removerentur; qua de re sanctus Paulus ad Galatas ita scripsit<sup>1)</sup>, quum Mosaici ritus cultores reprehenderet: „Dies observatis, et menses, et tempora, et annos; timeo vos, ne forte sine causa laboraverim in vobis.“ In quam etiam sententiam scripsit ad Colossenses<sup>2)</sup>. Et haec de differentia.

*VI. Quo pacto tertium hoc praeceptum cum reliquis novem consentiat.*

Convenit autem hoc praeceptum cum reliquis, non ritu et caeremoniis, sed quia aliquid habet, quod ad mores naturaeque ius attineat. Nam Dei cultus ac religio, quae hoc praecpto exprimitur, a naturae iure existit, quum illud natura comparatum sit, ut aliquot horas in iis, quae ad Dei cultum pertinent, versemur. Cuius rei argumento est, quod apud omnes nationes statas quasdam ferias, easque publicas fuisse cernimus, quae sacris rebus ac divinis obeundis erant consecratae. Est enim naturale homini, ut is certum quoddam tempus necessariis rerum functionibus det, veluti corporis quieti, somno et aliis huiusmodi rebus; et quemadmodum corpori, ita eadem naturae ratione factum est, ut menti aliquid etiam temporis concederet, quo in Dei contemplatione sese reficeret; atque ita quum aliqua temporis pars esse debeat, quo res divinae coluntur, cultusque Deo debitus tribuatur, hoc sane ad morum praecpta pertinet.

<sup>1)</sup> Gal. 4, 10. 11. <sup>2)</sup> Col. 2, 16.

*Dee. 11.*

*VII. Diem dominicum pro die sabbati Apostoli colendum ordinaverunt.*

Quam ob causam Apostoli ex illis septem diebus eum, qui primus est, ad divinum cultum consecrare statuerunt, quem diem dominicum dixerunt. Nam et sanctus Ioannes<sup>1)</sup> in Apocalypsi, „dominicae diei“ meminit: et Apostolus<sup>2)</sup>, „per unam sabbati,“ quae est dies dominicus, ut sanctus Chrysostomus interpretatur<sup>3)</sup>, collectas fieri iubet, ut intelligamus, iam tum in ecclesia diem dominicum sanctum habitum esse. Iam vero, ut sciant fideles, quid eo die agere, a quibusve actionibus abstinere debeant, non alienum est, ut parochus totum praecipsum, quod in quatuor partes recte distribui potest, ad verbum diligenter interpretetur.

*VIII. Quid hoc verbo: Memento, hic generatim praescribatur.*

Itaque primum generatim proponat, quid iis verbis praescribatur: „Memento, ut diem sabbati sanctifices.“ Ob eam vero causam initio praecepti verbum illud „Memento“ apposite additum est, quod huius diei cultus ad caeremonias pertineat; qua de re populus admonendus esse videbatur, quum naturae lex, etsi aliquo tempore Deum religionis ritu colendum esse doceat, hoc tamen, quo potissimum die fieri deberet, non praescripsit. Praeterea fideles docendi sunt, ex iis verbis modum et rationem colligi posse, qua in tota hebdomada opus facere conveniat; ita scilicet, ut diem festum semper spectemus, quo die, quum actionum et operum nostrorum Deo quasi reddenda ratio sit, eiusmodi opera efficiamus necesse est, quae neque Dei iudicio repudientur, neque nobis, ut scriptum est<sup>4)</sup>, „in singultum“ sint, „et in scrupulum cordis.“ Postremo id docemur, quod certe animadvertere debemus, non defuturas scilicet occasiones, quamobrem nos huius praecepti capiat oblio, vel aliorum, qui illud negligunt, exemplo adductos, vel spectaculorum ludorumque studio, quibus plerumque ab huius diei sancto religiosoque cultu abducimur. Sed iam ad id veniamus, quod sabbati significatione demonstratur.

*IX. Quid sabbatum et sabbatizare in sacris literis denotet.*

Sabbatum, hebraicum nomen, si latine interpretaris, cessatio dicitur. Sabbatizare propterea cessare et requiescere latino vocabulo appellatur, qua significazione factum est, ut sabbati nomine „dies septimus“ diceretur; quoniam, absoluta perfectaque mundi universitate, „Deus“ ab omni opere, quod fecerat, „requievit;“ ita hunc diem in Exodo<sup>5)</sup> Dominus vocat.

<sup>1)</sup> Apoc. 1, 10. <sup>2)</sup> I. Cor. 16, 2. <sup>3)</sup> hom. 43. in 1. Corinth. <sup>4)</sup> I. Reg. 25, 31  
<sup>5)</sup> Gen. 2, 3. Ex. 20, 10.

Postea vero non solum septimus hic dies, sed ob eius dignitatem, ipsa etiam hebdomada eo nomine appellata est; in quem sensum Phariseus apud sanctum Lucam dixit<sup>1)</sup>: „Ieiuno bis in sabbato.“ Atque hoc quidem de sabbati significatione.

*X. Quo modo fideles sabbatum sanctificare dicantur.*

Sanctificatio autem sabbati sacris in literis cessatio est, quae fit a corporis laboribus et a negotiis, ut aperte ostendunt haec, quae sequuntur praecepti verba: „Non operaberis.“ Neque vero id solum significat, (aliter enim satis fuisset dicere in Deuteronomio<sup>2)</sup>): „Observa diem sabbati;“ sed quum in eodem loco addatur; „ut sanctifices eum“: hoc verbo ostenditur, sabbati diem religiosum esse, divinisque actionibus et sanctis rerum officiis consecratum. Itaque diem sabbati tum plene et perfecte celebramus, quum pietatis et religionis officia Deo praestamus; hocque plane „sabbatum“ est, quod Isaias<sup>3)</sup> „delicatum“ appellat, quoniam festi dies sunt veluti deliciae Domini et piorum hominum. Quare si religioso huic sanctoque sabbati cultui misericordiae adiunguntur opera, certe maxima sunt et multa praemia, quae eodem capite nobis proponuntur.

*XI. Quae sit germana superiorum verborum sententia.*

Itaque verus ac proprius huius praecepti sensus eo spectat, ut homo et animo et corpore in eam curam incumbat, ut, statuto aliquo tempore a negotiis corporisque laboribus ferriatus, Deum pie colat ac veneretur.

*XII. Quid altera praecepti parte demonstretur.*

Altera vero praecepti parte demonstratur, diem septimum Dei cultui divinitus dicatum esse; nam ita scriptum est: „Sex diebus operaberis, et facies omnia opera tua; septimo autem die sabbatum Domini Dei tui est.“ Quae verba ad eam sententiam referuntur, ut sabbatum Domino consecratum interpretetur, eique eo die religionis officia tribuamus, septimumque diem intelligamus signum esse quietis Domini.

*XIII. Cur Iudeis expedierit certum diem, eumque septimum, ad religionis officia praescribere.*

Hic vero dies divino cultui dicatus est, quia rudi populo minus expediebat habere eam facultatem temporis arbitratu suo diligendi, ne forte Aegyptiorum sacra imitaretur. Itaque e septem diebus ultimus ad Deum colendum delectus est; quae quidem res plena mysterii est. Quare Dominus in Exodo<sup>4)</sup>, et apud Ezechielem<sup>5)</sup> signum vocat: „Videte“ itaque, ille in-

<sup>1)</sup> Lue. 18, 12. <sup>2)</sup> Deut. 5, 12. <sup>3)</sup> Is. 58, 13. <sup>4)</sup> Ex. 31, 13. <sup>5)</sup> Ez. 20, 12.

quit, „ut sabbatum meum custodiatis; quia signum est inter me et vos in generationibus vestris, ut sciatis, quia ego Dominus, qui sanctifico vos.“

*XIV. Quarum rerum signum fuerit sabbati celebritas.*

Itaque signum fuit, quod indicabat, homines Deo se dedicare oportere, sanctosque eidem praebere, quum diem etiam videamus ei dicatum esse; siquidem ille dies sanctus est, quod tum praecipue sanctitatem et religionem homines colere debeant. Deinde signum est et quasi monumentum conditae huius admiranda universitatis. Signum praeterea fuit Israëlitarum memoriae traditum, quo admoniti, se Dei auxilio a durissimo Aegyptiacae servitutis iugo solutos ac liberatos esse, meminissent; id quod Dominus ostendit illis verbis<sup>1)</sup>: „Memento, quod et ipse servieris in Aegypto, et eduxerit te inde Dominus Deus in manu forti, et brachio extento; idcirco praeceperit tibi, ut observares diem sabbati.“ Est signum item tum spiritualis, tum coelestis sabbati.

*XV. Quod sit spirituale populi Christiani sabbatum.*

Spirituale autem sabbatum in sancta quadam et mystica quiete consistit, nimirum, quum vetus homo, Christo consupultus, ad vitam renovatur, atque in iis actionibus, quae Christianae pietati convenient, studiose se exercet. Debent enim, qui „aliquando“<sup>2)</sup> erant „tenebrae, nunc autem lux in Domino“ sunt, „ut filii lucis ambulare,“ in omni bonitate, iustitia et veritate, neque „communicare operibus infructuosis tenebrarum.“

*XVI. Quod sit beatis etiam suum sabbatum.*

Coeleste vero sabbatum est, ut ait D. Cyrillus<sup>3)</sup> eum locum Apostoli tractans<sup>4)</sup>: „Relinquitur ergo sabbatismus populo Dei,“ illa vita, in qua omnibus bonis cum Christo viventes fruemur, peccato radicibus extirpato, secundum illud<sup>5)</sup>: „Non erit ibi leo, et mala bestia per eam non ascendet,“ sed erit ibi semita pura, „et via sancta vocabitur.“ Omnia enim bona in visione Dei mens sanctorum adipiscitur. Quare fideles hortandi erunt his verbis, et a pastore incitandi<sup>6)</sup>: „Festinemus ergo ingredi in illam requiem.“

*XVII. Iudeis alii dies, quam septimus, fuere festivi.*

Praeter diem septimum habebat populus Iudeus alios etiam festos et sacros dies divina lege constitutos, quibus maximorum beneficiorum memoria renovaretur.

<sup>1)</sup> Deut. 5, 15. <sup>2)</sup> Rom. 6, 6. Eph. 5, 8. sq. <sup>3)</sup> Lib. 4. in Io. 4. c. 6. <sup>4)</sup> Hebr. 4, 9. <sup>5)</sup> Is. 35, 9. <sup>6)</sup> Hebr. 4, 11.

*XVIII. Quare Apostoli non septimum hebdomadae diem, sed primum divino cultui consecrarint.*

Placuit autem ecclesiae Dei, ut diei sabbati cultus et celebritas in dominicum transferretur diem. Nam ut eo die primum lux orbi terrarum illuxit, sic Redemptoris nostri, qui ad vitam aeternam nobis aditum patefecit, resurrectione, quae eo die fuit, e tenebris ad lucem vita nostra revocata est; unde et dominicum diem Apostoli dici voluerunt. Solemnam praeterea hunc diem esse, in sacris literis animadvertisimus, quod eo die mundi creatio initium habuit, quodque Spiritus sanctus discipulis datus sit.

*XIX. Quamobrem ad diem dominicum alia festa Christianis accesserint.*

Alios autem dies festos ab ecclesiae initio et consequentibus deinde temporibus Apostoli et sancti Patres nostri instituerunt, ut pie et sancte Dei beneficiorum memoriam coleremus. Inter eos autem celeberrimi habentur illi dies, qui ob redēptionis nostrae mysteria religioni consecrati sunt, deinde, qui sanctissimae Virgini matri, tum vero Apostolis ac martyribus ceterisque sanctis cum Christo regnantibus dicantur; in quorum victoria Dei bonitas et potentia laudatur, ipsis debiti honores tribuuntur, atque ad eorum imitationem fidelis populus incitatur.

*XX. Quomodo ex hoc praecepto ad otium fugiendum incitentur*

Et quoniam ad hoc praeceptum servandum magnam vim ea ipsius pars habet, quae illis verbis expressa est: „Sex diebus operaberis; septimus autem dies sabbatum Dei est:“ parochus debet illam partem diligenter explicare. Etenim ex his verbis colligi potest, fideles hortandos esse, ne otiosi et desides vitam traducant, sed potius, apostolicae vocis memores, negotium (I. Thes. 4, 11.) suum quisque agat, et operetur manibus suis, sicut ab eo praeceptum fuerat. Praeterea hoc praecepto illud Dominus iubet, ut sex ipsis diebus opera nostra efficiamus; ne aliquid eorum, quae aliis hebdomadae diebus fieri agive oporteat, in diem festum reiiciatur, atque ita animus a rerum divinarum cura studioque avocetur.

*XXI. Quid maxime diebus festis agere sit prohibitum.*

Tertia deinde praecepti pars explicanda est, quae quodam modo describit, qua ratione sabbati diem colere debeamus; praecipue autem explicat, quid illo die facere prohibemur. Quare inquit Dominus: „Non facies omne opus in eo tu, et filius tuus, et filia tua, servus tuus, et ancilla tua, iumentum tuum, et advena, qui est intra portas tuas.“ Quibus verbis ad id primum

instituimus, ut quaecumque divinum cultum impedire possunt omnino vitemus. Facile enim perspici potest, omne servilis operis genus prohiberi, non quidem ea re, quod sua natura aut turpe aut malum sit, sed quoniam mentem nostram a divino cultu, qui finis praecepti est, abstrahit; quo magis peccata a fidelibus vitanda sunt, quae non solum animum a divinarum rerum studio avocant, sed nos a Dei amore prorsus sciungunt.

*XXII. Externae actiones, quae ad Dei cultum referuntur, sabbato non interdicuntur.*

Non tamen eae actiones neque ea opera vetantur, quae ad divinum cultum attinent, etiamsi servilia sint; ut altare instruere, templia alicuius festi diei causa ornare, et reliqua huius generis. Ideoque a Domino (Mat. 12, 5.) dictum est, sacerdotes in templo sabbatum violare, et sine crimine esse.

*XXIII. Quaedam etiam servilia opera ob necessitatem diebus festis conceduntur.*

Sed nequè carum rerum opera hac lege prohiberi existimandum est, quarum iactura facienda sit, si die festo praetermittantur; quemadmodum sacris etiam canonibus permisum est. Multa alia Dominus in Evangelio festis diebus fieri posse declaravit, quae facile parochus apud sanctos Matthaeum et Ioannem observabit.

*XXIV. Cur iumenta quiescere Dominus voluerit.*

Sed ut nulla res praetermitteretur, cuius actione hic sabbati cultus impediretur: facta est iumenti mentio; quo animalium genere impediuntur homines, quo minus sabbatum diem colant. Si enim die sabbati alicui operis actioni iumenti usus destinatur, necessaria est etiam ad id hominis opera, qui iumentum agat; itaque solum per se opus facere non potest, sed hominem, qui illud molitur, adiuvat. Eo autem die nemini opus facere licet, ergo neque iumentis, quorum opera ad id homines utuntur. Itaque huius praecepti lex eo etiam spectat, ut, si iumentorum laboribus homines parcere Deus vult, eo certe magis ipsi cavere debeant, ne inhumani sint in eos, quorum opera atque industria utuntur.

*XXV. Quibus praecipue in operibus Christiani diebus festis se exercere debeant.*

Neque vero parochus illud praetermittere debet, ut diligenter doceat, quibus in operibus atque actionibus Christiani homines diebus festis exercere se debeant. Illae vero eiusmodi sunt, ut ad Dei templum accedamus, eoque loco sincera piaque animi attentione sacrosanctae missae sacrificio intersi-

mus, divina ecclesiae sacramenta, quae ad salutem nostram instituta sunt, ad animae vulnerum curationem crebro adhibeamus. Nihil vero est, quod opportunius aut melius a Christianis hominibus fieri possit, quam si peccata sua sacerdotibus saepe confiteantur; ad quam rem perficiendam poterit parochus populum adhortari, sumpta huius probandae rei ratione et copia ex iis, quae de poenitentiae sacramento suo loco tradita ac praecepta sunt. Neque solum ad hoc sacramentum populum excitabit, sed sedulo etiam atque etiam ad illud adhortabitur, ut sacrosanctum eucharistiae sacramentum crebro percipient. Attente praeterea diligenterque sacra concio fidelibus audienda est; nihil enim minus ferendum est, neque tam profecto indignum, quam Christi verba contemnere aut negligenter audire. Exercitatio item atque studium fidelium in precibus divinisque laudibus frequens esse debet; praecipuaque eorundem cura, ut quae ad Christianae vitae institutionem pertinent, ea diligenter addiscant, seduloque se exerceant in iis officiis, quae pietatem continent, pauperibus et egenis eleemosynam tribuendo, aegros homines visitando, moerentes, quique dolore afficti iacent, pie consolando. Nam, ut est apud S. Iacobum (Iac. 1, 27.), „religio munda et immaculata apud Deum et Patrem, haec est: visitare pupillos et viduas in tribulatione eorum.“ Ex his, quae dicta sunt, facile erit colligere, quae contra huius praecepti regulam committuntur.

*XXVI. Cur necesse fuerit certos quosdam dies divino cultui deputare.*

Parochi vero officium in eo item esse debet, ut certos quosdam locos in promptu habeat, unde rationes atque argumenta sumat, quibus populo illud maxime persuadeatur, ut huius praecepti legem summo studio accurataque diligentia servet. Ad hoc plurimum valet, ut populus scilicet intelligat, ac plane perspiciat, quam iustum et rationi consentaneum sit, nos certos quosdam dies habere, quos totos divino cultui tribuamus, Dominumque nostrum, a quo summa et innumerabilia beneficia accepimus, agnoscamus, colamus et veneremur. Si enim iussisset nos quotidie sibi religionis cultum tribuere, nonne pro suis erga nos beneficiis, quae maxima et infinita sunt, omnis opera danda esset, ut prompto alacrique animo eius dicto audientes essemus? Nunc vero paucis ad eius cultum institutis diebus, non est, cur nos negligentes atque difficiles in eius officii functione simus, quod sine gravissima culpa praetermittere non possumus.

*Dec. IV.*

301

*Pars III. Caput V.*

301

**XXVII.** *Quae utilitas ad eos redeat, qui sedulo huic praecepto obtemperaverint.*

Demonstret deinde parochus, quanta huius praeepti virtus sit, quum ii, qui illud recte servaverint, in conspectu Dei esse, cum eoque colloqui videantur. Nam et precibus facientis Dei maiestatem contemplamur, et cum eo colloquimur, et concionatoribus audiendis Dei vocem accipimus, quae ad aures nostras eorum opera pervenit, qui de rebus divinis pie sancteque concionantur; tum in altaris sacrificio praesentem Christum Dominum adoramus. Et his quidem bonis illi maxime fruuntur, qui hoc praeeptum servant diligenter.

**XXVIII.** *Quid contra de illis sentiendum sit, qui hanc legem omnino neglexerint.*

Qui vero hanc legem omnino negligunt, ii quum Deo et ecclesiae non obediant, neque eius praeeptum audiant, et Dei et sanctorum legum hostes sunt; quod animadverti potest ex eo, quod praeeptum hoc eiusmodi est, ut nullo labore servari queat. Quum enim Deus non labores nobis imponat, quos vel difficillimos eius causa suspicere deberemus, sed quietos illis diebus festis a terrenis curis liberos esse iubeat: magnae temeritatis indicium est, huius praeepti legem recusare. Exemplo nobis esse debent supplicia, quae de illis Deus sumpsit, qui illud violarunt, ut ex libro Numerorum (15, 35.) licet intelligere. Ne igitur in hanc Dei offensionem incidamus, operae pretium erit, saepe illud verbum „Memento“ cogitatione repetere, magnasque illas utilitates et commoda sibi ante oculos proponere, quae ex festorum dierum cultu percipi, supra declaratum est; et multa alia ad id genus pertinentia, quae bonus et diligens pastor, ut occasionis ratio postulabit, copiose lateque persequi poterit.

---

**CAPUT V.**

**De quarto Praecepto.**

Honora patrem tuum et matrem tuam, ut sis longaevis super terram, quam Dominus Deus tuus dabit tibi.

**I.** *Quae sit huius praeepti dignitas, et quomodo cum superioribus conveniat.*

Cum in superioribus praeeptis summa sit vis et dignitas, merito, quae nunc persequimur, quia maxime necessaria sunt, proximum locum obtinent. Nam illa finem, qui Deus est, continuo spectant, haec nos ad proximi caritatem erudiunt, etsi

longius progressa ad Deum, id est illud extremum, cuius gratia proximum ipsum diligimus, perducunt. Quamobrem Christus Dominus<sup>1)</sup> praecepta illa duo de diligendo Deo et proximo similia inter se esse dixit. Hic autem locus dici vix potest, quantas habeat utilitates, quum et suos fructus ferat, uberes illos quidem ac praestantes, et sit tanquam signum, ex quo primi praecepti obedientia et cultus eluceat. „Qui non diligit,“ inquit divus Ioannes<sup>2)</sup>), „fratrem suum, quem videt: Deum, quem non videt, quomodo potest diligere?“ Ad eundem modum, si parentes, quos secundum Deum diligere debemus, non veneramur et colimus, quum nobis in conspectu fere semper sint: Deo summo parenti et optimo, qui nullum subaspectum cadit, quem honorem, quem cultum tribuemus? Ex quo perspicuum est, utraque praecepta inter se congruere.

*II. Quam late pateat huius praecepti vis, et quantum parentes ex hoc praecepto adiuventur.*

Huius autem praecepti usus latissime patet; nam praeter eos, qui nos genuerunt, multi praeterea sunt, quos in parentum loco colere debemus, vel potestatis, vel dignitatis, vel utilitatis, vel praestantis alicuius muneris et officii nomine. Parentum praeterea maiorumque omnium laborem levat; quum enim id in primis curent, ut, quos habent in sua potestate, iure recte et divinae legi convenienter vivant: erit haec cura per facilis, si omnes intelligent, Deo auctore et monitore summum honorem parentibus tribui oportere; quod ut praestare possimus, necesse est, nosse quandam differentiam, quae est inter praecepta primae et secundae tabulae.

*III. Praeceptorum legis in duas tabulas quorsum facta sit distinctio.*

Ergo haec primum a parocho sunt explicanda; idque in primis moneat, divina decalogi praecepta fuisse in duabus tabulis incisa; in quarum altera, quemadmodum a sanctis Patribus accepimus, tria illa continebantur, quae iam sunt exposita, reliqua vero in alteram tabulam erant inclusa. Atque haec nobis per apposita fuit descriptio, ut praeceptorum rationem ordo ipse distingueret; nam quidquid in sacris literis divina lege iubetur aut vetatur, id duorum generum oritur ex altero; aut enim erga Deum aut erga homines caritas in omni officio spectatur. Et quidem caritatem in Deum superiora tria praecepta docent; quod vero ad hominum coniunctionem et societatem pertinet, id reliquis septem praeceptis continetur. Quo-

<sup>1)</sup> Mat. 22, 39. Marc. 12, 31. <sup>2)</sup> I. Io. 4, 20.

*IV. Praecepta*

circa non sine causa eiusmodi est facta distinctio, ut alia ad priorem, alia ad alteram tabulam praecepta referantur.

*IV. Quo modo caritas erga Deum tribus primis praeceptis, et caritas erga proximum ceteris contineatur, et quae sit inter ultraque differentia.*

Nam superioribus tribus praeceptis, de quibus dictum est, quasi subiecta materies, quam tractent, est Deus, id est sumum bonum: ceteris vero proximi bonum. Illis summus, his proximus amor est propositus; illa finem, haec autem ea, quae ad finem referuntur, spectant. Praeterea caritas Dei ex ipso pendet; Deus enim per se, non alterius rei causa, summe diligendus est; caritas autem proximi a caritate Dei ortum habet, atque ad eam tanquam ad certam regulam dirigenda est. Nam si parentes caros habemus, si dominis paremus, si dignitate antecedentes reveremur: id ea re maxime faciendum est, quod eorum procreator est Deus, eosque aliis praeesse voluit, quorum opera ceteros homines regit ac tuetur; qui, quum nobis auctor sit, ut eiusmodi personas vereamur, idcirco id praestare debemus, quia a Deo hoc ipso honore dignantur. Ex quo fit, ut honor, quem parentibus habemus, Deo potius, quam hominibus haberi videatur. Sic enim apud sanctum Matthaeum est, quum de observantia in superiores agitur<sup>1)</sup>: „Qui recipit vos, me recipit;“ et Apostolus in epistola ad Ephesios<sup>2)</sup>, servos instituens: „Servi,“ inquit, „obedite dominis carnalibus cum timore et tremore, in simplicitate cordis vestri, sicut Christo; non ad oculum servientes, quasi hominibus placentes, sed ut servi Christi.“

*V. Quo modo caritas Dei nullo fine, caritas vero proximi suis finibus circumscribatur.*

Accedit, quod Deo nullus honor, nulla pietas, nullus cultus satis digne tribuitur, in quem amor augeri infinite potest, propterea nostra erga illum caritas in dies fiat ardentior necesse est; quem, eius iussu<sup>3)</sup>, ex toto corde, ex tota anima, ex omnibus viribus amare debemus. At caritas, qua proximum complectimur, suis finibus circumscribitur; iubet enim Dominus<sup>4)</sup> proximos diligere sicut nos ipsos. Quod si quis hos fines egressus fuerit, ita ut parem Deo et proximis amorem tribuat: is maximum scelus admittit, „Si quis venit ad me,“ inquit Dominus<sup>5)</sup>, „et non odit patrem suum, et matrem, et uxorem, et filios, et fratres, et sorores, adhuc autem animam suam, non potest meus esse discipulus;“ in quam sententiam item dictum.

<sup>1)</sup> Mat. 10, 40. <sup>2)</sup> Eph. 6, 5. 6. I. Petr. 2, 18. <sup>3)</sup> Deut. 6, 5. Luc. 10, 27.  
<sup>4)</sup> Mat. 22, 37. <sup>5)</sup> Luc. 14, 26.

est<sup>1)</sup>: „Sine, ut mortui sepeliant mortuos suos,“ quum quidam primum humare patrem vellet, postea Christum sequi; cuius rei dilucidior illa apud S. Matthaeum explicatio est<sup>2)</sup>: „Qui amat patrem aut matrem plus quam me, non est me dignus.“

*VI. Quomodo parentes sint amandi, quaque ex causa illis subinde non obtemperandum sit.*

Nec tamen ulla dubitatio est, quin parentes vehementer amandi observandique sint; sed ad pietatem in primis necessarium est, Deo, qui parens et effector est omnium, praecipuum honorem et cultum tribui; ideoque mortales parentes amari, ut ad coelestem sempiternumque patrem tota amoris vis referatur. Quod si interdum parentum iussa Dei praecepsit repugnant: non dubium est, quin liberi parentum cupiditati Dei voluntatem anteferre debeant, divinae illius sententiae memores<sup>3)</sup>: „Obedire oportet Deo magis, quam hominibus.“

*VII. Quid in huius praecepsi sententia proprie honorandi vox denotet.*

Quibus rebus expositis, parochus verba praecepsi interpretabitur, atque illud primum, „honorare“ quid sit. Est enim de aliquo honorifice sentire, et quae illius sunt, maximi putare omnia. Huic autem honori haec omnia coniuncta sunt: amor, observantia, obedientia et cultus. Scite autem in lege posita est honoris vox, non amoris aut metus, etiamsi valde amandi ac metuendi parentes sint; etenim qui amat non semper observat et veneratur, qui metuit non semper diligit: quem vero aliquis ex animo honorat, item amat et veretur. Haec quum parochus explicarit, tum ager de patribus, quique sint ii, qui vocentur hoc nomine.

*VIII. Quinam patris nomine hic intelligentur.*

Nam etsi de iis praecipue patribus lex loquitur, ex quibus generati sumus, tamen ad alios quoque pertinet hoc nomen, quos etiam complecti lex videtur; quemadmodum ex pluribus divinae Scripturae locis facile colligimus. Praeter illos igitur, qui nos procrearunt, patrum genera item alia sunt in sacris literis, (quod antea attigimus,) quibus singulis suis honor debetur. Ac primum ecclesiae praesides et pastores et sacerdotes „patres“ dicuntur; quemadmodum ex Apostolo constat, qui ad Corinthios scribens<sup>4)</sup>: „Non,“ inquit, „ut confundam vos, haec scribo, sed ut filios meos carissimos moneo. Nam si decem millia paedagogorum habeatis in Christo, sed non multos patres; nam in Christo Iesu per Evangelium ego vos

<sup>1)</sup> Mat. 8, 22. Luc. 9, 60. <sup>2)</sup> Mat. 10, 37. <sup>3)</sup> Act. 5, 29. <sup>4)</sup> I. Cor. 4, 14.

*H. Praeg.*

genui.“ Et in Ecclesiastico<sup>1)</sup> scriptum est: „Laudemus viros gloriosos, et parentes nostros in generatione sua.“ Deinde ii, quibus aut imperium, aut magistratus, aut potestas commissa est, qui rempublicam gubernant, „patres“ appellantur. Sic Naaman<sup>2)</sup> a famulis „pater“ vocabatur. Praeterea „patres“ eos dicimus, quorum procurationi, fidei, probitati, sapientiaeque alii commendantur; cuiusmodi sunt tutores et curatores, paedagogi et magistri. Quare Eliam et Elisaeum filii Prophetarum<sup>3)</sup> „patrem“ vocabant. Postremo „patres“<sup>4)</sup> dicimus senes et aetate confectos, quos etiam vereri debemus. Atque hoc in parochi praeceptis maximum sit, ut doceat, patres, cuiusque sint generis, praesertim vero eos, ex quibus nati sumus, a nobis honorandos, de quibus divina lex praecipue loquitur.

*IX. Cur parentibus secundum carnem Christianorum filii praecipuum honorem impendere debeant.*

Sunt enim immortalis Dei quasi quaedam simulacra, in iisque ortus nostri imaginem intuemur; ab iis vita nobis data est; iis Deus usus est, uti nobis animum mentemque impertiret; ab iis ad sacramenta deducti, ad religionem, ad humanum cultum civilemque instituti, ad morum integritatem et sanctitatem eruditii sumus. Doceat vero parochus, merito nomen „matris“ in hoc praecepto expressum, ut eius beneficia et merita erga nos consideremus, quanta cura et sollicitudine nos in utero gesserit, quanto cum labore et dolore pepererit et educarit.

*X. Quibus rationibus honore afficiantur carnales parentes.*

Porro ita observandi parentes sunt, ut, quem eis tribuimus, honor, ex amore atque intimo animi sensu depromptus videatur; quibus hoc officium debetur maxime, quum erga nos sint ita affecti, ut nullum laborem, nullam contentionem, nulla pericula nostri causa refugiant, nihilque illis accidere possit iucundius, quam, ut filiis caros se esse sentiant, quos maxime diligunt. Ioseph<sup>5)</sup>), quum in Aegypto honore et amplitudine regi esset proximus, patrem, qui in Aegyptum venerat, honorifice exceptit, et Salomon<sup>6)</sup> matri advenienti assurrexit, eamque veneratus regio in solio ad dexteram collocavit. Alia praeterea sunt honoris officia, quae in parentes conferri debent. Nam eos tum etiam honoramus, quum a Deo suppliciter petimus, ut iisdem bene et feliciter omnia eveniant; ut in maxima gratia et honore sint apud homines; ut ipsi Deo ac sanctis, qui in coelis sunt, commendatissimi sint. Item paren-

<sup>1)</sup> Eccl. 44, 1. <sup>2)</sup> IV. Reg. 5, 13. <sup>3)</sup> IV. Reg. 2, 12. et 13, 14. <sup>4)</sup> I. Mach. 2, 65. Lev. 19, 32. Sap. 2, 10. <sup>5)</sup> Gen. 46, 29. <sup>6)</sup> III. Reg. 2, 19.

tes honoramus, quum nostras rationes ad eorum arbitrium voluntatemque conferimus; cuius rei suasor Salomon<sup>1)</sup>: „Audi,“ inquit, „fili mi, disciplinam patris tui, et ne dimittas legem matris tuae, ut addatur gratia capitii tuo, et torques collo tuo.“ Cuiusmodi sunt etiam D. Pauli cohortationes<sup>2)</sup>: „Filii, obedite parentibus vestris in Domino; hoc enim iustum est;“ item<sup>3)</sup>. „Filii, obedite parentibus per omnia; hoc enim placitum est in Domino.“ Et sanctissimorum hominum exemplis confirmatur. Etenim Isaac<sup>4)</sup>, quum a patre ad sacrificium vinciretur, modeste ac sine recusatione paruit, et Rechabita<sup>5)</sup>, ne a patris consilio unquam discrepant, vino se in perpetuum abstinuerunt. Item parentes honoramus, quum eorum recte facta moresque imitamur. Iis enim plurimum tribuere videmur, quorum esse volumus quam simillimi. Item parentes honoramus, quoram consilia non modo exquirimus, verum etiam sequimur.

*XI. Quo modo parentibus in necessitate constitutis sit subveniendum, et maxime in mortis periculo.*

Item, quibus subvenimus ea impertientes, quae victus cultusque desiderat; quod Christi testimonio comprobatur, qui Phariseorum impietatem redargens<sup>6)</sup>: „Quare et vos,“ ait, „transgredimini mandatum Dei propter traditionem vestram? Nam Deus dixit: Honora patrem et matrem, et: Qui maledixerit patri vel matri, morte moriatur. Vos autem dicitis: Qui cunque dixerit patri vel matri: Munus quocunque est ex me, tibi proderit; et non honorificabit patrem suum, aut matrem suam, et irritum fecistis mandatum Dei propter traditionem vestram.“ Et honoris quidem officia parentibus tribuere semper debemus, sed tum maxime, quum periculose aegrotant; danda enim opera est, ne quid praetermittant, quod vel ad peccatorum confessionem attinet, vel ad reliqua sacramenta, quae a Christianis hominibus percipi debent, quum mors appropinquat, idque nobis curae sit, ut pii religiosique homines eos crebro intervisant, qui vel imbecillos confirment, et consilio iuvent, vel optime animatos ad spem erigant immortalitatis, ut, quum mentem a rebus humanis excitarint, totam coniiciant in Deum. Sic fiet, ut fidei, spei et caritatis beatissimo comitatu, ac religionis praesidio muniti, mortem non modo non pertimescendam, quum necessaria sit, sed, quum aditum ad aeternitatem expediatur, etiam appetendam censeant.

<sup>1)</sup> Prov. 1, 8. 9. <sup>2)</sup> Eph. 6, 1. <sup>3)</sup> Col. 3, 20. <sup>4)</sup> Gen. 22, 9. <sup>5)</sup> Ier. 35, 5. seq.  
<sup>6)</sup> Mat. 15, 3. seq.

*XII. Quo modo mortuis parentibus honorem exhibeamus.*

Postremo vel mortuis parentibus honor tribuitur, si iis funus facimus, si exequias honestamus, si honorem sepulturae impertimus; si iusta et sacrificia anniversaria curamus, si, quae ab iis legata sunt, diligenter persolvimus.

*XIII. Quo pacto episcopi et sacerdotes sint honorandi.*

Honorandi autem sunt non modo ii, ex quibus nati sumus, verum etiam alii, qui patres appellantur, ut episcopi et sacerdotes, ut reges, ut principes, ut magistratus, ut tutores, ut curatores, ut magistri, ut paedagogi, ut senes et ceteri eiusmodi; digni enim sunt, qui ex caritate, ex obedientia, ex ope nostra fructus percipiunt; sed alias alio magis. De episcopis et aliis pastoribus ita scriptum est<sup>1)</sup>: „Qui bene praesunt presbyteri, duplice honore digni habeantur; maxime qui labant in verbo et doctrina.“ Iam vero, quanti erga Apostolum amoris documenta Galatae dederunt! quibus is praeclarum illud benevolentiae testimonium tribuit<sup>2)</sup>: „Testimonium enim perhibeo vobis, quia, si fieri posset, oculos vestros eruissetis, et dedissetis mihi.“

*XIV. Quo modo sacerdotibus necessaria ad victimum suppeditari debant.*

Quin etiam sacerdotibus ea suppeditanda sunt, quae ad vitae usus necessarios requiruntur. Quare Apostolus<sup>3)</sup>: „Quis,“ inquit, „militat suis stipendiis unquam?“ Et in Ecclesiastico scriptum est<sup>4)</sup>: „Honorifica sacerdotes, et propurga te cum brachiis; da illis partem, sicut mandatum est tibi, primitiarum et purgationis.“ Illis etiam obtemperandum esse docet Apostolus<sup>5)</sup>: „Obedite,“ inquit, praepositis vestris, et subiacete eis; ipsi enim pervigilant, quasi rationem pro animabus vestris reddituri.“ Quin potius a Christo Domino praeceptum est, ut vel improbis pastoribus obtemperemus, quum dicat<sup>6)</sup>: „Super cathedram Moysi sederunt scribae et Pharisaei. Omnia ergo, quaecumque dixerint vobis, servate et facite; secundum opera vero eorum nolite facere; dicunt enim, et non faciunt.“

*XV. Magistratibus politicis honor deferendus ostenditur.*

Idem de regibus, de principibus, de magistratibus et reliquis, quorum potestati subiicimur, dicendum est. Iis vero quod honoris, cultus, observantiae genus tribuendum sit, Apostolus ad Romanos<sup>7)</sup> late explicat; pro quibus etiam orandum esse monet<sup>8)</sup>. Et divus Petrus<sup>9)</sup>: „Subiecti,“ inquit, „estote

<sup>1)</sup> I. Tim. 5, 17. <sup>2)</sup> Gal. 4, 15. <sup>3)</sup> I. Cor. 9, 7. <sup>4)</sup> Eclips. 7, 33. <sup>5)</sup> Hebr. 13, 17-  
<sup>7)</sup> Math. 23, 3. <sup>8)</sup> Rom. c. 13. <sup>9)</sup> Tit. 3, 1. <sup>10)</sup> I. Tim. 2, 2. <sup>11)</sup> I. Petr. 2, 13.

omni humanae creaturae propter Deum; sive regi, quasi prae-cellenti, sive ducibus, tanquam ab eo missis.“ Nam si quem eius cultum tribuimus, is ad Deum refertur; habet enim venerationem hominum excellens dignitatis gradus, quia divinae potestatis est instar; in quo etiam Dei providentiam veneramur, qui publici muneric procreationem eis attribuit, quibusque utitur tanquam potestatis suae ministris.

*XVI. Cur magistratibus politicis etiam improbis sit obtemperandum, et quando non sit.*

Nec enim hominum improbitatem aut nequitiam, si tales sunt magistratus, sed divinam auctoritatem, quae in illis est, reveremur, ut, quod permirum fortasse videatur, quamvis in nos sint inimico infensoque animo, quamvis implacabiles, tamen non satis digna causa sit, cur eos non perofficiose observemus. Nam et Davidis magna in Saulem officia extiterunt, quum ei tamen esset offensior; quod innuit illis verbis<sup>1)</sup>: „Cum iis, qui oderunt pacem, eram pacificus.“ At vero si quid improbe, si quid inique imperent, quum id non ex potestate, sed ex iniustitia atque animi perversitate agant, omnino non sunt audiendi. Ubi haec parochus singillatim exposuerit, deinceps consideret, quodnam praemium, quamque consentaneum eis propositum sit, qui divino huic paecepto obediunt.

*XVII. Quod praemium obedientiae in parentes divinitus sit propositum.*

Nam in eo fructus est maximus, ut diu vivant; propterea quod digni sunt, qui beneficio quam diutissime perfruantur, cuius memoriam perpetuo conservant. Quum igitur, qui parentes colunt, eis gratiam referant, a quibus lucis et vitae usuram habent: iure et merito vitam ad summam senectutem perducunt. Tum adiungenda est divinae promissionis illustris explanatio; neque enim solum sempiternae ac beatae, sed huius etiam, quam in terris agimus, vitae usus promittitur; cuius sententiae interpres est D. Paulus, quum inquit<sup>2)</sup>: „Pietas ad omnia utilis est, promissionem habens vitae, quae nunc est, et futurae.“

*XVIII. Diurnae vitae promissio quanti hic facienda.*

Nec vero haec merces aut exigua est, aut contemnenda, etiamsi sanctissimis viris, ut Iob, ut Davidi, ut<sup>3)</sup> Paulo, mors fuerit optabilis, et aerumnosis ac miseris hominibus vitae propagatio sit iniucunda; nam illorum verborum adiunctio: „Quam Dominus tuus dabit tibi,“ non modo temporis diurnitatatem ad vivendum, sed otium, quietem, incolumitatem ad bene vi-

<sup>1)</sup> I. Reg. 17, 25. Ps. 119, 7. <sup>2)</sup> I. Tim. 4, 8. <sup>3)</sup> Iob 10, 1. Ps. 119, 5. Phil. 1, 23.

vendum, pollicetur. Nam in Deuteronomio<sup>1)</sup> non solum inquit: „Ut longo vivas tempore,“ sed illud etiam addit: „ut bene sit tibi,“ quod deinde ab Apostolo<sup>2)</sup> repetitum est.

*XIX. Quo modo, qui parentes honorant, etiamsi cito moriuntur, huius praecepti praemium capiant.*

Haec autem bona eis suppetere dicimus, quorum pietati Deus gratiam referat. Aliter enim divini promissi fides et constantia non erit, quum interdum, qui maiorem pietatem parentibus praestiterunt, iis vita brevior sit; quibns id quidem contingit, vel quod iis optime consulitur, qui prius e vita excedunt, quam a virtutis ei officii religione discedant; rapiuntur enim<sup>3)</sup>, ne malitia mutet intellectum eorum, aut ne fictio decipiat animam illorum, vel quia dum pernices et rerum omnium perturbatio impendet, e corporibus evocantur, ut communium temporum acerbitatem evadant. „A facie enim malitiae,“ inquit Propheta<sup>4)</sup>, „collectus est iustus;“ quod fit, ne eorum aut virtus aut salus periclitetur, quum a mortalibus flagitiorum poenas repetit Deus, vel ne tristissimis temporibus ex propinquorum amicorumque calamitatibus acerbissimos luctus sentiant. Quare metuendum est maiorem in modum, quum viris bonis immatura mors accidit.

*XX. Quibus poenis ii afficiantur, qui huius praecepti praevaricatores existunt.*

Ac quemadmodum eis, qui grati in parentes sunt, officii merces et fructus est a Deo propositus: sic ingrati et impii filii gravissimis poenis reservantur. Scriptum est enim<sup>5)</sup>: „Qui maledixerit patri suo vel matri, morte moriatur;“ et<sup>6)</sup>: „Qui affligit patrem, et fugit matrem, ignominiosus est et infelix;“ et<sup>7)</sup>: „Qui maledicit patri suo vel matri, extinguetur lucerna eius in mediis tenebris;“ et<sup>8)</sup>: „Oculum, qui subsanat patrem, et qui despicit partum matris suae, effodiant eum corvi de torrentibus, et comedant eum filii aquilae.“ Qui parentibus iniuriam intulerunt, multos fuisse legimus, in quibus ulciscendis Dei iracundia exarsit. Non enim Davidem inultum reliquit, sed sceleri debitas poenas dedit Absalon<sup>9)</sup>, quem ob eius scelus tribus hastis transfixum punivit. De iis vero, qui sacerdotibus non obtemperant, scriptum est<sup>10)</sup>: „Qui superbierit, nolens obedire sacerdotis imperio, qui eo tempore ministrat Domino Deo tuo, ex decreto iudicis morietur homo ille.“

<sup>1)</sup> Deut. 5, 16. <sup>2)</sup> Eph. 6, 3. <sup>3)</sup> Sap. 4, 11. <sup>4)</sup> Is. 57, 1. <sup>5)</sup> Ex. 21, 17. <sup>6)</sup> Prov. 19, 26. <sup>7)</sup> Prov. 20, 20. <sup>8)</sup> Prov. 30, 17. <sup>9)</sup> II. Reg. 18, 14. <sup>10)</sup> Deut. 17, 12.

**XXI.** *Quibus potissimum rationibus parentes se dignos honore illo divinitus praescripto reddere possint.*

Et quemadmodum divina lege sancitum est, ut parentibus filii honorem habeant, ut pareant, ut obsequantur: sic parentum propria officia sunt atque munera, ut sanctissimis disciplinis ac moribus filios imbuant, iisque optima dent vivendi praecepta, ut ad religionem instructi et parati Deum sancte inviolateque venerentur; quod a parentibus Susannae<sup>1)</sup> factum esse legimus. Itaque sacerdos parentes commoneat, ut se liberis magistros praebeant virtutis, aequitatis, continentiae, modestiae et sanctitatis; triaque praesertim declinent, in quibus saepe offendere consueverunt: primum, ne quid acerbius in liberos aut loquantur aut statuant, quod Apostolus in epistola ad Colossenses ita praecepit<sup>2)</sup>: „Patres, nolite ad indignationem provocare filios vestros, ut non pusillo animo fiant;“ nam periculum est, ne fracto abiectoque animo sint, dum omnia timent. Quare illud praecipiat, ut nimiam severitatem effugiant, malintque liberos corrigeret, quam ulcisci.

**XXII.** *Quo modo parentes erga liberos remissi esse non debeant, nec eis ut nimis amplum patrimonium relinquant, nimis laborare.*

Deinde, si qua culpa commissa est, quum necessaria sit castigatio et obiurgatio, ne quid liberis per indulgentiam dissolute remittant; saepe enim filii parentum nimia lenitate et facilitate depravantur. Quamobrem a dissoluta indulgentia deterreat exemplo Heli summi sacerdotis<sup>3)</sup>, qui, quod in liberos indulgentior fuerat, maximo supplicio est affectus. Postremo, ne, quod foodissimum est, in filiorum educatione ac doctrina praeposta consilia ineant; etenim permulti in hac una cogitatione curaque versantur, ut opes, ut pecunias, ut lautum et amplum patrimonium liberis relinquant; quos non ad religionem, non ad pietatem, non ad bonarum artium disciplinam, sed ad avaritiam et ad rem familiarem augendam cohortantur, nec de filiorum existimatione aut salute sunt solliciti, dummodo pecuniosi sint et praedivites; quo quid dici aut cogitari turpius potest? Ita fit, ut ad illos non tam rerum copias, quam sua scelera et flagitia transferant; quibus tandem non ad coelum se duces praebent, sed ad inferorum supplicia sempiterna. Sacerdos igitur optimis praeceptis parentes instituat, eosque ad Tobiae<sup>4)</sup> exemplum ac similem virtutem excitet, ut, quum filios ad Dei cultum et sanctimoniam probe erudierint, ab iis etiam amoris, et observantiae, et obsequii uberrimos fructus capiant.

<sup>1)</sup> Dan. 13. 3. <sup>2)</sup> Col. 3, 21. Eph. 6, 4. <sup>3)</sup> I. Reg. 4, 18. <sup>4)</sup> Tob. c. 4.

## CAPUT VI.

De quinto Praecepto.

Ne occides.

*I. Quis sit eius doctrinae, quae hoc praecepto includitur, fructus et utilitas.*

Magna illa, quae pacificis hominibus proposita est, felicitas — „quoniam<sup>1)</sup> filii Dei vocabuntur“, pastores maxime commovere debet, ut praecepti huius disciplinam fidelibus diligenter accurateque tradant; nam ad conciliandas hominum voluntates nulla melior ratio iniri potest, quam si eiusmodi praecepti lex recte explicata, ab omnibus ita, ut oportet, sancte servetur; quoniam tum sperare licet, ut summa animi consensione coniuncti homines concordiam et pacem maxime colant. Sed quam necesse sit, praeceptum hoc explicari, ex eo perspicitur, quod immensa illa universae terrae inundatione facta, hoc unum inprimis est, quod Deus hominibus interdixit: „Sanguinem“, inquit<sup>2)</sup>), „requiram animarum vestrarum de manu cunctarum bestiarum, et de manu hominis.“ In Evangelio etiam, quo primum veteres leges a Domino explicatae sunt, in iis haec prima est, de qua apud sanctum Matthaeum<sup>3)</sup> ita scriptum est: „Dictum est enim: Non occides“, et reliqua, quae hac de re eo ipso loco deinceps commemorantur. Fideles praeterea attente libenterque praeceptum hoc audire debent. Si enim eius vis spectatur, ad vitam cuiusque tuendam valet; quoniam iis verbis: „Non occides“, homicidium omnino interdictum est. Itaque singuli homines tanta cum voluptate animi illud accipere debent, perinde ac si, ira Dei proposita gravissimisque aliis poenis, nominatim prohibitum sit, ne quis eorum laedatur. Ergo ut praeceptum hoc auditu iucundum est, ita eius peccati cautio, quod praecepto prohibetur, iucunditatem habere debet.

*II. Quid hoc praecepto quum vetetur, tum iubeatur.*

Cum autem huius legis vim Dominus explicaret, in eo duo contineri ostendit, alterum, ne occidamus, quod a nobis fieri vetitum est; alterum<sup>4)</sup> quod facere iubemur, ut concordia amicitia caritateque inimicos complectamur, pacem habeamus cum omnibus, cuncta denique incommoda patienter feramus.

*III. Licet bestiis vesci et animalia occidere.*

In eo autem, quod caedes prohibetur, illud primum docendum est, quae caedes sint eiusmodi, quae hac praecepti

<sup>1)</sup> Mat. 5, 9. <sup>2)</sup> Gen. 9, 5. <sup>3)</sup> Mat. 5, 21. <sup>4)</sup> Ex. 21, 12. Col. 3, 8.

lege non vetentur. Nam bestias occidi prohibitum non est, quoniam si illis vesci a Deo hominibus est concessum, fas item est illas occidi; qua de re ita sanctus Augustinus<sup>1)</sup>, „quum audimus,“ inquit, „Non occides, non accipimus hoc dictum esse de fructetis, quia nullus est iis sensus; nec de irrationalibus animalibus, quia nulla nobis ratione sociantur.“

*IV. Licet homines in iudicio vel morti adiudicare vel interimere.*

Alterum permissum caedis genus est, quod ad eos magistratus pertinet, quibus data est necis potestas, qua ex legum praescripto iudicioque in facinorosos homines animadvertisunt, et innocentes defendunt; quo in munere dum iuste versantur, non modo ii caedis non sunt rei, sed huic divinae legi, qua caedes vetatur, maxime obediunt. Cum enim legi huic finis is propositus sit, ut hominum vitae salutique consulatur: magistratum item, qui legitimi sunt scelerum vindices, animadversiones eodem spectant, ut audacia et iniuria suppliciis repressa, tuta sit hominum vita. Quare David: „In matutino,“ inquit<sup>2)</sup>, „interficiebam omnes peccatores terrae, ut disperderem de civitate Domini omnes operantes iniquitatem.“

*V. Quo modo etiam, qui in bello iusto occidunt, rei caedis non sint.*

Qua ratione ne illi quidem peccant, qui iusto bello, non cupiditate aut crudelitate impulsi, sed solo publicae utilitatis studio vitam hostibus admittunt. Sunt praeterea eiusmodi caedes, quae nominatim iussu Dei fiunt. Levi filii non peccaverunt, qui uno die tot millia hominum occiderunt; qua caede facta sic ad eos locutus est Moyses<sup>3)</sup>: „Consecrasti manus vestras hodie Domino.“

*VI. Huius praecepti reus non est, qui hominem fortuito casu interimit.*

Neque vero huius praecepti reus est, qui non sponte, nec meditato, sed fortuitu hominem occidit; qua de re in Deuteronomii<sup>4)</sup> libro ita scriptum est: „Qui percusserit proximum suum nesciens, et qui heri et nudius tertius nullum contra eum odium habuisse comprobatur, sed abiisse cum eo simpliciter in silvam ad ligna caedenda, et in succione lignorum securis fuderit manu, ferrumque lapsum de manubrio amicum eius percusserit, et occiderit.“ Hae caedes eiusmodi sunt, quae, quia non voluntate, neque de industria inferuntur, propterea non omnino in peccatis numerantur. Quod S. Augustini<sup>5)</sup> sententia comprobatur: „Absit enim,“ inquit, „ut ea, quae aut propter

---

<sup>1)</sup> de civ. Dei 1, 20. <sup>2)</sup> Ps. 100, 8. <sup>3)</sup> Ex. 32, 29. <sup>4)</sup> Deut. 19, 4. 5. <sup>5)</sup> ep. 47.

*Dec. V.*

bonum aut licitum facimus, si quidem praeter nostram voluntatem quidquam mali acciderit, nobis imputetur.

*VII. Quo modo homicidii reus est, qui casu caedem fecit.*

In quo tamen duabus de causis peccari potest: altera, si quis in re iniusta occupatus, hominem occiderit, exempli causa, si quis gravidam mulierem pugno vel calce percuteret, ex quo abortus sequeretur; fuisset quidem illud praeter percussoris voluntatem, non tamen praeter culpam, cum illi non liceret ullo modo gravidam mulierem percutere. Altera, si non omnibus circumspectis negligenter et incaute aliquem occiderit.

*VIII. Licet etiam salutis suae tuendae causa alterum occidere.*

Qua etiam ratione, si quis salutis suae defendendae causa, omni adhibita cautione, alterum interemerit, hac lege non teneri satis appetat. Atque hae quidem, quas modo commemoravimus, caedes sunt, quae hoc legis praecepto non continentur; quibus exceptis reliquae omnes prohibentur, sive homicidam quis spectet, sive qui occiditur, sive modos, quibus caedes fit.

*IX. Nemini licet privata auctoritate caedem facere.*

Nam quod ad eos pertinet, qui caedem faciunt, nemo plane excipitur, non divites, non potentes homines, non domini, non parentes, sed delectu omni et discrimine remoto occidere vetitum est omnibus.

*X. Nemo prorsus est, qui hac lege tutus esse non possit.*

Si vero ii spectantur, qui interficiuntur, ad omnes haec lex pertinet: nec quisquam est tam humilis et abiectae conditionis homo, quin legis huius vi defendatur. Neque vero se ipsum interficere cuiquam fas est, cum vitae suae nemo ita potestatem habeat, ut suo arbitratu mortem sibi consiscere liceat; ideoque legis huius verbis non ita praecriptum est: „Ne alium occidas,“ sed simpliciter: „Ne occidas.“

*XI. Quot modis hoc praeceptum violari contingat.*

Sin autem multiplicem caedis faciendae modum attendimus, nemo est, qui excipiatur. Non solum enim suis cuiquam manibus, aut ferro, aut lapide, aut baculo, aut laqueo, aut veneno vitam homini eripere non licet, sed consilio, ope, auxilio, vel alia quamcumque ratione id fieri prorsus vetitum est. In quo summa tarditas stuporque Iudeorum fuit, qui crederent se hoc praeceptum servare, si manus tantum a caede abstinerent. Sed homini Christiano, qui interprete Christo didicit hanc legem spiritualem esse, nempe quae non manus solum puras, sed animum etiam castum sincerumque nos ha-

bere iubet: illud non satis omnino est, quod illi satis cumulate se praestare arbitrabantur; nam ne irasci quidem cuiquam licere, in Evangelio traditum est, quum dicat Dominus<sup>1)</sup>: „Ego autem dico vobis: Omnis, qui irascitur fratri suo, reus erit iudicio; qui autem dixerit fratri suo: Raca, reus erit consilio; qui autem dixerit: Fatue, reus erit gehennae ignis.“

*XII. Quo modo quis irascendo peccare, vel non peccare potest.*

Ex quibus verbis perspicuum est, eum culpa non carere, qui fratri succenseat, quamvis iram animo inclusam contineat; qui vero eius irae significationem aliquam dederit, graviter peccare; at multo gravius, qui non vereatur dure fratrem accipere, et ei convictionem facere. Et quidem hoc verum est, si nulla subsit irascendi causa. Nam irae causa, quae a Deo legibusque conceditur, ea est, quum in eos animadvertisimus, qui nostro imperio potestatique parent, si in eis sit culpa. Christiani enim hominis ira non a carnis sensibus, sed a Spiritu sancto proficiisci debet, quum „templa<sup>2)</sup> sancti Spiritus,“ in quibus Iesus Christus habitet, nos esse conveniat.

*XIII. Quo modo homines perfecte hanc legem observent, et quam multi in eam peccent.*

Multa praeterea sunt a Domino tradita, quae ad perfectam huius legis rationem pertinent; qualia illa sunt<sup>3)</sup>. „Non resistere malo, sed, si quis te percutserit in dexteram maxillam tuam, praebet illi et alteram, et ei, qui vult tecum in iudicio contendere, et tunicam tuam tollere, dimitte ei et pallium, et quicumque te angariaverit mille passus, vade cum illo alia duo.“ Ex his, quae iam commemorata sunt, animadvertisit, quam proclives sint homines ad ea peccata, quae hoc praecepto vetita sunt, quamvis multi reperiantur, qui si minus manu, animo saltem caedis scelus committunt.

*XIV. Quantum in sacris literis homicidium Deus detestetur.*

Et quoniam huic tam periculo morbo remedia in sacris literis adhibita sunt, parochi est officium, ea diligenter fidelibus tradere; praecipuum autem illud est, ut intelligent, quam nefarium sit peccatum, hominis caedes. Idque vel plurimis maximisque sanctorum literarum testimonii perspici potest. Usque enim adeo homicidium detestatur Deus in sanctis literis<sup>4)</sup>, ut a bestiis hominum caedis poenam se repetitum dicat, ac belluam, quae hominem laeserit, occidi iubeat; neque aliam ob causam a sanguine hominem adhorrere voluit, nisi ut omni ratione a nefaria hominis caede et animum et manus abstineret.

<sup>1)</sup> Mat. 5, 22. <sup>2)</sup> I. Cor. 6, 19. <sup>3)</sup> Mat. 5, 39. sq. <sup>4)</sup> Gen. 9, 5. Ex. 21, 28.

*XV. Quantum sit scelus, hominis caedes, ratione demonstratur.*

Sunt enim homicidae humani generis, atque ideo naturae hostes acerbissimi, qui, quantum in eis est, universum Dei opus evertunt, quum hominem tollant, cuius causa is omnia, quaecumque procreata sunt, se fecisse testatur; immo vero in Genesi<sup>1)</sup> quum prohibitum sit hominem occidi, quia illum Deus ad imaginem suam et similitudinem creavit: insignem Deo iniuriam is facit, quasique violentas illi manus afferre videtur, qui eius imaginem e medio tollit. Hoc divina animi cogitatione meditatus David, gravissime de sanguinariis hominibus conquestus est illis verbis<sup>2)</sup>: „Veloci pedes eorum ad effundendum sanguinem.“ Neque simpliciter dixit, „occidunt,“ sed „effundunt sanguinem;“ quae verba ad detestabilis illius sceleris amplificationem, immanemque illorum crudelitatem ostendendam protulit. Utque declararet in primis, quam praecepites illi diabolico quodam impulsu ad id facinus ferantur, dixit: „Veloci pedes eorum ad effundendum sanguinem.“

*XVI. Quid in hoc praecepto Deus faciendum imperet.*

Iam vero quae in hoc praecepto servanda esse Christus Dominus iubet, eo spectant, ut pacem cum omnibus habeamus; ait enim, quum hunc locum interpretaretur<sup>3)</sup>: „Si offeres munus tuum ad altare, et ibi recordatus fueris, quia frater tuus habet aliquid adversum te: relinque ibi munus tuum ante altare, et vade prius reconciliari fratri tuo, et tunc veniens offeres munus tuum,“ et quae sequuntur. Quae ita a parocho explicabuntur, ut doceat, sine ulla exceptione omnes caritate complectendos esse; ad quam in huius praecepti explicatione fideles, quam maxime poterit, incitabit, quod in eo proximi diligendi virtus maxime elucet. Quum enim odium hoc praecepto aperte vetetur, quoniam<sup>4)</sup> „qui fratrem suum odit, homicida est,“ certe illud consequitur, ut amoris et caritatis praeceptum detur.

*XVII. Quae officia sint caritatis, quae hoc praecepto continentur.*

Cumque hac lege de caritate et amore praeceptum sit, tum omnium etiam illorum officiorum atque actionum, quae caritatem ipsam consequi solent, praecepta traduntur. „Caritas patiens est,“ inquit D. Paulus<sup>5)</sup>. Patientia igitur nobis praecepitur, in qua nos animas nostras possessuros esse, Salvator<sup>6)</sup> docet. Beneficentia deinde caritatis comes est et socia; quoniam caritas „benigna est<sup>7)</sup>.“ Benignitatis autem at-

<sup>1)</sup> Gen. 9, 6. <sup>2)</sup> Ps. 13, 3. Is. 59, 7. <sup>3)</sup> Mat. 5, 23, 24. Rom. 12, 18. Hebr. 12, 14.  
<sup>4)</sup> I. Io. 3, 15. <sup>5)</sup> I. Cor. 13, 4. <sup>6)</sup> Luc. 21, 19. <sup>7)</sup> I. Cor. 13, 4.

que beneficentiae virtus late patet, eiusque officium in iis rebus maxime versatur, ut pauperibus suppeditemus res necessarias, cibum esurientibus, sitiensibus potum demus, nudos vestiamus; et quo quisque opis nostrae magis indiget, eo in illum plus liberalitatis conferamus.

*XVIII. Quo modo omnium caritatis officiorum perfectissimum sit inimicorum dilectio.*

Haec beneficentiae et bonitatis officia, quae per se sunt illustria, eo fiunt illustriora, si inimicis praestentur; ait enim Salvator<sup>1)</sup>: „Diligitte inimicos vestros, benefacite iis, qui oderunt vos;“ quod etiam Apostolus monet illis verbis<sup>2)</sup>: „Si esuirerit inimicus tuus, ciba illum; si sitit, potum da illi; hoc enim faciens, carbones ignis congeres super caput eius. Noli vinci a malo, sed vince in bono malum.“ Deinde si caritatis legem spectemus, quae benigna est: omnia, quaecunque ad mansuetudinem, lenitatem, aliasve id generis virtutes pertinent, officia, colere ea lege prescribi intelligemus.

*XIX. Qua praecipue re caritas proximi, quae hic imperatur, elucescat.*

At vero longe omnium praestantissimum officium, quod caritatis plenissimum est, in quo maxime nos exercere convenit, illud est, ut iniurias, quas accepimus aequo animo remittamus atque condonemus; quod ut plane efficiamus, saepe nos divinae literae, ut antea dictum est, monent atque hortantur, quum non beatos solum eos dicant,<sup>3)</sup> qui ita prorsus faciunt, sed erratorum etiam veniam iisdem a Deo datam affirment; qui vero hoc ipsum facere negligunt, aut omnino recusant, illam non consequuntur. Sed quoniama ulciscendi libido hominum mentibus fere insita est, parochus maximam in eo diligentiam ponat necesse est, ut iniuriarum oblivisci, easque remittere Christianum hominem oportere, non doceat solum, sed penitus etiam fidelibus persuadeat. Quumque hac ipsa de re apud sacros scriptores multa fiat mentio, eos consulat, ad refellendam illorum pertinaciam, qui in ulciscendi cupiditate animo obstinato sunt atque obfirmato. Argumenta in promptu habeat, quae illi Patres gravissima, et ad eam rem maxime accommodata, pie adhibuerunt.

*XX. Quibus praesertim rationibus odium reprimendum sit, inducendique sint fideles ad iniuriarum oblivionem.*

Verum haec potissimum tria explicanda sunt. Primum est, ut, qui se iniuriarum accepisse putat, ei maxime persuadea-

<sup>1)</sup> Mat. 5, 44. <sup>2)</sup> Rom. 12, 20. 21. Prov. 25, 21. <sup>3)</sup> Is. 58, 6. Luc. 6, 38.

tur, illum detrimenti aut iniuriae praecipuam causam non fuisse, quem ipse ulcisci cupit. Sic admirabilis ille Iob fecit, qui a Sabaeis hominibus, a Chaldaeis, et a daemonе graviter laesus, nulla tamen eorum habita ratione, ut vir rectus et homo admodum pius recte pieque iis verbis usus est<sup>1)</sup>: „Dominus dedit, Dominus abstulit.“ Itaque patientissimi illius viri oratione et exemplo Christiani homines sibi persuadeant, quod verissimum est, omnia, quaecumque in hac vita patimur, a Domino, qui iustitiae omnis misericordiaeque parens est et auctor, proficiisci.

*XXI. Homines nos persequentes, Dei ministri ac satellites sunt, quamvis id ex mala voluntate faciant.*

Neque vero ille nos, quae eius est immensa benignitas, ut inimicos punit, sed uti filios corrigit et castigat. Nec profecto, si recte animadvertis, in hisce rebus homines aliud omnino sunt, nisi ministri et quasi satellites Dei, et quanquam homo potest male aliquem odisse, pessimeque illi cupere, tamen ei, nisi permisso Dei, nocere nullo modo potest. Hac ratione adductus Ioseph<sup>2)</sup>, fratum impia consilia, sic David<sup>3)</sup> iniurias sibi a Semei illatas, aequo animo tulit. Ad hanc item rem illud argumenti genus valde pertinet, quod sanctus Chrysostomus<sup>4)</sup> graviter atque erudite pertractavit: neminem scilicet nisi a se ipso laedi; nam qui se iniuriōse tractatos esse opinantur, si rem recta secum via reputent, comperient profecto, nullam se ab aliis iniuriam aut damnum accepisse; etsi enim, quibus ipsi laeduntur, ea extrinsēcus eveniunt, tamen se maxime ipsi offendunt, quum animum odio, cupiditate, invidia nefarie contaminant.

*XXII. Quae ad eos commoda proveniant, qui iniurias libenter condonant.*

Alterum est, quod duo praecipua commoda complectitur, quae ad illos pertinent, qui pio erga Deum studio adducti iniurias libenter remittunt; quorum primum illud est, quod aliena debita remittentibus promisit Deus fore, ut ipsi etiam peccatorum veniam impetrent; ex quo promisso, quam gratum illi sit hoc pietatis officium, facile appetet. Alterum commodum est, quod nobilitatem quandam et perfectionem assequimur; quoniam, condonandis iniuriis, quodammodo Dei similes efficimur, „qui<sup>5)</sup> solem suum oriri facit super bonos et malos; et pluit super iustos et iniustos.“

<sup>1)</sup> Iob 1, 21. <sup>2)</sup> Gen. 45, 4. seq. Hebr. 12, 6. Ap. 3, 19. <sup>3)</sup> II. Reg. 16, 10. seq.  
<sup>4)</sup> In hom. Quod nemo laeditur nisi a se ipso. <sup>5)</sup> Mat. 5, 45. 6, 14.

*XXIII. Quae et quot incommoda ex odio inimicorum proveniant.*

Postremo explicanda sunt incommoda illa, in quae nos tum incidimus, quum iniurias, quae nobis illatae sunt, condonare nolumus. Itaque parochus illis, qui sibi in animum inducere non possunt, ut inimicis ignoscant, ob oculos ponat, odium non solum peccatum grave esse, sed etiam diuturnitate peccandi gravius inhaerere; quum enim is, in cuius animo hic affectus insederit, inimici sui sanguinem sitiat, illius ulciscendi spe plenus, dies noctesque in perenni quadam mala mentis agitatione ita versatur, ut nunquam a caedis aut nefariae allicuius rei cogitatione cessare videatur. Quo fit, ut is vel nunquam, vel maximo negotio ad id impellatur, ut aut prorsus ignoscat, aut aliqua saltem ex parte iniurias remittat; quare merito vulneri comparatur, cui telum infixum haeret.

*XXIV. Multa peccata ex odio nasci demonstratur.*

Multa praeterea incommoda et peccata sunt, quae hoc uno odii peccato, tamquam vinculo quodam, iuncta tenentur. Ideoque D. Ioannes in hanc sententiam ita dixit<sup>1)</sup>: „Qui odit fratrem suum, in tenebris est, et in tenebris ambulat, et nescit quo eat, quia tenebrae obcaecaverunt oculos eius.“ Itaque saepius labatur necesse est. Etenim quo pacto fieri potest, ut dicta aliquis aut facta illius probet, quem oderit? Hinc temeraria et iniqua iudicia existunt, irae, invidiae, obtrectationes, et alia eiusmodi, quibus illi quoque implicari solent, qui aut cognatione, aut amicitia iuncti sunt. Itaque saepe fit, ut ex uno peccato multa existant; neque iniuria dicitur hoc peccatum esse „diaboli“, quandoquidem ipse ab initio „homicida“ fuit. Quamobrem Dei Filius, Dominus noster Iesus Christus, quum sibi mortem Pharisaei afferre cuperent, illos „a patre diabolo“ genitos esse dixit<sup>2)</sup>.

*XXV. Remedia adversus peccatum odii.*

Sed praeter haec, quae dicta sunt, unde sceleris huius detestandi rationes peti possunt, alia quoque remedia, et ea profecto maxime opportuna, sanctarum literarum monumentis tradita sunt. Ac primum omnium remedium et maximum est Salvatoris nostri exemplum, quod ad imitandum nobis propnere debemus. Is enim, quum ne minima quidem peccati suspicio in eum cadere posset, virgis caesus, spinis coronatus, et cruci denique affixus, eam habuit orationem plenissimam pietatis<sup>3)</sup>: „Pater, dimitte illis; non enim sciunt, quid faciunt.“ Cuius aspersionem sanguinis testatur Apostolus<sup>4)</sup> „melius lo-

<sup>1)</sup> I. 2, 14. <sup>2)</sup> Io. 8, 44. I. Petr. 2, 22. <sup>3)</sup> Luc. 23, 34. <sup>4)</sup> Hebr. 12, 24.

quentem, quam Abel.<sup>4)</sup> Alterum autem remedium ab Ecclesiastico propositum est, ut mortem atque illum iudicii diem recordemur. „Memorare,“ inquit ille<sup>1)</sup>, „novissima tua, et in aeternum non peccabis;“ quae sententia eodem spectat, ac si dicat: illud saepe etiam atque etiam cogita, brevi fore, ut mortem obeas; proinde quia tali tempore tibi optatissimum erit, et maxime necessarium, summam Dei misericordiam impetrare, eam tibi ob oculos iam nunc perpetuoque proponas necesse est. Ita enim fiet, ut immanis illa ulciscendi cupiditas tibi exhauriatur, quum ad misericordiam Dei implorandam nullum aptius maiusve remedium invenias, quam oblivionem iniuriarum et amorem in eos, qui te aut tuos re aut oratione violarint.

## CAPUT VII.

### *De sexto Praecepto.*

Non<sup>2)</sup> moechaberis.

*I. Quo pertineat istud praeceptum, quaque ratione a parochis tractandum sit.*

Quoniam viri et uxoris vinculum arctissimum est, et nihil utrique iucundius accidere potest, quam intelligere, se mutuo quodam et singulari amore diligere; contra, nihil molestius, quam sentire, a se debitum et legitimum amorem alio transferri: recte quidem atque ordine illam, quae hominis vitam a caede tuetur, legem haec, quae de moechia sive adulterio est, consequitur, ut sanctam illam et honorabilem matrimonii coniunctionem, unde magna caritatis vis exsistere solet, nemo ullo adulterii scelere violare aut dirimere audeat. Sed tamen in hac ipsa re explicanda cautus admodum sit parochus et prudens; et tectis verbis rem commemoret, quae moderationem potius desiderat, quam orationis copiam. Verendum est enim, ne, dum is late atque copiose nimis explicare studet, quibus modis homines ab huius legis praescripto discedant, in illarum rerum sermonem forte incidat, unde excitandae libidinis potius materia, quam restiguendae illius ratio emanare solet.

*II. Quae in hoc praecepto iussa comprehendantur.*

Sed quoniam hoc praecepto multa continentur, quae praetermittenda non sunt, ea suo loco explicabuntur a parochis. Eius igitur duplex vis est: altera, qua disertis verbis adulterium vetatur; altera, quae eam sententiam inclusam habet, ut animi corporisque castitatem colamus.

<sup>1)</sup> Eclus. 7, 40. <sup>2)</sup> Ex. 20, 14. Deut. 5, 18.

*III. Quid sub nomine moechiae seu adulterii hic prohibeatur.*

Ut autem ab eo, quod prohibitum est, docendi initium sumatur: Adulterium est legitimi tori iniuria, sive alienus sive proprius ille sit. Etenim si maritus cum muliere soluta rem habet, suum ipse torum violat; si vero solutus vir alienam cognoscat uxorem, adulterii labe torus alienus inquinatur. Hoc vero adulterii interdicto omnia prohiberi, divus Ambrosius<sup>1)</sup> et Augustinus<sup>2)</sup> auctores sunt, quaecunque in honesta sunt et impudica. In hanc sententiam haec verba accipienda esse, ex sacris literis tum veteris tum novi Testamenti licet colligere; nam praeter adulterium alia libidinis genera apud Moysen puniuntur.

*IV. Variae libidinum species, quae in Scripturis numerantur.*

Est Iudee in Genesi<sup>3)</sup> iudicium in nurum suam. Est praeclara illa in Deuteronomio<sup>4)</sup> Moysis lex, ne de filiabus Israel ulla esset meretrix. Exstat praeterea Tobiae<sup>5)</sup> ad filium eiusmodi adhortatio: „Attende tibi, fili mi, ab omni fornicatione.“ Ecclesiasticus<sup>6)</sup> item: „Erubescite,“ inquit, „a respectu mulieris fornicariae.“ In Evangelio etiam Christus Dominus inquit<sup>7)</sup>, de corde exire „adulteria et fornicationes, — quae coquinuant hominem.“ Apostolus vero Paulus hoc vietum saepe multis gravissimisque verbis detestatur<sup>8)</sup>: „Haec est,“ ait, „voluntas Dei, sanctificatio vestra, ut abstineatis vos a fornicatione,“ et<sup>9)</sup>: „Fugite fornicationem,“ et<sup>10)</sup>: „Nec commisceamini fornicariis.“ „Fornicatio autem,“ inquit<sup>11)</sup>, „et omnis immunditia, aut avaritia, nec nominetur in vobis,“ et<sup>12)</sup>: „Neque fornicarii — neque adulteri, neque molles, neque masculorum concubidores, — regnum Dei possidebunt.“

*V. Cur praecepue in hoc praecepto adulterii sit facta mentio.*

Praecipue vero ob eam rem adulterium diserte vetitum est, quia praeter turpidinem, quae illi cum aliis intemperantiae generibus communis est, iniustitiae quoque peccatum non solum in proximum, sed etiam in civilem societatem adiunctum habet. Est illud idem certum, qui se a ceterarum libidinum intemperantia non abstinet, eum ad hanc, quae adulterii est, incontinentiam facile labi. Quare hoc adulterii interdicto facile intelligimus, omne impuritatis et impudicitiae genus, quo polluitur corpus, prohiberi; immo omnem intimam animi libidinem hoc praecepto vetitam esse, tum Christus Dominus docuit illis verbis<sup>13)</sup>: „Audistis quia dictum est antiquis:

<sup>1)</sup> de Abrah. 1. 4. <sup>2)</sup> sup. Exod. q. 71. <sup>3)</sup> Gen. 38, 24. <sup>4)</sup> Deut. 23, 17. <sup>5)</sup> Tob. 4, 13. <sup>6)</sup> Eclips. 41, 21. 25. <sup>7)</sup> Mat. 15, 19. <sup>8)</sup> I. Thes. 4, 3. <sup>9)</sup> I. Cor. 6, 18. <sup>10)</sup> I. Cor. 5, 9. <sup>11)</sup> Eph. 5, 3. <sup>12)</sup> I. Cor. 6, 9. 10. <sup>13)</sup> Mat. 5, 27. 28.

*Sec. VI.*

Non moechaberis. Ego autem dico vobis, quia omnis, qui viserit mulierem ad concupiscendum eam, iam moechatus est eam in corde suo.<sup>1)</sup> Haec sunt, quae fidelibus publice tradenda duimus; si tamen ea addantur, quae a sancta Tridentina synodo<sup>1)</sup> in adulteros, et eos, qui scorta et pellices alunt, decreta sunt, praetermissis multis aliis ac variis impudicitiae et libidinis generibus, de quibus privatum unusquisque a parocho admonendus erit, ut temporis et personarum ratio postulabit. Sequitur nunc, ut ea explicentur, quae iubendi vim habent.

*VI. Quid praeter ea, quae prohibentur, hic necessario observandum praescribatur.*

Docendi igitur sunt fideles, ac vehementer hortandi, ut pudicitiam et continentiam omni studio colant, mundentque se ab omni inquinamento carnis et spiritus, perficientes sanctificationem in timore Dei. In primis autem admonendi sunt, quamvis castitatis virtus in eorum hominum genere magis eluceat, qui pulcherrimum illud ac plane divinum virginitatis propositum sancte et religiose colunt: tamen iis etiam convenire, vel qui caelibem vitam agunt, vel matrimonio iuncti a vetita libidine pueros se et integros servant.

*VII. Quae sint potissimum cogitanda volenti libidines suas edomare.*

Quoniam vero multa a sanctis Patribus tradita sunt, quibus docemur domitas habere libidines, et coercere voluptates: ea parochus studeat populo accurate exponere, atque in hac tractatione diligentissime veretur. Haec autem eiusmodi sunt, partim quae in cogitatione consistunt, partim quae in actione. Quod in cogitatione remedium positum est, id in eo maxime versatur, ut intelligamus, quanta sit huius peccati turpitudo et pernicies; qua cognita facilior fiet eius detestandi ratio. Perniciosum vero scelus esse, intelligi ex eo potest, quoniam propter hoc peccatum e Dei regno pelluntur atque exterminantur homines, quod malorum omnium ultimum est. Et haec quidem calamitas omnium scelerum communis est. Illud autem huius peccati proprium, quod qui fornicantur, in sua ipsi corpora peccare dicuntur, ex sententia Apostoli ita scribentis<sup>2)</sup>: „Fugite fornicationem, omne enim peccatum, quodcumque fecerit homo, extra corpus est; qui autem fornicatur, in corpus suum peccat. Quod ob eam causam dictum est, quoniam illud iniuriose tractat, quum eius violat sanctitatem; qua de re ad Thessalonices ita D. Paulus<sup>3)</sup>: „Haec

<sup>1)</sup> Sess. 24. cap. 8. de Ref. matr. <sup>2)</sup> I. Cor. 6, 18. <sup>3)</sup> I. Thes. 4, 3—5.

est enim, " inquit, „voluntas Dei, sanctificatio vestra, ut abstineatis vos a fornicatione; ut sciat unusquisque vestrū vas suum possidere in sanctificatione et honore, non in passione desiderii, sicut et gentes, quae ignorant Deum.“ Deinde, id quod scelestius est, si homo Christianus meretrici turpiter se dedat, membra, quae Christi sunt, ea meretricis facit; ita enim D. Paulus ait<sup>1)</sup>: „Nescitis quoniam corpora vestra membra sunt Christi? tollens ergo membra Christi, faciam membra meretricis? absit. An nescitis quoniam qui adhaeret meretrici, unum corpus efficitur?“ Est praeterea homo Christianus, ut idem testatur<sup>2)</sup>, „templum Spiritus sancti,“ quod violare nihil aliud est, nisi ab eo Spiritum sanctum eiicere.

### *VIII. Quibus rationibus adulterii enormitatem intelligere liceat.*

In adulterii autem scelere magna inest iniquitas. Si enim, ut vult Apostolus<sup>3)</sup>, qui matrimonio iuncti sunt, ita eorum alter alterius potestati mancipatus est, ut neuter „sui corporis potestatem“ iusque habeat, sed mutuo quodam sint inter sc quasi servitutis vinculo ita devincti, ut vir ad uxoris voluntatem, contraque uxor ad viri nutum voluntatemque se accommodare debeat: certe, si alteruter corpus suum, quod est alieni iuris, ab eo, cui illud adstrictum est, disiungit, is admodum iniquus est et nefarius. Et quoniam infamiae metus, et ad ea, quae iussa sunt, vehementer incitat homines, et a vetitis magnopere deterret: docebit parochus, adulterium hominibus insignem turpitudinis notam inurere. Nam sacris literis ita proditum est<sup>4)</sup>: „Qui adulter est, propter cordis inopiam, perdet animam suam; turpitudem et ignominiam congregat sibi, et opprobrium illius non delebitur.“ Verum huius sceleris magnitudo ex supplicii severitate facile perspici potest; adulteri enim, lege a Domino in veteri Testamento praescripta<sup>5)</sup>, obruebantur lapidibus.

### *IX. Cuiusmodi poenae impuras libidines fere consequi solent.*

Quin etiam ob unius libidinem, non solum qui scelus admisit, sed universa interdum civitas, ut de Sichimitis<sup>6)</sup> legimus, deleta est. Multa divinae animadversionis exempla in sacris literis prodita sunt, quae ad deterrendos a nefaria libidine homines, parochus colligere poterit: ut Sodomae<sup>7)</sup> et reliquarum finitimarum urbium interitus, Israëlitarum<sup>8)</sup> qui fornicati sunt cùm filiabus Moab in deserto, supplicium, Beniamitarum<sup>9)</sup> deletio. Qui vero mortem effugiant, intolerabiles

<sup>1)</sup> I. Cor. 6, 15. 16. <sup>2)</sup> Ib. v. 19. <sup>3)</sup> I. Cor. 7, 4. <sup>4)</sup> Prov. 6, 32. <sup>5)</sup> Lev. 20, 10. 10, 8, 5. <sup>6)</sup> Gen. 34, 25. <sup>7)</sup> Gen. 19, 24. <sup>8)</sup> Num. 25, 4. <sup>9)</sup> Iud. a. 20.

Sec. II.

tamen dolores ac poenarum cruciatus, quibus saepe plectuntur, non effugint; nam mente caeci, quae poena gravissima est, ita fiunt, ut neque Dei, neque famae, neque dignitatis, neque filiorum denique, vitaque suae rationem habeant, hocque pacto adeo nequam et inutiles fiunt, ut nihil grave committi eis debeat, et ad nullum fere officii munus idonei sint. Huius rei exempla a Davide<sup>1)</sup> et Salomone<sup>2)</sup> petere nobis licet, quorum alter postquam adulteratus est, repente sui dissimilimus ex mitissimo crudelis extitit, ut Uriam optime de se meritum morti obtulerit; alter quum se totum in mulierum libidinem profudisset, ita a vera Dei religione sese avertit, ut „alienos Deos sequeretur.“ Aufert igitur, ut Oseas<sup>3)</sup> dixit, hoc peccatum cor hominis, saepe obcaecat. Nunc ad ea remedia veniamus, quae in actione consistunt.

*X. Quibus modis homines ad libidinem incitentur, quos illi evitare praeceperunt debeat.*

Quorum primum illud est, ut otium maxime fugiamus; in quo Sodomitae homines, ut est apud Ezechielem<sup>4)</sup>, quum hescerent, in spurcissimum illud nefariae libidinis scelus praecepites lapsi sunt. Deinde crapula magnopere est vitanda. „Saturavi eos,“ inquit Propheta<sup>5)</sup>, „et moechati sunt,“ quoniam venter expletus ac saturatus libidinem parit. Hoc ipsum illis verbis Dominus significavit<sup>6)</sup>: „Attendite vobis ne forte graventur corda vestra in crapula et ebrietate.“ Hoc item Apostolus<sup>7)</sup>: „Nolite,“ inquit, ineibriari vino, in quo est luxuria.“ Sed maxime animus ad libidinem oculis inflammari solet, quo pertinet illa Christi Domini sententia<sup>8)</sup>: „Si oculus tuus scandalizat te, erue eum et proice abs te.“ Multae praeterea sunt Prophetarum de eadem re voces; ut est apud Iob<sup>9)</sup>: „Pepigi foedus cum oculis meis, ut ne cogitarem quidem de virgine.“ Sunt multa denique, ac pene innumerabilia exempla malorum, quae ex oculorum aspectu ortum habuerunt. Sic David<sup>10)</sup>, sic rex Sichem<sup>11)</sup> peccavit; hocque item pacto senes illi Susanna<sup>12)</sup> calumniatores deliquerunt.

*XI. Mulierum exquisitus ornatus, sermonesque obscoeni, et alias luxuriae incitamenta fugienda.*

Elegantior item ornatus, quo oculorum sensus valde excitatur, occasionem libidini non parvam saepe praebet; ideoque Ecclesiasticus monet<sup>13)</sup>: „Averte faciem tuam a muliere compta.“ Cum igitur mulieres in nimio ornatus studio ver-

<sup>1)</sup> II. Reg. c. 11. <sup>2)</sup> III. Reg. c. 11. <sup>3)</sup> 4, 11. <sup>4)</sup> Ez. 16, 49. <sup>5)</sup> Ier. 5, 7. <sup>6)</sup> Luc. 21, 34. <sup>7)</sup> Eph. 5, 18. <sup>8)</sup> Mat. 5, 29. Marc. 9, 46. <sup>9)</sup> Iob. 31, 1. Eccl. 9, 5 <sup>10)</sup> II. Reg. 11, 2. <sup>11)</sup> Gen. 34, 2. <sup>12)</sup> Dan. 13, 8. <sup>13)</sup> Eccl. 9, 8.

sentur, non alienum erit, si parochus aliquam in eo diligenter adhibeat, ut eas interdum moneat obiurgetque verbis, quae hoc de genere gravissima Apostolus Petrus ita protulit<sup>1)</sup>: „Mulierum non sit extrinsecus capillatura, aut circumdatio auri, aut indumenti vestimentorum cultus.“ D. Paulus item<sup>2)</sup>: „Non in tortis,“ inquit, „crinibus, aut auro, aut margaritis, vel veste pretiosa;“ multae enim auro et margaritis adornatae ornamenta mentis et corporis perdiderunt. Hoc autem libidinis incitamentum, quod ex vestium exquisito ornato existere solet, alterum sequitur, quod est turpis obscoenique sermonis; nam verborum obscoenitate, quasi face quadam subiecta, adolescentum accenduntur animi. „Corrumptum enim mores bonos colloquia mala,“ inquit Apostolus<sup>3)</sup>, hocque ipsum quum maxime efficiant delicatores et molliores cantus ac saltationes, ab iis quoque diligenter cavendum est. Quo in genere numerantur item libri obscoene et amatorie scripti, qui ita vitandi sunt, ut imagines, quae aliquam turpitudinis speciem prae se ferunt, quum ad turpes rerum illecebras, inflammadosque adolescentum animos vis in illis sit maxima. Sed parochus in primis curet, ut quae de iis a sacrosancto Tridentino concilio<sup>4)</sup> pie religioseque constituta sunt, ea sanctissime serventur. Haec vero omnia, quae commemorata iam sunt, si magno adhibito studio curaque vitentur, omnis fere libidinis materia tollitur.

*XII. Confessionis et eucharistiae et piarum precum usus ad castitatem consequendam est necessarius.*

Sed ad illius vim opprimendam maxime valet frequens confessionis et eucharistiae usus; tum assidue ac piae quidem ad Deum preces, cum eleemosynis atque ieiunio coniunctae. Est enim castitas donum Dei, quod recte potentibus non denegat, nec patitur nos tentari supra id, quod possumus.

*XIII. Corpus castitatem sectanti domandum.*

Corpus autem non ieiuniis modo, et iis praesertim, quae sancta ecclesia instituit, sed vigiliis etiam, piis peregrinationibus atque aliis afflictationum generibus exercendum est, sensuumque appetitiones reprimenda; in his enim atque aliis eiusmodi rebus maxime cernitur temperantiae virtus. In quam sententiam ad Corinthios ita D. Paulus scribit<sup>5)</sup>: „Omnis, qui in agone contendit, ab omnibus se abstinet; et illi quidem ut corruptibilem coronam accipiant, nos autem incorruptam;“ et

<sup>1)</sup> I. Petr. 3, 3. <sup>2)</sup> I. Tim. 2, 9. <sup>3)</sup> I. Cor. 15, 33. <sup>4)</sup> Sess. 25. de cr. de sanct. Imag. <sup>5)</sup> I. Cor. 9, 25. 27.

Dec VI.

paulo post: „Castigo,“ inquit, „corpus meum, et in servitutem redigo, ne forte, quum aliis praedicaverim, ipse reprobus efficiar;“ et alio loco<sup>1)</sup>: „Carnis curam ne feceritis in dessideriis.“

## C A P U T VIII.

### De septimo Praecepto.

Non<sup>2)</sup> furtum facies.

*I. Quanta sit huius praeepti commendatio, et cum duabus precedentibus connexio.*

Veterem hunc ecclesiae morem fuisse, ut huius praeepti vis et ratio inculcaretur auditoribus, indicat illa apud Apostolum<sup>3)</sup> obiurgatio eorum, qui ceteros ab iis vitiis maxime deterrent, quibus ipsi cumulati reperiebantur: „Qui ergo,“ inquit, „alium doces, te ipsum non doces? qui praedicas non furandum, furaris?“ Quo doctrinae bono non solum frequens illorum temporum peccatum corrigerbat, sed etiam turbas ac litas sedabat, aliasque malorum causas, quae furto commoveri solent. In iis et delictis, et delictorum incommodis atque calamitatibus quum nostra etiam haec aetas misere versetur: ad exemplum sanctorum Patrum et Christianae disciplinae magistrorum, parochi hunc urgebunt locum, et assidue ac diligenter huius praeepti vim ac sententiam explicabunt. Ac primum officium et diligentiam suam conferent ad declarandum Dei infinitum amorem erga genus humanum; qui non modo illis duobus interdictis: „Non occides,“ — „Non moechaberis,“ quasi praesidiis, et vitam corpusque nostrum, et famam existimationemque tueatur: sed etiam hoc praeeptio. „Non furtum facies,“ tanquam custodia quadam externas res ac facultates muniat atque defendat.

*II. Quae sit huic praeeptio subiecta sententia.*

Quam enim haec verba subiectam habent notionem, nisi eam, quam supra diximus, quum de aliis praeeceptis loquemur? vetare videlicet Deum, bona haec nostra, quae in eius tutela sint, a quoquam auferri aut violari. Quod divinae legis beneficium quo maius est, eo nos in ipsius beneficii auctorem Deum gratiores esse oportet. Et quoniam et habendae et referendae gratiae nobis optima ratio proposita est, ut non tantum praeepta libenter auribus accipiamus, sed etiam

<sup>1)</sup> Rom. 13, 14. <sup>2)</sup> Ex. 20, 15. Deut. 5, 19. <sup>3)</sup> Rom. 2, 21.

re ipsa probemus: ad hoc colendum praecepti officium fideles excitandi et inflammanti sunt. Est autem hoc praeceptum, quemadmodum superiora, divisum in duas partes; quarum altera, quae furtum vetat, aperte est enunciata; alterius sententia et vis, qua iubemur benigni et liberales esse in proximos, in priore occulta est et involuta. De priore igitur prius dicetur: „Non furtum facies.“

*III. Quid furti vocabulo hic legislator significatum velit.*

In quo illud animadvertisendum est, furti nomine non modo intelligi, quum occulte ab invito domino aliquid auferatur, sed etiam quum aliquid alienum contra voluntatem scientis domini possidetur; nisi forte existimandum est, eum, qui furtum prohibeat, rapinas factas per vim et iniuriam non improbare, quum exstet illud Apostoli<sup>1)</sup>: „Rapaces regnum Dei non possidebunt,“ quorum omnem rationem et consuetudinem fugiendam esse, idem scribit Apostolus<sup>2)</sup>. Quanquam vero maius peccatum rapinae sint, quam furtum, quae praeter rem, quam alicui adimunt, praeterea vim afferunt, et maiores imponunt ignominiam.

*IV. Quum omnem iniustam rei alienae usurpationem Deus hic prohibere velit, cur potius furti quam rapinae meminerit.*

Mirandum tamen non est, quod leviori hoc furti nomine notatum sit divinae legis praeceptum, non rapinae; id enim summa ratione factum est, quia furtum latius patet, et ad plura pertinet, quam rapinae, quas tantummodo illi facere possunt, qui potentia et viribus praestant. Quanquam nemo non videt, exclusis eiusdem generis levioribus peccatis, graviora etiam facinora prohiberi.

*V. Enumerantur furti latius sumpti species.*

Variis autem nominibus notatur iniusta possessio, et usus rerum alienarum, ex varietate eorum, quae et invitis et insciis dominis auferuntur; nam si privatum quid privato admittur, „furtum“ dicitur; si surripitur publico, „peculatus“ appellatur; „plagiatum“ vocant, si homo liber vel servus alienus in servitutem abducitur; si vero sacra res eripitur, nominatur „sacrilegium,“ quod facinus maxime nefarium ac sceleratum adeo in mores inductum est, ut bona quae necessario et sacrorum cultui, et ecclesiae ministris, et pauperum usui pie ac sapienter fuerant attributa, in privatas cupiditates perniciosasque libidines convertantur.

<sup>1)</sup> I. Cor. 6, 10. <sup>2)</sup> I. Cor. 5, 11.

*sec. vi.*  
**VI. Non illi dumtaxat hoc praeceptum transgreduntur, qui re ipsa aliena possident, sed etiam animo.**

Sed praeter ipsum furtum, id est externam actionem funderandi etiam animus et voluntas Dei lege prohibetur. Est enim spiritualis lex, quae animum, fontem cogitationum et consiliorum, inspicit. „De corde enim,“ inquit Dominus apud sanctum Matthaeum<sup>1)</sup>, „exēunt cogitationes malae, homicidia, adulteria, fornicationes, furtū, falsa testimonia.“

**VII. Unde potissimum furtū gravitatem metiri possimus.**

Sed quam grave scelus furtum sit, ipsa naturae vis et ratio satis ostendit; est enim iustitiae contrarium, quae suum cuique tribuit. Nam bonorum distributiones et assignationes, iam inde ab initio iure gentium constitutas, divinis et humanis legibus confirmatas, ratas esse oportet, ut unusquisque, nisi humanam societatem tollere velimus, ea teneat, quae ei iure obtigerunt. Nam, ut Apostolus ait<sup>2)</sup>: „Neque fures, neque avari, neque ebriosi, neque maledici, neque rapaces regnum Dei possidebunt.“ Etsi huius sceleris importunitatem et immanitatem permulta declarant, quae furtum consequuntur. Fiunt enim iudicia temere et inconsulto multa de multis; erumpunt odia, suscitantur inimicitiae, existunt interdum acerbissimae innocentium hominum damnationes.

**VIII. Quo modo sint ablata necessario restituenda.**

Quid dicemus de ea necessitate, quae divinitus imposita est omnibus, satisfaciendi ei, cui aliquid ademptum sit? „Non enim,“ inquit Augustinus<sup>3)</sup>, remittitur peccatum, nisi restituantur ablatum;“ quae restitutio, quum quis assueverit ex alienis locupletari, quantam habeat difficultatem praeter id, quod unusquisque et ex aliorum consuetudine, et de suo sensu iudicare potest, ex testimonio Habacuc<sup>4)</sup> Prophetae licet intelligere; ait enim: „Vae ei, qui multiplicat non sua usquequo, et aggravat contra se densum lutum.“ Lutum appellat densum rerum alienarum possessionem, unde emergere et expedire se homines difficile possint. Furorum autem tam multa sunt genera, ut ea dinumerare sit difficillimum. Quare de his duobus, furto et rapinis, dixisse satis erit, ad quae, tanquam ad caput, reliqua, quae dicemus, referuntur. Ad ea igitur detestanda, et ad fidelem populum a scelesto facinore deterrendum, conferent omnem curam ac diligentiam parochi. Verum huius generis partes persecuamur.

---

<sup>1)</sup> Math. 15, 19. <sup>2)</sup> I. Cor. 6, 10. <sup>3)</sup> ep. 153. c. 6. <sup>4)</sup> Hab. 2, 6.

*IX. Quae sint praecipua furtorum genera, quique furibus sint annumerandi.*

Sunt igitur fures etiam, qui furto sublatas res emunt, vel aliquo modo inventas, occupatas aut ademptas retinent; ait enim sanctus Augustinus<sup>1)</sup>: „Si invenisti, et non reddidisti, rapuisti.“ Quod si rerum dominus nulla ratione inveniri potest, illa sunt bona in usus pauperum conferenda. Quae ut restituat qui adduci non potest, ea re facile probat, se undique ablaturum omnia, si possit. Eodem se alligant scelere, qui in emendis vendendisque rebus fraudes adhibent, et vanitatem orationis; horum fraudes vindicabit Dominus. Graviores et iniquiores in hoc furtorum genere sunt ii, qui fallaces et corruptas merces vendunt pro veris et integris; quive pondere, mensura, numero et regula decipiunt emptores. Est enim in Deuteronomio<sup>2)</sup>, „Non habebis in sacculo diversa pondera;“ et in Levitico<sup>3)</sup>: „Nolite facere iniquum aliquid in iudicio, in regula, in pondere, in mensura; statera iusta, et aequa sint pondera, iustus modius, aequusque sextarius.“ Est et alio loco<sup>4)</sup>: „Abominatio est apud Dominum pondus et pondus; statera dolosa non est bona.“ Furtum etiam aperatum est operariorum et artificum, qui totam et integrum mercudem exigunt ab iis, quibus ipsi iustum et debitam operam non dederunt. Nec vero distinguuntur a furibus servi dominorum, rerumque custodes infidi; quin etiam eo sunt detestabiliores, quam reliqui fures, qui clavibus excluduntur, quod furaci servo nihil domi obsignatum aut occlusum esse potest. Furtum praeterea facere videntur, qui fictis simulatisque verbis, quive fallaci mendicitate pecuniam extorquent; quorum eo gravins est peccatum, quod furtum mendacio cumulant. Illi quoque in furum numero reponendi sunt, qui, quum ad privatum aliquod vel publicum officium conducti sunt, nullam vel parvam operam navantes munus negligunt, mercede tantum ac pretio fruuntur. Reliquam furtorum multitudinem a sollerti avaritia, quae omnes pecuniae vias novit, excogitatam, persequi longum est, et, ut diximus, difficillimum.

*X. Quae sint rapinarum genera, quique raptore dicendi.*

Itaque de rapinis, quod est alterum horum scelerum caput, dicendum videtur, si prius monuerit parochus Christianum populum ut meminerit illius Apostoli sententiae<sup>5)</sup>: „Qui volunt divites fieri, incident in tentationem et in laqueum diaboli.“ Nec ullo sibi loco patiatur excidere praeceptum hoc<sup>6)</sup>:

<sup>1)</sup> 1. Serm. 178. c. 8. <sup>2)</sup> Deut. 15, 13. <sup>3)</sup> Lev. 19, 35. 36. <sup>4)</sup> Prov. 20, 23  
<sup>5)</sup> I. Tim. 6, 9. <sup>6)</sup> Mat. 7, 12.

*Dec. 7.*

„Quaecunque vultis ut faciant vobis homines, et vos facite illis.“ Et illud cogitet perpetuo<sup>1)</sup>: „Quod ab alio oderis fieri tibi, vide ne tu aliquando alteri facias.“ Rapinae igitur patient latius; nam qui debitam operariis mercedem non persolvunt, sunt rapaces, quos sanctus Iacobus ad poenitentiam invitat illis verbis<sup>2)</sup>: „Agite nunc divites, plorate ululantes in miseriis vestris, quae advenient vobis.“ Cuius poenitentiae causam subiungit: „Ecce enim merces operariorum, qui mesuerunt regiones vestras, quae fraudata est a vobis, clamat, et clamor eorum in aures Domini Sabaoth introivit.“ Quod genus rapinarum in Levitico<sup>3)</sup>, in Deuteronomio<sup>4)</sup>, apud Malachiam<sup>5)</sup> et apud Tobiam<sup>6)</sup> vehementer improbatur. In hoc crimine rapacitatis includuntur, qui, quae ecclesiae praesidibus et magistratibus debentur, vectigalia, tributa, decimas, et reliqua huius generis non dissolvunt vel intervertunt, et ad se transferunt.

*XI. Foenerari est rapinam committere, et quam grave scelus illud sit.*

Huc etiam referuntur foeneratores in rapinis acerrimi et acerbissimi, qui miseram plebem compilant ac trucidant usuris. Est autem usura, quidquid praeter sortem et caput illud, quod datum est, accipitur; sive pecunia sit, sive aliiquid aliud, quod emi aut aestimari possit pecunia. Sic enim apud Ezechiel scriptum est<sup>7)</sup>: „Ad usuram non commodaverit, et amplius non acceperit,“ et Dominus apud Lucam<sup>8)</sup>: „Mutuum date, nihil inde sperantes.“ Gravissimum semper hoc fuit facinus, etiam apud gentes, et maxime odiosum. Hinc illud<sup>9)</sup>: „Quid foenerari? Quid hominem, inquit, occidere?“ Nam qui foenerantur, bis idem vendunt, aut id vendunt, quod non est.

*XII. Iudices venales et creditorum fraudatores rapinas committunt.*

Item rapinas faciunt nummarii iudices, qui venalia habent iudicia, et pretio muneribusque definiti optimas tenuiorum et egentium causas evertunt. Fraudatores creditorum et inficiatores, quique sumpto temporis spatio ad solvendum sua vel aliena fide merces emunt, neque fidem liberant, damnabuntur eodem crimen rapinarum; quorum etiam delictum gravius est, quod mercatores illorum destitutiouis et fraudationis occasione magno detimento civitatis vendunt omnia carius; in quos illa Davidis sententia videtur convenire<sup>10)</sup>: „Mutuabitur peccator, et non solvet.“

<sup>1)</sup> Tob. 4, 16. <sup>2)</sup> Iac. 5, 1. 4. <sup>3)</sup> Lev. 19, 13. <sup>4)</sup> Deut. 24, 14. <sup>5)</sup> Mal. 3, 5.  
<sup>6)</sup> Tob. 4, 15. <sup>7)</sup> Ez. 18, 8. 17. <sup>8)</sup> Luc. 6, 35. <sup>9)</sup> Ambros. c. 14. de Tob. <sup>10)</sup> Ps. 36, 21.

*XIII. Locupletes, qui ablatis pignoribus pauperes comprimunt, inter raptore numerantur.*

Quid de locupletibus dicemus iis, qui ab illis, qui solvendo non sunt, quod commodarunt, exigunt acerbius, et pignora etiam ea auferunt contra Dei interdictum, quae ad eorum corpus tuendum sunt necessaria? Deus enim inquit<sup>1)</sup>: „Si pignus a proximo tuo acceperis vestimentum, ante solis occasum reddes ei; ipsum enim est solum, quo operitur, indumentum carnis eius, nec habet aliud in quo dormiat. Si clamaverit ad me, exaudiam eum, quia misericors sum.“ Horum exactionis acerbitatatem iure rapacitatem, atque adeo rapinas appellabimus.

*XIV. Frumenta necessitatis tempore comprimentes sunt raptore.*

Ex numero eorum, qui raptore dicuntur a sanctis Patribus, sunt, qui in frugum inopia compriment frumentum, faciuntque, ut sua culpa carior ac durior sit annona, quod etiam valet in rebus omnibus ad victum et ad vitam necessariis; ad quos illa Salomonis pertinet exsecratio<sup>2)</sup>: „Qui abscondit frumenta, maledicetur in populis.“ Quos, suorum scelerum admonitos, parochi liberius accusabunt, ac propositas illis peccatis poenas explicabunt uberius. Haec de vetitis; nunc ad iussa veniamus, in quibus satisfactio vel restitutio primum locum habet. Peccatum<sup>3)</sup> enim non dimittitur, nisi restituatur ablatum.

*XV. Quosnam ad restitutionem obligari iudicandum sit.*

Sed quoniam non is solum, qui furtum fecit, ei, cui fatus est, id debet restituere, sed omnes praeterea, qui furti participes fuerunt, hac lege restitutionis tenentur: aperiendum est, qui sint illi, qui hanc satisfaciendi vel restituendi necessitatem effugere non possint. Sunt autem plura hominum genera; ac primum est eorum, qui furari imperant, qui non modo sunt ipsi furtorum socii et auctores, sed etiam in illo furum genere teterrimi. Alterum genus, par voluntate primis, potestate dispar, in eodem tamen furum gradu ponendum, eorum, qui, quum iubere non possint, suasores sunt atque impulsores furtorum. Tertium genus est eorum, qui cum furibus consentiunt. Quartum genus est eorum, qui participes furtorum inde lucrum ipsi etiam faciunt, si lucrum dicendum est, quod, nisi resipuerint, eos addicit aeternis cruciatibus; de quibus sic loquitur David<sup>4)</sup>: „Si videbas furem, currebas cum eo.“ Quintum genus est furum, qui, quum furtu possint prohibere, tantum abest, ut illis occurrant et obsistant, ut eorum licentiam permittant atque concedant. Sextum genus

<sup>1)</sup> Ex. 22, 26. 27. <sup>2)</sup> Prov. 11, 26. <sup>3)</sup> Aug. ep. 153. c. 7. <sup>4)</sup> Ps. 49, 18.

est eorum, qui, quum et furtum factum, et ubi factum sit, certo sciant, non indicant rem, sed eam se scire dissimulant. Postremum genus est, quod omnes complectitur furtorum adiutores, custodes, patronos, quique illis receptaculum praebent ac domicilium; qui omnes et satisfacere debent iis, quibus aliquid detractum est, et ad illud necessarium officium vehementer cohortandi sunt. Ne huius quidem sceleris omnino sunt expertes approbatores furtorum et laudatores. Nec vero etiam ab eadem culpa sunt alieni filiifamilias et uxores, qui pecunias a patribus et viris surripiunt.

*XVI. Quid de eleemosynis, quae involute hic etiam praescribuntur, sentiendum.*

Iam vero huic praecepto et illa subiecta sententia est, ut pauperum et inopum misereamur, eorumque difficultates et angustias nostris facultatibus et officiis sublevemus. Quod argumentum, quia saepissime et copiosissime tractandum est, petent ea parochi ex virorum sanctissimorum Cypriani, Ioannis Chrysostomi, Gregorii Nazianzeni et aliorum libris, qui de eleemosyna praecipue scripserunt, quibus huic muneri satisfacient. Sunt enim inflammandi fideles ad studium et alacritatem opitulandi iis, quibus aliena misericordia vivendum est. Sunt vero etiam docendi, quantam habeat necessitatem eleemosyna; ut videlicet re et opera nostra in egentes simus liberales, verissimo illo arguento, quod illo summi iudicii die detestatus sit eos Deus, et semper ignibus addicturus, qui eleemosynae officia praetermisserint ac neglexerint; illos autem collaudatos in patriam coelestem introducturus, qui benigne fecerint indigentibus. Est utraque Christi Domini ore pronunciata sententia<sup>1)</sup>: „Venite benedicti Patris mei; possidete paratum vobis regnum,“ et: „Discedite a me maledicti in ignem aeternum.“

*XVII. Quibus modis populi ad eleemosynam excitandi.*

Utentur praeterea sacerdotes accommodatis illis ad persuadendum locis<sup>2)</sup>: „Date, et dabitur vobis.“ Proferent Dei promissum, quo nihil uberius, nihil magnificentius ne cogitari quidem potest<sup>3)</sup>: „Nemo est, qui reliquerit domum etc., qui non accipiat centies tantum nunc in tempore hoc, — et in saeculo futuro vitam aeternam.“ Adiicient illud, quod a Christo Domino dictum est<sup>4)</sup>: „Facite vobis amicos de mammona iniquitatis, ut, quum defeceritis, recipiant vos in aeterna tabernacula.“ Huius vero necessarii munieris partes exponent, ut,

<sup>1)</sup> Mat. 25, 34. 41. <sup>2)</sup> Luc. 6, 38. <sup>3)</sup> Marc. 10, 29. 30. <sup>4)</sup> Luc. 16, 9.

qui largiri non possunt egentibus, quo vitam sustentent, saltem commodent pauperi iuxta Christi Domini praeceptum<sup>1)</sup>: „Mutuum date, nihil inde sperantes.“ Atque huius rei felicitatem beatus David expressit<sup>2)</sup>: „Iucundus homo, qui miseretur et commodat.“

*XVIII. Ad largiendas eleemosynas, otiique vitandi causa labrandum est.*

Est autem Christianae pietatis, nisi sit aliunde facultas bene merendi de iis, quibus ad victimum aliena misericordia opus est, vitandi etiam otii causa labore, opera ac manibus ea quaerere, quibus inopum indigentiam levare possit. Ad id omnes suo exemplohortatur in epistola ad Thessalonicenses Apostolus illis verbis<sup>3)</sup>: „Ipsi enim scitis, quemadmodum oporteat imitari nos;“ item ad eosdem<sup>4)</sup>: „Operam detis, ut quieti sitis, et ut vestrum negotium agatis, et operamini manibus vestris, sicut praeceperimus vobis;“ et ad Ephesios<sup>5)</sup>: „Qui furabatur, iam non furetur; magis autem laboret, operando manibus suis quod bonum est, ut habeat, unde tribuat necessitatem patienti.“

*XIX. Parce vivendum est ad aliorum sublevandam inopiam.*

Est etiam frugalitati consulendum, parcendumque bonis alienis, ne ceteris graves aut molesti simus; quae temperantia sane quam elucet in omnibus Apostolis, sed maxime eminet in divo Paulo, cuius illud est ad Thessalonicenses<sup>6)</sup>: „Memores enim estis, fratres, laboris nostri et fatigationis; nocte et die operantes, ne quem vestrum gravaremus, praedicavimus in vobis Evangelium Dei.“ Atque idem alio loco Apostolus<sup>7)</sup>: „In labore et in fatigatione nocte et die operantes, ne quem vestrum gravaremus.“

*XX. Quibus rationibus populus Christianus in destationem furorum et studium benigitatis adducendus sit.*

Sed ut ab universo hoc genere nefariorum facinorum abhorreat fidelis populus, parochis a Prophetis petere, et a reliquis divinis libris sumere par erit destationem furorum et rapinarum, et horribiles minas a Deo propositas iis, qui illa scelera committunt. Clamat Amos propheta<sup>8)</sup>: „Audite hoc, qui conteritis pauperem, et deficere facitis egenos terrae, dicentes: Quando transibit mensis, et venundabimus merces, et sabbatum, et aperiemus frumentum, ut imminuamus mensuram, et augeamus siculum, et supponamus stateras dolosas?“ Sunt in eadem sententia multa apud Hieremiam, in Proverbiis et apud Eccle-

<sup>1)</sup> Luc. 6, 35. <sup>2)</sup> Ps. 111, 5. <sup>3)</sup> II. Thes. 3, 7. <sup>4)</sup> I. Thes. 4, 11. <sup>5)</sup> Eph. 4, 28. <sup>6)</sup> I. Thes. 2, 9. Act. 20, 34. I. Cor. 4, 12. <sup>7)</sup> II. Thes. 3, 8. <sup>8)</sup> Amos 8, 4. sq.

*Jul 18.*

siasticum<sup>1)</sup>). Nec vero dubitandum est, quin haec malorum semina, quibus malis opprimitur haec aetas, magna ex parte in his inclusa sint causis. Verum ut assuescant Christiani homines prosequi omni liberalitatis ac benignitatis officio egentes et mendicos, quod ad alteram huius praecepti partem pertinet; proferent parochi maxima praemia, quae beneficis et largis et in hac et in futura vita daturum se Deus pollicetur.

*XXI. Quid de illis sentiendum sit, qui vano praetextu sua furtar et sacrilegia excusant.*

Sed quia non desunt, qui etiam se in furtis excusent: admonendi sunt, fore, ut nullam eorum peccati excusationem accipiat Deus; immo vero futurum, ut illa purgatione non modo non levetur peccatum, sed mirum in modum augeatur. Ecce, nobilium hominum non ferendae deliciae, qui culpam extenuare sibi videntur, si se affirmarint non cupiditate aut avaritia ad detrahendum alteri sua descendere, sed tuendae causa amplitudinis familiae, et maiorum suorum, quorum existimatio ac dignitas rueret, nisi rerum alienarum accessione fulciretur. Quibus perniciosus error eripiendus est, simulque demonstrandum, unam esse rationem conservandi et amplificandi copias et opes, maiorumque gloriam, si Dei voluntati paruerint, si eius praecepta servarint, quibus contemptis fundatae et optime constitutae opes evertuntur; reges ex regio solio et summo gradu honoris praecipites exturbantur, in quorum locum infimi interdum homines, et qui summo in odio illis fuerunt, divinitus vocantur. Incredibile est, quantopere his succenseat Deus; cuius rei testis est Isaias<sup>2)</sup>), apud quem sunt illa Dei verba: „Principes tui infideles, socii furum: omnes diligunt munera, sequuntur retributiones. Propter hoc ait Dominus Deus exercituum fortis Israel: Eheu, consolabor super hostibus meis, et vindicabor de inimicis meis, et convertam manum meam ad te, et excoquam ad purum scoriam tuam.“

*XXII. Quo modo iis respondendum, qui commoditate se ad aliena rapienda adigi affirmant.*

Non desunt, qui non iam illam afferant causam splendoris et gloriae, sed victus et vitae commodiorem facultatem et elegantiam; qui refellendi sunt, docendique, quam impia sit eorum et actio et oratio, qui ullam commoditatem anteferant Dei voluntati et gloriae, quem, negligendo eius praecepta, offendimus mirandum in modum. Etsi quae potest esse in furto commoditas, quod summa incommoda consequantur? „Super furem enim,“ inquit Ecclesiasticus<sup>3)</sup>), est confusio et

<sup>1)</sup> Ier. 5, 27. 23. Prov. 21, 6. Eclus. 10, 9. <sup>2)</sup> Is. 1, 23—26. <sup>3)</sup> Eclus. 5, 17.

poenitentia.“ Sed fac esse, ut cum illis non agatur incommodo: dedecorat fur divinum nomen, repugnat eius sanctissimae voluntati, salutaria ipsius praecepta contemnit. Quo ex fonte omnis error, omnis improbitas, omnis fluit impietas.

*XXIII. Quid dicendum sit iis, qui locupletibus spoliandis, vel consuetudine sua furtū obtegunt.*

Quid, quod audire licet interdum fures, qui nihil se eo peccare contendant, quod detrahant aliquid locupletibus et copiosis hominibus, qui ea detractione nihil damni faciant, ne sentiant quidem? misera sane et pestifera defensio. Putat alias, satisfactionem suam accipi debere, quod eam furandi consuetudinem cepit, ut non facile possit ab illa mente et actione desistere; qui nisi audierit Apostolum<sup>1)</sup> dicentem: „Qui furabatur, iam non furetur:“ velit, nolit, etiam consuetudinem capiet aeternorum suppliciorum.

*XXIV. Quid rursus illis dicendum sit, qui vel occasione, vel ulciscendi libidine ad furandum induci causantur.*

Nonnulli sunt, qui excusant se occasione data alteri aliquid ademisse; est enim illud tritum sermone proverbium: fures, qui non sint, fieri occasione; qui hac ratione sunt de nefaria sententia deducendi: resistendum esse pravis cupiditatibus. Nam si continuo est re perficiendum id, quod libido persuaserit: quis modus, quis finis erit scelerum ac flagitiorum? Turpissima igitur est illa defensio, vel summae potins intemperantiae et iniustitiae confessio. Nam qui dicit, se non ideo peccare, quia nullam habet peccandi occasionem: idem pro memodum fatetur, se semper oblata occasione peccaturum. Sunt, qui furari se dicant ulciscendi causa, quod ab aliis eadem iniuria sint affecti; quibus ita respondendum est: primum nemini licere iniurias persequi; deinde non posse quemquam rei sua iudicem esse; tum multo minus concedi, ut poenas ab aliis repeatant eorum, quae alii in eum peccaverunt.

*XXV. Quid illis dicendum, qui, ut aere alieno liberentur, furantur.*

Postremo quidem furtum satis illa ratione defensum teclumque arbitrantur, quod, quum sint aere alieno oppressi, aliter eo liberari non possint, nisi illud furto dissolvant; qui buscum ita agendum est: nullum esse gravius aes alienum, et quo magis prematur humanum genus, quam debitum illud, cuius in divina precatione quotidie meminimus<sup>2)</sup>: „Dimitte nobis debita nostra;“ quare illud insanissimi hominis esse, plus

<sup>1)</sup> Eph. 4, 28. <sup>2)</sup> Mat. 6, 12.

Dec. VIII.

velle Deo debere, id est plus peccare, ut quod debet homini-  
bus dissolvat, multoque praestare coniici in carcerem, quam  
mandari suppliciis inferorum sempiternis; longe etiam esse  
gravius, Dei, quam hominum, iudicio condemnari; porro au-  
tem supplices ipsos ad Dei opem ac pietatem confugere de-  
bere, a quo, quid opus sit, possint impetrare. Sunt alia exca-  
sationum genera, quibus parochi prudentes ac sui officii dili-  
gentissimi facile poterunt occurrere, ut aliquando habeant  
populum sectatorem bonorum operum.

## CAPUT IX.

### *De octavo Praecepto.*

Non<sup>1)</sup> loqueris contra proximum tuum falsum testimonium.

#### *I. Quam utilitatem hoc praeceptum comprehendat.*

Quantam non modo utilitatem, sed etiam necessitatem  
habeat assidua huius et praecepti explicatio, et officii admo-  
nitio, nos D. Iacobi monet auctoritas illis verbis<sup>2)</sup>: „Si quis  
in verbo non offendit, hic perfectus est vir.“ Et idem: „Lin-  
gua modicum quidem membrum est, et magna exaltat: ecce  
quantus ignis. quam magnam silvam incendit!“ et quae se-  
quuntur in eandem sententiam. Quibus duo monemur: pri-  
mum, latissime patere hoc linguae vitium; quod etiam illa  
Prophetae<sup>3)</sup> sententia confirmatur: „Omnis homo mendax;“  
ut propemodum sit unum hoc peccatum, quod ad omnes ho-  
mines pertinere videatur. Alterum, inde proficisci mala innu-  
merabilia, quum saepe maledici hominis culpa facultates, fama,  
vita, animae salus amittatur, vel eius, qui laeditur, quod con-  
tumelias patienter ferre non possit, sed eas impotenti animo  
persequatur; vel eius, qui laedit, quod pravo pudore et falsa  
cuiusdam existimationis opinione deterritus, adduci non pos-  
sit, ut illi, qui offensus sit, satisfaciat. Quare hoc loco mo-  
nendi fideles erunt, ut quantas possunt maximas Deo gratias  
agant de hoc salutari praecepto non dicendi falsi testimonii;  
quo non solum ipsi aliis iniuriam facere vetamur, sed etiam  
hac obedientia ab aliorum iniuria prohibemur.

#### *II. Quae sit huic praecepto subiecta sententia.*

Verum hoc praecepto eadem ratione et via progredien-  
dum est, qua in ceteris progressi sumus; ut videlicet animad-  
vertantur in eo duae leges: altera prohibens ne falsum dicatur

<sup>1)</sup> Ex. 20, 16. Deut. 5, 20. <sup>2)</sup> Iac. 3, 2. 5. <sup>3)</sup> Ps. 115, 11. Eclus. 20, 28. Rom. 3, 4.

testimonium; iubens altera, ut, simulatione fallaciisque sublatiis, dicta et facta nostra simplici veritate metiamur. Cuius officii Apostolus Ephesios illis verbis admonuit<sup>1)</sup>: „Veritatem facientes in caritate, crescamus in illo per omnia.“

*III. Quid maxime hoc praecepto caveatur.*

Sed prior huius praecepti pars habet hanc rationem, ut, quamvis nomine falsi testimonii significetur, quidquid in bonam vel in malam partem de altero constanter dicatur, sive in iudicio sive extra iudicium: tamen praecepit prohibeat illud testimonium, quod in iudicio falso dicitur a iurato. Iurat enim per Deum testis, quod ita testificantis et divinum nomen interponentis oratio plurimum fidei habet et ponderis. Itaque, quia periculosum est hoc testimonium, idcirco praecepit prohibetur; iuratos enim testes, nisi exceptionibus legitimis excludantur, aut eorum sit aperta improbitas atque perversitas, ne iudex quidem ipse potest reicere; praesertim quum extet iussum divinae legis<sup>2)</sup>, ut „in ore duorum vel trium stet omne verbum.“ Sed ut praeceptum plane fideles intelligent. docendi erunt, quid significet hoc „proximi“ vocabulum, in quem falsum testimonium dicere minime licet.

*IV. Quis proximi nomine hic designetur.*

Est antem proximus, ut ex Christi Domini doctrina collitur<sup>3)</sup>, quicumque eget opera nostra, sive ille propinquus sit, sive alienus, sive civis, sive advena, sive amicus, sive inimicus; nefas enim est existimare, contra hostes licere falsum aliquid dicere pro testimonio, quos iusu Dei ac Domini nostri diligere oporteat. Quin etiam, quia sibi quisque quadam ratione proximus est, nemini fas est in se falsum testimonium dicere; quod qui committant, sibi ipsi notam inurentes ignominiae ac turpitudinis, et se ipsos, et ecclesiam laedunt, cuius sunt membra; quo modo etiam, qui sibi mortem consciscunt, nocent civitati. Ita enim est apud sanctum Augustinum<sup>4)</sup>: „Nec recte intelligentibus poterat videri, non esse prohibitum, ut adversus se ipsum quisque falsus testis assisteret, eo quod in praecepto additum fuit: contra proximum tuum. Sed non ideo, si adversus se ipsum quisque falsum testimonium dixerit, ab hoc crimine se putet alienum; quando regulam diligendi proximi a semetipso dilector accepit.“

*V. In utilitatem proximi falsum testari aut mentiri non licet.*

Verum quia prohibemur proximum laedere falso testimonio, nemo propterea contrarium permitti nobis arbitretur, ut

<sup>1)</sup> Eph. 4, 15. <sup>2)</sup> Deut. 19, 15. Mat. 18, 16. <sup>3)</sup> Luc. 10, 29, sq. <sup>4)</sup> de civ. Dei L. 1. c. 20.

*Dec VIII.*

peierando licet conciliare ei, qui nobiscum natura ac religione coniunctus sit, aliquid utilitatis aut commodi. Nemini enim mendacio et vanitate, multo minus periurio studendum est. Quare S. Augustinus de mendacio ad Crescentium<sup>1)</sup> docet ex Apostoli sententia, mendacium in falsis testimoniorum numerandum esse, etiamsi in cuiusquam falsa laude dicatur. Nam locum illum tractans<sup>2)</sup>: Invenimus autem et falsi testes Dei, quoniam testimonium diximus adversus Deum, quod suscitaverit Christum, quem non suscitavit, si mortui non resurgunt: „Falsum,“ inquit, „testimonium vocat Apostolus, si quis de Christo, et quod ad eius laudem videtur pertinere, mentiatur.“

*VI. Quot mala falsum testimonium in gratiam alterius prolatum consequantur.*

Saepissime vero etiam contingit, ut, qui alteri favet, ob sit alteri. Certe errandi causa adfertur iudici, qui interdum falsis testibus adductus, contra ius secundum iniuriam statuit, et iudicare cogitur. Nonnunquam etiam fit, ut, qui ob falsum alicuius testimonium causam iudicio vicerit, idque impune tulerit: exultans iniqua victoria, assuescat corrumpere et adhibere falsos testes, quorum opera sperat se posse ad id, quodcumque concupierit, pervenire. Est vero id et ipsi testi gravissimum, quod et ab eo, quem iureiurando sublevarit et adiuverit, falsus et periurus agnoscerit, et ipse, quod ei e sententia succedit scelus, quotidie maiorem exercitationem et consuetudinem capit impietatis et audaciae.

*VII. Peccata eorum omnium, qui iudicia tractant, et in universum omne mendacium hoc praecepto prohibetur.*

Ut igitur testium vanitas, mendacia et periuria prohibentur, sic et accusatorum et reorum, et patronorum, cognitorum, et procuratorum, advocatorum et omnium denique, qui iudicia constituunt. Postremo vetat Deus omne testimonium non modo in iudicio, sed etiam extra iudicium, quod alteri incommodum aut detrimentum possit afferre. Est enim in Levitico<sup>3)</sup>, quo loco haec praecepta iterantur, his verbis: „Non facietis furtum, non mentieminis, nec decipiet unusquisque proximum suum,“ ut nemini dubium esse possit, quin a Deo omne mendacium hoc praecepto eiectum condemnetur; quod apertissime testatur David in hunc modum<sup>4)</sup>: „Perdes omnes, qui loquuntur mendacium.“

<sup>1)</sup> de mend. c. 12. sq. <sup>2)</sup> I. Cor. 15, 15. <sup>3)</sup> Lev. 19, 11. <sup>4)</sup> Ps. 5, 7.

*VIII. Hoc praeceptum ad detractionis vitium etiam extenditur.*

Prohibetur autem hoc praecepto non modo falsum testimonium, sed detestabilis etiam libido et consuetudo detrahendi alteri, qua ex peste incredibile est, quam multa et quam gravia et incommoda et mala nascantur. Hoc vitium maledice et contumeliose dicendi occulte in alterum passim improbant divinae literae. „Cum hoc“ inquit David<sup>1</sup>), „non edebam;“ et S. Iacobus: „Nolite<sup>2</sup>) detrahere alterutrum, fratres mei.“ Nec vero praecepta solum sacrae literae, sed etiam exempla suppeditant, quibus sceleris magnitudo declaratur. Nam et Aman<sup>3</sup>) confictis criminibus adeo incendit in Iudeos Assuerum, ut is omnes eius gentis homines imperarit occidi. Refferta est huiusmodi exemplis sacra historia, quorum commemoratione sacerdotes operam dabunt, ut fideles a rei improbitate deterreant.

*IX. Quinam in obtrectatorum numerum sint referendi.*

Ut autem peccati huius vis, quo de altero detrahitur, omnino perspiciatur, sciendum est, non tantum adhibenda calumnia offendi hominum existimationem, sed et augendis amplificandisque criminibus, et, si quid occultius ab aliquo commissum sit, quod ubi rescitum fuerit, grave aut turpe sit ad famam: eam rem qui ubi, quando, quibus necesse non sit, pervulgarit, is obtrectator et maledicus iure dicitur. Verum totius obtrectationis nulla capitalior est, quam eorum, qui catholicae doctrinae eiusque praedicatoribus obtrectant. In simili culpa sunt, qui malarum doctrinarum et errorum magistros extollunt laudibus.

*X. Qui audiunt detrahentes, vel inter amicos dissidia serunt, sunt detractores.*

Nec vero ab horum hominum numero et culpa seiunguntur, qui detrahentibus et maledicentibus hominibus patefacientes aures, non reprehendunt obtrectatores, sed illis libenter assentiuntur. Detrahere enim, vel detrahentem audire, scribunt S. Hieronymus<sup>4</sup>) et Bernardus<sup>5</sup>), utrum damnabilius sit, non facile constat; non enim essent qui detraherent, si non adesserent qui detrahentes audirent. In eodem genere sunt, qui suis artificiis distrahunt homines, et inter se committunt, magnopereque serendis discordiis delectantur, ut summas coniunctiones et societates fictis sermonibus dirimentes, amicissimos viros ad immortales inimicitias et ad arma compellant. Hanc pestem sic detestatur Dominus<sup>6</sup>): „Non

<sup>1)</sup> Ps. 100, 5. <sup>2)</sup> Iac. 4, 11. Prov. 4, 24. Sap. 1, 11. <sup>3)</sup> Esth. c. 13. <sup>4)</sup> ap. 52.  
<sup>5)</sup> de consid. 2, 13. <sup>6)</sup> Lev. 19, 16.

eris criminator, neque susurro in populo.<sup>4</sup> Tales erant multi ex consiliariis Saulis, qui eius voluntatem a Davide alienare, et in illum regem incitare conabantur.

*XI. Assentatio hac lege etiam interdicta est.*

Peccant denique in hanc partem blandi homines et assentatores, qui blanditiis et simulatis laudibus influunt in aures et in animos eorum, quorum gratiam, pecuniam et honores aucupantur, dicentes, ut est apud Prophetam<sup>1</sup>): „Malum bonum, et bonum malum;” quos ut arceamus et pellamus a consuetudine nostra, monuit nos David illa oratione<sup>2</sup>): „Corripet me iustus in misericordia, et increpabit me; oleum autem peccatoris non impinguet caput meum.“ Quanquam enim isti proximo minime maledicunt, tamen ei maxime nocent, qui vel laudandis eius peccatis afferunt ipsi causam perseverandi in vitiis, quamdiu vixerit. Et quidem in hoc genere illa est assentatio deterior, quae ad proximi calamitatem et perniciem adhibetur. Sic Saul quum Davidem furori et ferro Philistaeorum obiicere cuperet, ut occideretur, ei blandiebatur illis verbis<sup>3</sup>): „Ecce filia mea maior Merob; ipsam dabo tibi uxorem; tantummodo esto vir fortis, et praeliare bella Domini.“ Sic Iudei insidiosa oratione Christum Dominum sunt affati<sup>4</sup>): „Magister, scimus, quia verax es, et viam Dei in veritate doces.“

*XII. Amici, quomodo amico periculose aegrotanti perniciose assententur.*

Longe autem perniciosior oratio est amicorum, affinium et cognatorum, qua ad eos interdum utuntur assentatorie, qui mortifero morbo affecti iam sint extremo spiritu, dum affirmant, nullum esse tum ei a morte periculum; dum laetum et hilarem esse iubent, eumque a peccatorum confessione tamquam a tristissima cogitatione deterrent; dum denique eius animum avertunt ab omni cura et meditatione extremonrum periculorum, in quibus maxime versatur. Quare fugiendum est omne mendaciorum genus, sed illud in primis, quo gravi damno quisquam affici possit. Plenissimum vero impietatis est mendacium, quum quis in religionem vel de religione mentitur.

*XIII. Impingunt etiam in hoc praeceptum libellorum famosorum auctores, ioco vel officii causa mentientes, et hypocritae.*

Sed illis etiam maledictis et probis graviter offenditur Deus, quae committuntur libellis, quos famosos vocant, et aliis huius generis contumeliis. Praeterea ioco vel officii causa fallere mendacio, etsi nemo in illo vel damnum vel lu-

<sup>1</sup>) Is. 5, 20. <sup>2</sup>) Ps. 140, 5. <sup>3</sup>) I. Reg. 18, 17. <sup>4</sup>) Mat. 22, 16. Marc. 12, 14. Luc. 20, 21.

crum fecerit, tamen omnino indignum est; ita enim nos Apostolus admonet<sup>1</sup>): „Deponentes mendacium loquimini veritatem.“ Nam in eo est ad frequens graviusque mendacium magna proclivitas, et ex iocosis mendaciis capiunt homines mentiendi consuetudinem; unde veniunt in opinionem, non esse veraces. Quamobrem, ut fidem faciat eorum oratio, necesse habent iurare perpetuo. Postremo priore parte huius praecepti simulatio repudiatur, nec modo, quae simulate dicuntur, sed quae ita fiunt, cum scelere coniuncta sunt; tam euim verba quam facta notae ac signa quaedam sunt eorum, quae sunt in animo cuiusque, ob eamque causam Dominus saepe Phariseos arguens hypocritas appellat. Et haec de priori praecepti lege, quae ad vetandum spectat. Nunc explicemus, quid in altera iubeat Dominus.

*XIV. Quidnam in altera legis huius parte verbis involuta de iudiciis forensibus praescribatur.*

Pertinet autem haec praecepti vis et ratio ad id, ut iuste et ex legibus forensia iudicia exerceantur, neve occupent homines et usurpent iudicia; non enim fas esse, alienum servum iudicare, scribit Apostolus<sup>2</sup>), ne, re et causa incognita, sententiam ferant. Quo in vitio fuit sacerdotum et scribarum consilium, qui de sancto Stephano iudicarunt; quod item peccatum fuit magistratus Philippensem, de quibus inquit Apostolus<sup>3</sup>): „Caesos nos publice indemnatos, homines Romanos, miserunt in carcerem, et nunc occulite nos eiiciunt.“ Ne condemnent innocentes, aut nocentes absolvant; ne pretio aut gratia, ne odio aut amore moveantur. Sic enim Moyses seniores admonet, quos populi iudices constituerat<sup>4</sup>): „Quod iustum est iudicate, sive civis sit ille sive peregrinus. Nulla erit distantia personarum; ita parvum audietis ut magnum, nec accipietis cuiusquam personam, quia Dei iudicium est.“

*XV. Rei, per legitimum magistratum interrogati, non possunt mentiri.*

De reis autem et sontibus, vult eos Deus verum confiteri, quum ex iudicii formula interrogantur. Est enim testimonium ac praedicatio quaedam illa confessio laudis et gloriae Dei, ex ipsis Iosue sententia, qui Achan ad veri confessionem adhortatus, inquit<sup>5</sup>): „Fili mi, da gloriam Domino Deo Israel, et confitere atque indica mihi, quid feceris; ne abscondas.“

*XVI. Quodnam sit testium officium.*

Sed quoniam hoc praeceptum testes potissimum attingit, de his etiam a parocho diligenter agendum erit. Nam prae-

<sup>1</sup>) Eph. 4, 25    <sup>2</sup>) Rom. 14, 4.    <sup>3</sup>) Act. 16, 37.    <sup>4</sup>) Deut. 1, 16. 17.    <sup>5</sup>) Ios. 7, 19.

Dec. VIII.

cepti vis ea est, ut non solum prohibeat falsum testimonium, sed verum etiam dici imperet. Est enim in humanis rebus maximus usus veri testimonii, quod sunt innumerabiles res, quas a nobis ignorari necesse sit, nisi eas ex testium fide cognoscamus. Quare nihil tam necessarium est, quam testimoniorum veritas in iis rebus, quas nec ipsi scimus, neque tamen licet ignorare. De quo exstat illa S. Augustini sententia<sup>1)</sup>: „Qui veritatem occultat, et qui prodit mendacium, uterque reus est; ille, quia prodesse non vult, hic, quia nocere desiderat.“ Licet vero interdum verum tacere, sed extra iudicium; nam in iudicio, ubi testis legitime interrogatur a iudice, vera omnino patefacienda sunt. Quo loco cavendum tamen est testibus, ne suae memoriae nimium confisi, quod exploratum non habent, id pro certo affirment. Reliqui sunt patroni causarum et advocati, actores deinceps et petitores.

*XVII. Qua ratione advocati et causarum procuratores suum officium explere poterunt.*

Illi igitur opera ac patrocinio suo non deerunt necessariis hominum temporibus, et egentibus benigne subvenient, tum iustas causas defendendas non suscipient, neque calumnia lites protrahent, nec alent avaritia. Quod ad mercedem attinet laboris et operae suaे, illam iure et aequo metiantur.

*XVIII. Petidores et accusatores, quo pacto suo officio non recte fungentur.*

Petidores vero et accusatores monendi sunt, ne cuiquam amore aut odio, aut cupiditate aliqua adducti, periculum ini quis, criminibus creent. Iussum hoc denique divinitus descriptum est piis omnibus, ut in congressibus et colloquis vere semper et ex animo loquantur, nihil dicant, quod alterius existimationi possit officere, ne de illis quidem, a quibus laedi se et exagitari intelligunt, quum illud propositum habere debeant, sibi cum illis eam necessitudinem et societatem intercedere, ut membra sint eiusdem corporis.

*XIX. Quibus rationibus Christiani ad agnitionem foeditatis, quae mendacio inest, perduci poterunt.*

Ut autem libentius hoc mendacii vitium caveant fideles, proponet eis parochus summam huius sceleris miseriam ac turpitudinem. Nam in sacris literis<sup>2)</sup> mendacii pater daemon dicitur. Quod enim daemon in veritate non stetit, mendax est et mendacii parens. Adiunget ad eiiciendum tantum flagitium ea mala, quae mendacium consequuntur, et quoniam

<sup>1)</sup> cf. c. 80. C. XI. qu. 3. <sup>2)</sup> Io. 8, 44.

sunt innumerabilia, fontes et capita incommodorum et calamitatum demonstrabit. Ac primum, in quantam cadat Dei offenditatem, quantumve eius odium incurrat homo vanus et mendax, Salomonis auctoritate declarabit eo loco<sup>1)</sup>: „Sed sunt, quae odit Dominus, et septimum detestatur anima eius: oculos sublimes, linguam mendacem, manus effudentes innoxium sanguinem, cor machinans cogitationes pessimas, pedes veloces ad currendum in malum, proferentem mendacia, et testem fallacem,“ et quae sequuntur. Quis igitur ei praestet incolumentem, qui in insigni odio sit apud Deum, quo minus gravissimis afficiatur suppliciis?

*XX. Quae incomoda mendacia humanae societati inferant.*

Deinde quid impurius aut foedi, ut sanctus inquit Iacobus<sup>2)</sup>, quam in eadem lingua, qua benedicimus Deum et Patrem, maledicere homines, qui ad imaginem et similitudinem Dei facti sunt, ita ut fons de eodem foramine emanet dulcem et amaram aquam? Quac enim lingua prius laudem et gloriam Deo tribuebat, postea, quantum in ea est, eum ignominia afficit ac dedecore mentiendo. Quare fit, ut a coelestis beatitudinis possessione mendaces excludantur. Quum enim in hunc modum quaereret a Deo David<sup>3)</sup>: „Domine, quis habitabit in tabernaculo tuo?“ respondit Spiritus sanctus: „Qui loquitur veritatem in corde suo, qui non egit dolum in lingua sua.“ Maximum vero etiam illud in mendacio incomodum est, quod fere insanabilis est is animi morbus. Quum enim peccatum, quod inferendo falso crimen, aut proximi famae et existimationi obtrectando commissum sit, non remittatur, nisi calumniator ei, quem criminatus fuerit, satisfaciat iniuriarum, id autem difficile fiat ab hominibus, primo, ut antea monuimus, pudore et inani quadam dignitatis opinione deterritis: qui in eo peccato sit, hunc addictum esse aeternis inferorum poenis, dubitare non possumus. Neque enim quisquam speret, se calumniarum vel obtrectationis veniam consequi posse, nisi prius ei satisfaciat, de cuius dignitate et fama aut publice in iudicio, aut etiam in privatis et familiaribus congressibus, aliquid detraxerit. Praeterea latissime patet hoc detrimentum, et in ceteros diffunditur, quia vanitate et mendacio fides ac veritas tolluntur, arctissima vincula societatis humanae, quibus sublati sequitur summa vitae confusio, ut homines nihil a daemonibus differre videantur. Docebit porro, vitandam esse loquacitatem<sup>4)</sup>, parochus, cuius vitatione et reli-

<sup>1)</sup> Prov. 6, 16. sq. <sup>2)</sup> Iac. 3, 9. <sup>3)</sup> Ps. 14, 1. 3. <sup>4)</sup> Prov. 10, 19.

qua peccata fugiuntur, et est magna cautio mendacii; a quo vitio loquaces sibi haud facile temperare possunt.

*XXI. Vanae mendaciorum excusationes diluuntur.*

Postremo iis illum errorem eripiet parochus, qui se in vanitate orationis excusant, et mendacium prudentium exemplo defendunt, quorum esse aiunt mentiri in tempore. Dicet id, quod verissimum est, prudentiam<sup>1)</sup> carnis mortem esse. Hortabitur auditores, ut in difficultatibus et angustiis Deo confidant, neque ad artificium mentiendi confugiant. Nam illo qui utuntur perfugio, facile declarant, se sua magis niti prudentia, quam in Dei providentia spem ponere. Qui causam sui mendacii conferunt in eos, a quibus sunt mendacio decepti: hi docendi sunt, non licere hominibus se ipsos ulcisci<sup>2)</sup>, neque malum malo compensandum esse, sed potius vincendum in bono malum; quod si etiam fas esset hanc re ferre gratiam, nemini tamen utile, se suo ulcisci detimento; esse autem id gravissimum detrimentum, quod mendacio dicens facimus. Iis, qui afferunt humanae naturae imbecillitatem et fragilitatem, tradendum erit hoc officii praeceptum, ut divinum auxilium implorent, nec infirmitati humanitatis obtemperent. Qui consuetudinem opponunt, admonendi sunt, si mentiri assueverunt, ut dent operam, ut contrariam consuetudinem capiant vere loquendi; praesertim, quum qui usu et consuetudine peccant, gravius delinquent quam ceteri.

*XXII. Propter aliorum mendacium non est mentiendum.*

Et quoniam non desunt, qui se tegant excusatione ceterorum hominum, quos passim mentiri et peierare contendunt: hac ratione illi ab ea opinione deducendi sunt: non esse imitandos malos, sed reprehendendos et corrigendos; quum autem ipsi mentimur, minus auctoritatis in reprehensione et correctione alterius nostram habere orationem. Alios se ita defendant, quod vera dicendo saepe incommode sint affecti, sic refellent sacerdotes: esse illam accusationem, non defensionem, quum sit officium Christiani hominis, quamvis potius facere iacturam, quam mentiri.

*XXIII. Mendacium neque iocosum, neque utile admittendum.*

Restant duo genera eorum, qui se in mendacio excusent; alteri, qui dicant se ioci causa mentiri; alteri, se idem facere utilitatis gratia, quippe qui bene nec emerent nec venderent, nisi mendacium adhiberent. Utrosque a suo errore parochi avertere studebunt. Ac superiores quidem illos a vi-

<sup>1)</sup> Rom. 8, 6. <sup>2)</sup> Rom. 12, 17. 21. I. Petr. 3, 9.

tio abducent, et docendo, quantum eo in genere peccandi consuetudinem augeat usus mentiendi, et illud inculcando, omnis otiosi verbi<sup>1)</sup> reddendam esse rationem; proximos autem hos acerbius etiam obiurgabunt, quorum in excusatione gravior insit illorum ipsorum accusatio, qui prae se ferant, se minime illis Dei verbis fidem et auctoritatem tribuere<sup>2)</sup>: „Quaerite primum regnum Dei, et iustitiam eius, et haec omnia adiicientur vobis.“

## CAPUT X.

### **De nono et decimo Praecepto.**

Non<sup>3)</sup> concupisces domum proximi tui; non desiderabis uxorem eius, non servum, non ancillam, non bovem, non asinum, nec omnia, quae illius sunt.

#### *I. Quo pacto nonum hoc et decimum praeceptum octo reliqua comprehendere videantur.*

In his duobus praeceptis, quae postremo loco tradita sunt, illud in primis sciendum est, rationem fere constitui, qua cetera praecpta serventur. Nam quod his verbis praeceptum est, eo spectat, ut si quis studet superiora legis iussa servare, hoc maximi faciat, ne concupiscat; quoniam qui non concupiscat, suis contentus, aliena non appetet, aliorum commodis gaudebit, Deo immortali gloriam tribuet, gratias eidem maximas aget, sabbatum colet, id est, quiete perpetua fruetur maioresque venerabitur, neminem denique neque re, neque verbis, neque ullo aliquando laedet. Nam<sup>4)</sup> stirps ac semen malorum omnium est prava concupiscentia, qua qui incensi sunt, praecipites feruntur in omne flagitiorum et scelerum genus. His animadversis et parochus in iis, quae sequuntur, tradendis diligenter, et fideles ad audiendum erunt attentiores.

#### *II. Quo pacto duo illa praecpta inter se differant.*

Sed quanquam haec duo praecpta coniunxerimus, propterea quod, quum non dissimile sit eorum argumentum, eandem docendi viam habent: parochus tamen et cohortando et monendo poterit communiter vel separatim, ut commodius ei videbitur, ea tractare. Sin autem decalogi interpretandi munus suscepit, demonstrabit, quae sit horum duorum praceptorum dissimilitudo, quidve una concupiscentia ab altera differat; quam differentiam libro Quaestionum in Exodum D.

<sup>1)</sup> Mat. 12, 36. <sup>2)</sup> Mat. 6, 33. <sup>3)</sup> Ex. 20, 17. Deut. 5, 21. <sup>4)</sup> I. Tim. 6, 10. Iac. 4, 1.

Augustinus<sup>1)</sup> declarat. Nam ex iis altera solum spectat, quid utile sit, quid fructuosum; alteri propositae sunt libidines et voluptates. Si quis igitur fundum aut domum concupiscit, is lucrum potius, et quod utile est consectetur, quam voluptatem; si vero alienam uxorem appetit, non utilitatis, sed voluntatis cupiditate ardet.

*III. Num sexto et septimo praecepto satis fuerit explicatum,  
quod his duobus postremis comprehenditur.*

Verum horum praceptorum duplex fuit necessitas; altera, ut sexti septimique praecepti sententia explicaretur. Nam etsi quodam naturae lumine intellectum est, alienae uxoris potiundae cupiditatem prohiberi, vetito adulterio (nam si concupiscere liceret, fas item esset potiri): tamen plerique ex Iudaeis peccato obcoecati in eam opinionem adduci non poterant, ut crederent id a Deo prohibitum esse; imo vero lata et cognita hac Dei lege, multi, qui se legis esse interpretes profitebantur, in eo errore versati sunt. Id quod animadvertere licet ex illo Domini sermone apud S. Matthaeum<sup>2)</sup>: „Audistis, quia dictum est antiquis: Non moechaberis; ego autem dico vobis,“ et quae sequuntur. Altera est horum praceptorum necessitas, quod aliqua distincta explicateque vetantur, quae sexto et septimo explicate non prohibebantur. Nam exempli causa, septimum praeceptum prohibuit, ne quis iniuste concupiscat aliena aut eripere conetur; hoc autem vetat, ne ullo modo quis concupiscat, etsi iure legeque assequi id possit, ex cuius adceptione proximo damnum importari videat.

*IV. Quale quantumque sit Dei beneficium, quod nobis legis huius mandato est collatum.*

Sed illud in primis, antequam ad praecepti explicationem veniamus, fideles docendi erunt: nos hac lege non ad id solum institui, ut cupiditates nostras cohibeamus, sed etiam Dei erga nos pietatem, quae immensa est, cognoscamus. Nam quum superioribus legis praeceptis nos quibusdam quasi praesidiis munivisset, ne quis nos ipsos aut nostra violaret: hoc adjuncto praecerto illud maxime providere voluit, ne appetitionibus nostris nos ipsi laederemus; quod facile futurum fuit, si omnia cupere atque optare liberum nobis atque integrum esset. Hac igitur non concupisciendi lege praescripta illud a Deo provisum est, ut cupiditatum aculei, quibus ad perniciosa quaeque incitari solemus, huius legis vi quodam modo excussi nos minus urgeant maiusque propterea temporis spatium nos,

<sup>1)</sup> quæst. 71. <sup>2)</sup> Mat. 5, 27. 28.

molesta illa cupiditatum sollicitudine liberati, ad ea praestanda pietatis et religionis officia habeamus, quae ipsi Deo multa maximaque debemus.

*V. Quod discrimin haec duo praecepta inter leges divinas et humanas esse insinuent.*

Neque id solum haec lex nos docet, verum etiam illud ostendit, legem Dei eiusmodi esse, quae non externis solum munerum functionibus, sed etiam intimo animi sensu servanda sit. Hocque inter divinas et humanas leges interest, quod hae rebus tantum externis contentae sunt, illae vero, quoniam animum<sup>1)</sup> Deus intuetur, ipsius animi puram sinceramque castitatem atque integritatem requirunt. Est igitur divina lex quasi speculum quoddam, in quo naturae nostrae vitia intuemur. Quamobrem dixit Apostolus<sup>2)</sup>: „Concupiscentiam nesciebam, nisi lex diceret: Non concupisces.“ Qum enim concupiscentia, id est peccati fomes, qui ex peccato originem habuit, perpetuo nobis infixus inhaereat, ex hoc agnoscimus, in peccato nos nasci; quapropter supplices ad eum confugimus, qui solus potest peccati sordes eluere.

*VI. Quae concupiscentia hic non prohibeatur, quidve sit concupiscentia.*

Habent autem haec singula praecepta illud cum ceteris commune, ut partim aliquid vetent, partim iubeant. Quod ad prohibendi vim attinet, ne quis forte arbitretur, concupiscentiam illam, quae vitio caret, aliquo modo vitium esse, ut concupiscere spiritum adversus carnem<sup>3)</sup>, vel expetere iustificationes Dei in omni tempore, id quod David<sup>4)</sup> summopere cupiebat: parochus doceat, quae concupiscentia illa sit, quam huius legis praecripto fugere oporteat. Quare sciendum est, concupiscentiam esse commotionem quandam ac vim animi, qua impulsi homines, quas non habent, res iucundas appetunt. Et quemadmodum reliqui animi nostri motus non perpetuo mali sunt: ita haec concupiscenti vis non semper in vitio est ponenda. Neque enim propterea malum est, si cibum aut si potum appetimus, aut, quum frigemus, si calescere, aut contra, quum calemus, si frigescere cupimus. Et quidem recta haec concupiscenti vis Deo auctore nobis a natura insita est, sed primorum parentum nostrorum peccato factum est, ut illa, naturae fines transsiliens, usque adeo depravata sit, ut ad ea concupiscentia saepe incitetur, quae spiritui ac rationi repugnant.

<sup>1)</sup> Reg. 16, 7. Ps. 7, 10. Ier. 11, 20. <sup>2)</sup> Rom. 7, 7. <sup>3)</sup> Gal. 5, 17. <sup>4)</sup> Pe. 118, 20.

*VII. Quas praecipue utilitates concupiscentia, rectae rationi conformis, homini praestet.*

Quin etiam haec vis, si moderata est, suisque finibus continetur, saepe etiam non mediocres utilitates praebet; nam illud primum efficit, ut assiduis precibus Deum oremus, supplicesque ab eo petamus quae maxime cupimus; oratio enim cupiditatis nostrae interpres est. Quod si recta haec concupiscenti vis abesset, non tam multae preces essent in ecclesia Dei. Efficit praeterea, ut cariora sint nobis Dei munera; quo enim vehementiori alicuius rei cupiditate flagramus, eo carior illa nobis res est atque iucundior, cum eam adepti sumus. Tum vero delectatio ipsa, quam ex re concupita sentimus, facit, ut maiore pietate gratias Deo agamus. Itaque si concupiscere aliquando licet, fateamur necesse est, non omnem concupiscenti vim prohibitam esse.

*VIII. Quo modo Apostolus concupiscentiam peccatum vocet.*

Et quanquam D. Paulus<sup>1)</sup> concupiscentiam peccatum esse dixit, in eam tamen sententiam accipiendum est, in quam Moyses<sup>2)</sup> locutus est, cuius ille testimonium afferit; id quod ipsius Apostoli oratio declarat. Nam illam carnis concupiscentiam vocat in epistola ad Galatas<sup>3)</sup>: „Spiritu,” inquit, „ambulate, et desideria carnis non perficietis.”

*IX. Quae concupiscentia hic omnino non prohibeatur, nec peccati rationes habeat.*

Naturalis igitur illa cupiditatis vis et moderata, quae fines suos non egreditur, non vetatur, multoque minus spiritualis illa rectae mentis cupiditas, qua ad eorum appetitionem incitamus, quae carni repugnant. Ad hanc ipsam enim sacrae literae nos adhortantur<sup>4)</sup>: „Concupiscite sermones meos,” et<sup>5)</sup>: „transite ad me omnes, qui concupiscitis me.”

*X. Quae sit concupiscentia hic interdicta.*

Itaque hoc interdicto non ipsa concupiscenti vis, quam ad bonum, tum ad malum uti licet, sed usus pravae cupiditatis, quae carnis concupiscentia et peccati fomes vocatur, ac, si animi assensionem adiunctam habeat, semper in vitiis numeranda est, omnino prohibetur. Ergo ea tantum concupiscenti libido vetita est, quam carnis concupiscentiam vocat Apostolus<sup>6)</sup>, illi scilicet concupiscenti motus, qui nullum rationis modum habent, neque finibus a Deo constitutis continentur.

<sup>1)</sup> Rom. 7, 7. 20. <sup>2)</sup> Ex. 20, 17. <sup>3)</sup> Gal. 5, 16. <sup>4)</sup> Sap. 6, 12. <sup>5)</sup> Eccl. 24, 28  
<sup>6)</sup> Gal. 5, 16. 1. Petr. 2, 11. I. Io. 2, 16.

*XI. Quibus ex causis agnoscatur, concupiscentiam esse peccatum.*

Haec cupiditas damnata est, vel quia malum appetit, veluti adulteria, ebrietates, homicidia et alia eiusmodi nefaria scelera, de quibus ita Apostolus<sup>1)</sup>: „Non simus,“ inquit, „concupiscentes malorum, quemadmodum et illi concupierunt;“ vel quia, etsi res natura sua malae non sunt, causa tamen aliunde exstat, quare illas concupiscere nefas sit; quo in genere sunt ea, quae ne possideamus, Deus aut ecclesia prohibet. Non enim ea nobis appetere licet, quae possidere omnino nefas sit; qualia olim in veteri lege fuerunt aurum et argentum, ex quibus idola conflata erant, quae Dominus<sup>2)</sup> in Deuteronomio vetuit, ne quis concupiseret. Ob eam praeterea causam haec cupiditas vitiosa prohibetur, quoniam quae appetuntur aliena sunt, ut domus, servus, ancilla, ager, uxor, bos, asinus et alia multa; quae quum aliena sint, ea concupiscere vetat divina lex; rerumque eiusmodi cupiditas nefaria est, et in peccatis gravissimis numeratur, quum illis concupiscentis animi praebetur assensus.

*XII. Concupiscentiae peccatum ubi maxime consistat.*

Nam tum peccatum natura existit, quum post malarum cupiditatum impulsu[m] animus rebus pravis delectatur, atque his vel assentitur, vel non repugnat; id quod D. Iacobus<sup>3)</sup>, quum peccati originem et progressionem ostendit, illis verbis docet: „Unusquisque tentatur a concupiscentia sua abstractus et illectus; deinde concupiscentia, quum conceperit, patit peccatum; peccatum vero quum consummatum fuerit, generat mortem.“

*XIII. Quae sit duorum extremonrum praceptorum sententia.*

Cum igitur lege ita caveatur: „Non concupisces,“ haec verba ad eum sensum referuntur, ut nostras cupiditates a rebus alienis cohibeamus; alienarum enim rerum cupiditatis sitis immensa est atque infinita, neque unquam satiatur, ut scriptum est<sup>4)</sup>; „Avarus non implebitur pecunia;“ de quo ita est apud Isaiam<sup>5)</sup>: „Vac, qui coniungitis domum ad domum, et agrum agro copulatis.“ Sed ex singularum vocum explicatione facilius intelligetur huius peccati foeditas et magnitudo.

*XIV. Quid domus vocabulo in huius praecepti formula intelligendum sit.*

Quare parochus docebit, domus vocabulo non locum modo, quem incolimus, sed universam hereditatem significari, ut ex divinorum scriptorum usu consuetudineque cognoscitur.

<sup>1)</sup> I. Cor. 10. 6. <sup>2)</sup> Deut. 7. 25. <sup>3)</sup> Iac. 1. 14. 15. <sup>4)</sup> Eccl. 5. 9. <sup>5)</sup> Is. 5. 8.

In Exodo (1, 21.) scriptum est, obstetricibus a Domino domos esse aedificatas: sententia eo spectat, ut illarum facultates ab eo auctas esse atque amplificatas interpretetur. Ex hac igitur interpretatione animadvertisimus, hac praecepti lege vetitum nobis esse, ne divitias avide expetamus, neque alienis opibus, potentiae, nobilitati invideamus, sed statu nostro, qualisqualis ille sit, sive humilis sive excelsus, contenti simus. Alienae deinde gloriae appetitionem vetitam esse intelligere debemus: nam hoc item ad domum pertinet.

*XV. Quid bovis et asini vocibus continetur.*

Quod vero sequitur: „non bovem, non asinum,“ id ostendit, non solum quae magna sunt, ut domus, nobilitas et gloria, ea quum aliena sint, concupiscere nobis non licere: sed etiam parva, qualia illa sint, sive animata, sive inanimata.

*XVI. De quibus servis in hoc pracepto sit sermo.*

Sequitur deinceps: „Neque servum,“ quod intelligendum est tam de captivis, quam de reliquo genere servorum, quos, ut cetera alterius bona, concupiscere non debemus. Liberos vero homines, qui voluntate serviunt, vel mercede conducti, vel amore observantiaque impulsi, nullo modo, neque verbis, neque spe, neque pollicitationibus, neque praemiis quis corrumpere aut sollicitare debet, ut eos deserant, quibus se ipsi sponte addixerunt: immo vero, si ante id tempus, quo se in illorum famulatu fore promiserant, ab illis recesserint, huius praecepti auctoritate admonendi sunt, ut ad eos ipsos omnino revertantur.

*XVII. Cur etiam in hoc pracepto mentio proximi fiat.*

Quod autem in pracepto mentio fit proximi, id eo pertinet, ut hominum vitium demonstretur, qui vicinos agros, aut proximas domos, aut aliam rem eiusmodi, quae secum continens sit, appetere solent. Vicinitas enim, quae in parte amicitiae ponitur, ab amore ad odium cupiditatis vitio traducitur.

*XVIII. Non praevaricantur istam legem, qui res venales proximi iusto pretio emere cupiunt.*

Hoc vero praecipsum ii minime violant, qui res, quas proximi venales habent, emere de illis cupiunt, aut iusto pretio emunt; ii enim non modo proximum non laedunt, sed valde adiuvant, quum ei pecunia maiori commodo usuique futura sit, quam res illae, quas ipse venditat.

*XIX. Quomodo decimum praceptum de non concupiscenda uxore proximi intelligendum sit.*

Hanc de re aliena non concupiscenda legem altera sequitur, quae prohibet, ne alienam concupiscamus uxorem;

qua lege concupiscentia libido non ea quidem tantum prohibita censetur, qua adulterius alterius uxorem appetit, sed etiam qua affectus aliquis alterius uxorem in matrimonium ducere concupiscit; eo enim tempore, quum repudii permittebatur libellus, illud facile evenire poterat, ut, quae ab uno repudiata esset, eam alter uxorem acciperet. At hoc Dominus vetuit, ne aut mariti ad uxores relinquendas sollicitarentur, aut uxores maritis difficiles se ac morosas ita praeberent, ut eam ob causam quaedam quasi necessitas viris imponeretur illas repudiandi. Nunc vero gravius est peccatum, quum mulierem, etiamsi a viro repudiata sit, alteri in matrimonium ducere non liceat, nisi marito mortuo. Itaque qui alterius uxorem concupiscet, facile ex una in aliam incidet cupiditatem; aut enim illius virum mori, aut adulterium admittere cupiet. Atque hoc idem de iis mulieribus dicitur, quae alteri despontiae sunt; neque enim has item concupiscere licet, cum ii, qui haec pacta rescindere student, violent sanctissimum fidei foedus. Et quemadmodum, quae alteri nupta est, eam concupiscere omnino nefas est: sic, quae ad Dei cultum religionemque est consecrata, nullo pacto licet illam uxorem appetere.

*XX. In hanc legem non peccat, qui mulierem, quam putat maritum amisisse, sollicitat ad matrimonium.*

Si vero quis mulierem, quae nupta est, quum eam innuptam esse opinetur, uxorem sibi dari concupiscit, neque, si in matrimonium alii collocatam intelligeret, eam nuptam sibi dari cuperet, id quod Pharaoni (Gen. 12. et 20.) et Abimelech contigisse legimus, qui Saram in matrimonio habere concupierunt, quum eam minime nuptam, Abrahaeque sororem, non uxorem arbitrarentur: ille certe, qui eo animo est, eiusmodi praecepti legem violare non videtur.

*XXI. Quae praeter ea, quae prohibentur, hoc praecepto facienda imperentur.*

Sed ut parochus remedia patefaciat, quae ad tollendum hoc cupiditatis vitium accommodata sunt, explicare alteram praecepti rationem debet, quae in eo consistit, ut, si divitiae affluant, cor non apponamus, easque pietatis et divinarum rerum studio abiicere parati simus, et in sublevandas pauperum miseras libenter pecuniam erogemus; si desint facultates, egestatem aequo et hilari animo feramus. Et quidem si rebus nostris dandis liberalitate utemur, rerum alienarum cupiditates restinguemus. De paupertatis autem laudibus divitiarumque despiciencia in sacris literis et apud sanctos Patres facile erit parocho multa colligere, et fideli populo tradere.

Hac item lege praecipitur, ut ardentи studio summaque cupiditate optemus, id potissimum effici, non quod nos concupiscimus, sed quod Deus vult, quemadmodum Domini oratione exponitur<sup>1)</sup>. Voluntas autem Dei in eo maxime est, ut nos singulari quodam modo sancti efficiamur, animumque nostrum sincerum, atque ab omni labе purum integrumque conservemus, et exerceamus nos in iis mentis ac spiritus officiis, quae corporis repugnant sensibus; horumque edomitis appetitionibus, ratione ac spiritu duce, rectum vitae cursum teneamus; quive praeterea sensus materiam cupiditatibus nostris libidinique praebent, eorum vim maxime reprimamus.

*XXII. Quae sint potissimum Christianis meditanda, ut vim concupiscentiae refrent.*

Sed ad hunc cupiditatum ardorem restinguendum plurimum etiam hoc potest, si, quae incommoda ex illis accident, ea nobis ob oculos proponamus. Primum vero illud incommodum est, quod, quoniam eiusmodi cupiditatibus paremus, in anima nostra regnat summa peccati vis ac potestas. Quamobrem monuit Apostolus<sup>2)</sup>: „Non regnet peccatum in vestro mortali corpore, ut obediatis concupiscentiis eius.“ Nam quemadmodum, si cupiditatibus resistimus, peccati vires concident: ita, si iisdem succumbimus, Dominum a regno suo expellimus, et in eius locum peccatum introducimus. Alterum praeterea incommodum est, quod ab hac concupiscendi vi, veluti fonte quodam, omnia peccata manant, ut D. Iacobus<sup>3)</sup> docet. D. item Ioannes<sup>4)</sup>: „Omne,“ inquit, „quod est in mundo, concupiscentia carnis est, et concupiscentia oculorum, et superbia vitae.“ Tertium incommodum in eo est, quoniam rectum animi iudicium his cupiditatibus obscuratur. Homines enim iis cupiditatum tenebris obcaecati honesta et praeclara putant omnia, quaecumque ipsi concupiscunt. Opprimitur praeterea concupiscendi vi verbum Dei, quod in animis nostris a magno illo agricola Deo insitum est. Sic enim apud D. Marcum scriptum est<sup>5)</sup>: „Alii sunt, qui in spinis seminantur: hi sunt, qui verbum audiunt, et aerumnae saeculi et deceptio divitiarum, et circa reliqua concupiscentiae introeuntes, suffocant verbum, et sine fructu efficitur.“

*XXIII. Qui cupiditatum laqueis maxime implicantur.*

Iam vero qui prae ceteris hoc cupiditatis vitio laborant, quosque praeterea parochus ad colendum hoc praeceptum diligentius cohortari debet, illi sunt, qui lusionibus non honestis

<sup>1)</sup> Mat. 6, 10    <sup>2)</sup> Rom. 6, 12.    <sup>3)</sup> Iac. 1, 14.    <sup>4)</sup> I. Io. 2, 16.    <sup>5)</sup> Marc. 4, 18. 19.

delectantur, aut qui ludis immoderate abutuntur, mercatoresque item, qui rerum penuriam annonaeque caritatem expectunt, atque id aegre ferunt, ut alii praeter ipsos sint, qui vendant aut emant; quo carius vendere aut vilius emere ipsi possint. Qua in re item peccant, qui alios egero cupiunt, ut aut vendendo, aut emendo ipsi lucentur. Peccant etiam milites, qui bellum expectunt, ut furari ipsis liceat; medici item, qui morbos desiderant; iureconsulti, qui causarum litiumque vim copiamque concupiscunt; tum artifices, qui quaestus avidi omnium, quae ad victum cultumque pertinent, penuriam exoptant, ut inde plurimum lucrifaciant. In hoc praeterea genere graviter ii peccant, qui alienae laudis gloriaeque avidi atque appetentes sunt non sine aliqua famae alterius obtrectatione, idque praesertim, si, qui illam appetunt, ignavi nulliusque pretii homines sunt; fama enim et gloria virtutis atque industriae, non ignaviae aut inertiae praemium est.

---

## C A T E C H I S M I

### P A R S Q U A R T A .

---

#### C A P U T I .

##### De Oratione, eiusque in primis necessitate.

###### *I. Quo modo Deus sit orandus.*

In officio et munere pastorali cum primis necessaria est ad salutem fidelis populi praeceptio Christianae precationis, cuius vim ac rationem multos necesse est ignorare, nisi pia et fidei pastoris diligentia tradita sit. Quamobrem praecipua parochi cura versari debet in eo, ut pii auditores intelligent, quid a Deo, et quomodo orandum sit. Omnes autem necessariae precationis numeros continet divina illa formula, quam Christus Dominus Apostolis, et per illos eorumque successores omnibus deinceps, qui Christianam religionem susciperent, notam esse voluit; cuius verba atque sententias sic animo ac memoria comprehendere oportet, ut in promptu habeamus. Ut autem in hac orandi ratione suppeditet parochis facultas instituendi fideles auditores: quae magis opportuna visa sunt, hic proposimus sumpta ab iis scriptoribus, quorum eo in genere doctrina &c. copia maxime laudantur; nam reliqua, si opus fuerit, pastore*y* ex iisdem fontibus haurire poterunt.

*II. Usus orandi ad salutem necessarius est.*

Primum igitur docendum est, quam sit oratio necessaria, cuius praeceptum non solum consilia causa traditum est, sed etiam necessarii iussi vim habet. Quod a Christo Domino declaratum est illis verbis<sup>1)</sup>: „Oportet semper orare.“ Hanc orandi necessitatatem ipsa, etiam illo Dominicæ precationis prooemio, ostendit ecclesia<sup>2)</sup>: „Praeceptis salutaribus moniti, et divina institutione formati, audemus dicere.“ Itaque quum esset necessaria precatio Christianis hominibus, et illud a discipulis ipse rogatus esset: „Domine, doce nos orare<sup>3)</sup>:“ praescripsit eis orandi formam Dei Filius, et spem attulit impetrationis eorum, quae postularent. Et ipse documentum fuit precationis, qua non solum utebatur assidue, sed etiam in ea<sup>4)</sup> pernoctabat. Cuius deinde officii iis, qui se ad Iesu Christi fidem contulissent, Apostoli praecepta tradere non destiterunt. Nam sancti et Petrus<sup>5)</sup> et Ioannes<sup>6)</sup> de ea re diligentissime piros admonent, et eius rationis memor Apostolus pluribus locis Christianos hortatur ad salutarem orandi necessitatem.

*III. Qua potissimum ratione homines adduci possint in cognitionem necessarii huius officii.*

Praeterea tam multis indigemus bonis et commodis ad animum et corpus tuendum necessariis, ut ad precationem confugere oporteat, tanquam ad unam omnium optimam, et indigentiae nostrae interpretem, et conciliatricem eorum, quibus egemus. Nam quum nihil cuiquam debeat Deus: reliquum profecto est, ut, quae nobis opus sunt, ab eo precibus expectamus; quas preces tanquam instrumentum necessarium nobis dedit ad id, quod optaremus, consequendum.

*IV. Non alia via omni indigentiae nostrae satisfacere licet, quam per orationem.*

Praesertim quum quaedam esse constet, quae nisi eius adiumento non liceat impetrare. Habent enim sacrae preces praestantem illam virtutem, qua maxime daemones eiiciuntur. Est enim quoddam daemoniorum genus, quod non eiicitur, nisi iejunio et oratione<sup>7)</sup>. Quare magnam sibi admunt facultatem singularium donorum, qui hanc consuetudinem exercitationemque non adhibent, pie ac diligenter orandi. Petitione enim non solum honesta, sed etiam assidua opus est ad impetrandum quod concupiscas. „Nam,“ ut inquit S. Hieronymus<sup>8)</sup>, scriptum est:

<sup>1)</sup> Luc. 18, 1. <sup>2)</sup> verb. Missalis Romani. <sup>3)</sup> Luc. 11, 1. <sup>4)</sup> Luc. 6, 12. <sup>5)</sup> I. Petr. 3, 7. et 4, 7. <sup>6)</sup> I. Io. 3, 22. et 5, 14. 16. <sup>7)</sup> Mat. 17, 20. <sup>8)</sup> In cap. 7. Matth.

„Omni potenti datur:“ ergo si tibi non datur, ob id non datur, quia non petis: „petite ergo et accipietis.“

## CAPUT II.

### De utilitate Orationis.

#### *I. Quis sit primus fructus, quem parit illa orandi necessitas.*

Habet autem haec necessitas iucundissimam utilitatem, quae fructus ex se edit uberrimos; quorum copiam sument pastores a sacris Scriptoribus, quum opus erit illos impetriri fidi populo. Nos ex ea copia aliquot elegimus, quos huic temporis accommodatos duximus. Primus autem fructus, quem inde capimus, est is, quod orantes Deo honorem habemus; siquidem est quoddam religionis argumentum oratio, quae in divinis literis thymiamati comparatur. „Dirigatur,“ enim, inquit Propheta<sup>1)</sup>, „oratio mea sicut incensum in conspectu tuo.“ Quare nos hac ratione Deo subiectos esse profitemur, quem bonorum omnium auctorem agnoscimus et praedicamus, in quem solum spectamus, quod unum incolumentis salutisque praesidium atque perfugium habemus. Huius fructus illis etiam verbis admonemur<sup>2)</sup>: „Invoca me in die tribulationis; eruam te, et honorificabis me.“

#### *II. Quae sit altera utilitas, quam orando consequimur.*

Sequitur fructus amplissimus et iucundissimus orationis, quum a Deo preces audiuntur; est enim, ex S. Augustini sententia<sup>3)</sup>, coeli clavis oratio. „Nam adscendit,“ inquit, „precatio et descendit Dei miseratio.“ Licet alta sit terra, altum coelum: audit tamen Deus hominis linguam, si mundam habeat conscientiam. Cuius orandi muneris tanta vis est, tanta utilitas, ut ea re coelestium donorum amplitudinem consequamur. Nam et impetramus nobis, ut ducem et adiutorem adhibeat Spiritum sanctum, et fidei assequimur conservationem et incolumentem, et vitationem poenarum, et divinum patrocinium in temptationibus, et ex diabolo victoriam. Omnino inest in preicatione singularis gaudii cumulus. Quamobrem sic loquebatur Dominus<sup>4)</sup>: „Petite et accipietis, ut gaudium vestrum sit plenum.“

#### *III. Semper pias preces exaudit divina maiestas.*

Nec vero quin huic petitioni praesto sit et occurrat Dei benignitas, ullus relictus est dubitandi locus; quod multa comprobant divinae Scripturae testimonia, quae, quia sunt in

<sup>1)</sup> Ps. 140, 2. <sup>2)</sup> Ps. 49, 15. <sup>3)</sup> serm. 47. in App. <sup>4)</sup> Io. 16, 24.

promptu, illa solummodo apud Isaiam exempli causa attingemus: „Tunc,“ inquit<sup>1)</sup> „invocabis, et Dominus exaudiet: clamabis, et dicet: Ecce adsum;“ et rursus<sup>2)</sup>: „Eritque antequam clament, ego exaudiam: adhuc illis loquentibus ego audiam.“ Exempla autem eorum, qui Deum exoraverunt, quia propemodum sunt et infinita et posita ante oculos, omittimus.

*IV. Qui fiat, ut quae petimus interdum non impetremus.*

At interdum fit, ut quae petimus a Deo non impetremus. Ita est; sed tum maxime prospicit utilitati nostrae Deus, vel quod alia nobis maiora et ampliora bona impertitur, vel quod nec necessarium nobis est, nec utile, quod petimus; immo vero fortasse supervacaneum id futurum sit, si dederit, atque pestiferum. „Quaedam enim,“ inquit sanctus Augustinus<sup>3)</sup>, „negat propitiis Deus, quae concedit iratus.“ Non nunquam etiam fit, ut adeo remisse ac negligenter oremus, ut ne ipsi quidem quod dicimus attendamus. Quum autem sit oratio mentis ascensus ad Deum, si in orando animus, qui ad Deum referri debet, peregrinatur, nulloque studio, nulla adhibita pietate, temere precationis verba funduntur: quomodo inanem huius orationis sonitum Christianam precationem esse dicemus? Quare minime mirum est, si Deus nostrae non obsequitur voluntati; quum vel ipsi nolle id nos, quod petimus, pene probemus nostrae negligentia et ignoracione precationis, vel postulemus ea, quae nobis sunt obfutura.

*V. Digne postulantes plus impetrant, quam postulent.*

Contra vero scienter ac diligenter petentibus multo plus tribuitur, quam a Deo postulaverint: quod et Apostolus testatur in epistola ad Ephesios<sup>4)</sup>, et illa prodigi filii similitudine<sup>5)</sup> declaratur, qui praecclare secum actum esse existimatus fuit, si in loco mercenarii famuli eum habuisse pater; etsi recte cogitantibus, non solum postulantibus, nobis cumulat gratiam suam Deus, non modo munerum copia, sed etiam celeritate tribuendi. Quod ostendunt divinae literae, quum illa utuntur loquendi formula<sup>6)</sup>: „Desiderium pauperum exaudivit Dominus.“ Intimis enim et tacitis egentium studiis, ne expectata quidem eorum voce, Deus occurrit.

*VI. Quis sit tertius orationis fructus.*

Accedit eo etiam ille fructus, quod orando animi virtutes et exercemus et augemus, maxime vero fidem. Ut enim rite illi non orant, qui fidem Deo non habent, („quomodo enim,

<sup>1)</sup> Isa. 58, 9. <sup>2)</sup> id. 65, 24. Ps. 80, 8. Prov. 15, 29. <sup>3)</sup> cf. ep. 130. c. 14. <sup>4)</sup> Eph. 8, 20. <sup>5)</sup> Luc. 15, 11. <sup>6)</sup> Ps. 9, b. 17. 20, 3. 102, 5.

inquit<sup>1)</sup> „invocabunt, in quem non crediderunt?“) sic fideles, quo studiosius orant, eo maiorem ac certiorem fidem habent divinae curae et providentiae, quae potissimum id requirit a nobis, ut ad se de iis, quae nobis opus sunt, referentes, omnia postulemus.

*VII. Cur Deus, quum sciat, quibus indigeamus, oratione nostra velit sollicitari.*

Posset vero Deus non potentibus, ne cogitantibus quidem, abunde nobis omnia dilargiri, quo modo et animantibus rationis expertibus cuncta suppeditat ad usus vitae necessarios: sed beneficentissimus parens vult a filiis invocari; vult nos quotidie rite petendo petere fidentius, vult, impetratis iis, quae postulamus, in dies magis testificari ac praedicare suam in nos ipsos benignitatem.

*VIII. Quo modo nostra in Deum caritas per orationem exercetur.*

Amplificatur etiam caritas; nam illum auctorem agnoscentes omnium bonorum utilitatumque nostrarum, quanta eum possumus maxima caritate amplectimur, et, ut amantes colloquio et congressu magis ad amorem incenduntur: sic pii homines, quo saepius Deo facientes preces et eius implorantes benignitatem, quasi cum ipso colloquuntur, eo maiori in singulas precationes affecti laetitia, ad eum amandum et colendum incitantur ardentius.

*IX. Precationis assiduitate tum digni divina gratia evadimus, tum humilitatem, et arma contra diabolum comparamus.*

Propterea nos hac uti vult exercitatione precationis, ut flagrantes petendi studio, quod optamus, tantum ea assiduitate et cupiditate proficiamus, ut digni simus, in quos illa conferantur beneficia, quae antea iejunus et angustus animus noster capere non poterat. Vult praeterea nos id, quod est, intelligere ac p[ro]ae nobis ferre, si gratiae coelestis auxilio deserramur, nostra opera nihil consequi posse, propterea que toto animo ad orandum incumbere. Valent autem maxime haec tanquam orationis arma contra naturae nostrae hostes acerrimos; ait enim S. Hilarius<sup>2)</sup>: „Adversus diabolum armaque eius orationum nostrarum sonitu certandum est.“

*X. Quae sit quarta utilitas, ex oratione in homines profluens.*

Praeclarum praeterea illum orationis fructum assequimur, quod, quum proclives simus ad malum et ad libidinis varios appetitus vitio infirmitatis ingenitiae, patitur Deus se nostris cogitationibus concipi: ut, dum illum oramus, et mereri eius con-

<sup>1)</sup> Rom. 10, 14. Mat. 21, 21. Marc. 11, 24. Iac. 5, 15. <sup>2)</sup> in Ps. 65.

tendimus munera, accipiamus innocentiae voluntatem, et ab omni labore delictorum omnium amputatione purgemur.

*XI. Quis sit postremus orationis fructus.*

Postremo ex S. Hieronymi<sup>1)</sup> sententia irae divinae resistit oratio. Itaque sic ad Moysen locutus est Deus<sup>2)</sup>: „Dimitte me,“ quum quidem poenas eum ab illo populo petere volentem precibus impediret. Nihil enim est, quod aequum Deum leniat iratum, aut etiam paratum ad plagas sceleratis inferendas aequum retardet et revocet a furore, ac preces piorum hominum.

### CAPUT III.

#### De partibus et gradibus Orationis.

*I. Quibus partibus constet christiana oratio.*

Exposita necessitate et utilitate Christianae precationis, scire praeterea oportet fidem populum, quot et quibus partibus ea constet oratio; id enim ad huius officii perfectionem pertinere testatur Apostolus, qui in epistola ad Timotheum, cohortans ad pie sancteque orandum, orationis partes diligenter enumerat. „Obsecro,“ inquit<sup>3)</sup>, „primum omnium fieri obsecrationes, orationes, postulationes, gratiarum actiones pro omnibus hominibus.“ Quod vero subtilis quaedam est harum differentia partium: si eius explicationem auditoribus parochi conducere existimabunt, consulent s. scriptores, praecipue S. Hilarius et Augustinum.

*II. De postulatione et gratiarum actione.*

Sed quoniam duae sunt praecipue partes orationis, postulatio et gratiarum actio, a quibus tanquam a capite manant reliquae: minime eas praetermittendas duximus. Nam ad Deum accedimus, ut, cultum ei ac venerationem adhibentes, vel ab eo aliquid impetremus, vel ipsi de beneficiis, quibus assidue ab eius benignitate ornamus et augemur, gratias agamus. Utramque hanc maxime necessariam partem orationis Deus ipse pronunciavit ore Davidis illis verbis<sup>4)</sup>: „Invoca me in die tribulationis; eruam te, et honorificabis me.“ Quantum autem egeamus divinae liberalitatis ac bonitatis, quis ignorat, modo summam hominum egestatem et miseriam intueatur?

*III. Dei in omnes homines benignitas et liberalitas praedicatur.*

Quam vero sit propensa Dei voluntas in genus huma-  
num, quam effusa in nos benignitas, omnes intelligunt, qui

<sup>1)</sup> Comm. in Ier. 1. q. c. 7. v. 16. <sup>2)</sup> Ex. 32, 10. <sup>3)</sup> I. Tim. 2. 1. <sup>4)</sup> Ps. 49, 15.

sensu oculorum et mente praediti sint. Nam quocumque oculos coniicimus, quocumque nos cogitatione convertimus, nobis admirabilis lux divinae beneficentiae ac benignitatis oboritur. Quid enim habent homines, quod a Dei largitate profectum non sit? et, si omnia sunt eius dona ac munera bonitatis: quid est, quod non omnes pro viribus beneficentissimum Deum laudibus celebrent, et gratiarum actione prosequantur? Sed utriusque officii, et petendi aliquid a Deo, et ei gratias agendi, multi sunt gradus, quorum aliis alio est altior atque perfectior. Ut igitur fidelis populus non solum oret, sed etiam optime fungatur illo munere orationis, proponent ei pastores summam perfectamque orandi rationem, et ad eam, quam diligentissime poterunt, hortabuntur.

*IV. Quinam sit optimus orandi modus, summusque precationis gradus.*

Sed quinam est optimus orandi modus, et summus precationis gradus? nempe is, quo pii et iusti homines utuntur, qui, freti verae fidei stabili fundamento, quibusdam optimae mentis orationisque gradibus in illum locum perveniunt, ex quo infinitam Dei potentiam, immensam benignitatem ac sapientiam contemplari possunt; ubi etiam in spem certissimam veniunt, se et quidquid petierint in praesentia, et illam inexplicabilium bonorum vim consecuturos esse, quae pollicitus est Deus largitum se iis, qui divinum auxilium pie et ex animo implorarint. His quasi duabus alis elata in coelum anima ardenti studio pervenit ad Deum, quem omni gratiarum et laudum honore prosequitur, quod summis ab eo beneficiis affecta sit; tum vero singulari adhibita pietate ac veneratione, quasi filius unicus carissimo parenti, quid sibi sit opus, non dubitanter exponit. Quem precandi modum effundendi voce expriment divinae literae. Inquit enim Propheta<sup>1)</sup>: Effundo in conspectu eius orationem meam, et tribulationem meam ante ipsum pronuncio; " quae vox eam vim habet, ut nihil reticeat, nihil occultet, sed effundat omnia is, qui ad orandum venit, fiderent confugiens in sinum amantissimi parentis Dei. Ad id enim nos doctrina coelestis hortatur illis verbis<sup>2)</sup>: „Effundite coram illo corda vestra; " et<sup>3)</sup>: Iacta super Dominum curam tuam. " Hunc autem precationis gradum significat sanctus Augustinus, quum inquit in eo libro, qui inscriptus est Enchiridion<sup>4)</sup>: „Quod fides credit, spes et caritas orat. "

<sup>1)</sup> Ps. 141, 3. I. Reg. 1, 15. <sup>2)</sup> Ps. 61, 9. <sup>3)</sup> Ps. 54, 23. <sup>4)</sup> c. 7.

*V. Quae sit altera orandi ratio.*

Alius est eorum gradus, qui mortiferis peccatis oppressi, fide tamen ea, quae<sup>1)</sup> mortua dicitur, uituntur sese erigere, et ad Deum adscendere, sed propter intermortuas vires summaque fidei imbecillitatem se altius a terra tollere non possunt; verumtamen sua peccata recognoscentes, et eorum conscientia ac dolore cruciati, humiliter ac demisse ex illo maxime longinquo loco poenitentes, scelerum a Deo veniam et pacem implorant. Horum oratio suum obtinet locum apud Deum; nam eorum preces audiuntur, immo vero huiusmodi homines liberalissime misericors Deus invitat<sup>2)</sup>: „Venite,“ inquit, „ad me omnes, qui laboratis, et onerati estis, et ego reficiam vos.“ Ex horum hominum numero fuit ille publicanus<sup>3)</sup>, qui quum oculos ad coelum tollere non auderet, „exiit tamen, inquit, „e templo magis iustificatus, quam pharisaeus.“

*VI. Quo in gradu tertium genus deprecatorum consistat.*

Est praeterea eorum gradus, qui nondum fidei lucem acceperunt: verumtamen, divina benignitate exiguum illorum naturae lumen accidente, vehementer excitantur ad studium cupiditatempore veritatis, quam ut doceantur, summis precibus petunt; qui, si manent in voluntate, a Dei clementia eorum studium non repudiatur. Quod exemplo Cornelii centurionis comprobatum videmus<sup>4)</sup>. Nemini enim, id ex animo petenti, clausae sunt fores divinae benignitatis.

*VII. Quinam inter deprecatores extremo in gradu haereant.*

Postremus est gradus eorum, quos, non modo facinorum ac flagitorum non poenitentes, sed etiam sceleribus scelerant cumulantibus, tamen non pudet saepe a Deo petere peccatorum veniam, in quibus solunt perseverare. Qui tali statu ne ab hominibus quidem audere deberent, ut sibi ignoscerent, postulare. Horum oratio a Deo non auditur; sic enim de Antiocho scriptum est<sup>5)</sup>: „Orabat autem hic scelestus Dominum, a quo non esset misericordiam consecuturus.“ Quare vehementer hortandi sunt, qui in gravi illa miseria versantur, ut abiecta peccandi voluntate vere et ex animo se convertant ad Deum.

---

<sup>1)</sup> Iac. 12, 17. <sup>2)</sup> Mat. 11, 28. <sup>3)</sup> Luc. 18, 10. sq. <sup>4)</sup> Act. 10, 2. <sup>5)</sup> II. Mach. 9, 13.

## CAPUT IV.

## De iis, quae petenda sunt.

*I. Quaenam a Deo petere liceat.*

Sed quoniam in singulis petitionibus quid postulandum, quid non, suo loco dicetur: satis hic erit fideles universe illud admonere, ut quae iusta, quaeque honesta sint, a Deo petant homines; ne, si contra quam deceat aliquid postularint, illo responsō repellantur<sup>1)</sup>: „Nescitis, quid petatis.“ Quidquid autem recte optari potest, petere licet. Quod illa Domini uberrima promissa testantur<sup>2)</sup>: Quodcunque volueritis, petetis, et fiet vobis.“ Omnia enim se concessurum pollicetur.

*II. Quae res primo et per se a Deo petenda sint.*

Quare primum optatum ac desiderium nostrum ad eam regulam dirigemus, ut ad Deum, qui summmum est bonum, summum studium desideriumque referatur. Deinde cupiemus ea, quae cum Deo nos maxime coniungant; quae vero nos inde seiungant, aut causam aliquam afferant disiunctionis, ab omni studio et cupiditate nostra removenda sunt. Hinc licet colligere secundum illud summum et perfectum bonum, quomodo reliqua, quae dicuntur bona, et optanda sint, et a parente Deo postulanda.

*III. Corporis et externa bona quatenus a Deo petenda sint.*

Nam haec corporis, quae vocant, et externa bona, ut sanitas, robur, pulchritudo, dicitiae, honores, gloria, quia facultatem ac materiam saepe dant peccato (quare fit, ut non omnino pie aut salutariter petantur): erit illa petitio his praescribenda finibus, ut haec vitae commoda postulentur necessitatis causa; quae precandi ratio refertur ad Deum. Licet enim nobis ea precibus petere, quae et Iacob et Salomon postularunt; ille enim in hunc modum<sup>3)</sup>: „Si dederit mihi panem ad vescendum, et vestimentum ad induendum, erit mihi Dominus in Deum;“ Salomon his verbis<sup>4)</sup>: „Tribue tantum victui meo necessaria.“

*IV. Divitiis et aliis bonis corporis quo modo utendum sit, quando ea Dei benignitate possidemus.*

Cum vero nobis Dei benignitate suppeditetur ad victum et ad cultum, par est, nos illius Apostoli cohortationis recordari<sup>5)</sup>: Qui emunt, tanquam non possidentes, et qui utuntur hoc mundo, tanquam non utantur; praeterit enim figura huius mundi.“

<sup>1)</sup> Mat. 20, 22. <sup>2)</sup> Io. 15, 7. <sup>3)</sup> Gen. 28, 20. 21. <sup>4)</sup> Prov. 30, 8. <sup>5)</sup> I. Cor. 7, 30. 31.

Item<sup>1)</sup> „divitiae si affluant, nolite cor apponere;“ quarum fructum et usum tantummodo nostrum esse, sed ita, ut cum ceteris communicemus, ab ipso doctore Deo didicimus. Si vallemus, si reliquis externis et corporis bonis abundamus: eo illa nobis tributa esse meminerimus, ut et facilius Deo inservire possimus, et proximo omnia eius generis commodare.

*V. Ingenii et doctrinae bona quo modo petenda sint.*

Ingenii autem bona et ornamenta, cuius generis sunt artes atque doctrinae, petere etiam licet, sed ea tantum conditione, si nobis ad Dei gloriam, et ad salutem profutura sunt. Quod autem omnino et sine adiunctione aut conditione optandum, quaerendum, postulandum est, quemadmodum antea diximus, id Dei gloria est, et deinceps omnia, quae summo illi bono coniungere nos queant, ut fides, timor Dei, amor; de quibus plenius dicemus in explicatione petitionum.

## CAPUT V.

### *Pro quibus orandum sit.*

*I. Nullum genus hominum in hoc mundo est, pro quibus non liceat Deum precari.*

His autem cognitis, quae petenda sint, docendus est fidelis populus, pro quibus orare debeat. Continet autem oratio petitionem et gratiarum actionem; quare prius de petitione dicamus. Orandum igitur est pro omnibus sine ulla exceptione vel inimicitarum, vel gentis, vel religionis. Nam sive hostis sit, sive alienus, sive infidelis: proximus est, quem quia Dei iussu amare debemus, sequitur, ut preces quoque, quod amoris officium est, pro eo facere oporteat; nam eo pertinet illa Apostoli cohortatio<sup>2)</sup>: „Obsecro fieri orationes pro omnibus hominibus.“ Qua in oratione primum petenda sunt, quae salutem animae complectuntur, deinde, quae corporis.

### *II. Pro quibus praecipue orandum sit.*

Debemus autem hoc precationis officium primum pastoriibus animarum tribuere, quod ab Apostolo eius exemplo monemur; scribit enim is ad Colossenses<sup>3)</sup>, ut orent pro se, ut sibi Deus aperiat ostium sermonis; quod item facit ad ThessalonICENSES<sup>4)</sup>. Est praeterea in Actis Apostolorum<sup>5)</sup>: „Oratio fiebat sine intermissione ab ecclesia“ pro Petro. Cuius etiam officii a divo Basilio in libris de Moribus<sup>6)</sup> admonemur. Pro

<sup>1)</sup> Ps. 61, 11. <sup>2)</sup> I. Tim. 2, 1. <sup>3)</sup> Col. 4, 3. <sup>4)</sup> I. Thes. 5, 25. <sup>5)</sup> Act. 12, 5.  
<sup>6)</sup> Lib. mor. reg. 58. c. 5.

iis enim orandum esse inquit, qui praesunt verbo veritatis. Secundo loco pro principibus nos precari oportet ex eiusdem Apostoli sententia. Quanto enim publico bono principibus piis et iustis utamur, nemo ignorat. Itaque rogandus est Deus, ut tales sint, quales esse oportet, qui reliquis hominibus praesint. Exstant exempla sanctorum hominum, quibus monemur, ut pro bonis etiam piisque deprecemur. Egent enim et illi precibus aliorum; quod divinitus factum est, ne superbia efferantur, dum intelligunt, se inferiorum suffragiis indigere.

*III. Pro inimicis nostris et hostibus ecclesiae idem praestandum esse monstratur.*

Iussit praeterea Dominus precari, „pro<sup>1)</sup>“ persequentibus et calumniantibus nos.“ Illud etiam S. Augustini<sup>2)</sup> testimonio celebratum est, hanc esse acceptam consuetudinem ab Apostolis, pro iis, qui ab ecclesia sunt alieni, preces et vota faciendi, ut infidelibus donetur fides, ut idolorum cultores ab impietatis errore liberentur, ut Iudaei discussa animorum caligine, lucem veritatis accipiant, ut haeretici, redeuntes ad sanitatem, catholicae doctrinae praeceptis erudiantur, ut schismatici, a qua desciverunt sanctissimae parentis ecclesiae communione, cum ea iterum verae caritatis nodo iuncti copulentur. Quantam autem vim habeant preces, pro huiusmodi hominibus factae ex animo, constat tam multis exemplis omnis hominum generis, quos quotidie, ereptos a potestate tenebrarum, transfert Deus in regnum Filii caritatis suae<sup>3)</sup>, et ex vasis irae facit vasa misericordiae. In quo plurimum valere piorum absecrationem, nemo, qui recte sentiat, dubitare potest.

*IV. Quomodo etiam ad mortuos extendi possit hoc beneficium.*

Preces autem, quae pro mortuis fiunt, ut ab igne purgatorii liberentur, ex Apostolorum doctrina fluxerunt; qua de re satis dictum est, quum de sacrificio missae loqueremur.

*V. Non prodest illis aliena oratio, qui peccant ad mortem.*

In iis autem, qui peccare dicuntur ad<sup>4)</sup> mortem, vix quidquam precibus votisque proficitur. Verumtamen est Christianae caritatis et precari pro illis, et lacrymis contendere, an eis possint reddere placatum Deum.

*VI. Quo modo exsecrationes, quae in Scripturis leguntur, sint accipiendae.*

Exsecrationes vero sanctorum hominum, quibus in impios utuntur ex Patrum sententia, constat esse vel praedictiones

<sup>1)</sup> Mat. 5, 44. Act. 7, 59. <sup>2)</sup> ep. 109. c. 2. <sup>3)</sup> Col. 1, 13. Rom. 9, 22. <sup>4)</sup> 1. Io. 5, 16.

illorum, quae illis eventura sunt, vel adhibitas contra peccatum, ut, salvis hominibus, peccati vis intereat.

*VII. Quis sit usus gratiarum actionis.*

In altera autem parte orationis maximas Deo gratias agamus pro divinis eius immortalibusque beneficiis, quibus et semper affectit, et quotidie afficit humanum genus. Maxime autem fungimur hoc munere gratiarum actionis sanctorum omnium causa, quo in officio singulares Deo laudes tribuimus, et eorum victoriae et triumphi, quem de omnibus et intimis et externis hostibus eius benignitate reportarunt.

*VIII. Inter eas gratulationes, quae Sanctorum causa Deo exhibentur, quaenam in ecclesia primas partes obtineat.*

Huc pertinet prima illa pars angelicae salutationis, quum ea ad precandum utimur: „Ave Maria, gratia plena: Dominus tecum, benedicta tu in mulieribus.“ Nam Deum summis et habendis laudibus, et gratiis agendis celebramus, quod sanctissimam Virginem omni coelestium donorum munere cumulavit; ipsique Virgini singularem illam, gratulamur felicitatem. Iure autem sancta Dei ecclesia huic gratiarum actioni preces etiam et implorationem sanctissimae Dei matris adiunxit, qua pie atque suppliciter ad eam confugeremus, ut nobis peccatoribus sua intercessione conciliaret Deum, bonaque tum ad hanc, tum ad aeternam vitam necessaria impetraret. Ergo nos exules filii Evae, qui hanc lacrymarum vallem incolimus, assidue misericordiae matrem ac fidelis populi advocatam invocare debemus, ut oret pro nobis peccatoribus; ab eaque hac prece opem et auxilium implorare, cuius et praestantissima merita apud Deum esse, et summam voluntatem iuvandi humanum genus, nemo, nisi impie et nefarie, dubitare potest.

## CAPUT VI.

### *Quis orandus sit.*

*I. Ad quem dirigenda sit praecipue oratio.*

Deum autem orandum esse, et eius nomen invocandum, ipsa loquitur naturae vis, insita in hominum mentibus, non solum tradunt divinae literae, in quibus licet audire imperantem Deum (Ps. 49, 15.): „Invoca me in die tribulationis;“ sed Dei nomine tres personas intelligi oportet.

*II. Sintne etiam Sancti cum Christo regnantes invocandi.*

Secundo loco confugimus ad auxilia sanctorum, qui in coelo sunt; quibus etiam preces esse faciendas, ita certum est

in ecclesia Dei, ut piis nulla de eo dubitatio possit accidere. Quae res, quia separatim suo loco est explicata, eo et parochos et ceteros transmittimus. Sed ut tollatur omnis error imperitorum, operae pretium erit docere fidelem populum, quid intersit inter hanc invocandi rationem.

*III. Alter Deum, et aliter Sanctos imploramus.*

Non enim eodem modo Deum et Sanctos imploramus. Nam precamur Deum, ut ipse vel bona det, vel liberet a malis: a Sanctis autem, quia gratosi sunt apud Deum, petimus ut nostri patrocinium suscipiant, ut nobis a Deo impetrant ea, quorum indigemus. Hinc duas adhibemus precandi formulas, modo differentes; ad Deum enim proprie dicimus: „Miserere nobis, Audi nos:“ ad Sanctos: „Orate pro nobis.“

*IV. Quo modo a Sanctis petere possimus, ut nostri misereantur.*

Quanquam licet etiam alia quadam ratione petere a Sanctis ipsis, ut nostri misereantur; sunt enim maxime misericordes, itaque possumus precari eos, ut, conditionis nostrae miseria permoti, sua nos apud Deum gratia ac deprecatione iuvent. Quo loco illud maxime cavendum est omnibus, ne, quod Dei proprium est, cuiquam praeterea tribuant; immo vero, quum ad imaginem Sancti alicuius quis dominicam orationem pronunciat, ita tum sentiat, se ab illo petere, ut secum oret, sibique postulet ea, quae dominicae orationis formula continentur, et sui denique sit interpres et deprecator ad Deum. Nam eos hoc fungi officio docuit sanctus Ioannes<sup>1)</sup> Apostolus in apocalypsi.

## CAPUT VII.

### De Praeparatione adhibenda.

*I. Quibus maxime virtutibus animus ad orationem sit praeparandus.*

Est in divinis literis<sup>2)</sup>: „Ante orationem praepara animam tuam, et noli esse quasi homo, qui tentat Deum.“ Tentat enim Deum is, qui, quum bene orat, male agit, et, quum loquatur cum Deo, a precibus animus eius aberrat. Quare quum tanti intersit, quo quisque animo Deo preces faciat, tradant parochi vias precationum piis auditoribus. Primus igitur gradus ad orationem erit vere humilis ac demissus animus, scelerum quoque recognitio; quibus sceleribus intelligat,

<sup>1)</sup> Apoc. 8. 3. sq. <sup>2)</sup> Eccl. 18. 23.

qui ad Deum accedit, se non modo dignum non esse, qui quidquam impetrat a Deo, sed qui ne in eius quidem conspectum veniat oratus. Huius praeparationis saepissime mentionem faciunt divinae literae, quae et illud loquuntur<sup>1)</sup>: „Respexit in orationem humilium, et non sprevit preces eorum;“ item<sup>2)</sup>: „Oratio humiliantis se nubes penetrabit.“ Sed occurserunt pastoribus eruditis loci innumerabiles, qui in eam sententiam convenienter; quamobrem plurim nec necessaria commemoratione supersedemus. Tantum vero, quae alias attigimus, ne in hac quidem parte, quia sunt apposita ad hanc rationem, duo illa exempla praetermittemus. Publicanus<sup>3)</sup> est ille notissimus, qui longe consistens, oculos humo tollere non audebat. Est etiam<sup>4)</sup> mulier illa peccatrix, quae dolore commota lacrymis pedes Christi Domini perfudit. Uterque, quantum afferat orationi pondus humilitas Christiana, declaravit. Sequitur angor quidam in recordatione delictorum, vel saltem aliquis doloris sensus ob eam causam, quod dolere non possumus. Quorum utrumque, vel certe alterum, nisi a poenitente adhibeatur, venia impetrari non potest.

## *II. Quae potissimum scelera volenti cum fructu orare sint cavenda.*

Sed quia sunt quaedam scelera, quae maxime obstant, quo minus in precatione Deus postulationi nostrae concedat, ut caedes et illata vis: manus abstinendae sunt ab hac crudelitate et violentia. De quo facinore sic Isaiae ore loquitur Deus<sup>5)</sup>: „Quum extenderitis manus vestras, avertam oculos meos a vobis, et quum multiplicaveritis orationem, non exaudiām; manus enim vestrae sanguine plenae sunt.“ Fugienda est ira ac dissidium, quae magnopere etiam impediunt, ne preces audiāntur. De quibus est illud Apostoli<sup>6)</sup>: „Volo viros orare in omni loco, levantes puras manus, sine ira et disceptatione.“ Videndum est praeterea, ne nos implacabiles cuiquam praebeamus in iniuria; nam sic affecti Deum precibus adducere non poterimus, ut nobis ignoscat. „Quum enim stabitis,“ inquit ipse<sup>7)</sup>, „ad orandum, dimittite si quid habetis;“ et<sup>8)</sup>: „Si non dimiseritis hominibus: nec Pater vester dimittet vobis peccata vestra.“ Cavendum quoque est, ne duri simus et inhumani egentibus. Nam in eiusmodi homines illud dictum est<sup>9)</sup>: „Qui obturat aurem suam ad clamorem pauperis, et ipse clamabit et non exaudietur.“ Quid dicemus de superbia? quae quantopere Deum offendat, testis est illa vox<sup>10)</sup>: „Deus superbis resistit,

<sup>1)</sup> Ps. 101, 18. <sup>2)</sup> Eccl. 35, 21. <sup>3)</sup> Luc. 18, 13. <sup>4)</sup> ib. 7, 38. <sup>5)</sup> Is. 1, 15. <sup>6)</sup> I. Tim. 2, 8. <sup>7)</sup> Marc. 11, 25. <sup>8)</sup> Mat. 6, 15. <sup>9)</sup> Prov. 21, 13. <sup>10)</sup> Iac. 4, 6. I. Petr. 5, 5.

humilibus autem dat gratiam.“ Quid de contemptione divinorum oraculorum? in quam exstat illud Salomonis<sup>1)</sup>: „Qui declinat aures suas, ne audiat legem: oratio eius erit execrabilis.“ Quo tamen loco non excluditur deprecatio factae iniuriae, non caedis, non iracundiae, non illiberalitatis in pauperes, non superbiae, non despicientiae divinae orationis, non denique reliquorum scelerum, si ignoscendi venia petatur.

### *III. De fide in Deum, quae ad orationem necessaria censemur.*

Est vero ad hanc quoque praeparationem animi fides necessaria, quae si desit, neque de summi Patris omnipotentia, neque de illius misericordia, unde tamen orantis fiducia oritur, habetur cognitio; quemadmodum docuit ipse Christus Dominus<sup>2)</sup>: „Omnia,“ inquit, „quaecumque petieritis in oratione credentes, accipietis.“ De huiusmodi fide scribit S. Augustinus de verbis Domini<sup>3)</sup>: Si fides deficit, oratio periret.“ Caput igitur est ad rite orandum, quod iam dictum est, ut fide firmi ac fixi simus, quod Apostolus ex contrario ostendit<sup>4)</sup>: „Quomodo invocabunt, in quem non crediderunt?“ Itaque credamus oportet, ut et orare possimus, et ne nos fides ipsa deficiat, qua salutariter oramus. Fides enim est, quae preces fundit; preces faciunt, ut omni dubitatione sublata stabilis ac firma sit fides. In hanc sententiam sanctus hortabatur Ignatius<sup>5)</sup> eos, qui ad Deum adirent oraturi: „Noli dubio esse animo in oratione; beatus est, qui non dubitaverit.“ Quare ad impetrandum quod velimus a Deo, maximum pondus afferat fides, et certa spes impetrandi; quod monet S. Iacobus<sup>6)</sup>: „Postulet in fide, nihil haesitans.“

### *IV. Quae nos ad fidem impetrandi ea, quae in oratione petimus, inducere possint.*

Multa sunt, quibus nos confidere oportet in hoc officio precationis. Est ipsa Dei in nos perspecta voluntas ac benignitas, quam iubet nos se Patrem appellare, ut eius nos esse filios intelligamus. Est prope infinitus numerus eorum, qui Deum exoraverunt. Est summus ille deprecator, qui nobis semper praesto est Christus Dominus, de quo sic est apud sanctum Ioannem<sup>7)</sup>: „Si quis peccaverit, advocationem habemus apud Patrem Iesum Christum iustum; et ipse est propitiatio pro peccatis nostris.“ Item Paulus Apostolus<sup>8)</sup>: „Christus Iesus, qui mortuus est, immo qui et resurrexit, qui est ad dexteram Dei, qui etiam interpellat pro nobis.“ Item ad Ti-

<sup>1)</sup> Prov. 28, 9. <sup>2)</sup> Mat. 21, 22. <sup>3)</sup> Serm. 115, c. 1. <sup>4)</sup> Rom. 10, 14. <sup>5)</sup> Ign. ep. 10 ad Hermon. <sup>6)</sup> Iac. 1, 6. <sup>7)</sup> I. Io. 2, 1. 2. <sup>8)</sup> Rom. 8, 34.

motheum<sup>1)</sup>: „Unus enim Deus, unus et mediator Dei et hominum, homo Christus Jesus.“ Tum ad Hebraeos<sup>2)</sup>: „Unde debuit per omnia fratribus similari, ut misericors fieret, et fidelis pontifex ad Deum.“ Quare, etsi nos indigni sumus, qui impetreremus: tamen optimi dignitate interpretis ac deprecatoris Iesu Christi sperare et magnopere confidere debemus, nobis omnia, quae per illum rite petierimus, concessurum Deum.

*V. Spiritus sanctus nostrarum orationum auctor est.*

Denique nostrae auctor est precationis Spiritus sanctus, quo duce preces nostras audiri necesse est. Accepimus enim „Spiritum<sup>3)</sup> adoptionis filiorum, in quo clamamus, Abba, Pater,“ qui quidem Spiritus infirmitatem<sup>4)</sup>, et inscitiam nostram adiuvat in hoc orandi munere. Immo vero inquit: „Ipse postulat pro nobis gemitibus inenarrabilibus.“

*VI. Quo modo in fide iuvari ad impetranda Dei beneficia debeamus.*

Quod si qui titubant interdum, nec se satis esse firmos in fide sentiunt: utantur illa voce Apostolorum<sup>5)</sup>: „Domine, adauge nobis fidem;“ et caeci illius<sup>6)</sup>: Aduiva incredulitatem meam.“ Sed tum maxime et fide et spe vigentes, omnia a Deo optata consequemur, quum ad ipsius Dei legem ac voluntatem omnem mentem, actionem et orationem nostram conformabimus. „Si manseritis“ enim, inquit<sup>7)</sup>, „in me, et verba mea in vobis manserint: quodcumque volueritis, petetis, et fiet vobis.“ Quanquam ad hanc impetrandi a Deo omnia facultatem in primis necessaria est, ut antea diximus, oblivio iniuriarum, et benevolentia ac benefica voluntas in proximos.

## CAPUT VIII.

### Quae ratio in orando requiratur.

*I. De optima orandi ratione docendum esse populum, et quid sit orare in spiritu et veritate.*

Maxime autem refert, quo modo sacris precibus utamur; nam etsi precatio bonum est salutare, tamen, nisi recte adhibetur, minime prodest; quod enim petimus, saepe non assequimur, ut sanctus inquit Iacobus<sup>8)</sup>, ob eam causam, quia male petimus. Ergo docebunt parochi fidelem populum, quae sit optima ratio bene petendi, et privatim ac publice orandi.

<sup>1)</sup> I. Tim. 2, 5. <sup>2)</sup> Hebr. 2, 17. <sup>3)</sup> Rom. 8, 15. <sup>4)</sup> ib. v. 26. <sup>5)</sup> Luc. 17, 5.  
<sup>6)</sup> Marc. 9, 23. <sup>7)</sup> Io. 15, 7. <sup>8)</sup> Iac. 4, 3.

Quae praecepta Christianae orationis tradita sunt ex Christi Domini disciplina. Est igitur orandum „in spiritu<sup>1)</sup> et veritate.“ Nam coelestis Pater tales quaerit, qui adorent eum in spiritu et veritate; orat autem eo modo, qui intimum ac flagrans animi studium adhibet; a qua spirituali precandi ratione vocalem non excludimus. Verumtamen principatum iure tribuendum ducimus illi, quae a vehementi animo proficiscitur, obsecrationi: quam Deus, cui patent occultae hominum cogitationes, audit, etiamsi non ore proferatur. Audivit Annae eius, quae mater fuit Samuelis, intimas preces, de qua illud legimus<sup>2)</sup>, flentem orasse, et tantum labia moventem. Oravit hoc modo David; ait enim<sup>3)</sup>: „Tibi dixit cor meum, exquisivit te facies mea.“ Huiusmodi exempla in divinis libris passim legentibus occurunt.

### *II. Quis sit usus vocalis orationis praecipuus.*

Habet autem vocalis oratio propriam utilitatem et necessitatem. Nam incendit animi studium, et religionem orantis inflammat, quod ad Probam S. Augustinus<sup>4)</sup> scripsit hoc modo: „Nonnunquam verbis et aliis signis ad augendum desiderium sanctum nos ipsi acrius excitamus.“ Cogimur interdum vehementi animi cupiditate et pietate verbis efferre sententiam; nam exultante animo laetitia par etiam est linguam exultare, et vere decet nos cumulatum illud sacrificium facere et animae et corporis, quem Apostolorum orandi morem fuisse, ex Actis et ex Apostolo multis locis cognoscimus.

### *III. Voci officium perinde in privata oratione ac in publica necessarium non est.*

Sed quoniam duplex precandi ratio est, privata et publica: privatae orationis pronunciatione utimur, ut intimum studium et pietatem adiuvet; in publica, quae ad incitandam fidelis populi religionem instituta est, certis statisque temporibus linguae officio supersederi nullo modo potest.

### *IV. Soli Christiani in spiritu orant, et longas orationes non debent refugere.*

Hanc vero spiritu orandi consuetudinem, propriam Christianorum hominum, infideles minime colunt; de quibus ita licet Christum Dominum loquentem audire<sup>5)</sup>: „Orantes nolite multum loqui, sicut ethnici; putant enim, quod in multiloquio suo exaudiantur. Nolite ergo assimilari eis; scit enim Pater vester, quid opus sit vobis, antequam petatis eum.“ Cum autem prohibeat loquacitatem, longas tamen preces, quae a

<sup>1)</sup> Io. 4, 23. <sup>2)</sup> I. Reg. 1, 10—17. <sup>3)</sup> Ps. 26, 8. <sup>4)</sup> ep. 130. c. 9. <sup>5)</sup> Mat. 6, 7, 8.

vehementi ac diuturno animi studio proficiscantur, tantum abest ut reiiciat, ut etiam suo exemplo nos ad eam rationem cohortetur, qui non modo noctes in precatione consumpsit, sed ter eundem sermonem repetit<sup>1)</sup>). Tantum igitur statuendum est, inani verborum sono minime exorari Deum.

*V. Orationes hypocitarum reiicit Dominus.*

Nec vero ex animo orant hypocritae, a quorum nos consuetudine deterret Christus Dominus in hanc sententiam<sup>2)</sup>: „Quum oratis, non eritis sicut hypocritae, qui amant in synagogis et in angulis platearum stantes orare, ut videantur ab hominibus. Amen dico vobis, receperunt mercedem suam. Tu autem, quum oraveris, intra in cubiculum tuum, et clauso ostio ora Patrem tuum in abscondito, et Pater tuus, qui videt in abscondito, reddet tibi.“ Cubiculum, quod hoc loco dicitur, ad cor hominis referri potest; quod non satis est ingredi, sed praeterea occludi oportet, ne quid irrumpat et influat in animas extrinsecus, quo precationis integritas violari possit; tum enim coelestis Pater, qui omnium mentes et occultas cogitationes maxime perspicit, orantis postulationi concedit.

*VI. Si diutius quod postulamus differtur, non tamen ab hoc pietatis exercitio cessandum est.*

Requirit praeterea oratio assiduitatem, quae quantam vim habeat, iudicis illius exemplo Dei Filius ostendit<sup>3)</sup>, qui, quum nec timeret Deum, nec hominem revereretur, victus assiduate ac diligentia viduae, eius postulationi concessit. Itaque assidue Deo preces facienda sunt, nec imitandi illi, qui semel aut iterum orantes, nisi quod petunt impetrarint, in oratione defatigantur; nulla enim huius officii lassitudo esse debet, quod nos Christi Domini et Apostoli docet auctoritas. Quod si interdum voluntas in eo defecerit, precibus a Deo petamus perseverandi vim.

*VII. Christus, si quid a coelesti Patre postulare velimus, illud in suo nomine postulandum iussit.*

Vult etiam Dei Filius, orationem nostram ad Patrem suo nomine pervenire; quae eius merito et gratia deprecatoris id pondus assequitur, ut a coelesti Patre audiatur. Est enim eius illa vox apud S. Ioannem<sup>4)</sup>: „Amen, amen dico vobis, si quid petieritis Patrem in nomine meo, dabit vobis. Usque modo non petistis quidquam in nomine meo; petite et accipietis, ut gaudium vestrum sit plenum;“ et iterum<sup>5)</sup>: „Quodcumque petieritis Patrem in nomine meo, hoc faciam.“

<sup>1)</sup> Mat. 26, 41—44. <sup>2)</sup> Mat. 6, 5. 6. <sup>3)</sup> Luc. 18, 2. sq. <sup>4)</sup> Io. 16, 23. 24. <sup>5)</sup> Io. 14, 13.

*VIII. Fervor Sanctorum in oratione imitandus, et petitioni gratiarum actio adiungenda.*

Imitemur ardens sanctorum hominum studium, quod in orando adhibebant. Gratiarum autem actionem cum precatione iungamus Apostolorum exemplo, qui hanc consuetudinem perpetuo servaverunt, quemadmodum apud Apostolum licet videre.

*IX. Ut fervens et efficax sit oratio, iejunium adhibendum est et eleemosyna.*

Ieiunium vero et eleemosynam ad orationem adhibeamus. Ieiunium quidem certe maxime est cum oratione sociatum; nam qui cibo et potu sunt onusti, horum mens oppressa est sic, ut neque Deum intueri, neque, quid sibi velit oratio, cogitare possint. Sequitur eleemosyna, quae magnam et ipsa cum oratione societatem habet. Quis enim, cui facultas sit benigne faciendi ei, qui aliena misericordia vivat, nec optulerit proximo et fratri suo, se caritate praeditum dicere audeat? aut quo ore is, qui expers sit caritatis, Dei auxilium implorabit? nisi tum peccati veniam precatur, simul et a Deo suppliciter postulat caritatem. Quare divinitus factum est, ut saluti hominum triplici hoc remedio subveniretur. Quum enim peccando vel offendamus Deum, vel proximos violemus, vel nos ipsos laedamus: sacris precibus placatum reddimus Deum; eleemosyna redimimus hominum offensiones; iejunio proprias vitae sordes eluimus. Et quanquam singula prosint ad omnium scelerum genera, tamen proprie singulis iis peccatis, quae dimicimus, apposita et accommodata sunt.

## CAPUT IX.

### De Orationis Dominicae prooemio.

Pater noster, qui es in coelis.

*1. Cur in huius precationis initio Christus Patris nomen potius, quam Domini aut Iudicis, nos usurpare voluerit.*

Cum haec formula Christianae precationis, a Iesu Christo tradita, eam habeat vim, ut, antequam ad preces postulationesque veniamus, certis verbis loco prooemii nobis utendum sit, quibus pie ad Deum accedentes, fidentius etiam id facere possimus: parochi officium est, illa distincte dilucide que declarare, ut alacrior pius populus ad preces audeat, sequre cum Patre Deo acturum intelligat. Prooemium autem, si spectes verba, brevissimum est; si res aestimes, gravissimum, mysteriorumque plenissimum. Ac prima quidem vox, qua Dei

iussu et institutione utimur in hac precatione, est „Pater.“ Nam etsi Salvator noster divinam hanc orationem praetexere potuit aliquo verbo, quod plus maiestatis haberet, exempli causa Creatoris aut Domini: tamen haec omisit, quae timorem simul nobis afferre possent; illud autem adhibuit, quod orantibus et aliquid a Deo potentibus amorem fiduciamque conciliat. Quid enim iucundius est patris nomine? quod indulgentiam sonat et caritatem.

*II. Quae sit prima ratio, ob quam homines Deum merito Patrem hic appellant.*

Quibus autem rationibus Patris nomen Deo conveniat, suppeditabit facultas docendi fidelem populum ex locis creationis, gubernationis ac redemptionis. Nam quum Deus hominem creaverit ad imaginem suam, nec illam ceteris animantibus impertiverit: ex hoc singulari munere, quo hominem ornavit, iure omnium hominum, nec fidelium modo, sed etiam infidelium, Pater in divinis Scripturis appellatur. (Deut. 32, 6.)

*III. Quae sit altera ratio, ob quam Deus Pater hominum dicatur.*

A gubernatione vero sumere poterit argumentum, quod prospiciendo et consulendo utilitati hominum praecipuo quadam curae et providentiae modo nobis praestat patriam caritatem. Sed ut in huius explicatione argumenti paternam Dei de hominibus curam melius agnoscat, de custodia angelorum, in quorum tutela sunt homines, aliquid dicendum videtur.

*IV. Dei providentia illud negotium angelis datum est, ut custodiant humanum genus.*

Est enim Dei providentia datum hoc negotium angelis, ut custodiant humanum genus, singulisque hominibus praesto sint, ne gravius aliquod detrimentum accipiant. Nam ut parentes, si infesta et periculosa via filiis iter faciendum sit, custodes adhibent et periculorum adiutores: sic coelestis Parentis in hoc itinere, quo ad coelestem patriam contendimus, singulis nobis praeposuit angelos, quorum ope ac diligentia tecti furtim paratos ab hostibus laqueos vitaremus, et factos in nos horribiles impetus repelleremus, iisque ducibus rectum iter teneremus, ne obiectus aliquis error a fallaci adversario nos de via posset deducere, quae dicit in coelum.

*V. Quibus argumentis clare intelligamus magnitudinem utilitatis, quae ad homines ex custodia angelorum redeat.*

Quam vero habeat utilitatem haec de hominibus Dei cura ac providentia singularis, cuius munus et administratio mandata est angelis, quorum inter Deum et homines media est et

interiecta natura: patet exemplis, quorum copiam suppeditant divinae literae, quae testantur, saepe Dei benignitate factum esse, ut inspectantibus hominibus angeli mirabiles res efficerent, quibus moneremur, innumerabilia eius generis, quae sub oculos non caderent, a custodibus nostrae salutis angelis effici utiliter ac salutariter. „Raphael Angelus<sup>1)</sup>,“ Tobiae comes et dux itineris divinitus adiunctus, illum duxit et reduxit incolumem, cui et adiumento fuit, ne ab immani pisce devoraretur, et quanta esset in eius piscis iecore, felle et corde vis demonstravit. Ille daemonium expulit, eiusque impedita et colligata potestate, ne Tobiae noceret, effecit. Ille verum et legitimum matrimonii ius et usum adolescentem edocuit; ille Tobiae patri oculis capto lumina restituit.

*VI. De angelo, per quem divus Petrus e carcere liberatus est.*

Angelus<sup>2)</sup> item ille principis Apostolorum liberator uberm praebebit materiam ad erudiendum pium gregem de admirabili fructu curae custodiaeque angelorum, quum demonstrabunt parochi, angelum carceris tenebras illustrantem, et Petrum, tacto eius latere, ex somno excitantem, solventem catenas, disrumpentem vincula, monentem ut surgeret, seque, sumptis caligis et reliquo vestitu, sequeretur; quum docebunt, ab eodem Angelo Petrum per custodias libere eductum e carcere, et aperta denique ianua in tuto collocatum. Huius generis exemplorum, quemadmodum diximus, referta est sanctarum literarum historia; quibus intelligimus, quanta sit vis beneficiorum, quae confert in homines Deus, angelis interpretibus et internunciis, nec solum certa aliqua et privata de remissis, sed a primo ortu nostrae curae praepositis, et in singulorum hominum salutis praesidio collocatis. Hanc doctrinam diligentiam illa utilitas consequetur, ut audientium mentes erigantur, et ad agnoscedam ac venerandam Dei paternam de se curam ac providentiam excitentur.

*VII. Qua praeterea ratione agnoscant homines fideles paternam Dei de hominibus curam.*

Commendabit autem hoc loco parochus in primisque praedicabit divitias benignitatis Dei erga genus humanum, quem quum a primo<sup>3)</sup> parente nostri generis et peccati usque ad hanc diem offenderimus flagitiis ac sceleribus innumerabilibus: retinet tamen in nos caritatem, neque praecipuum illam de nobis curam deponit. Quem si quis existimat hominum obliuisci, amens est, et in Deum iacit indignissimam contumeliam. Ira-

<sup>1)</sup> Tob. 12, 3. — 6, 17. <sup>2)</sup> Act. 12, 7—9. — 5, 19. sq. <sup>3)</sup> Gen. 3, 6.

scitur Israeli Deus propter eius gentis blasphemiam, quae se arbitrabatur coelesti ope desertam esse. Est<sup>1)</sup> enim in Exodo: „Tentaverunt Dominum, dicentes: Estne Dominus in nobis, an non?“ et apud Ezechielem<sup>2)</sup> succenset eidem populo Deus, quod dixerat: „Non videt Dominus nos; dereliquit Dominus terram.“ Ergo fideles his auctoritatibus a nefaria illa opinione deterrendi sunt, fieri posse, ut Deum capiat hominum oblivio. In quam sententiam audire licet conquerentem de Deo apud Isaiam Israeliticum populum, contraque Deum stultam eius querimoniam benigna similitudine refellentem. Est enim ibi<sup>3)</sup>: „Dixit Sion, dereliquit me Dominus, et Dominus oblitus est mei.“ Cui Deus: „Numquid oblivisci potest mulier infantem suum, ut non misereatur filio uteri sui? et si illa oblita fuerit, ego tamen non oblidiscar tui; ecce in manibus meis descripsi te.“

*VIII. Exemplo primi parentis Dei in nos benignitas demonstratur.*

Quibus locis, quanquam id liquido confirmatur, tamen ut penitus fidei populo persuadeatur, nullum posse tempus accidere, quo deponat Deus hominum memoriam, quo eis non tribuat patriae caritatis officia: parochi rem clarissimo primorum hominum exemplo comprobabunt, quos, post neglectum violatumque Dei iussum cum acerbius accusatos, et horribili illa sententia condemnatos audis<sup>4)</sup>: „Maledicta terra in opere tuo; in laboribus comedes ex ea cunctis diebus vitae tuae, spinas et tribulos germinabit tibi, et comedes herbas terrae,“ quum vides e Paradiso expulsos, et, ut omnis redditus spes adimeretur, quum in aditu Paradisi collocatum legis Cherubim, flammeum tenentem et versatilem gladium, quum ab ulciscente suam iniuriam Deo illos intimis et externis molestiis confitatos intelligis: an non actum de homine putas? an non credas non modo divino illum auxilio nudatum, sed etiam cuivis iniuriae propositum? Verumtamen in tantis divinae irae et ultionis indiciis, oborta est lux quaedam Dei in eos caritatis. „Fecit“ enim, inquit, „Dominus Deus Adae et uxori eius tunicas pelliceas, et induit eos;“ quod maximum fuit argumentum, hominibus nullo unquam tempore defuturum Deum.

*IX. Nullis quantumvis magnis hominum sceleribus Dei benignitatem exhaustiri posse probatur.*

Huius etiam sententiae vim, — „non exhaustiri Dei amorem ulla hominum iniuria,“ David expressit illis verbis<sup>5)</sup>: „Numquid continebit Deus in ira sua misericordias suas?“

<sup>1)</sup> Ex. 17, 7. <sup>2)</sup> Ez. 8, 12. <sup>3)</sup> Is. 49, 14. sq. <sup>4)</sup> Gen. 3, 17. 18. <sup>5)</sup> Ps. 76, 10.

Hanc Habacuc Deum affatus exposuit, dum inquit<sup>1)</sup>: „Quum iratus fueris, misericordiae recordaberis.“ Hanc sic Michaeas aperuit<sup>2)</sup>: „Quis Deus similis tui, qui aufers iniquitatem, et transfers peccatum reliquiarum hereditatis tuae? non immittet ultra furorem suum, quoniam volens misericordiam est.“ Omino res ita se habet; quum maxime perditos nos, et Dei praesidio spoliatos arbitramur, tum maxime pro immensa sua bonitate nos quaerit et curat Deus; sustinet enim in ira gladium iustitiae, nec cessat affundere inexhaustos misericordiae thesauros.

*X. Quae sit tertia ratio, qua patriae caritatis beneficium in genus humanum Deus cumulate ostendit.*

Magnam igitur vim habent ad declarandam praecipuam Dei rationem in amando tuendoque hominum genere creatio et gubernatio. Sed tamen illud opus redimendi hominem sic eminet inter duo superiora, ut beneficentissimus Deus parensque noster summam in nos benignitatem tertio hoc beneficio cumulatam illustrarit. Quare tradet spiritualibus filiis parochus, et assidue eorum auribus inculcabit hanc praestantissimam Dei erga nos caritatem, ut intelligent, se, quia redempti sint, admirabilem in modum Dei filios evasisse; „dedit“ enim, inquit Ioannes<sup>3)</sup>, „eis potestatem, filios Dei fieri;“ et: „Ex Deo nati sunt.“ Quam ob causam baptismus, quod primum redemptionis pignus et monumentum habemus, sacramentum regenerationis dicitur: inde enim nascimur Dei filii. Nam inquit ipse Dominus<sup>4)</sup>: „Quod natum est ex Spiritu, Spiritus est;“ et: „Oportet vos nasci denuo.“ Item Petrus Apostolus<sup>5)</sup>: „Renati non ex semine corruptibili, sed incorruptibili per verbum Dei vivi.“

*XI. Singulari Dei beneficio per redemptionem filii Dei effecti sumus.*

Huius pondere redemptionis et Spiritum sanctum acceperimus, et Dei gratia dignati sumus. Quo munere Dei filii adoptamur; quemadmodum ad Romanos scripsit Apostolus Paulus<sup>6)</sup>: „Non accepistis spiritum servitutis iterum in timore, sed accepistis spiritum adoptionis filiorum, in quo clamamus: Abba, Pater.“ Cuius vim et efficaciam adoptionis explanat sanctus Ioannes ad hunc modum<sup>7)</sup>: „Videte, quamcarum caritatem dedit nobis Pater, ut filii Dei nominemur et simus.“

*XII. Quid Christiani, filii Dei iam effecti, post tot accepta parentae caritatis officia, vicissim Patri praestare debeat.*

His expositis, admonendus est fidelis populus, quid ipse vicissim debeat amantissimo Patri Deo, ut intelligat, quem

<sup>1)</sup> Habac. 3, 2. <sup>2)</sup> Mich. 7, 18. <sup>3)</sup> Io. 1, 12, 13. Rom. 5, 8. Gal. 4, 5. <sup>4)</sup> Io. 3, 6, 7. Tit 3, 5. <sup>5)</sup> I. Petr. 1, 23. <sup>6)</sup> Rom. 8, 15. I. Tim. 1, 16. <sup>7)</sup> I. Io. 3, 1.

amorem ac pietatem, quam obedientiam ac venerationem creatori, gubernatori, ac redemptori praestare, qua spe ac fiducia illum invocare oporteat. Sed ad erudiendam inscitiam, dirigendamque sententiae perversitatem eorum, si qui tantummodo secundas res et prosperum vitae cursum argumento esse existimant, Deum conservare nobis amorem suum, rebus autem adversis et calamitatibus quum a Deo exercemur, id esse signum hostilis in nos animi, et prorsus abalienatae a nobis divinae voluntatis: demonstrandum erit, quum tangit<sup>1)</sup> nos manus Domini, minime id hostiliter facere Dominum, verum percutiendo sanare, et plagam a Deo venientem esse medicinam. Castigat enim peccantes, ut ea disciplina meliores faciat, et praesenti animadversione redimat ab exitio sempiterno. Nam visitat<sup>2)</sup> quidem in virga iniquitates nostras, et in verberibus peccata nostra, misericordiam autem suam non auferit a nobis. Quare monendi sunt fideles, ut in eiusmodi castigatione patriam Dei caritatem agnoscant, et illud apud patientissimum Iob in memoria et in ore habeant<sup>3)</sup>: „Ipse vulnerat, et medetur; percutit, et manus eius sanabunt;“ ut illud usurpent, quod sub persona populi Israelitici scripsit Hieremias<sup>4)</sup>: „Castigasti me, et eruditus sum quasi iuvenculus indomitus. Converte me, et convertar: quia tu Dominus Deus meus,“ ut Tobiae exemplum sibi proponant, qui, quum in illa plaga caecitatis paternam Dei manum caedentem sensisset, exclamavit<sup>5)</sup>: „Benedico te, Domine Deus Israel, quia tu castigasti me, et tu salvasti me.“

### *XIII. Deum nunquam nostri oblitum esse fidelibus inculcandum.*

In quo maxime cavendum est fidelibus, ne, etiamsi quis incommodo affecti, quavis calamitate afflicti sint, Deum id ignorare existiment; ait enim ipse<sup>6)</sup>: „Capillus de capite vestro non peribit.“ Immo vero se ipsi illo divini oraculi solatio consolentur, quod in apocalypsi dictum est<sup>7)</sup>: „Ego, quos amo, arguo et castigo.“ Conquiescat in Apostoli cohortatione ad Hebraeos<sup>8)</sup>: „Fili mi, noli negligere disciplinam Domini; neque fatigeris, dum ab eo argueris: quem enim diligit Dominus, castigat; flagellat autem omnem filium, quem recipit. — Quod si extra disciplinam estis, ergo adulteri estis et non filii. — Patres quidem carnis nostrae eruditores habuimus, et reverebamur eos: non multo magis obtemperabimus Patri spirituum, et vivemus?“

<sup>1)</sup> Iob. 19, 21. Deut. 32, 39. <sup>2)</sup> Ps. 88, 33. sq. <sup>3)</sup> Iob. 5, 18. <sup>4)</sup> Ier. 31, 18. <sup>5)</sup> Tob. 11, 17. Sap. 16, 13. <sup>6)</sup> Luc. 21, 18. <sup>7)</sup> Apoc. 3, 19. Prov. 3, 12. <sup>8)</sup> Hebr. 12, 5.

Noster.

*XIV. Cur Deum pluralitatis vocabulo nostrum Patrem hic appellare iubeamur.*

Cum Patrem invocamus singuli, et nostrum appellamus, docemur, ex dono ac iure divinae adoptionis consequi necessario, ut fratres sint fideles omnes et inter se fraterne amare debeant. „Omnes enim,“ inquit<sup>1)</sup>), „vos fratres estis.“ — Unus est enim Pater vester, qui in coelis est. Quare etiam in Epistolis fideles omnes Apostoli „fratres“ appellant. Ex quo item conficitur illa consecutio necessaria, ut eadem adoptione Dei non solum inter se fideles universi fraterna necessitudine coniungantur, sed quia homo est unigenitus Dei Filius, fratres eius et nominentur, et sint. Nam in Epistola ad Hebreos<sup>2)</sup>), quum de Filio Dei loqueretur, scripsit Apostolus: „Non confunditur fratres eos vocare, dicens: nunciabo nomen tuum fratribus meis;“ quod tanto ante David<sup>3)</sup> de Christo Domino praedixerat. Ipse vero etiam Christus sic apud Evangelistam loquitur ad mulieres<sup>4)</sup>: „Ite, nunciate fratribus meis, ut eant in Galilaeam; ibi me videbunt.“ Quod tum ab eo dictum esse constat, quum iam excitatus a mortuis immortalitatem esset consecutus, ne quis existimet fraternalm hanc cognationem eins resurrectione et in coelum ascensu dissolutam esse. Tantum enim abest, ut hanc coniunctionem et caritatem Christi resurrectio diremerit, ut ex illa maiestatis et gloriae sede, tum quum de omnibus omnis memoriae hominibus iudicabit, fidelium „minimos“ ab eo „fratrum“ nomine appellandos acceperimus<sup>5)</sup>.

*XV. Qua ratione inter Christi fratres fideles censeantur.*

Qui autem fieri potest, ut „Christi fratres“ non simus, cuius coheredes dicimur? Est enim „primogenitus ipse, „constitutus „heres universorum<sup>6)</sup>;“ nos vero secundo loco geniti, coheredes eius pro modo coelestium donorum, pro ratione caritatis, qua praebuerimus nos ministros, et coadiutores Spiritus sancti, quo auctore ad virtutem, salutaresque actiones impellimur et incendimur, ut eius freti gratia in certamen salutis fortiter descendamus; quo sapienter constanterque confecto, decursoque huius vitae spatio, iustum coronae praemium capimus a coelesti Parente, omnibus, qui eundem cursum tenuerint, constitutum. „Non enim,“ ut ait Apostolus<sup>7)</sup>), „injustus est Deus, ut obliviscatur operis nostri et dilectionis.“

<sup>1)</sup> Mat. 23, 8. 9. Rom. 1, 13. II. Petr. 3, 17. I. Io. 3, 13. <sup>2)</sup> Hebr. 2, 11. 12. <sup>3)</sup> Pa. 21, 23 <sup>4)</sup> Mat. 28, 10. <sup>5)</sup> Mat. 25, 40 <sup>6)</sup> Rom. 8, 17. Hebr. 1, 2. <sup>7)</sup> Hebr. 6, 10.

*XVI. Quo modo alii pro aliis orare, et omnes invicem fratres aestimare debeamus.*

Quam vero hanc ex animo vocem „Noster“ proferre debeamus, S. Chrysostomi<sup>1)</sup> sententia declaratur, qui Deum inquit libenter Christianum audire, non solum pro se, sed pro altero deprecantem; quod pro se orare naturae est, pro altero gratiae: pro se necessitas cogit, pro altero fraterna caritas hortatur. Quibus illa subiunxit: Iucundior est Deo illa oratio, quam caritas fraterna commendat, quam ea, quae necessitate rei pronunciatur. In hac tanta materia salutaris orationis monere et hortari debet parochus omnes omnis aetatis, generis, ordinis, ut, communis huius fraternae necessitudinis memores, comiter et fraterne se gerant, neque se aliis alii praeferant insolentius. Nam etsi in ecclesia Dei diversi sunt officiorum gradus, tamen illa varietas graduum et munerum fraternae necessitudinis coniunctionem minime tollit; quemadmodum in hominis corpore varius usus et diversa functio membrorum nihil agit, quamobrem haec vel illa corporis pars membra munus et nomen amittat.

*XVII. Quibus de causis Christiani sint tanta necessitudinis coniunctione copulati.*

Propone tibi eum, qui regia sit potestate; an is igitur, si fidelis est, frater non est omnium, qui Christianae fidei communione continentur? Maxime. Quid ita? quia non est Deus alias is, ex quo divites et reges nati sunt, ab eo, a quo pauperes, et qui in regum potestate sunt, extiterunt, sed unus Deus et parens et dominus omnium. Itaque una spiritualis ortus omnium nobilitas, una dignitas, unus splendor generis, quum omnes ex eodem Spiritu, ex eodem fidei sacramento nati simus filii Dei, et eiusdem hereditatis coheredes. Nec vero alium Christum Deum habent copiosi et potentes homines, alium tenuiores et infimi; non aliis sacramentis sunt initiati, nec aliam hereditatem regni coelestis exspectant. Fratres sumus omnes, et, ut inquit Apostolus ad Ephesios<sup>2)</sup>, „membra sumus corporis Christi, de carne eius, et de ossibus eius.“ Quod idem in Epistola ad Galatas significat Apostolus<sup>3)</sup>: „Omnes filii Dei estis per fidem in Christo Iesu. Quicunque enim in Christo baptizati estis, Christum induistis. Non est Iudeus, neque Graecus; non est servus, neque liber; non est masculus, neque femina: omnes enim vos unum estis in Christo Iesu.“ Haec autem accurate versanda res est pastoribus ani-

<sup>1)</sup> Op. imperf. hom. 14. <sup>2)</sup> Eph. 5, 30. <sup>3)</sup> Gal. 3, 26—28. Col. 3, 11.

marum, et scienter illis in hac sententia commorandum; est enim accommodatus locus non minus ad confirmandos et excitandos inopes et abiectos homines, quam ad coercendam comprehendamque arrogantiam locupletum atque potentium. Cui hominum incommodo uti mederetur, urgebat Apostolus fraternalm hanc caritatem, et inculcabat fidelium auribus.

*XVIII. Quid Christianus, ubi exordium precationis illud, Pater noster, pronunciabit, meditari debeat.*

Cum igitur has Deo preces facturus es, Christiane, me-mineris, te tanquam filium ad Patrem Deum accedere. Itaque quum precationem ordiris, et illud „Pater noster,“ pronuncias, cogita, quem in locum te summa Dei benignitas extulerit, qui non ut servum ad dominum adire invitum ac timidum, sed ut ad patrem filium voluntarium securumque confugere iusserit. Qua in memoria et cogitatione, quo vicissim studio et pietate tibi orandum sit, considera. Danda enim est tibi opera, te ut talem praebeas, qualem esse decet Dei filium, id est, ut oratio et actiones tuae non indignae sint divino genere, quo te dignari voluit beneficentissimus Deus. Ad hanc officii rationem nos Apostolus cohortatur, quum ait<sup>1)</sup>: „Estote ergo imitatores Dei, sicut filii carissimi,“ ut vere de nobis dici possit, quod ipse Apostolus scripsit ad Thessalonicenses<sup>2)</sup>: „Omnes vos filii lucis estis, et filii diei.“

Qui es in coelis.

*XIX. Quum Deus sit ubique praesens, quomodo domicilium suum peculiariter in coelo habere dicatur.*

Constat inter omnes, qui recte de Deo sentiunt, ubique locorum et gentium esse Deum; quod non ita intelligendum est, quasi ipse distributus in partes, una parte locum unum, alia alium occupet ac tueatur. Nam Deus spiritus est, omnis expers divisionis. Quis enim audeat, Deum, tanquam in vestigio positum, loci alicuius finibus circumscribere, quum ipse de se dicat<sup>3)</sup>: „Numquid non coelum et terram ego impleo?“ Quod rursum sic accipiendum est: Deum coelum ac terram, quaeque coelo ac terra comprehensa sunt, vi sua ac virtute complecti; non autem ipsum ullo loco contineri. Adest enim rebus omnibus Deus, vel creans ipsas, vel conservans creatas, nulla regione, nullis finibus vel circumscriptus, vel ita definitus, quo minus et naturam et potestatem suam praesens ubique constituat. Quod beatus David<sup>4)</sup> expressit illis verbis: „Si ascendero in coelum, tu illic es.“ Verum etsi praesens

<sup>1)</sup> Eph. 5, 1. Act. 17, 28. 29. <sup>2)</sup> I. Thes. 5, 5. <sup>3)</sup> Ier. 23, 24. <sup>4)</sup> Ps. 138, 8.

dass er seine Wohnung im Himmel habe; dies ist, wie wir sehen, deßhalb geschehen, weil die Himmel, zu welchen wir hinaufblicken, der vornehmste Theil der Welt sind, und unverwest bleiben, an Kraft, Größe und Schönheit die übrigen Körper übertreffen und ihre bestimmten unwandelbaren Bewegungen haben. Um also den Geist der Menschen zur Betrachtung seiner unendlichen Macht und Majestät, welche besonders im Werke der Himmel hervorleuchtet, anzuregen, so bezeugt er in der heiligen Schrift, dass er in den Himmeln wohne. Oft erklärt er auch, wie es denn wirklich ist, es gebe keinen Theil der Welt, welcher nicht von dem daselbst gegenwärtigen Wesen und der Kraft Gottes umfasst wäre.

#### 20. Was jene Worte, „der du bist in den Himmeln“ den Gläubigen zu betrachten vorstellen.

Indeß sollen sich die Gläubigen bei diesem Gedanken nicht nur das Bild des gemeinsamen Vaters Aller, sondern auch des im Himmel regierenden Gottes vorstellen, damit sie, wenn sie beten wollen, sich erinnern, dass Geist und Herz zum Himmel zu erheben sei; und so viel Hoffnung und Vertrauen ihnen auch der Name Vater einflößt, so möge doch eben so viel christliche Demuth und Chrfurcht jene herrliche Natur und göttliche Majestät unseres Vaters „der in den Himmeln ist“, hinzufügen. Diese Worte bestimmen auch den Betenden im Voraus, um was sie zu beten haben. Denn all unser bitten, welches sich auf den Nutzen und Nothwendigkeit dieses Lebens bezieht, ist, sofern es nicht mit himmlischen Dingen verbunden und auf dieses Ziel gerichtet ist, nichtig und eines Christen unwürdig. Daher werden die Pfarrer die frommen Zubörer an diese Weise des Gebetes mahnen und ihre Mahnung durch jenes Zeugniß des Apostels belegen: „Wenn ihr mit Christus auferstanden seid, so suchet, was oben ist, wo Christus sitzt zur Rechten Gottes; habt Geschmack an dem, was oben ist, nicht was auf der Erde.“

### Behutes Hauptstück.

#### Von der ersten Bitte des Gebetes des Herrn.

Geheiligt werde dein Name.

#### 1. Warum wir unsere Wünsche mit der Heiligung des göttlichen Namens beginnen.

Was man von Gott begehrten solle, und in welcher Ordnung es zu thun sei, hat uns der Meister und Herr Aller gelehrt und geboten. Denn da das Gebet Kundgebung und Ausdruck unseres Begehrens ist, so bitten wir dann recht und vernünftig, wenn die Ordnung der Bitten sich nach der Ordnung dessen richtet, was man begehrten darf. Es mahnt uns aber die wahre Liebe, dass wir unsern Sinn und Eifer auf Gott richten, welcher, da

caritas, totum ut animum ac studium conferamus in Deum, qui, quoniam solus est in se ipso summum bonum, iure est praecipuo quodam ac singulari amore diligendus. Nec vero ex animo et unice potest amari Deus, nisi rebus ac naturis omnibus eius honor et gloria praeponatur. Bona enim et nostra, et aliena, et omnino omnia, quaecumque boni vocabulo nominantur, ab illo profecta, summo ipsi bono cedunt. Quare, ut ordine procederet oratio, Salvator petitionem hanc de summo bono principem et caput constituit petitionum reliquarum, docens nos, priusquam ea, quae nobis aut proximo cuique opus sint, postulemus, quae propria sint Dei gloriae petere debere, ipsique Deo studium et desiderium eius rei nostrum exponere. Quo facto manebimus in officio caritatis, qua docemur, et plus Deum, quam nos ipsos diligere, et primum petere quae Deo cupiamus, deinde, quae nobis optemus.

*II. Quum divina natura nulla re augeri aut carere possit, cur necesse fuerit, sanctificationem nominis Dei hic postulare.*

Et quoniam desiderium et petitio sunt earum rerum, quibus caremus, (nec vero Deo, id est eius naturae, fieri accessio potest, aut augeri ulla re divina substantia, quae inexplicabilem in modum est omni perfectione cumulata:) intelligendum est, extra haec esse, quae a Deo ipsi Deo petimus, et ad externam eius gloriam pertinere. Cupimus enim et petimus, ut Dei nomen notius sit gentibus, ut eius regnum amplifietur, ut plures quotidie obedient divino numini; quae tria, nomen, regnum, obedientia, non in illo ipso sunt intimo Dei bono, sed assumuntur extrinsecus.

*III. Verba illa „sicut in coelo et in terra,“ ad tres primas petitiones referri posse, et quomodo hic intelligantur.*

Verum ut, hae petitiones quam vim habeant, et quid valent, planius intelligatur: pastoris erunt partes, monere fidellem populum, verba illa: „Sicut in coelo et in terra,“ ad singulas referri posse primarum trium postulationum, ut: „Sanctificetur nomen tuum, sicut in coelo et in terra;“ item: „Adveniat regnum tuum, sicut in coelo et in terra;“ similiter: „Fiat voluntas tua, sicut in coelo et in terra.“ Quum autem petimus, ut sanctificetur nomen Dei, id sentimus, ut augeatur sanctitas et gloria divini nominis. Quo loco parochus animadvertis, ac docebit pios auditores, non id dicere Salvatorem, ut eodem modo sanctificetur in terra, quo et in coelo, id est, ut amplitudine terrestris sanctificatio coelestem exaequet, (hoc enim fieri nullo pacto potest): sed ut ex caritate, et intimo animi studio id agatur.

*IV. Quo modo Dei nomen, per se sanctum, sanctificari a nobis possit.*

Etsi verissimum illud est, sicuti est, divinum nomen per se sanctificatione non egere, quum sanctum<sup>1)</sup> et terribile sit, quemadmodum ipse Deus suapte natura sanctus est, neque ei ulla sanctitas, qua ob omni aeternitate praeditus non fuerit, possit accedere: tamen, quod in terris longe minori honore afficitur, quam par est, nonnumquam etiam maledictis et nefariis vocibus violatur, propterea cupimus ac petimus, ut laudibus, honore, gloria celebretur, ad exemplum laudum, honoris et gloriae, quae illi in coelo tribuuntur, id est, ut sic honor et cultus in mente, in animo, in ore versetur, ut omni veneratione et intima et externa prosequamur, omni celebriitate excelsum, purum et gloriosum Deum, ad imitationem supernorum ac coelestium civium, complectamur. Ut enim coelites summa consensione, gloria et praedicatione efferunt Deum: sic precamur ut idem contingat orbi terrarum, et omnes gentes Deum cognoscant, colant et venerentur; ut nulli plane mortales reperiantur, qui non et suscipiant Christianam religionem, et se totos Deo dicantes credant, ex eo omnem sanctitatis fontem existere, neque quidquam esse purum aut sanctum, quod non a sanctitate divini nominis oriatur.

*V. Quo modo fieri possit, ut Dei nomen in infidelibus sanctum esse possit.*

Testatur enim Apostolus, mundatam esse ecclesiam in<sup>2)</sup> „lavacro aquae, in verbo vitae.“ Significat autem verbum vitae nomen Patris, et Filii, et Spiritus sancti, in quo baptizamur et sanctificamur. Itaque, quoniam nulla cuiusquam expiatio, nulla munditia et integritas esse potest, super quo non sit invocatum divinum nomen: cupimus et petimus a Deo, ut omne hominum genus, relictis impurae infidelitatis tenebris, ac radiis divini luminis illustratum, huius vim nominis agnoscat sic, ut in eo veram quaerat sanctitatem, et in nomine sanctae et individuae Trinitatis baptismi sacramentum suscipiens ipsius Dei dextera, perfectam vim sanctitatis consequatur.

*VI. Qua ratione Dei nomen in peccatoribus sanctificari possit.*

Pertinet vero optatum, et postulatio nostra non minus etiam ad eos, qui flagitiis et sceleribus contaminati puram baptismi integritatem et innocentiae stolam amiserunt; quare factum est, ut in illis miserrimus suam iterum sedem impurissimus spiritus collocarit. Optamus igitur, et precamur a Deo,

<sup>1)</sup> Ps. 110, 10. <sup>2)</sup> Eph. 5, 26. Mat. 28, 19.

ut in ipsis etiam sanctificetur nomen eius, ut ad cor et ad sanctitatem redeuntes sacramento poenitentiae redimant pristinam sanitatem, seque ipsos purum ac sanctum Deo templum ac domicilium praebeant.

*VII. Quo modo omnes homines in se sanctificare Dei nomen poterunt.*

Oramus denique, lumen ut suum Deus praferat omnium mentibus, quo videre possint, „omne<sup>1)</sup> datum optimum, et omne donum perfectum, — descendens a Patre luminum,<sup>2)</sup> ad nos divinitus esse delatum; quo temperantiam, iustitiam, vitam, salutem, omnia denique animi, corporis, externa, vitalia ac salutaria bona illi accepta referant, a quo, quemadmodum praedicat ecclesia, bona cuncta procedunt. Si quid luce sua sol, si quid reliqua sidera motu et cursu prosunt hominum generi, si circumfuso hoc alimur spiritu, si terra frugum et fructuum ubertate vitam sustinet omnium, si opera magistratum quiete ac tranquillitate fruimur, et haec et huius generis bona innumerabilia nobis suppeditat immensa Dei benignitas. Quin etiam, quas philosophi secundas causas appellant, interpretari debemus, mirabiliter effectas quasdam, et ad usum nostrum accommodatas Dei manus, quibus nobis sua bona distribuit, ac longe lateque diffundit.

*VIII. Quo modo maxime per agnitionem et venerationem ecclesiae catholicae Dei nomen sanctificetur.*

Quod autem maxime rem continet in hac petitione, illud est, ut omnes agnoscant et venerentur sanctissimam Iesu Christi sponsam, et parentem nostram ecclesiam, in qua una est fons ille amplissimus atque<sup>3)</sup> perpetuus ad eluendas et expandas omnes peccatorum sordes, unde hauriuntur universa salutis et sanctitatis sacramenta, quibus quasi coelestibus quibusdam fistulis in nos a Deo ille sanctitatis ros et liquor effunditur; ad quam solam, et ad eos, quos suo sinu et gremio complexa est, pertinet divini illius imploratio nominis, quod unum „sub<sup>3)</sup>“ coelo datum est hominibus, in quo oporteat nos salvos fieri.<sup>4)</sup>

*IX. Qua ratione nomen Dei a Christianis hodie polluatur.*

Verum parochi maxime hunc locum urgere debebunt: boni esse filii, non solum Patrem Deum orare verbis, sed re etiam et actione conari, ut eluceat in ipso sanctificatio divini nominis. Utinam non essent, qui, quum oratione hanc Dei nominis sanctificationem assidue postulent, factis, quantum in-

<sup>1)</sup> Iac. 1, 17. <sup>2)</sup> Zach. 13, 1. Ezech. 36, 25, 47, 8. sq. <sup>3)</sup> Act. 4, 12.

ipsis est, illud violent atque contaminant; quorum culpa interdum ipsi etiam Deo maledicuntur. In quos dictum est ab Apostolo<sup>1)</sup>: „Nomen Dei per vos blasphematur inter gentes;“ et apud Ezechiel<sup>2)</sup> legimus: „Ingressi sunt ad gentes, ad quas introierunt, et polluerunt nomen sanctum meum, quum diceretur de eis: populus Domini iste est, et de terra eius egressi sunt.“ Qualis enim est vita, et ut sunt eorum mores, qui religionem profitentur: sic de religione ipsa, deque eius auctore religionis multitudo imperita iudicare solet. Quare qui vivunt ex Christiana religione, quam suscepereunt, et ad eius regulam orationem et actiones dirigunt suas, magnam facultatem praebent aliis laudandi nomen coelestis parentis, et omni honore et gloria celebrandi. Nobis enim ipse has partes imposuit Dominus, ut illustribus virtutis actionibus excitemus homines ad laudem et praedicationem divini nominis; ad quos loquitur in hunc modum apud Evangelistam<sup>3)</sup>: „Sic luceat lux vestra coram hominibus, ut videant opera vestra bona, et glorificant Patrem vestrum, qui in coelis est;“ et princeps Apostolorum<sup>4)</sup>: „Conversationem vestram inter gentes habentes bonam, ut, — ex bonis operibus vos considerantes, glorificant Deum.“

## CAPUT XI.

### De secunda Petitione.

Adveniat regnum tuum.

#### I. Regni Dei praedicatio in Scripturis quam saepe commendata.

Regnum coeleste, quod altera hac petitione postulamus, eiusmodi est, ut eo referatur ac terminetur omnis Evangelii praedicatio. Nam et inde exorsus est ad poenitentiam cohortari S. Ioannes Baptista, dum „Poenitentiam,“ inquit<sup>5)</sup>, „agite; appropinquavit enim regnum coelorum;“ nec aliunde fecit initium suae praedicationis Salvator humani generis, et in illo salutari sermone, quo beatitudinis vias discipulis in monte monstravit, tanquam proposito orationis argumento, principium duxit a regno coelorum; nam „Beati,“ inquit<sup>6)</sup>, „pauperes spiritu; quoniam ipsorum est regnum coelorum.“ Quin etiam eum retinere cupientibus attulit<sup>7)</sup> illam causam necessariae professionis: „Et aliis civitatibus oportet me evangelizare regnum Dei, quia ideo missus sum.“ Hoc idem postea regnum praedicare iussit Apostolus<sup>8)</sup>, et illi, qui se ire ad sepeliendum

<sup>1)</sup> Rom. 2, 24. <sup>2)</sup> Ez. 36, 20. Is. 52, 5. <sup>3)</sup> Mat. 5, 16. Luc. 8, 16. <sup>4)</sup> I. Petr. 2, 12. <sup>5)</sup> Mat. 3, 2. Luc. 3, 8. <sup>6)</sup> Mat. 5, 3. <sup>7)</sup> Luc. 4, 43. <sup>8)</sup> Mat. 10, 7.

patrem suum velle dixerat, respondit<sup>1)</sup>: „Tu autem vade, et annuncia regnum Dei.“ Quum vero resurrexisset a mortuis, per illos quadraginta dies, quibus apparuit Apostolis<sup>2)</sup>, loquebatur „de regno Dei.“ Quare parochi hunc secundae postulationis locum diligentissime tractabunt, ut fideles auditores, quanta sit in hac petitione vis ac necessitas, intelligent.

*II. Quid haec secunda petitio comprehendat.*

Primum autem ipsis ad rem scienter subtiliterque expli-  
candam magnam facultatem dabit ea cogitatio, quod, etsi haec  
petitio coniuncta sit eum reliquis omnibus, eam tamen sepa-  
ratim etiam adhiberi iusserit a ceteris, ut quod petimus summo  
studio quaeramus; inquit enim<sup>3)</sup>: „Quaerite primum regnum  
Dei et iustitiam eius, et haec omnia adiicientur vobis.“ Et  
quidem tanta vis et copia coelestium munierum hac postulatione  
continetur, ut omnia complectatur, quae ad corpoream et spi-  
ritualem vitam tuendam sint necessaria. Quem autem regio no-  
mine dignum dicemus, cui ea curae non sint, quae regni salutem  
contineant? quod si sunt homines de regni sui incolumente sol-  
liciti, quanta regem regum omnium cura et providentia tueri  
credendum est et vitam et salutem hominum? Hac igitur regni  
Dei petitione comprehensa sunt omnia, quibuscumque in hac  
peregrinatione vel exilio potius indigemus, quae concessurum se  
Deus benigne pollicetur; nam statim illa subiunxit: „Et haec  
omnia adiicientur vobis.“ Quibus omnino declaravit, se eum  
esse regem, qui generi hominum copiose omnia largeque sup-  
peditat, in cuius infinitae benignitatis cogitatione infixus David  
cecinit<sup>4)</sup>: „Dominus regit me, et nihil mihi deerit.“

*III. Quid his faciendum sit, qui huius petitionis fructum con-  
sequi cupiunt.*

Verum minime satis est, vehementer petere Dei regnum,  
nisi ad petitionem nostram adhibeamus omnia tanquam instru-  
menta, quibus illud quaeritur et invenitur. Nam et quinque fatuae  
virgines studiose illae quidem petierunt ad hunc modum<sup>5)</sup>:  
„Domine, Domine, aperi nobis,“ verumtamen, quod illius postu-  
lationis praesidia non haberent, exclusae sunt; nec iniuria: est enim  
illa Dei ore pronunciata sententia<sup>6)</sup>: „Non omnis, qui  
dicit mihi: Domine, Domine, intrabit in regnum coelorum.“

*IV. Quibus rationibus regni Dei desiderium hominibus sit ex-  
citandum.*

Quamobrem haurient animarum curatores sacerdotes ex  
uberrimis divinarum literarum fontibus ea, quae fidelibus

<sup>1)</sup> Luc. 9, 60. <sup>2)</sup> Act. 1, 8. <sup>3)</sup> Mat. 6, 33. <sup>4)</sup> Ps. 22, 1. <sup>5)</sup> Mat. 25, 11. <sup>6)</sup> Mat. 7, 21.

desiderium studiumque commoveant regni coelorum, quae calamitosam status nostri conditionem illis ob oculos ponant, quae sic eos afficiant, ut respicientes et colligentes se in memoriam redeant summae beatitudinis et inexplicabilium bonorum, quibus redundat aeterna parentis Dei domus. Exsules enim sumus, et plane eius loci incolae, in quo habitant daemones, quorum odium in nos nulla ratione mitigari potest; nam sunt infestissimi et implacabiles in genus humanum. Quid domestica intestinaque praelia, quae inter se corpus et anima, caro et spiritus, assidue gerunt? quibus perpetuo timendum est, ne concidamus; timendum autem? immo vero statim concideremus, nisi propugnaculo divinae dexteræ defenderemur. Quam vim misericarum quum sentiret Apostolus<sup>1)</sup>: „Infelix,“ inquit, „ego homo, quis me liberabit de corpore mortis huius?“

*V. Quanta sit hominis miseria; per aliarum rerum cum homine collationem demonstratur.*

Haec infelicitas nostri generis, quanquam per se cognoscitur, tamen ex contentione reliquarum naturarum et creaturarum rerum facilius intelligi potest. In illis, sive rationis, sive etiam sensus expertibus, raro fieri videmus, ut aliqua natura a propriis actionibus, a sensu, vel motu insito declinet sic, ut a proposito et constituto fine deflectat. Hoc apparet in bestiis agrestibus, nantibus, volucribus, ut res declaratione non egeat. Quod si coelum suspexeris, nonne verissimum id esse intelligis, quod a Davide dictum est<sup>2)</sup>: „In aeternum, Domine, verbum tuum permanet in coelo.“ Nempe illud continentis motu et perpetua conversione fertur, ut ne minimum quidem a praefinita divinitus lege discedat. Si terram et reliquam universitatem consideres, facile videoas, aut nulla, aut exigua ex parte deficere. At miserrimum hominum genus saepissime labitur, raro quae recte sunt cogitata perseguitur, plerumque susceptas bonas actiones abiicit atque contemnit; quae modo placuerat optima sententia, subito displicet, et illa reiecta ad turpia consilia sibique perniciosa delabitur.

*VI. Quae sit omnium misericarum causa potissima.*

Quaenam igitur est huius inconstantiae miseriaeque causa? Contemptio plane divini afflatus. Claudimus enim<sup>3)</sup> aures Dei monitis; oculos tollere nolumus ad ea, quae nobis lumina divinitus preferuntur; nec coelestem Patrem salutariter praecepientem audimus. Quare huc incumbendum erit parochis, ut et miseras oculis subiiciant fidelis populi, et commemoremont

<sup>1)</sup> Rom. 7, 25. Gal. 5, 17. <sup>2)</sup> Ps. 118, 89. Sap. 2, 5. I Petr. 1, 85. <sup>3)</sup> Ia. 65, 12.

causas miseriarum, et remediorum vim ostendant. Quorum omnium illis facultas non deerit, comparata ex viris sanctissimis Ioanne Chrysostomo et Augustino, maxime vero ex iis, quae in symboli expositione posuimus. Nam illis cognitis, quis erit e facinorosorum hominum numero, quin adiumento Dei gratiae praeeuntis, evangelico<sup>1)</sup> illo prodigi filii exemplo, conetur exsurgere, et erigere se, atque in coelestis regis patrisque conspectum venire?

*VII. Quidnam Dei regnum sacris in literis designet.*

His explicatis, quae sit fidelium fructuosa petitio, aparent, quid sit, quod his verbis a Deo postulemus; praesertim quum vocabulum regni Dei multa significet, quorum declaratio et ad reliquam Scripturae intelligentiam non erit inutilis, et est ad huius loci cognitionem necessaria. Communis igitur quaedam regni Dei significatio, quae frequens est in divinis literis, est non solum eius potestatis, quam habet in omnem hominum rerumque universitatem, sed etiam providentiae, qua cuncta regit et moderatur. „In manu eius,“ inquit Propheta<sup>2)</sup>, „sunt omnes fines terrae.“ Quibus finibus intelliguntur etiam, quae occulta sunt et abdita in intimis terrae ac rerum omnium partibus. In hanc sententiam Mardochaeus loquebatur illis verbis<sup>3)</sup>: „Domine, Domine, rex omnipotens, in ditione enim tua cuncta sunt posita, et non est, qui possit tuae resistere voluntati. — Dominus omnium es; nec est, qui resistat maiestati tuae.“

*VIII. Christi regnum in pios quale.*

Item Dei regno declaratur praecipua illa ac singularis providentiae ratio, qua Deus pios et sanctos homines tuerit et curat; de qua propria et eximia quadam Dei cura dictum est illud a Davide<sup>4)</sup>: „Dominus regit me, et nihil mihi deerit;“ tum ab Isaia<sup>5)</sup>: „Dominus, rex noster, ipse salvabit nos.“ In qua Dei regia potestate etsi praecipua ratione sunt in hac vita ii, quos diximus, sancti ac pii homines: tamen monuit Pilatum ipse Christus Dominus, regnum suum non esse ex hoc mundo<sup>6)</sup>, hoc est, minime ex hoc mundo, qui et conditus est et interitur, ortum habere; nam eo, quem diximus, modo dominantur imperatores, reges, respublicae, duces, omnesque ii, qui vel expetiti ac delecti ab hominibus praesunt civitatisbus atque provinciis, vel per vim et iniuriam dominatum occupaverunt. Christus autem Dominus „constitutus“ est Rex<sup>7)</sup>

<sup>1)</sup> Iuc. 15, 20. <sup>2)</sup> Ps. 94, 4. <sup>3)</sup> Esth. 13, 9. 11. <sup>4)</sup> Ps. 22, 1. <sup>5)</sup> Is. 33, 22. <sup>6)</sup> Io. 18, 36. <sup>7)</sup> Ps. 2, 6.

a Deo, ut ait Propheta; cuius regnum ex Apostoli sententia iustitia est; ait enim<sup>1)</sup>: „Regnum Dei est iustitia, et pax, et gaudium in Spiritu sancto.“

*IX. Qua ratione Christus in suis regnet fidelibus.*

Regnat autem in nobis Christus Dominus per virtutes intimas, fidem, spem, caritatem; quibus virtutibus regni quodam modo partes efficimur, et Deo peculiari quadam ratione subiecti, ad eius cultum ac venerationem consecramur, ut, quemadmodum dixit Apostolus<sup>2)</sup>: „Vivo autem iam non ego; vivit vero in me Christus:“ ita nobis dicere liceat: Regno ego, iam non ego; regnat vero in me Christus. Id autem regnum „iustitia“ dicitur, quia Christi Domini iustitia constitutum est. Ac de hoc regno sic loquitur apud S. Lucam Dominus<sup>3)</sup>: „Regnum Dei intra vos est.“ Nam etsi Iesus Christus per fidem regnat in omnibus, qui gremio ac sinu sanctissimae matris ecclesiae continentur: praecipuo tamen modo regit eos, qui praestanti fide, spe et caritate praediti, se tanquam pura quaesum et viva membra Deo praebuerunt; et in his Dei gratiae regnum esse dicitur.

*X. De regno gloriae Christi Domini nostri.*

Est vero etiam Dei gloriae regnum illud, de quo Christum Dominum apud S. Matthaeum loquentem audimus<sup>4)</sup>: „Venite benedicti Patris mei, possidete paratum vobis regnum a constitutione mundi.“ Quod idem ab eo regnum apud S. Lucam latro, admirabiliter sua scelera recognoscens, expetebat in hunc modum<sup>5)</sup>: „Domine, memento mei, quum veneris in regnum tuum.“ Sanctus etiam Ioannes meminit huius regni<sup>6)</sup>: „Nisi quis renatus fuerit ex aqua et Spiritu sancto, non potest introire in regnum Dei.“ Meminit item Apostolus ad Ephesios<sup>7)</sup>: „Omnis fornicator, aut immundus, aut avarus, (quod est idolorum servitus) non habet hereditatem in regno Christi et Dei.“ Eodem pertinent aliquot similitudines Christi Domini, loquentis de regno coelorum<sup>8)</sup>.

*XI. De regni gloriae et gratiae Christi natura et diversitate.*

Necesse est autem prius ponere regnum gratiae; neque enim fieri potest, ut in ullo regnet Dei gloria, nisi eiusdem gratia in illo regnarit. Est vero gratia ipsius sententia Salvatoris<sup>9)</sup> „fons aquae salientis in vitam aeternam.“ Gloriam autem quid esse dicemus, nisi gratiam quandam perfectam et absolutam? quamdiu enim fragili hoc et mortali corpore ve-

<sup>1)</sup> Rom. 14, 17. <sup>2)</sup> Gal. 2, 20. <sup>3)</sup> Luc. 17, 21. <sup>4)</sup> Mat. 25, 34. <sup>5)</sup> Luc. 23, 42.  
<sup>6)</sup> Io. 3, 5. <sup>7)</sup> Eph. 5, 5. <sup>8)</sup> Mat. 18, 24. sq. 22, 2. <sup>9)</sup> Io. 4, 14.

stiti sumus, dum in hac caeca peregrinatione et exilio vagi et imbecilles absumus a Domino, saepe labimur et cadimus, abiecto regni gratiae adminiculo, quo nitebamur; quum autem regni gloriae, quod perfectum est, lux nobis illuxerit, firmi ac stabiles perpetuo consistemus; omne enim et vitium et incommodeum exhaerietur; omnis infirmitas confirmata robabitur; ipse denique nostra in anima et in corpore regnabit Deus. Quae res uberior in symbolo tractata est, quum de resurrectione carnis ageretur.

*XII. Quid in primis igitur hac petitione Deum oremus.*

His igitur expositis, quae communem regni Dei sententiam declarant, quid sibi haec petitio proprie velit, dicendum est. Petimus autem a Deo, ut regnum Christi, quod est ecclesia, propagetur; ut se ad fidem Christi Domini, et ad accipiendam veri Dei cognitionem convertant infideles et Iudei, et schismatici ac haeretici redeant ad sanitatem, et ad ecclesiae Dei communionem, a qua desciverunt, revertantur; ut compleatur, et ad exitum perducatur, quod Isaiae ore dixit Dominus<sup>1)</sup>: „Dilata locum tentorii tui, et pelles tabernaculorum tuorum extende, ne parcas: longos fac funiculos tuos, et clavos tuos consolida; ad dexteram enim et ad laevam penetrabis, — quia dominabitur tui, qui fecit te.“ Et idem<sup>2)</sup>: „Ambulabunt gentes in lumine tuo, et reges in splendore ortus tui. Leva in circuitu oculos tuos, et vide, omnes isti congregati sunt, venerunt tibi: filii tui de longe venient, et filiae tuae de latere surgent.“

*XIII. Secundo quidnam hic postuletur.*

Verum quia sunt in ecclesia, qui verbis confitentes Deum, factis negantes<sup>3)</sup>, deformatam fidem prae se ferant, in quibus propter peccatum daemon habitat ac dominatur tanquam in propriis domiciliis; petimus etiam, ut ad eos veniat regnum Dei, quo illi, peccatorum discussa caligine, et radiis divinae lucis illustrati, restituantur in filiorum Dei pristinam dignitatem, ut, omnibus e suo regno, coelestis parens, sublatis haereticis atque schismaticis, eiectisque offenditionibus ac scelerum causis<sup>4)</sup>, aream purget ecclesiae, quae, Deo cultum pie sancte que adhibendo, quieta ac tranquilla pace perfruatur.

*XIV. Quid tertio loco eadem petitione quaeramus.*

Petimus denique, ut solus in nobis vivat, solus regnet Deus, ne sit posthac morti locus, sed ut illa absorbeatur in<sup>5)</sup> Victoria

<sup>1)</sup> Is. 54, 2. 3. 5. <sup>2)</sup> Is. 60, 3. 4. <sup>3)</sup> Tit. 1, 16. <sup>4)</sup> Mat. 3, 12. <sup>5)</sup> I. Cor. 15, 54.

Christi Domini nostri, qui, disiecto ac dissipato omni hostium principatu, potestate et virtute suo omnia subiiciat imperio.

*XV. Quae Christianis huius petitionis occasione praecipue agenda et contemplanda offerantur.*

Erit autem curae parochis, ut, quod postulat huius ratio petitionis, fidelem populum doceant, quibus cogitationibus et meditationibus instructus has pie Deo preces facere possit. Ac primum hortabuntur, ut vim ac sententiam intueatur illius similitudinis a Salvatore introductae<sup>1)</sup>: „Simile est regnum coelorum thesauro abscondito in agro; quem qui invenit homo, abscondit, et prae gaudio illius vadit, et vendit universa, quae habet, et emit agrum illum.“ Nam qui noverit Christi Domini divitias, is prae illis omnia contemnet, huic facultates, opes, potentia sordescunt; nihil enim est, quod illi summo pretio comparari, immo vero, quod in conspectu eius stare possit. Quare, quibus id nosse contigerit, exclamabunt illi, ut Apostolus<sup>2)</sup>: „Omnia detrimentum feci, et arbitror ut stercora, ut Christum lucrifaciam.“ Haec est illa insignis Evangelii<sup>3)</sup> margarita, in quam qui pecuniam, ex omnium bonorum venditione redactam, erogarit, is beatitudine fruetur sempiterna.

*XVI. Quam sit desiderabile regnum Christi hic per gratiam, et in futuro per gloriam.*

O nos felices, si tantum luminis nobis praferret Iesus Christus, ut illam videre possemus divinae gratiae margaritam, qua ipse regnat in suis! (nam et nostra omnia, et nos ipsos venumdaremus, ut emptam illam tueremur;) tum enim denique nobis id non dubitanter dicere liceret<sup>4)</sup>: „Quis nos separabit a caritate Christi?“ Praestantem vero regni gloriae excellentiam, si, quae sit, scire volumus: eadem de illa et Prophetae et Apostoli vocem atque sententiam audiamus<sup>5)</sup>: „Oculus non vidit, neque auris audivit, neque in cor hominis ascendit, quae praeparavit Deus iis, qui diligunt illum.“

*XVII. De humilitate, quam in hac petitione et aliis pra nobis ferre debemus.*

Proficiet autem ad impetrandum maxime quod petimus, si, qui simus, ipsi nobiscum reputemus, id est, Adam progenies, iure e paradiso electi et exsules; quorum indignitas ac perversitas summum Dei odium, ac sempiternas poenas postularerit. Quare demisso tum et abiepto animo simus oportet. Nostra etiam erit plena Christianae humilitatis oratio; et omnino nobis ipsi diffidentes, illius more publicani<sup>6)</sup> configiemus in Dei

<sup>1)</sup> Mat. 13, 44. <sup>2)</sup> Phil. 3, 8. <sup>3)</sup> Mat. 13, 46. <sup>4)</sup> Rom. 8, 35. <sup>5)</sup> Is. 64, 4. 1. Cor. 2, 9. <sup>6)</sup> Luc. 18, 13.

misericordiam, totumque eius benignitati tribuentes, ipsi gratias agemus immortales, qui nobis suum Spiritum sit elargitus, quo freti clamare audeamus<sup>1)</sup>: „Abba, Pater.“

*XVIII. Quanto studio nobis incumbendum sit, ut tandem coelorum regno potiamur.*

Suscipiemus etiam illam curam et cogitationem, quid agendum, quid contra vitandum sit, ut ad coeleste regnum pervenire possimus; non enim a Deo ad otium et ad inertiam vocati sumus, quin immo inquit<sup>2)</sup>: „Regnum coelorum vim patitur, et violenti rapiunt illud,“ et<sup>3)</sup>: „Si vis ad vitam ingredi, serva mandata.“ Itaque non est satis petere regnum Dei, nisi suum ipsi etiam studium et operam adhibeant homines; nam<sup>4)</sup> adiutores sint oportet, et administrari Dei gratiae, in eo tenendo cursu, quo pervenitur in coelum. Nunquam nos deserit Deus, qui nobiscum se futurum perpetuo pollicitus est; unum ut nobis videndum sit, ne Deum et nos ipsos deseramus. Ac Dei quidem sunt in hoc ecclesiae regno omnia, quibus et vitam tuetur hominum, et salutem perficit sempiternam, et quae sub aspectum non cadunt, angelorum copiae, et plenissimum virtutis coelestis visibile hoc munus sacramentorum. In his tantum nobis praesidii est divinitus constitutum, ut non modo ab acerrimorum hostium regno tuti esse, sed ipsum etiam tyrannum eiusque nefarios satellites prosternere et conculcare possimus.

*XIX. Conclusio huius petitionis, et brevis illius alia expositio.*

Quare vehementer ad extremum petamus a Dei Spiritu, nos ut omnia iubeat e sua voluntate facere; satanae ut tollat imperium; nullam ut in nobis summo illo die potestatem habeat; ut vincat et triumphet Christus; ut vigeant eius leges toto orbe terrarum; ut decreta serventur; nullus ut proditor aut desertor eius sit; sed tales se praebeant omnes, ut in regis Dei conspectum non dubitanter veniant, et constitutam illis ex omni aeternitate<sup>5)</sup> possessionem adeant regni coelestis, ubi beati cum Christo sempiterno aevo fruantur.

---

<sup>1)</sup> Rom. 8, 15. <sup>2)</sup> Mat. 11, 12. <sup>3)</sup> ib. 19, 17. <sup>4)</sup> I. Cor. 3, 9. <sup>5)</sup> Mat. 25, 34.

## C A P U T XII.

## De tertia Petitione.

Fiat voluntas tua.

*I. Quare postulato Dei regno, statim subiiciatur, ut eiusdem voluntas fiat.*

Cum a Christo Domino dictum sit<sup>1)</sup>: „Non omnis, qui dicit mihi, Domine, Domine, intrabit in regnum coelorum; sed qui facit voluntatem Patris mei, qui in coelis est, ipse intrabit in regnum coelorum;“ quicumque in illud coeleste regnum pervenire cupiunt, id a Deo petere debent, ut fiat voluntas eius. Quamobrem hoc loco posita haec petitio est, statim post regni coelestis postulationem.

*II. Qua methodo ad veram huius petitionis intelligentiam perveniendum sit.*

Ut autem intelligent fideles, quam necessarium id nobis sit, quod hac prece postulamus, quantamque vim salutarium munerum ex eius impetracione consequamur: demonstrabunt parochi, quibus miseriis et aerumnis oppressum fuerit hominum genus, propter peccatum primi parentis.

*III. Quae mala praevaricatio primi parentis in humanum genus iniecerit.*

Nam a principio Deus proprii boni appetitionem creatis rebus ingeneravit, ut naturali quadam propensione suum quaererent, et expeterent finem, a quo illae nunquam, nisi obiecto extrinsecus impedimento, declinant. Haec autem initio fuit in homine expetendi Deum, suae beatitudinis auctorem parentemque, eo praeclarior et praestantior vis, quod is compos esset rationis atque consilii. Sed hunc amorem sibi naturaliter ingenitum quum reliquae naturae rationis expertes conservassent, quae ut initio procreatae fuerunt natura bonae, sic in eo statu et conditione manserunt, hodieque manent: miserum hominum genus cursum non tenuit; non enim solum bona iustitiae originalis amisit, quibus a Deo supra naturae sua facultatem auctum ornatumque fuerat, sed etiam insitum in animo praecipuum virtutis studium obscuravit<sup>2)</sup>: „Omnis,“ inquit, „declinaverunt, simul inutiles facti sunt; non est, qui faciat bonum, non est usque ad unum.“ Nam<sup>3)</sup> „sensus et cogitatio humani cordis in malum prona sunt ab adolescentia sua;“ ut inde facile intelligi possit, neminem per se salutiter sapere, sed omnes ad malum esse propensos<sup>4)</sup>, innumerater

<sup>1)</sup> Mat. 7, 11. <sup>2)</sup> Ps. 52, 4. <sup>3)</sup> Gen. 2, 21. <sup>4)</sup> Rom. 7, 19 sq.

bilesque esse hominum pravas cupiditates, dum proclives sunt, et flagranti studio feruntur ad iram, ad odium, ad superbiam, ad ambitionem, ad omne fere malorum genus.

*IV. Homo etsi multis miseriis obrutus sit, suum tamen statum ignorat.*

Quibus in malis quanquam assidue versemur, tamen, quae summa est nostri generis miseria, permulta ex illis sunt, quae nobis minime mala videantur; quae res insignem arguit hominum calamitatem, qui, cupiditatibus ac libidinibus obcaecati, non videant, quae salutaria opinantur, plerumque esse pestifera; immo vero ad illa perniciosa mala tanquam ad optabile et expetendum bonum rapiantur praecipites; ab iis, quae vere bona sunt et honesta, tanquam a contrariis rebus, abhorreant. Hanc opinionem corruptumque iudicium detestatur Deus illis verbis<sup>1)</sup>: „Vae, qui dicitis malum bonum, et bonum malum, ponentes tenebras lucem, et lucem tenebras, ponentes amarum in dulce, et dulce in amarum.“

*V. Quo modo nostram hanc miseriam sacrae literae nobis sub oculos subiiciant.*

Itaque nostris ut subiiciant oculis nostras miserias, comparant nos divinae literae iis, qui verum gustandi sensum amiserunt; quare fit, ut a salubri victu alieni sint, appetantque contrarium. Cum aegrotis<sup>2)</sup> praeterea nos conferunt; ut enim illi, nisi morbum depulerint, sanorum et integrorum hominum officia ac munera obire non possunt: sic nos actiones, quae Deo gratae sint, suscipere sine divinae gratiae adiumento nequimus.

*VI. In statu naturae corrupto quanta sit ad aliquid boni agendum hominum infirmitas.*

Quod si quaedam sic affecti assequimur, levia illa sunt, et quae ad consequendam coelestem beatitudinem parum vel nihil momenti habent. At Deum, ut par est, amare et colere, quod maius quiddam et altius est, quam ut nos humi strati id humanis viribus assequamur, nunquam poterimus, nisi adminiculo divinae gratiae sublevemur.

*VII. In rebus divinis nos omnino pueris esse persimiles.*

Quanquam aptissima est etiam illa comparatio ad significandam miseram humani generis conditionem, quod similes esse dicimus puerorum, qui suo relicti arbitrio temere moventur ad omnia; pueri, inquam, sumus, et imprudentes, ludicris sermonibus, et inanibus actionibus dediti, si a divino praesidio deseramur. Sic enim nos obiurgat Sapientia<sup>3)</sup>: „Usque-

<sup>1)</sup> Is. 5, 20. <sup>2)</sup> Ps. 6, 3. 106, 12. — Ier. 29, 31. Ez. 18, 2. <sup>3)</sup> Prov. 1, 22.

quo parvuli diligitis infantiam, et stulti ea, quae sibi sunt noxia, cupient?“ Et in hunc modum hortatur Apostolus<sup>1)</sup>: „Nolite pueri effici sensibus.“ Etsi maiori in inanitate et errore versamur, quam illa puerilis aetas, cui tantum abest humana prudentia, ad quam tamen per se tempore potest pervenire, quum ad divinam prudentiam, quae ad salutem necessaria est, nos, nisi Deo auctore et adiutore, adspirare non possimus; nisi enim praesto nobis sit Dei auxilium, reiectis iis, quae vere sunt bona, ad interitum ruimus voluntarium.

*VIII. Quodnam hac petitione tantorum malorum proponatur remedium.*

Ac si quis, discussa divinitus animi caligine, has videat hominum miserias, et sublato stupore sentiat legem membrorum, ac sensus cupiditate spiritui repugnantes recognoscat, omnemque dispiciat naturae nostrae propensionem ad malum: qui poterit non ardentि studio opportunum tanto huic malo, quo naturae vitio premimur, remedium quaerere, salutaremque illam regulam expetere, ad quam Christiani hominis vita dirigenda et conformanda sit? Hoc igitur illud est, quod imploramus, quum ita precamur Deum: „Fiat voluntas tua.“ Quum enim, abiecta obedientia et Dei voluntate neglecta, in has miserias incideremus: unum illud tantorum malorum remedium nobis divinitus propositum est, ut ex Dei voluntate, quam peccando contempsimus, aliquando vivamus, omnesque cogitationes et actiones nostras ea regula metiamur. Quod ut assequi possumus, suppliciter illud a Deo petimus: „Fiat voluntas tua.“

*IX. Etiam a iustificatis, qui iam Deo parent, usurpanda haec precatio est.*

Id vero illis etiam vehementer petendum est, in quorum animis iam regnat Deus, quique iam sunt radiis divini luminis illustrati, cuius gratiae beneficio Dei obtemperent voluntati. Quibus licet ita comparatis, propriae tamen cupiditates adversantur propter proclivitatem ad malum, insitam in hominum sensibus, ut, etiamsi tales simus, magnum tamen hoc loco nobis periculum sit a nobis ipsis, ne abstracti et illecti a „concupiscentiis, quae<sup>2)</sup> militant in membris nostris,“ iterum de salutis via deflectamus. De quo periculo nos Christus Dominus admonuit illis verbis<sup>3)</sup>: „Vigilate et orate, ut non intretis in tentationem; spiritus quidem promptus est, caro autem infirma.“

<sup>1)</sup> I. Cor. 14, 20. <sup>2)</sup> Iac. 1, 14. 4, 1. <sup>3)</sup> Mat. 26, 41.

**X. In iustificatis adhuc viget concupiscentia, quam quidem nemo penitus potest extingui.**

Non enim est in hominis potestate, ne in eius quidem, qui per Dei gratiam est iustificatus, ita domitos habere carnis affectus, ut nunquam illi postea excitentur, quippe quum eorum, qui iustificati sunt, mentem sanet Dei gratia, non etiam carnem, de qua illud scripsit Apostolus: „Scio, enim, quia non habitat in me, hoc est, in carne mea, bonum.“ (Rom. 7, 18.) Nam ut semel prius homo iustitiam originalem, quo tanquam freno quodam cupiditates regebantur, amisit: minime eas postea ratio ita continere potuit in officio, ut ea non appeterent, quae etiam rationi repugnant. Itaque in ea hominis parte peccatum, id est peccati fomitem, habitare scribit Apostolus, ut intelligamus, eum non ad tempus quasi hospitem diversari apud nos, sed quamdiu vivimus, tanquam incolam nostri corporis in domicilio membrorum haerere perpetuo. Ergo domesticis et intestinis hostibus assidue oppugnati, facile intelligimus, confugiendum esse ad Dei auxilium, petendumque, ut fiat in nobis voluntas eius. Iam vero faciendum est, ut sciant fideles, quae sit huius petitionis vis.

**XI. Quomodo voluntas Dei in hac petitione accipiatur.**

Quo loco multis omissis, quae a doctoribus scholasticis de Dei voluntate utiliter et copiose disputantur, voluntatem hic accipi dicimus pro ea, quam „signi“ appellare solent, hoc est, pro eo, quod Deus a nobis fieri aut caveri iusserit aut monuerit. Quare voluntatis nomine hoc loco comprehensa sunt universa, quae nobis ad coelestem beatitudinem comparandam proponuntur, sive illa ad fidem, sive ad mores pertineant; omnia denique, quaecunque nos Christus Dominus per se vel per ecclesiam suam facere aut imperarit, aut prohibuerit. De qua voluntate ita scribit Apostolus: „Nolite fieri imprudentes, sed intelligentes, quae sit voluntas Dei bona, beneplacens et perfecta.“ (Eph. 5, 17.)

**XII. Quam includat tertia petitio sententiam.**

Cum igitur illud precamur: „Fiat voluntas tua:“ petimus in primis nobis, ut Pater coelestis facultatem concedat obtemperandi divinis iussis, et inserviendi ei in sanctitate et iustitia omnibus diebus nostris; ut ad nutum et voluntatem eius omnia faciamus; ut ea colamus officia, de quibus in sacris literis admonemur; ut ipso duce et auctore reliqua omnia praestemus, quae eos decent, qui non ex voluntate carnis, sed ex Deo nati sunt, exemplum Christi Domini secuti, „qui (Phil. 2, 8.) factus est obediens usque ad mortem, mortem autem crucis,“

ut parati simus omnia perpeti potius, quam vel minimum ab eius voluntate discedere.

*XIII. Quibus potissimum datum sit, eorum, quae hic petuntur, studio et amore ardentissime flagrare.*

Nec vero quisquam est, qui huius studio et amore petitionis flagret ardentius, quam is, cui concessum sit, ut summa eorum dignitatem intueatur, qui Deo obediunt. Idem enim illud verissime dici intelligit, servire Deo, et illi obediare, regnare esse. „Quicunque,“ inquit Dominus<sup>1)</sup>, „fecerit voluntatem Patris mei, qui in coelis est, ipse meus frater, et soror, et mater est;“ hoc est, cum illo sum omnibus amoris et benevolentiae vinculis coniunctissimus. Nemo fere est ex viris sanctis, quin praecipuum huius petitionis munus vehementer a Deo postularit, ac praeclara quidem omnes, sed varia persaepe oratione usi sunt; in quibus mirificum et suavissimum Davidem videmus illud varie postulantem. Modo enim inquit<sup>2)</sup>: „Utinam dirigantur viae meae ad custodiendas iustificationes tuas.“ Interdum<sup>3)</sup>: „Deduc me in semitam mandatorum tuorum.“ Nonnunquam<sup>4)</sup>: „Gressus meos dirige secundum eloquium tuum, et non dominetur mei omnis iniustitia.“ Huc pertinent illa<sup>5)</sup>: „Da mihi intellectum, ut discam mandata tua. Iudicia tua doce me. Da mihi intellectum, ut sciam testimonia tua.“ Saepe aliis verbis eandem tractat versatque sententiam. Qui loci diligenter animadvertisi sunt, et fidelibus explicandi, ut, quanta sit in prima huius petitionis parte vis et copia salutarium rerum, omnes intelligent.

*XIV. Quid praeterea hac petitione significemus.*

Secundo loco, quum illud precamur: „Fiat voluntas tua,“ detestamur opera carnis, de quibus scribit Apostolus<sup>6)</sup>: „Manifesta sunt autem opera carnis; quae sunt fornicatio, immunditia, impudicitia, luxuria, idolorum servitus, beneficia, inimicitiae, contentiones, aemulationes, irae, rixae, dissensiones, sectae, invidia, homicidia, ebrietates, commissationes“ etc.; et<sup>7)</sup>: „si secundum carnem vixeritis, moriemini.“ Petimusque, ne sinat Deus ea nos perficere, quae sensus, quae cupiditas, quae imbecillitas nostra suaserit, sed ut nostram voluntatem sua voluntate moderetur. Alieni sunt ab hac voluntate voluptarii homines, qui in terrenarum rerum cura et cogitatione defixi sunt. Feruntur enim libidine praecipites ad potiendum, quod concupierunt, et in illo fructu pravae cupiditatis felicitatem ponunt, ut beatum

<sup>1)</sup> Mat. 12, 50. <sup>2)</sup> Ps. 118, 5. <sup>3)</sup> ib. v. 35. <sup>4)</sup> v. 183. <sup>5)</sup> v. 73. 108. 125. <sup>6)</sup> Gal. 5, 19. <sup>7)</sup> Rom. 8, 13

etiam esse dicant, qui quodcumque optarit consequatur. Nos contra petimus a Deo, ut ait Apostolus<sup>1)</sup>, „ne carnis curam faciamus in desideriis,“ sed ut fiat voluntas eius.

*XV. Melius est, id optare fieri, quod Deus vult, quam id, quod cupimus.*

Etsi non facile adducimur, ut precemur Deum, ut cupiditatibus nostris non satisfaciat; habet enim difficultatem haec animi inductio, quod ipsi quodammodo, id petentes, nos videmur odisse, quod etiam stultitiae tribuunt ii, qui toti haerent in corpore. Sed nos stultitiae famam subeamus libenter Christi causa, cuius est illa sententia<sup>2)</sup>: „Si quis vult post me venire, abneget semetipsum;“ praesertim quum sciamus, multo praestare, id optare, quod rectum iustumque sit, quam id assequi, quod a ratione, a virtute, a Dei legibus sit alienum. Et certe deteriore loco is est, quicunque ad id pervenit, quod temere ac libidinis impulsu cupiebat, quam qui, optime quod optavit, non assequitur.

*XVI. Etiam ea, quae pietatis speciem non habent, a Deo petenda non sunt.*

Quanquam non id modo petimus, ne concedatur nobis a Deo, quod ipsi nostra sponte cupimus, quum studium nostrum depravatum esse constat: sed ne id etiam detur, quod suatore et impulsore daemone, simulato lucis angelo, tanquam bonum interdum postulamus. Rectissimum illud principis Apostolorum<sup>3)</sup> studium videbatur, pietatisque plenissimum, quum Dominum a consilio proficisciendi ad mortem avocare conabantur: et tamen eum, quia humanis sensibus, non divina ratione ducebatur, Dominus acriter obiurgavit. Quid amantius in Dominum videbatur eo postulari potuisse, quod sancti viri, Iacobus<sup>4)</sup> et Ioannes, illis irati Samaritanis, qui magistrum hospitio accipere noluissent, ab eo petierunt, ut iuberet ignem e coelo descendere, qui duros illos et inhumanos absumeret? At a Christo Domino reprehensi sunt illis verbis<sup>5)</sup>: „Nescitis, cuius spiritus estis: Filius enim hominis non venit animas perdere, sed salvare.“

*XVII. Quum, quae cupimus, ad naturae conservationem spectant, ea maxime, ut fiant, si Deus velit, petendum est.*

Neque vero solum, quum quod cupimus malum est, aut mali speciem habet, Deum precari debemus, ut fiat voluntas eius: sed etiam, quum revera malum non est, veluti quum voluntas sequitur primam illam naturae inclinationem, ut appetat ea, quae naturam conservant, et reiiciat, quae ei con-

<sup>1)</sup> Rom. 13, 14. <sup>2)</sup> Mat. 16, 14. <sup>3)</sup> Mat. 16, 22. sq. <sup>4)</sup> Luc. 9, 54. <sup>5)</sup> ib. 55. 56.

traria videantur. Quocirca, cum in eum locum ventum est, ut aliquid petere velimus huius generis, tum vero dicamus ex animo, „Fiat voluntas tua;“ imitemur illum ipsum, a quo salutem et salutis disciplinam accepimus; qui, quum naturaliter insito cruciatum et acerbissimae mortis timore commoveretur, tamen in illo horrore summi doloris suam ad Dei Patris retulit voluntatem (Luc. 22, 42): „Non mea,“ inquit, „voluntas, sed tua fiat.“

*XVIII. Quum citra Dei auxilium peccatum vitare non possimus, id etiam hac petitione postulamus.*

Sed mirabiliter depravatum est hominum genus, qui, quum vim etiam suae attulerint cupiditati, eamque divinae voluntati subiecerint, tamen sine Dei auxilio, quo et a malo protegimur et ad bonum dirigimur, peccata vitare non possunt. Ergo confugiendum est ad hanc precationem, et petendum a Deo, ut in nobis ipse instituta perficiat; ut exsultantes cupiditatis motus comprimat, ut appetitus rationi obedientes efficiat; ut nos denique totos ad suam conformet voluntatem. Precamur etiam, ut Dei voluntatis cognitionem totus orbis terrarum accipiat, quo divinum mysterium, absconditum a saeculis et generationibus, notum ac pervulgatum sit apud omnes.

Sicut in coelo, et in terra.

*XIX. Quid sibi ista clausula velit.*

Formam praeterea et praescriptionem huius obedientiae postulamus; ut videlicet ad eam regulam dirigatur, quam in coelo et servant beati angeli, et colit reliquus coelestium animalium chorus; ut, quemadmodum illi sponte et summa cum voluptate obediunt divino numini, sic nos Dei voluntati, quo modo ipse maxime vult, libentissime pareamus.

*XX. Deo non pretii alicuius causa, sed amore ipsius parentum est.*

Et vero in opera et studio, quod Deo navamus, summum a nobis amorem Deus, et eximiam caritatem requirit, ut, etiamsi spe coelestium praemiorum totos nos ei dicaverimus, tamen ideo illa speremus, quod, ut in eam spem ingredemur, placuit divinae maiestati. Quare tota nitatur illo in Deum amore nostra spes, qui mercedem amori nostro proposuit aeternam beatitudinem. Sunt enim, qui amanter alicui serviant, sed tamen pretii causa, quo amorem referunt. Sunt praeterea, qui tantummodo caritate et pietate commoti, in eo, cui dant operam, nihil spectant, nisi illius bonitatem atque virtutem; cuius cogitatione et admiratione se beatos arbitrantur, quod ei suum officium praestare possint.

*XXI. Aliae item eius clausulae expositiones.*

Et hanc habet sententiam illa apposito: „Sicut in coelo, et in terra.“ Maxime enim nobis entendum est, ut Deo simus obedientes, quemadmodum beatas mentes esse diximus, quarum laudes, in illo summae obedientiae munere obeundo, eo psalmo persequitur David<sup>1)</sup>: „Benedicite Domino omnes virtutes eius; ministri eius, qui facitis voluntatem eius.“ Quod si quis sanctum Cyprianum<sup>2)</sup> secutus, sic illa interpretatur, ut dicat: „In coelo,“ in bonis et piis, „in terra,“ in malis et impiis: nos vero etiam eius sententiam comprobamus, ut pro „coelo“ spiritus, pro „terra“ caro intelligatur, ut et omnes et omnia in omnibus Dei voluntati obedient.

*XXII. Quo modo etiam gratiarum actionem contineat haec petitio.*

Gratiarum item actionem continet haec petitio. Veneramur enim eius sanctissimam voluntatem, et maximo perfusi gaudio summis laudibus et gratulationibus omnia eius opera celebramus, qui certo sciamus, eum omnia bene fecisse. Quum enim constet, esse omnipotentem Deum, necessario sequitur, ut omnia eius nutu facta esse intelligamus. Quum vero etiam ipsum, sicuti est, summum bonum esse affirmemus: nihil ex eius operibus non esse bonum, quum omnibus ipse suam impertiverit bonitatem, confitemur. Quod si in omnibus divinam rationem non assequimur, in omnibus tamen, et ambigui causa neglecta, et reiecta omni haesitatione, illud Apostoli profitemur: „investigabiles<sup>3)</sup>“ esse vias eius. Sed ob id maxime etiam Dei voluntatem colimus, quod ab eo coelesti lumine dignati sumus. Erectos enim „de potestate tenebrarum, translit in regnum Filii dilectionis<sup>4)</sup> suae.“

*XXIII. Quid ex hac petitione ad contemplationem referendum sit.*

Sed ut extremo loco id explicetur, quod ad meditationem pertinet huius petitionis: redeundum est ad id, quod initio attigimus, debere fidelem populum in huius pronunciatione petitionis esse demisso et humili animo, reputantem secum eam, quae in natura est insita, cupiditatum vim divinae voluntati repugnantem; cogitantem, se in eo officio vinci a naturis omnibus, de quibus ita scriptum est<sup>5)</sup>: „Omnia serviunt tibi,“ maximeque imbecillem esse, qui nullum opus Deo gratum non modo non perficere, sed ne instituere quidem possit, nisi Dei adiumento sublevetur. Quoniam vero nihil magnificentius est, nihil praestantius, quam, ut diximus, Deo servire, et vitam ex eius lege ac praeceptis agere: quid optabilius esse potest ho-

<sup>1)</sup> Ps. 102, 21. <sup>2)</sup> in Orat. dom. <sup>3)</sup> Rom. 11, 33. <sup>4)</sup> Col. 1, 13. <sup>5)</sup> Ps. 118, 91.

mini Christiano, quam ambulare in viis Domini, quam nihil agitare animo, nihil actione suscipere, quod a divina voluntate abhorreat? Ut vero exercitationem capiat, et illud institutum teneat diligenter, petat ex divinis libris exempla eorum, quibus, quem illi consiliorum suorum rationem non retulissent ad Dei voluntatem, omnia male ceciderunt.

*XXIV. Quantum commodi ad vitam tranquille agendam ex huius petitionis meditatione consequi possimus.*

Moneantur postremo fideles, ut in simplici et absoluta Dei voluntate acquiescant; ferat aequo animo conditionem suam, qui sibi inferiori loco videtur esse, quam eius dignitas postulet, ne deserat ordinem suum, sed in ea<sup>1)</sup> vocatione maneat, in qua vocatus est, et proprium iudicium subiiciat Dei voluntati, qui nobis melius consultit, quam ipsi optare possumus. Si angustia rei familiaris, si corporis valetudine, si persecutionibus, si aliis molestiis et angoribus premimur: certo statuendum est, nihil horum sine Dei voluntate, quae summa omnium ratio est, nobis accidere posse; ideoque non debere nos gravius commoveri, sed invicto animo ferre, semper illud in ore habentes<sup>2)</sup>: „Domini voluntas fiat,“ et illud beati Iob<sup>3)</sup>: „Sicut Domino placuit, ita factum est: sit nomen Domini benedictum.“

## CAPUT XIII.

### De quarta Petitione.

Panem nostrum quotidianum da nobis hodie.

*I. Quaenam in hac oratione Dominica ratio ordinis servata sit.*

Quarta petitio, et reliquae deinceps, quibus animae et corporis subsidia proprie ac nominativum postulamus, ad superiores petitiones referuntur.. Habet enim hunc ordinem ac rationem precatio dominica, ut postulationem rerum divinarum consequatur earum petitio, quae ad corpus, et ad hanc vitam tuendam pertinent. Nam ut ad Deum tamquam ad ultimum finem referuntur homines: sic humanae vitae bona ad divina eadem ratione diriguntur.

*II. Cur humanae vitae bona a Deo licite optentur et petantur.*

Quae quidem ideo optanda ac petenda sunt, vel quod ita divinus ordo postulat, vel quod illis adiumentis ad divinorum

<sup>1)</sup> 1. Cor. 7, 20. Eph. 4, 1. <sup>2)</sup> Act. 21, 14. <sup>3)</sup> Iob 1, 21.

bonorum adeptionem indigemus, ut iis adminiculis propositum finem consequamur, qui regno et gloria coelestis Patris, atque iis praeceptis colendis servandisque continetur, quae Dei voluntatis esse non ignoramus. Quare omnem vim et rationem huius petitionis ad Deum eiusque gloriam referre debemus.

*III. Quo fine et modo temporalia bona sint postulanda.*

Praestabunt igitur suum officium fidelibus auditoribus, ut intelligent, in iis petendis, quae ad usum ac fructum pertinent rerum terrenarum, esse intendendum animum ac studium nostrum ad Dei praescriptionem, nec inde ulla ex parte declinandum. Nam in eo, quod scribit Apostolus<sup>1)</sup>: „Quid oremus, sicut oportet, nescimus,“ maxime peccatur his postulationibus terrenarum et caducarum rerum. Ergo petenda sunt bona haec, ut oportet, ne perperam aliquid postulantes, responsum illud a Deo feramus<sup>2)</sup>: „Nescitis, quid petatis.“ Erit autem certa iudicandi nota, quae prava sit, quaeve recte petitio, consilium et propositum postulantis. Nam si quis terrena petit eo animo, ut illa omnino bona existimet, et in illis tamquam in optato fine conquiescens, nihil praeterea requirat; sine dubio non orat, sicut oportet. „Non enim,“ inquit S. Augustinus<sup>3)</sup>, „petimus temporalia haec tanquam bona nostra, sed tanquam necessaria nostra.“ Apostolus, etiam in epistola ad Corinthios docet, omnia, quae spectant ad usus vitae necessarios, ad Dei gloriam referri oportere. „Sive ergo manducatis,“ inquit<sup>4)</sup>, „sive bibitis, sive aliud quid facitis; omnia in gloriam Dei facite.“

*IV. Quot quantisque commoditatibus in statu innocentiae homo sit potitus.*

Sed ut videant fideles, quantam habeat haec petitio necessitatem: commemorabunt parochi, quanta ad victum, et ad vitam colendam indigentia sit externarum rerum; quod magis intelligent, si comparatio fiat eorum, quae primo illi parenti nostri generis, et reliquis deinceps hominibus fuerunt ad vivendum necessaria. Nam etsi ille in amplissimo innocentiae statu, unde et ipse, et eius culpa omnis posteritas corruit, necesse habuisset adhibere cibum ad reficiendas vires: tamen inter illius et nostrae vitae necessitates multum interest. Non enim ei vestibus ad tegumentum corporis opus fuisset, non tecto ad perfugium, non armis ad defensionem, non remediis ad valetudinem, non aliis multis, quorum subsidio nos ad hanc naturae

<sup>1)</sup> Rom. 8, 26. <sup>2)</sup> Mat. 20, 22. <sup>3)</sup> lib. 2. de serm. Dom. in monte, c. 16.  
<sup>4)</sup> L Cor. 10, 31.

imbecillitatem ac fragilitatem tueñdam egemus. Satis ei fuisset ad immortalem vitam ille fructus, quem felicissima vitae arbor nullo eius aut posterorum labore praebuisset. Neque vero futurus erat homo in tantis paradisi deliciis otiosus, quem ad agendum Deus in eo voluptatis domicilio collocarat: verum nulla ei opera molesta, nullum officii munus non iucundum fuisset. Tulisset ille perpetuo suavissimos fructus, ex cultura felicium hortorum, nec eum unquam opera aut spes fecellisset.

*V. Quanta mala Adae praevericationem sint secuta.*

At posteriorum proles non solum fructu privata vitalis arboris, verum etiam horribili illa sententia condemnata est: *Maledicta<sup>1)</sup> terra in opere tuo; in laboribus comedes ex ea cunctis diebus vitae tuae; spinas et tribulos germinabit tibi, et comedes herbas terrae; in sudore vultus tui vesceris pane tuo, donec revertaris in terram de qua sumptus es: quia pulvis es, et in pulverem reverteris.<sup>2)</sup>* Nobis igitur contra evenierunt omnia, atque illi et posteris contigissent, si Dei dicto audiens fuisset Adam. Itaque versa sunt omnia, et mutata in deterrimam partem. In quo illud gravissimum est, quod maximos sumptus, summum laborem ac sudorem saepissime nullus fructus consequitur, quum fruges datae in deteriorem se getem, vel succrescenti agrestium herbarum asperitate opprimuntur, vel nimbis, vento, grandine, uredine, rubigine perculsa et prostratae intereunt, ut omnis anni labor exiguo tempore aliqua coeli vel terrae calamitate recidat ad nihilum. Quod accidit immanitate nostrorum scelerum, a quibus aversus Deus, nostris minime benedicit operibus; sed horrenda manet sententia, quam de nobis initio pronunciavit: „In sudore vultus tui vesceris pane tuo.“<sup>3)</sup>

*VI. Homines, ut succurrant suis necessitatibus, laborare tenentur, qui tamen, nisi Deus faveat, frustra laborant.*

Ergo pastores in huius loci tractationem incumbent, ut sciatis fidelis populus, sua culpa homines in has angustias et miserias incidere; ut intelligat desudandum quidem et elaborandum esse in parandis iis, quae ad vivendum sunt necessaria; verumtamen, nisi laboribus nostris benedixerit Deus, fallacem spem, et inanem fore omnem contentionem. Nam<sup>4)</sup> „neque qui plantat, est aliquid, neque qui rigat; sed qui incrementum dat, Deus;“ et<sup>4)</sup>: „Nisi Dominus aedificaverit dominum, in vanum laboraverunt, qui aedificant eam.“

<sup>1)</sup> Gen. 3, 17. 19. <sup>2)</sup> Gen. 3, 19. <sup>3)</sup> I. Cor. 3, 7. <sup>4)</sup> Ps. 126, 1.

*VII. Deus rogandus, ut ea, quibus indigemus, suppeditet; quod prolixe facit.*

Docebunt igitur parochi, esse res pene innumerabiles, quae si nobis desint, vel vitam amittimus, vel agimus insuavem. Hac enim cognita rerum necessitate naturaeque imbecillitate Christianus populus coelestem Patrem adire cogetur, et ab eo terrena et coelestia bona suppliciter petere. Imitabitur prodigum illum filium<sup>1)</sup> , qui, quum in regione longinqua coepisset egere, nec esset, cum esuriret, qui ei siliquas daret, aliquando ad se rediens, intellectus, malorum, quibus premebatur, nusquam, nisi a patre esse expetendum remedium. Quo loco accedet etiam fidentius ad orandum fidelis populus, si in cogitatione divinae benignitatis recordabitur, paternas aures perpetuo patere filiorum vocibus. Nam dum hortatur nos, ut panem petamus, ea se recte potentibus abunde largitur, pollicetur. Docendo enim, quo modo petamus, hortatur, hortando impellit, impellendo spondet, spondendo nos in spem certissimae impetrationis inducit.

*VIII. Quid panis nomine intelligatur, quaeque huius petitionis sit sententia.*

Excitat igitur et inflammatis animis fidelis populi, sequitur, ut, quid hac petitione postuletur, declarandum sit: primum, quid sit ille panis, quem petimus. Sciendum igitur est, in divinis literis hoc „panis“ nomine<sup>2)</sup> multa quidem significari, sed illa duo praecipue: primum, quidquid in virtu ceterisque rebus ad corpus vitamque tuendam adhibemus; deinde, quidquid nobis ad spiritus et animae vitam ac salutem Dei munere tributum est. Petimus autem hoc loco huius, quam in terris agimus, vitae subsidia, sanctorum Patrum ita sentientium auctoritate.

*IX. Temporalia a Deo beneficia peti posse, demonstratur.*

Quam ob rem minime sunt audiendi, qui dicunt, non licere Christianis hominibus a Deo petere terrena huius vitae bona. Nam huic adversantur errori praeter consentientem Patrum sententiam, exempla permulta tum veteris, tum novi Testamenti. Iacob enim vovens sic orabat<sup>3)</sup>: „Si fuerit Deus mecum, et custodierit me in via, per quam ego ambulo, et dederit mihi panem ad vescendum, et vestimentum ad induendum, reversusque fuero prospere ad domum patris mei: erit mihi Dominus in Deum, et lapis iste, quem erexi in titulum, vocabitur domus Dei, cunctorumque, quae dederis

<sup>1)</sup> Luc. 15, 16. Mat. 7, 9. <sup>2)</sup> Eclus. 15, 3. Luc. 14, 15. <sup>3)</sup> Gen. 28, 20.

mihi, decimas offeram tibi.“ Salomon etiam certum petebat huius vitae subsidium, cum illud precabatur<sup>1)</sup>: Mendicitatem et divitias ne dederis mihi; tribue tantum victui meo necessaria.“ Quid, quod Salvator humani generis illa iubet petere, quae nemo negare audeat ad corporis usum pertinere: „Orate,“ inquit<sup>2)</sup>, „ut non fiat fuga vestra in hieme vel sabbato.“ Quid dicemus de sancto Iacobo<sup>3)</sup>, cuius illa sunt: „Tristatur aliquis vestrum? oret; aequo animo est? psallat.“ Quid de Apostolo, qui sic cum Romanis agebat<sup>4)</sup>: „Obsecro vos fratres per Dominum nostrum Iesum Christum, et per caritatem sancti Spiritus, ut adiuvetis me in orationibus pro me ad Deum, ut liberer ab infidelibus, qui sunt in Iudea.“ Quare quum et divinitus concessum sit fidelibus, ut petant haec subsidia rerum humanarum, et perfecta haec a Christo Domino tradita sit orandi formula: ne illud quidem dubium relinquatur, unam ex septem hanc esse petitionem.

*X. Panis nomine quid hic ad corporis necessitatem pertinens intelligatur.*

Petimus praeterea panem quotidianum, id est victui necessaria, ut panis nomine, quod satis sit et vestium ad tegendum, et cibi ad vescendum, sive panis is sit, sive caro, sive piscis, sive quocumque aliud, intelligamus. Videmus enim usum esse hoc loquendi modo Elisaeum<sup>5)</sup>, quum regem moneret, ut praeberet panem militibus Assyriis; quibus magna ciborum copia data est. Illud etiam de Christo Domino scriptum scimus<sup>6)</sup>: Ingressus est „in domum cuiusdam principis Pharisacorum sabbato manducare panem;“ qua voce, quae ad cibum, quaeque ad potum pertinent, significari videmus. Ad huius petitionis absolutam significationem praeterea animadvertisendum est, hoc panis vocabulo non abundantem et exquisitam ciborum ac vestium copiam, sed necessariam et simplicem intelligi debere; quemadmodum Apostolus<sup>7)</sup> scripsit: „Habentes alimenta, et quibus tegamur, his contenti sumus;“ et Salomon<sup>8)</sup>, ut diximus: „Tribue tantum victui meo necessaria.“

*XI. Cur non simpliciter panem, sed panem „nostrum“ hic petamus.*

Huius quoque frugalitatis et parsimoniae illa voce, quae proxime sequitur, admonemur; quum enim „nostrum“ dicimus, panem illum ad necessitatem nostram, non ad luxuriam petimus; non enim nostrum dicimus, quia eum nobis opera nostra sine Deo parare possimus, (est enim apud Davidem<sup>9)</sup>:

<sup>1)</sup> Prov. 30, 8. <sup>2)</sup> Mat. 24, 20. <sup>3)</sup> Iac. 5, 13. <sup>4)</sup> Rom. 15, 30. <sup>5)</sup> IV. Reg. 6, 22, 23. <sup>6)</sup> Luc. 14, 1. <sup>7)</sup> I. Tim. 6, 8. <sup>8)</sup> Prov. 30, 8. <sup>9)</sup> Ps. 103, 27.

„Omnia a te exspectant, ut des illis escam in tempore, dante illis colligent; aperiente te manum tuam, omnia implebuntur bonitate,“ et alio loco<sup>1</sup>): „Oculi omnium in te sperant, Domine, et tu das escam illorum in tempore opportuno“; sed quia necessarius est, et a parente omnium Deo, qui omnes sua providentia alit animantes, nobis attributus.

*XII. Labore nostro parandus est nobis panis, quem esse volumus, si nostrum panem postulamus.*

Ob eam quoque causam panis noster appellatur, quod iure est a nobis acquirendus, non iniuria, fraude, aut furto parandus; quae enim nobis malis artibus conciliamus, non nostra sunt, sed aliena, saepiusque illorum calamitosa est vel adeptio, vel possessio, vel certe iactura. Contra vero honestis ac laboriosis piorum hominum lucris ex Prophetae sententia tranquillitas inest, et magna felicitas. „Labores,“ enim inquit<sup>2</sup>), „manuum tuarum, quia manducabis; beatus es, et bene tibi erit.“ Iam vero iis, qui iusto labore victimum quaerunt, fructum suae benignitatis eo loco pollicetur Deus<sup>3</sup>): „Emittet Dominus benedictionem super cellaria tua, et super omnia opera manuum tuarum, benedicetque tibi.“ Neque solum petimus a Deo nobis, ut illo uti liceat, quod nostro sudore ac virtute peperimus eius adiumento benignitatis, id enim vere dicitur nostrum: sed etiam bonam mentem postulamus, ut recte partis recte item ac prudenter uti possimus.

Quotidianum.

*XIII. Quare et haec particula „quotidianum“ adiiciatur.*

Huic etiam voci subiecta est ea notio frugalitatis ac parsimoniae, quam proxime diximus. Non enim multiplicem aut delicatum cibum postulamus, sed eum, qui naturae necessitatibus satisfaciat, ut eos pudeat hoc loco, qui fastidio communis cibi et potionis, conquisitissima escarum ac vinorum genera persequuntur. Nec minus hac „quotidianum“ voce improbantur ii, quibus horrendas illas minas proponit Isaías<sup>4</sup>): „Vae, qui coniungitis domum ad domum, et agrum agro copulatis usque ad terminum loci; numquid habitatis vos soli in medio terrae?“ Etenim est inexplibilis horum hominum cupiditas, de quibus illud scriptum est a Salomone<sup>5</sup>): „Avarus non implebitur pecunia;“ ad quos dictum etiam illud pertinet Apostoli<sup>6</sup>): „Qui volunt divites fieri, incident in tentationem, et laqueum diaboli.“ Quotidianum praeterea panem appellamus, quod vescimur eo

<sup>1)</sup> Ps. 144, 15. <sup>2)</sup> Ps. 127, 2. <sup>3)</sup> Deut. 28, 8. <sup>4)</sup> Is. 5, 8. <sup>5)</sup> Eccl. 5, 9.  
<sup>6)</sup> I. Tim. 6, 9.

ad reficiendum vitalem humorem, qui quotidie consumitur vi naturalis caloris. Est denique illa huius ratio nominis, quod assidue petendus est, ut in hac consuetudine amandi et colendi Deum retineamur, nobisque omnino persuadeamus, id quod est, vitam ac salutem nostram ex Deo pendere.

Da nobis.

*XIV. Quid haec duo verba „da nobis“ sibi velint.*

Quantam hae duae voces materiam praebeant ad cohortandos fideles, ut infinitam Dei potentiam pie sancteque contant ac venerentur, in cuius manu sunt omnia, et ut nefariam illam satanae ostentationem detestentur<sup>1)</sup>: „Mihi tradita sunt omnia, et cui volo, do illa:“ nemo non videt. Nam unius nutu Dei distributa cuncta et conservantur et augentur.

*XV. Cur divites, etiamsi rebus omnibus abundant, his verbis uti debeant.*

Sed quae divitibus haec est imposita necessitas, dixerit quispiam, petendi quotidianum panem, quum rebus omnibus abundant? Haec illis necessitas est orandi in hunc modum, non ut dentur eis, quorum Dei benignitate habent copiam, sed ne, quae abunde illis adsunt, amittant. Quamobrem, ut scribit Apostolus, hinc discant divites<sup>2)</sup>, „non sublime sapere, neque sperare in incerto divitiarum, sed in Deo vivo, qui praestat nobis omnia abunde ad fruendum.“ Huius autem necessariae petitionis hanc causam affert sanctus Chrysostomus<sup>3)</sup>, non solum ut nobis suppetat cibus, sed ut eam suppeditet nobis Domini manus, quae, salubrem atque adeo salutarem vim inserens pani quotidiano, efficit, ut et cibus corpori prosit, et corpus animae serviat.

*XVI. Cur „da nobis,“ non „da mihi“ dicamus.*

Sed quid est, quamobrem „da nobis“ numero multitudinis dicimus, non autem „da mihi?“ Quia proprium illud est Christianae caritatis, non ut quisque de se uno sollicitus sit, sed ut praeterea de proximo laboret, et in cura suae utilitatis meminerit etiam aliorum. Accedit eo, quod, quae alicui munera divinitus tribuuntur, non idecirco tribuuntur, ut solus is ea possideat, vel in illis luxuriose vivat, sed ut cum aliis communicet, quae necessitati superfuerint. Nam inquit sancti Basilius et Ambrosius<sup>4)</sup>: „Esurientium panis est, quem tu detines; nudorum indumentum est, quod tu recludis; miserorum redemptio est et absolutio pecunia, quam tu in terram

<sup>1)</sup> Luc. 4, 6. <sup>2)</sup> Tim. 6, 17. <sup>3)</sup> Op. imperf. hom. 14. <sup>4)</sup> Basil. hom. in Luc. 12, 18. (ex vers. Ambr.)

defodis. Tot te ergo scias invadere bona, quot possis praestare, et nolis.“

Hodie.

*XVII. Quid vocula „Hodie“ hic apposita insinuet.*

Admonet nos haec vox communis infirmitatis. Quis enim est, qui si minus sua unius opera providere se posse sperat in longinquum tempus necessarios vitae sumptus, saltem in diem victus subsidia paraturum non confidat? Sed ne huius quidem fiduciae facultas nobis a Deo permittitur, qui nos singularum etiam dierum cibum a se petere iussit. Quae sententia habet illam necessariam rationem, quia quotidiano pane egemus omnes, quotidie etiam dominica preicatione singulis utendum esse. Haec de pane, qui ore perceptus, corpus alit atque sustentat, qui communis fidelium et infidelium, piorum et impiorum, admirabili Dei bonitate, „qui<sup>1)</sup> solem suum oriri facit super bonos et malos, et pluit super iustos et iustos,“ omnibus impertitur.

*XVIII. Quidnam spirituali pane, qui amplitudine huius petitionis etiam includitur, hic intelligendum sit.*

Reliquus est spiritualis panis, quem etiam hoc loco petitimus. Quo significantur omnia, quaecumque in hac vita ad spiritus et animae salutem et incolumentem requiruntur. Ut enim multiplex est cibus, quo corpus alitur et sustentatur, sic non est unius generis esca, quae spiritus et animae vitam continent: nam et verbum Dei cibus est animae. Sapientia enim inquit<sup>2)</sup>: „Venite, comedite panem meum, et bibite vinum, quod miscui vobis.“ Huius autem verbi facultatem quum adimit Deus hominibus, quod efficere solet, quum gravius nostris sceleribus offenditur: fame dicitur premere genus humanum. Sic enim est apud Amos<sup>3)</sup>: „Mittam famem in terram, non famem panis, neque sitim aquae, sed audiendi verbum Domini.“ Ut autem illud est certum propinquae mortis signum, quum non possunt homines vel cibum sumere, vel sumptum retinere: sic magnum est desperatae salutis argumentum, quum vel non quaerunt verbum Dei, vel, si adsit, non sustinent, et illam impietatis vocem in Deum effundunt<sup>4)</sup>: „Recede a nobis, scientiam viarum tuarum nolumus.“ In hoc furore animi et mentis caecitate versantur illi, qui, neglectis iis, qui legitime eis praesunt, catholicis et episcopis et sacerdotibus, a sancta Romana ecclesia desciscentes, corruptoribus Dei verbi haereticis se in disciplinam tradiderunt.

<sup>1)</sup> Mat. 5, 45. Luc. 6, 35. <sup>2)</sup> Prov. 9, 5. <sup>3)</sup> Amos. 8, 11. <sup>4)</sup> Iob 21, 14.

*XIX. De vero pane supersubstantiali, qui est Christus Dominus.*

Iam vero panis est Christus Dominus, animae cibus: nam inquit ipse de se<sup>1</sup>): „Ego sum panis vivus, qui de coelo descendit.“ Incredibile est, quanta voluptate ac laetitia perfundat piorum animas hic panis tum, quum maxime terrenis molestiis et incommodis conflictantur. Exemplo nobis est sanctus ille chorus Apostolorum, de quibus exstat<sup>2</sup>): „Illi quidem ibant gaudentes a conspectu concilii, quoniam digni habitu sunt pro nomine Iesu contumeliam pati.“ Referti sunt huiusmodi exemplis libri de vita sanctorum hominum; et de intimis his bonorum gaudiis ita loquitur Deus<sup>3</sup>): „Vincenti dabo manna absconditum.“

*XX. Christus in eucharistiae sacramento vere continetur, atque ideo proprie panis noster dicitur.*

Praecipue autem panis noster est ipse Christus Dominus, qui in sacramento eucharistiae substantialiter continetur. Hoc inexplicabile pignus caritatis dedit nobis redditus ad Patrem, de quo dixit<sup>4</sup>): „Qui manducat meam carnem, et bibit meum sanguinem, in me mamet, et ego in illo.“ „Accipite<sup>5</sup>) et manducate; hoc est corpus meum.“ Ea petent parochi, quae ad fidelis populi utilitatem pertinebunt, ex eo loco, quo separatim huius sacramenti vis ac ratio continetur. Et vero dicitur hic panis „noster“, quia fidelium solummodo hominum est, id est eorum, qui caritatem cum fide coniungentes, poenitentiae sacramento sordes elidunt peccatorum; qui non dimittentes memoriam, se Dei filios esse, divinum sacramentum sumunt et colunt, quanta maxima possunt, sanctitate ac veneratione.

*XXI. Cur eucharistia quotidianus noster panis dicatur.*

Quotidianus vero quamobrem dicatur, in promptu duplex ratio est: altera, quod in sacris Christianae ecclesiae mysteriis quotidie et offertur Deo, et datur pie sancteque postulantibus; altera, quod quotidie sumendus est, vel certe ita vivendum, ut quotidie, quoad eius fieri possit, digne sumere queamus. Audiant qui contra sentiunt, nisi longo intervallo salutaribus his epulis animae vesci non oportere, quid sanctus dicat Ambrosius<sup>6</sup>): „Si quotidianus est panis, cur post annum illum sumis? Accipe quotidie, quod quotidie tibi prospicit; sic vere, ut quotidie merearis accipere.“

*XXII. Quomodo affecti esse debeamus, si petitum panem mox non impetremus.*

Sed in hac petitione ad illud praecipue cohortandi sunt fideles, ut, quum recte et consilium et industriam suam po-

<sup>1</sup>) Io. 6, 41. <sup>2</sup>) Act. 5, 41. <sup>3</sup>) Apoc. 2, 17. <sup>4</sup>) Io. 6, 57. <sup>5</sup>) I. Cor. 11, 24.  
<sup>6</sup>) Lib. 5. de sacr. c. 4.

suerint in comparandis rebus vitae necessariis, rei exitum Deo permittant, suumque desiderium ad eius referant voluntatem, „qui<sup>1)</sup> non dabit in aeternum fluctuationem iusto.“ Nam vel concedet Deus quae petuntur, et ita suum optatum consequentur, vel non concedet, et id erit certissimum argumentum, nec salutare illud esse, nec utile, quod piis a Deo negatur, cui magis curae est de eorum salute, quam illis ipsis. Quem locum instruere poterunt explicandis iis rationibus parochi, quae a S. Augustino in epistola ad Probam praecclare colliguntur.

*XXIII. Cuius rei meditandae occasio se hic exhibeat.*

Extremum illud erit in huius tractatione petitionis, ut meminerint divites, facultates suas et copias Deo acceptum referre, cogitentque, se idcirco illis bonis esse cumulatos, ut illa distribuant indigentibus. In quam sententiam convenienter, quae in prima epistola ad Timotheum<sup>2)</sup> ab Apostolo disseruntur; unde magnam vim parochis petere licebit divinorum praceptorum ad hunc locum utiliter ac salutariter illustrandum.

---

## CAPUT XIV.

### De quinta Petitione.

**Et dimitte nobis debita nostra, sicut et nos dimittimus debitoribus nostris.**

*I. Ex passione Christi omnium peccatorum nostrorum remissio emanavit.*

Cum ita multa sint, quae infinitam Dei potentiam, cum pari sapientia ac bonitate coniunctam, significant, ut, quocumque oculos cogitationemque converteris, certissima signa immensae potestatis ac benignitatis occurrant: nihil profecto est, quod summum eius amorem et admirabilem in nos caritatem magis declarat, quam inexplicabile mysterium Iesu Christi passionis, unde perennis ille fons ad eluendas peccatorum sordes erupit, quo perfundi et expiari, Deo duce ac largitore, exoptamus, quum illud ab eo petimus: „Dimitte nobis debita nostra.“

*II. Quid haec quinta petitio contineat.*

Continet autem haec petitio summam eorum bonorum, quibus per Iesum Christum cumulatum est humanum genus. Id enim docuit Isaías. „Dimittetur,“ inquit<sup>3)</sup>, „iniquitas domui Iacob, et iste omnis fructus, ut auferatur peccatum eius.“ Quod David etiam ostendit, beatos praedicans

---

<sup>1)</sup> Ps. 54, 23. <sup>2)</sup> I. Tim. 6, 17—19. <sup>3)</sup> Is. 27, 9.

eos, qui salutarem illum fructum percipere potuerunt, his verbis<sup>1)</sup> „Beati, quorum remissae sunt iniuriae.“ Quare est accurate ac diligenter pastoribus huius postulationis animadvertenda et exponenda sententia, quam ad coelestem vitam consequendam tantum valere intelligimus.

*III. Quo modo hic non sit eadem precandi ratio, quae in superioribus fuit.*

Ingredimur autem novam precandi rationem. Nam hactenus a Deo non solum aeterna et spiritualia bona, sed caduca, et quae ad hanc vitam pertinent, commoda petivimus: nunc vero mala deprecamur et animae et corporis, et huius et sempiternae vitae.

*IV. Quae in eo, qui veniam peccati impetrare velit, requirantur.*

Sed quoniam ad impetrandum, quod postulamus, requiritur recta postulandi ratio: quo modo affectos esse oporteat eos, qui Deum hoc orare velint, dicendum videtur. Monebunt igitur parochi fidelem populum, primum necesse esse, ut is, qui ad hoc petendum velit accedere, suum ipse peccatum agnoscat; deinde, ut eius sensu ac dolore commoveatur; tum, ut sibi omnino persuadeat, Deum in hac esse voluntate, ut iis, qui peccaverunt, ita, ut diximus, affectis et comparatis, ignoscat, ne forte acerbam delictorum recordationem ac recognitionem illa veniae desperatio consequatur, quae olim Cain et Iudae animum occupavit, qui Deum modo vindicem et ultorem, non etiam mitem et misericordem existimarunt. Ergo in hac petitione sic affecti simus oportet, ut dolenter peccata nostra recognoscentes, ad Deum tanquam ad parentem, non quasi ad iudicem, configugiamus, a quo, non ut ex iustitia nobiscum agat, sed ex misericordia, postulemus.

*V. Quibus rationibus homo ad agnitionem peccatorum perducatur.*

Facile autem adducemur, ut peccatum nostrum agnoscamus, si ipsum audierimus Deum nos in sacris literis huius rationis admonentem. Est enim illud apud Davidem<sup>2)</sup>: „Omnes declinaverunt, simul inutiles facti sunt; non est, qui faciat bonum, non est usque ad unum.“ In eandem sententiam loquitur Solomon<sup>3)</sup>: „Non est homo iustus in terra, qui faciat bonum et non peccet.“ Quo illud etiam pertinet<sup>4)</sup>: „Quis potest dicere: mundum est cor meum, purus sum a peccato?“ Quod idem a S. Ioanne ad deterrendos homines ab arrogantia scriptum est<sup>5)</sup>: „Si dixerimus, quoniam peccatum non habemus,

1) Rom. 4, 7. Ps. 31, 1. 2) Ps. 13, 3. 3) Eccl. 7, 21. 4) Prov. 20, 9. 5) I. Io. 1, 8.

ipsi nos seducimus, et veritas in nobis nou est;“ et a Ieremia<sup>1)</sup>: „Dixisti: absque peccato et innocens ego sum, et propterea avertatur furor tuus a me. Ecce ego iudicio contendam tecum eo, quod dixeris: non peccavi.“ Quorum sententias omnium idem, qui eas eorum ore protulerat, Christus Dominus hoc petitionis praescripto confirmat, quo iubet nos delicta nostra confiteri. Id enim secus interpretari prohibuit auctoritas Milevitani concilii<sup>2)</sup> in hunc modum: „Placuit, ut quicumque verba ipsa dominicae orationis, ubi dicimus: „Dimitte nobis debita nostra,“ ita vult a sanctis dici, ut humiliter, non veraciter, hoc dicatur: anathema sit.“ Quis enim ferat orantem, et non hominibus, sed ipsi Domino mentientem, qui labii sibi dicit dimitti velle, et corde dicit, quae sibi dimittantur debita, non habere?

**VI. Quo pacto post agnatum peccatum dolor remordens, et vera eiusdem poenitentia in animo excitetur.**

Verum in necessaria recognitio ne peccatorum non est satis, illa leviter recordari: nam ut acerba nobis sit ea memoria, ut cor pungat, animum stimulet, et dolorem inurat necesse est. Quare pertractabunt locum hunc diligenter parochi, ut non solum facinorum ac flagitorum suorum meminerint fideles auditores, sed ut moleste dolenterque meminerint, ut, quum angantur intimis sensibus, conferant se ad Patrem Deum, a quo, ut inhaerentes evellat scelerum aculeos, suppliciter petant. Nec vero solum erratorum turpitudinem studebunt subiicere oculis fidelis populi: verum etiam indignitatem ac sordes hominum, qui quum nihil simus, nisi putida caro, nisi summa foeditas, incomprehensibilem illam Dei maiestatem, et inexplicabilem praestantiam, incredibilem in modum audeamus offendere; praesertim a quo procreati, liberati, innumerabilibus maximisque beneficiis aucti sumus.

**VII. Quo modo per peccatum gravissimae diaboli servituti nos tradamus.**

Ut quid? ut abalienati a Patre Deo, qui summum bonum est, turpissima peccati mercede diabolo nos addicamus in misserrimam servitutem. Neque enim dici potest, quam crudeliter ille dominetur in eorum animis, qui, repulso suavi iugo Dei, ruptoque caritatis amabilissimo nodo, quo parenti Deo spiritus noster adstringitur, ad hostem accerrimum desciverunt; qui eo nomine „princeps<sup>3)</sup>“ et rector „mundi,“ et princeps<sup>4)</sup> tenebrarum, et „rex<sup>5)</sup> super universos filios superbiae“ dicitur in divinis literis. In eos autem, qui daemonis tyrannide

<sup>1)</sup> Ier. 2, 35. <sup>2)</sup> conc. Milev. II. c. 8. <sup>3)</sup> Io. 14, 30. <sup>4)</sup> Eph. 6, 12. <sup>5)</sup> Job 41, 25.

opprimuntur, vere convenit illa vox Isaiae<sup>1)</sup>: „Domine Deus noster, possederunt nos domini absque te.“

*VIII. Quanta mala peccatum in animam invehat.*

Haec si nos minus movent rupta foedera caritatis, moveant certe calamitates et aerumnæ, in quas per peccatum incidimus. Violatur enim sanctitas animæ, quam Christo de-sponsam esse scimus; profanum fit illud templum Domini, quod qui contaminant, in eos dicit Apostolus<sup>2)</sup>: „Si quis autem templum Dei violaverit, disperdet illum Deus.“ Innumerabilia sunt mala, quae peccatum invexit in hominem; quam pene infinitam pestem David his verbis expressit<sup>3)</sup>: „Non est sanitas in carne mea a facie irae tuae; non est pax ossibus meis a facie peccatorum meorum.“ Nimirum norat hanc plague vim, quum nullam sui partem pestifero peccato intactam fateretur. Pervaserat enim in ossa peccati virus, id est, rationem et voluntatem, quae maxime solidæ sunt animæ partes, infecerat. Hanc late patentem pestem indicant sacrae literæ, quum peccatores claudos, surdos, mutos, caecos et omnibus membris captos appellant. Sed praeter dolorem, quem ex peccatorum quasi scelere sentiebat, magis etiam angebatur David ex ira Dei, quam in se propter peccatum commotam intelligebat. Bellum enim est sceleratis cum Deo, quorum sceleribus incredibiliter offenditur; inquit enim Apostolus<sup>4)</sup>: „Ira et indignatio, tribulatio et angustia in omnem animam hominis, operantis malum.“ Nam etsi transierit actio peccati, tamen peccatum macula et reatu permanet, cui semper imminens ira Dei illud perseguitur, tanquam umbra corpus.

*IX. Quomodo perspecta peccatorum calamitate, ad poenitentiam converti debeamus.*

Cum igitur David his vulneraretur aculeis, ad petendam delictorum veniam excitabatur, cuius et exemplum doloris, et doctrinae rationem, ex quinquagesimo eius Psalmo depromptam, proponent parochi fidelibus auditoribus, ut Prophetæ imitatione et ad doloris sensum, id est ad veram poenitentiam, et ad veniae spem erudiri possint. Quantam habeat utilitatem haec docendi ratio, ut ex peccatis dolere discamus, illa Dei apud Hieremiam<sup>5)</sup> declarat oratio, qui, quum Israelem ad poenitentiam hortaretur, admonebat eum, ut malorum sensum perciperet, quae peccatum consequuntur. „Vide enim,“ inquit, „quia malum et amarum est, reliquise te Dominum Deum tuum, et non esse timorem mei apud te, dicit Dominus, Deus

<sup>1)</sup> Ies. 26, 13. <sup>2)</sup> I. Cor. 3, 17. <sup>3)</sup> Ps. 37, 4. <sup>4)</sup> Rom. 2, 8, 9. <sup>5)</sup> Ier. 2, 19.

exercituum.<sup>4)</sup> Qui carent necessario hoc recognitionis ac doloris sensu, ii apud Prophetas, Isaiam<sup>1)</sup>, Ezechielem<sup>2)</sup> et Zchariam<sup>3)</sup> „cor durum, lapideum, et adamantium“ habere dicuntur. Sunt enim instar lapidis, nullo dolore molliti, nullum vitae, id est salutaris recognitionis, sensum habentes.

*X. Quibus meditationibus post peccati agnitionem et detestacionem spes impetranda veniae concipienda sit.*

Sed ne peccatorum gravitate deterritus se populus veniam impetrare posse desperet: ipsum ad spem vocare parochi debebunt his rationibus: quod et ecclesiae Christus Dominus potestatem dedit remittendi peccata, quemadmodum sacrosancti symboli articulo declaratur, et hac petitione docuit, quanta esset Dei bonitas ac liberalitas in genus humatum; nisi enim promptus esset ac paratus Deus ad condonandum peccata poenitentibus: nunquam nobis hanc precandi formulam praescripsisset: „Dimitte nobis debita nostra.“ Quamobrem illud fixum in animis nostris tenere debemus, fore ut is paternam misericordiam nobis impertiat, qui ipsam his precibus iussit exposcere.

*XI. Quo modo, si nos poeniteat, Deus facile peccatis nostris indulget.*

Nam omnino sub hac petitione illa est subiecta sententia, sic esse in nos affectum Deum, ut vere poenitentibus libenter ignoscat. Est enim Deus is, in quem abiecta obedientia peccamus, cuius ordinem sapientiae perturbamus, quantum est situm in nobis; quem offendimus, quem factis dictisque violamus. Verum idem est ille beneficentissimus parens, qui, quum possit omnia condonare, non modo se id velle declaravit, sed etiam impulit homines, ut a se veniam peterent, et, quibus verbis id facerent, docuit. Quare nemini dubium esse potest, quin, illo auctore, in nostra potestate sit, nobis Dei gratiam reconciliare. Et quoniam haec testificatio propensae ad ignoscendum divinae voluntatis fidem auget, spem alit, caritatem inflammat: operae pretium est, ornare hunc locum nonnullis divinis testimoniis et hominum exemplis, quibus maximorum scelerum poenitentibus Deus veniam concesserit. Quam sententiam quoniam persecuti sumus, quantum res ferrebat, in prooemio huius precationis, et in ea symboli parte, quae est de remissione peccatorum: inde assumpt parochi, quae ad hunc locum instruendum pertinere videbuntur; reliqua haurient ex divinarum literarum fontibus.

<sup>1)</sup> Is. 46, 12. <sup>2)</sup> Ez. 36, 26. <sup>3)</sup> Zach. 7, 12.

*XII. Quid in illa petitionis sententia debitorum nomine intelligendum sit.*

Tum vero eodem utantur instituto, quo in ceteris petitionibus utendum duximus; ut intelligent fideles, quid hic „debita“ significant, ne forte, decepti ambiguo, aliud ab eo, quam quod petendum sit, postulent. Primum autem scire oportet, minime petere nos, nobis ut remittatur amor ex toto corde, ex tota anima, et ex tota mente nostra, quem omnino Deo debemus, et cuius debiti solutio est ad salutem necessaria. Neque vero, quia debiti nomine etiam obedientia, cultus, veneratio, et cetera huius generis officia continentur, postulamus, ut non amplius ea debeamus: sed precamur, ut liberet a peccatis. Sic enim S. Lucas<sup>1)</sup> est interpretatus, qui peccata pro debitibus posuit, ob eam causam, quod illis committendis rei efficimur Deo, et debitibus poenis propositi, quas vel satisfaciendo, vel patiendo pendimus. Huius generis debitum fuit, quod Christus Dominus locutus est ore Prophetae<sup>2)</sup>: „Quae non rapui, tunc exsolvebam.“ Qua Dei verbi sententia licet intelligere non solum, nos debitores esse, sed etiam non esse solvendo, quum peccator per se satisfacere nullo modo possit.

*XIII. Cum peccator per se non sit solvendo, unde debito per peccatum contracto satisficeri possit.*

Quare confugiendum nobis est ad Dei misericordiam, cui quia par iustitia respondet, cuius est retinentissimus Deus, utendum erit<sup>3)</sup> deprecatione, et patrocinio passionis Domini nostri Iesu Christi, sine qua nemo unquam veniam delictorum impetravit, a qua omnis et satisfaciendi vis et ratio, tanquam ex fonte, profluxit. Nam pretium illud in cruce a Christo Domino persolutum et nobiscum per sacramenta, re vel studio ac desiderio adhibita, communicatum, tanti est, ut nobis impetrat et conficiat, quod hac petitione postulamus, ut peccata nostra remittantur.

*XIV. Hic pro indulgentia ac remissione culpae venialis et mortiferae oratur.*

Quo loco non id modo pro levibus erratis et facillimis ad impetrandam veniam, sed pro gravibus et mortiferis peccatis deprecamur; quae precatio in scelerum gravitate pondus non habebit, nisi id a poenitentiae sacramento, re, vel certe desiderio suscepto, ut iam dictum est, assumserit.

<sup>1)</sup> Luc. 11, 4. <sup>2)</sup> Ps. 68, 5. <sup>3)</sup> Ps. 100, 1. 1. Io. 2, 1. sq.

*XV. Non eadem est ratio, cur „debita nostra“ hic dicamus, quae fuit dum „panem nostrum“ peteremus.*

Dicimus autem „Debita nostra“ longe aliter, atque „Panem nostrum“ antea diximus. „Noster“ enim ille est panis, quia nobis Dei munere tribuitur, et peccata „nostra“ sunt, quia illorum culpa residet in nobis; nam nostra voluntate suscipiuntur, quae peccati vim non haberent, nisi essent voluntaria. Nos igitur, eam culpam sustinentes et confitentes, ad expiandum peccata necessariam Dei clementiam imploramus. In quo non utinur excusatione cuiusquam, nec causam in quemquam transferimus, ut primi homines Adam et Eva fecerunt<sup>1)</sup>; ipsi nos iudicamus, illam si sapimus, Prophetae prectionem adhibentes<sup>2)</sup>: „Non declines cor meum in verba malitiae, ad excusandas excusationes in peccatis.“

*XVI. Cur in numero multitudinis „dimitte nobis debita“ postulemus.*

Nec vero dicimus, dimitte mihi, sed „nobis;“ quod fraterna necessitudo et caritas, quae inter omnes homines intercedit, a nobis singulis postulat, ut de communii proximorum salute solliciti, quum pro nobis preces facimus, pro illis etiam deprecemur. Hunc orandi morem a Christo Domino traditum, deinceps ab ecclesia Dei acceptum, perpetuoque servatum, ipsi et maxime tenuerunt Apostoli, et, ut ceteri adhiberent, auctores fuerunt. Huius autem flagrantis studii et cupiditatis in deprecando pro salute proximorum habemus in utroque Testamento sanctorum Mosis et Pauli praeclarum exemplum; quorum alter sic Deum precabatur<sup>3)</sup>: „Aut dimitte eis hancnoxam, aut si non facis, dele me de libro tuo, quem scripsisti;“ alter in hunc modum<sup>4)</sup>: „Optabam ego ipse anathema esse a Christo pro fratribus meis.“

Sicut et nos dimittimus debitoribus nostris.

*XVII. Quomodo haec verba: sicut et nos dimittimus debitoribus nostris, sint intelligenda.*

Illud „sicut“ duplice intelligi potest; nam et similitudinis vim habet, quum videlicet a Deo petimus, ut, quemadmodum nos iniurias et contumelias remittimus iis, a quibus laesi sumus, sic ipse nobis peccata condonet. Est praeterea conditionis nota; in quam sententiam Christus Dominus eam formulam interpretatur: „Si enim dimiseritis,“ inquit<sup>5)</sup>, „hominibus peccata eorum, dimittet et vobis pater vester ecclesiasticus delicta vestra; si autem non dimiseritis hominibus, nec

<sup>1)</sup> Gen. 3, 12. 13. <sup>2)</sup> Ps. 140, 4. <sup>3)</sup> Ex. 32, 31. 32. <sup>4)</sup> Rom. 9, 3. <sup>5)</sup> Mat. 6, 14. 15.

Pater vester dimittet vobis peccata vestra.<sup>4)</sup> Verum habet uterque sensus eandem ignoscendi necessitatem; ut, si volumus nobis Deum veniam concedere delictorum, parcamus illis ipsis necesse sit, a quibus iniuriam accepimus. Sic enim Deus oblivionem iniuriarum mutuumque studium et amorem requirit a nobis, ut eorum, qui in gratiam non sunt reconciliati, dona ac sacrificia reiiciat et aspernetur.

*XVIII. Remissio omnium iniuriarum probatur esse et naturae praecceptoris, et Christi mandatis consentanea.*

Est etiam naturae lege sancitum, ut tales nos aliis praebamus, quales eos in nos esse cupimus, vere ut impudentissimus ille sit, qui postulet a Deo, ut sui sceleris poenam praetermittat, quum ipse in proximum animum retineat armatum. Quare parati et prompti ad ignoscendum esse debent ii, quibus impositae sunt iniuriae, quum et urgeantur hac precandi formula, et apud sanctum Lucam<sup>1)</sup> id iubeat Deus: „Si peccaverit in te frater tuus, increpa illum, et si poenitentiam egerit, dimitte illi, et si septies in die peccaverit in te, et septies in die conversus fuerit ad te, dicens: Poenitet me: dimitte illi,“ et in Evangelio S. Matthaei sit<sup>2)</sup>: „Diligit inimicos vestros,“ et Apostolus<sup>3)</sup> et ante eum Salomon<sup>4)</sup>, scripsérunt: „Si esurierit inimicus tuus, ciba illum: si sitit, potum da illi,“ et sic apud S. Marcum Evangelistam<sup>5)</sup>: „Quum stabitis ad orandum, dimittite, si quid habetis adversus aliquem; ut et Pater vester, qui in coelis est, dimittat vobis peccata vestra.“

*XIX. Quibus rationibus flectendi sint hominum animi ad lenitatem, quam hic Deus exigit.*

Sed quoniam depravatae naturae vitio nihil aegrius fit ab homine, quam ut inferenti condonet iniurias: omnem conferant parochi animi et ingenii vim ad commutandos et flectendos animos fidelium ad hanc lenitatem et misericordiam Christiano homini necessariam. Commorentur in traditione divinorum oraculorum, in quibus audire licet imperantem Deum, inimicis ignoscendum. Praedicent id, quod verissimum est, magno esse argumento hominibus, eos esse Dei filios, si facile remittant iniurias, et inimicos diligent ex animo. Elucet enim in eo, quod inimicos diligimus, similitudo quaedam cum parente Deo, qui sibi inimicissimum et infestissimum genus hominum, Filii sui morte ab aeterno exitio redemptum, reconciliavit. Sit autem huius cohortationis et praecepti clausula illud imperium Christi Domini, quod recusare non possumus sine summo

<sup>1)</sup> Luc. 17, 3. 4. <sup>2)</sup> Mat. 5, 44. <sup>3)</sup> Rom. 12, 20. <sup>4)</sup> Prov. 25, 21. <sup>5)</sup> Marc. 11, 25.

dedecore, et pernicie (Mat. 5, 44. 45.): „Orate pro persequentibus et calumniantibus vos, ut sitis filii Patris vestri, qui in coelis est.“

**XX.** *Quo modo cum iis agendum sit, qui ex animo iniuriarum recordationem delere nequeunt.*

Verum hoc loco non vulgaris pastorum prudentia requiritur, ne quis, cognita huius difficultate ac necessitate praecepi, salutem desperet. Sunt enim, qui, quum se debere intelligent conterere iniurias oblivione voluntaria, et eos diligere, qui laeserunt: id cupiunt, et pro viribus faciunt, sed universam memoriam iniuriarum sibi exhaustiri non posse sentiunt. Nam resident in animo quaedam reliquiae simultatis; quamobrem magnis agitantur conscientiae fluctibus, verentes, ne, parum simpliciter et candide positis inimicitiis, Dei iusso non obediant. Hic igitur pastores contraria studia carnis et spiritus explicabunt; quod illius sensus sit ad vindicationem proclivis, huius ratio propensa ad ignoscendum: hinc inter ipsos perpetuam turbam ac rixam existere. Quare saluti minime diffidendum esse demonstrabunt, reclamantibus et adversantibus rationi corruptae naturae appetitionibus, modo spiritus perstet in officio, et voluntate remittendi iniurias, proximumque diligendi.

**XXI.** *Qui appetitum vindictae adhuc retinent, possunt et debent orationem dominicam absque culpa recitare.*

Quod autem aliqui fortasse fuerint, qui, quum nondum animum inducere possint, ut, oblii iniurias, ament inimicos, propterea, deterriti ea, quam diximus, conditione huius petitionis, dominica precatione non utantur: duas has rationes afferent parochi, quibus exitiosum hunc errorem illis eripiant. Nam quisvis unus e fidelium numero preces has facit totius ecclesiae nomine, in qua pios aliquot esse necesse est, qui debitoribus ea, quae hic commemorantur, debita remiserunt. Accedit eo, quod id a Deo petentes, una etiam petimus, quidquid ad illud impetrandum in eam petitionem a nobis necessario conferendum est. Petimus enim et veniam peccatorum, et donum verae poenitentiae; petimus facultatem intimi doloris; postulamus, ut a peccatis abhorrende, et illa sacerdoti vere ac pie confiteri possimus. Itaque cum necesse etiam nobis sit parcere iis, qui damnum aut malum aliquod dederint: quum, ut nobis Deus ignoscat, precamur, simul oramus, ut facultatem largiatur reconciliandi nos illis, quos odimus. Quare deterrendi sunt ab ea opinione, qui inani et pravo illo timore commoventur, ne sibi Deum reddant offensiorem hac precatione; contraque etiam cohortandi ad frequentem orationis

usum, quo a parente Deo postulent, ut sibi det eam mentem, ut iis, qui laeserint, ignoscant, et inimicos diligent.

*XXII. Quid illi sit faciendum, qui orationem de remissione peccatorum sibi cupit esse fructuosam.*

Sed ut precatio omnino fructuosa sit, primum haec in ea est cura meditatioque adhibenda, nos Deo supplices esse, et ab eo veniam petere, quae non datur, nisi poenitenti; itaque nos ea caritate et pietate praeditos esse oportere, quae poenitentibus conveniat; convenire autem maxime iis, subiecta quasi oculis propria flagitia atque facinora lacrymis expiare. Cum hac cogitatione coniungenda est cautio in posterum earum rerum, in quibus fuit aliqua occasio peccandi, quaeque nobis ansam dare possint ad offendendum parentem Deum. In his curis versabatur David, quum diceret<sup>1)</sup>: „Et peccatum meum contra me est semper,“ et alio loco<sup>2)</sup>: „Lavabo per singulas noctes lectum meum; lacrymis meis stratum meum rigabo.“ Proponat sibi praeterea unusquisque ardentissimum orandi studium eorum, qui a Deo precibus impetraverunt veniam delictorum; ut publicani illius, qui longe consistens praepudore ac dolore, et oculis humi defixis, tantum pulsabat peccatus, eam habens orationem<sup>3)</sup>: „Deus propitius esto mihi peccatori;“ tum illius peccatricis mulieris<sup>4)</sup>, quae Christo Domino, retro stans, rigatos a se eius pedes, capillis etiam abscessos osculabatur; Petri denique principis Apostolorum<sup>5)</sup>, „qui egressus foras, flevit amare.“

*XXIII. Quae sint praecipua ad sananda animae vulnera remedia.*

Deinde cogitandum est, quo infirmiores sunt homines, et ad morbos animi, quae sunt peccata, propensiores, eo pluribus et frequentioribus medicamentis indigere. Sunt autem aegrotae animae remedia poenitentia et eucharistia. Haec igitur saepissime adhibeat fidelis populus. Deinde eleemosyna, quemadmodum tradunt divinae literae, medicina est accommodata sanandis animae vulneribus. Quare qui pie hac prece uti cupiunt, pro viribus benigne faciant egentibus; quantum enim vim habeat ad delendas scelerum maculas, testis est in Tobia angelus Domini, sanctus Raphael<sup>6)</sup>, cuius est illa vox: „Eleemosyna a morte liberat, et ipsa est, quae purgat peccata, et facit invenire misericordiam et vitam aeternam.“ Testis est Daniel, qui Nabuchodonosor regem sic admonebat<sup>7)</sup>: „Peccata tua eleemosynis redime, et iniquitates tuas misericordiis pau-

<sup>1)</sup> Ps. 50, 5. <sup>2)</sup> Ps. 6, 7. <sup>3)</sup> Luc. 18, 13. <sup>4)</sup> id. 7, 37. sq. <sup>5)</sup> Mat. 26, 75. <sup>6)</sup> Tob. 12, 9. <sup>7)</sup> Dan. 4, 24.

perum.“ Optima autem largitio, et impertiendae misericordiae ratio est oblivio iniuriarum, et bona voluntas erga eos, qui rem, vel existimationem, vel corpus tuum tuorumve violaverint. Quicumque igitur cupit, in se esse maxime misericordem Deum, is ipsi Deo suas donet inimicitias, remittatque omnem offenditionem, et pro hostibus libentissime deprecetur, omnem captans occasionem, de illis ipsis bene promerendi. Sed quoniam hoc argumentum explicatum est, quum homicidii locum tractavimus, eo reicimus parochos; qui tamen hanc petitionem hoc fine concludant, nihil iniustius esse aut fingi posse, quam eum, qui, quum hominibus durus sit, ut nemini se det ad lenitatem, idem postulet, ut in se sit mitis ac benignus Deus.

## CAPUT XV.

### De sexta Petitione.

Et ne nos inducas in tentationem.

*I. Quantum periculum sit, ne post peccatorum remissionem perceptam iterum in peccatum relabamur.*

Non dubium est, quin filii Dei, post impetratam delictorum veniam, quum incensi studio adhibendi Deo cultum et venerationem, coeleste regnum exoptant, et omnia divino Numini tribuentes pietatis officia, toti pendent a paterna eius voluntate ac providentia: tum eo magis humani generis hostis omnes adversus illos artes excogitet, omnes machinas paret, quibus oppugnentur sic, ut verendum sit, ne, labefactata et mutata sententia, rursus in vitia delabantur, longeque deteriores evadant, quam antea fuerint. De quibus illud principis Apostolorum iure dici possit (II. Petr. 2, 21): „Melius erat illis, non cognoscere viam iustitiae, quam post agnitionem retrorsum converti ab eo, quod illis traditum est, sancto mandato.“

*II. Quo modo Christus nos hac ratione adversus vaferimi hostis insidias munire voluerit.*

Quare nobis a Christo Domino datum est huius petitionis praeceptum, ut quotidie nos Deo commendemus, eiusque patriam curam et praesidium imploremus, minime dubitantes fore ut, si deseramur divino patrocinio, vaferimi hostis laqueis irretiti teneamur. Neque vero solum in hac orandi regula iussit a Deo petere, ne patiatur nos induci in tentationem, sed in illa etiam oratione, quam ad sacros Apostolos habuit sub ipsum mortis tempus, quum quidem ipsos mur-

dos<sup>1)</sup> esse dixisset, eos huius officii his verbis admonuit<sup>2)</sup>: „Orate, ut non intretis in temptationem.“ Quae iterum a Christo Domino adhibita admonitio magnum diligentiae onus imponit parochis, excitandi fidelem populum ad frequentem huius usum precationis, ut, quum tanta hominibus ab hoste diabolo in singulas horas pericula huius generis intendantur, a Deo, qui solus illa propulsare potest, petant illud assidue: „Ne nos inducas in temptationem.“

*III. Quibus praecipue rationibus homines huius petitionis necessitatem intelligere possint.*

Intelliget autem fidelis populus, quantopere egeat divini huius adiumenti, si suae imbecillitatis inscitiaeque meminerit, si recordabitur illam Christi Domini sententiam<sup>3)</sup>: „Spiritus quidem promptus est, caro autem infirma;“ si ei venerit in mentem, quam graves sint et exitiales hominum casus, impellente daemone, nisi sustineantur dexteræ coelestis auxilio. Quod illustrius esse possit humanæ infirmitatis exemplum, quam sacer ille chorus Apostolorum, qui magno antea animo cum essent, primo quoque obiecto terrore relieto Salvatore<sup>4)</sup> diffugerunt? etsi illustrius etiam est illud principis Apostolorum, qui in tanta professione singularis et fortitudinis et amoris in Christum Dominum, quum paulo ante<sup>5)</sup>, sibi bene fidens, ita dixisset: „Si opportuerit me mori tecum, non te negabo;“ statim unius voce mulierculæ perterritus, se Dominum non nosse, iureurando affirmavit. Nimirum illi in summa spiritus alacritate non respondebant vires. Quod si viri sanctissimi humanæ naturæ fragilitate, cui confidebant, graviter peccaverunt, quid non timendum est ceteris, qui ab eorum sanctitate absunt longissime?

*IV. Quot quantisque temptationum periculis hominum vita sit exposita.*

Quare proponat fidi populo parochus praelia ac pericula, in quibus assidue versamur, dum anima est in hoc mortali corpore, quos undique caro, mundus et satanas oppugnant. Quid ira, quid cupiditas in nobis possit, quotusquisque est, qui magno suo malo non experiri cogatur? Quis non his lacceditur stimulis? quis hos non sentit aculeos? quis subiectis non uritur ardentibus facibus? et quidem tam varii sunt ictus, tam diversae petitiones, ut difficillimum sit, gravem aliquam plagam non accipere. Ac praeter hos inimicos, qui habitant et vivunt nobiscum, sunt practerea illi hostes acerrimi, de

<sup>1)</sup> Io. 13, 10. <sup>2)</sup> Mat. 26, 41. <sup>3)</sup> Id. 26, 41. <sup>4)</sup> Id. 26, 56. <sup>5)</sup> Id. 26, 35.

quibus scriptum est<sup>1)</sup>: „Non est nobis collectatio adversus carnem et sanguinem; sed adversus principes et potestates, adversus mundi rectores tenebrarum harum, contra spiritualia nequitiae in coelestibus.“

*V. Quam graves sint daemonum in nos insultus, ex sententia D. Pauli exponitur.*

Accedunt enim ad intimas pugnas externi impetus et impressiones daemonum, qui et aperte nos petunt, et per cuniculos influunt in animas nostras, vix ut ab illis cavere possimus. Illos et „principes“ appellat Apostolus propter naturae excellentiam (nam natura hominibus et ceteris, quae sub sensu cadunt, creatis rebus antecellunt); et „potestates“ vocat, quod non solum naturae vi, sed potestate etiam superant; et „rectores“ nominat mundi tenebrarum: non enim clarum et illustrem mundum regunt, id est bonos et pios, sed obscurum et caliginosum, nempe eos, qui flagitiosae et facinorosae vitae sordibus ac tenebris obcaecati, duce tenebrarum diabolo delectantur. Nuncupat etiam daemones „spiritualia nequitiae“, est enim et carnis et spiritus nequitia. Carnalis quae dicitur nequitia incendit appetitum ad libidines et voluptates, quae percipiuntur sensibus. Spiritualia nequitiae sunt mala studia, et pravae cupiditates, quae ad superiorem pertinent animae partem; quae tanto peiores sunt, quam reliquae, quanto mens ipsa et ratio altior est atque praestantior. Quae satanae nequitia quia maxime spectat illuc, ut coelesti nos hereditate privet: propterea dixit Apostolus „in coelestibus.“ Ex quo licet intelligere, magnas esse hostium vires, invictum animum, immane in nos et infinitum odium; bellum etiam perpetuum eos gerere nobiscum, ut nulla pax esse cum illis, nullae induciae fieri possint.

*VI. Quanta sit diaboli ad tentandum audacia et perversitas.*

Quantum vero audeant, declarat satanae apud Prophetam vox<sup>2)</sup>: „In coelum condescendam.“ Aggressus est primos homines in paradiſo; adortus est Prophetas; appetivit Apostolos, ut, quemadmodum loquitur apud Evangelistam<sup>3)</sup> Dominus, „cribraret eos sicut triticum.“ Ne ipsum quidem Christi Domini os erubuit. Itaque eius inexplebilem cupiditatem et immensam diligentiam sanctus Petrus<sup>4)</sup> expressit, quum dixit: „Adversarius vester diabolus tanquam leo rugiens circuit, quaerens quem devoret.“ Quanquam non unus modo tentat homines satan, sed gregatim interdum daemones in singulos impetum faciunt. Quod ille confessus est daemon, qui rogatus

<sup>1)</sup> Eph. 6, 12. <sup>2)</sup> Is. 14, 13. <sup>3)</sup> Luc. 22, 31. — Mat. 4, 1. <sup>4)</sup> I. Petr. 5, 8.

a Christo Domino, quod sibi nomen esset, respondit<sup>1)</sup>: „Legio mihi nomen est,“ nempe daemonum multitudo, quae miserum illum divexarat; et de alio scriptum est<sup>2)</sup>: Assumit septem alias spiritus secum, nequiores se, et intrantes habitant ibi, et fiunt novissima hominis illius peiora prioribus.“

*VII. Cur perversi minus, pii autem magis a daemonibus infestentur.*

Multi sunt, qui, quod impulsus atque impetus daemonum in se minime sentiunt, totam rem falsam esse arbitrantur; quos ipsos a daemonibus non impugnari mirum non est, quibus se sponte tradiderunt. Non est in illis pietas, non caritas, non virtus ulla Christiano homine digna. Quare fit, ut toti sint in potestate diaboli, nec ullis temptationibus opus est ad eos evertendos, in quorum iam animis, ipsis libentibus, commoratur. At vero qui se Deo dicaverant, in terris coelestem vitam agentes: ii maxime omnium satanae incursibus petuntur, hos acerbissime odit, his in singula temporis momenta struit insidias. Plena est historia divinarum literarum sanctorum hominum, quos praesenti etiam animo stantes vel vi, vel fraude pervertit. Adam, David, Salomon, aliquique, quos enumerare difficile sit, experti sunt daemonum violentos impetus, et callidam astutiam, cni resisti non possit consilio, aut hominum viribus. Quis igitur se suo praesidio satis tutum existimet? Itaque pie casteque petendum a Deo est, ne nos tentari sinat supra id<sup>3)</sup>, quod possumus, sed faciat etiam cum temptatione proventum, ut possimus sustinere.

*VIII. Daemones, quantum aut quamdiu volunt, homines tentare non possunt.*

Verum hic fideles confirmandi sunt, si qui animi imbecillitate aut rei ignorantiae daemonum vim perhorrescant, ut ipsi temptationum fluctibus agitat<sup>4)</sup> in hunc precationis portum configiant. Non enim satan in tanta et potentia et pertinacia, in capitali odio nostri generis, nec quantum, nec quamdiu vult, tentare nos aut vexare potest, sed omnis eius potestas Dei nutu et permisso gubernatur. Notissimum est exemplum Iob, de quo nisi diabolo dixisset Deus<sup>4)</sup>: „Ecce universa, quae habet, in manu tua sunt,“ nihil eius satanas attigisset; contra vero nisi addidisset Dominus: „Tantum in eum ne extendas manum tuam:“ uno diaboli ictu cum filiis ipse facultibusque concidisset. Ita autem alligata est daemonum vis, ut ne in porcos quidem illos, de quibus scribunt Evangelistae, non permittente Deo invadere potuissent.

<sup>1)</sup> Marc. 5, 9. <sup>2)</sup> Mat. 12, 45. <sup>3)</sup> I. Cor. 10, 13. II. Pet. 2, 9. <sup>4)</sup> Iob 1, 12.

*IX. Quid tentandi vox nobis designet, quaque ratione a Deo tentemur.*

Sed ad intelligendam huius petitionis vim dicendum est, quid hic „tentatio“ significet, quid item, induci in tentationem. Est autem tentare periculum facere de eo, qui tentetur, ut ab ipso, quod cupimus, elicientes, verum exprimamus. Qui tentandi modus in Deum minime cadit. Quid enim est, quod nesciat Deus? „Omnia enim,“ inquit<sup>1)</sup>, „nuda et aperta sunt oculis eius.“ Est alterum tentandi genus, quum longius progrediendo aliud quaeri solet in bonam vel in malam partem; in bonam, quum ea re tentatur alicuius virtus, ut, illa perspecta et cognita, is commodis et honoribus augeatur, eiusque exemplum ceteris imitandum proponatur, ac denique omnes ob id ipsum ad Dei laudes excitentur. Quae tentandi ratio sola couenit in Deum. Huius exemplum temptationis est illud in Deuteronomio<sup>2)</sup>: „Tentat vos Dominus Deus vester, ut palam fiat, utrum diligatis eum an non.“ Quo modo etiam tentare suos dicitur Deus, quum inopia, morbo et aliis calamitatum generibus premit: quod probandae eorum patientiae causa facit, et ut aliis documentum sint Christiani officii. In hanc partem legimus<sup>3)</sup>, Abraham esse tentatum, ut filium immolaret; quo facto fuit is obedientiae et patientiae exemplum singulare ad memoriam hominum sempiternam. In eadem sententiam dictum est<sup>4)</sup> de Tobia: „Quia acceptus eras Deo, necesse fuit, ut tentatio probaret te.“

*X. Quo modo daemon homines tentet.*

In malam partem tentantur homines, quum ad peccatum aut exitium impelluntur; quod proprium diaboli officium est. Is enim eo animo tentat homines, ut decipiat agatque praecipites. Quamobrem „tentator“ in divinis literis<sup>5)</sup> appellatur. In iis vero temptationibus, modo intimos nobis admovens stimulos animae affectiones et commotiones adhibet administras, modo nos exagitans extrinsecus, externis rebus utitur, vel prosperis ad efferendos, vel ad frangendos adversis; nonnunquam habet emissarios et excursores perditos homines, imprimisque haereticos, qui, sedentes in cathedra pestilentiae, malarum doctrinarum mortifera semina dispergunt, ut illos, qui nullum delectum aut discrimen habent virtutis et vitiorum, homines, per se proclives ad malum, nutantes ac praecipitantes impellat.

*XI. Quibus modis dicatur quis in temptationem induci.*

Dicimus autem „induci“ in temptationem, quum temptationibus succumbimus. Inducimur vero in temptationem dupliciter:

<sup>1)</sup> Hebr. 4, 13. <sup>2)</sup> Deut. 13, 3. <sup>3)</sup> Gen. 22, 1. <sup>4)</sup> Tob. 12, 13. <sup>5)</sup> Mat. 4, 3.

primum, quum de statu dimoti in id ruimus malum, in quod tentando nos aliquis impulerit. At nemo quidem a Deo hoc modo in temptationem inducitur, quia nemini est peccati auctor Deus, immo vero odit „omnes<sup>1)</sup>, qui operantur iniquitatem.“ Sic vero etiam est apud S. Iacobum<sup>2)</sup>: „Nemo, quum tentatur, dicat, quoniam a Deo tentatur: Deus enim intentator malorum est.“ Deinde dicitur nos in temptationem inducere is, qui etsi non tentat ipse, neque operam dat, quo tentemur, tentare tamen dicitur, quia, quum possit prohibere, ne id accidat, aut ne temptationibus superemur, non impedit. Hoc modo Deus bonos et pios tentari quidem sinit, verumtamen sua gratia sustentatos non deserit. Nec vero non interdum iusto et occulto Dei iudicio nostris id sceleribus postulantibus, nobis ipsi relictii, concidimus.

### XII. Beneficia Dei quandoque nos in temptationem inducunt.

Praeterea nos in temptationem Deus inducere dicitur, quum eius beneficiis, quae nobis ad salutem dedit, abutimur ad perniciem, et patris substantiam, ut prodigus ille filius<sup>3)</sup>, dissipamus „vivendo luxuriose“, nostris cupiditatibus obsequentes. Quamobrem id dicere possumus, quod de lege dixit Apostolus<sup>4)</sup>: „Inventum est mihi, mandatum, quod erat ad vitam, hoc esse ad mortem.“ Opportunum rei exemplum est Hierosolyma teste Ezechiele<sup>5)</sup>, quam Deus omni ornamentorum genere locupletarat, ut eius ore Prophetae diceret Deus: „Perfecta eras in decore meo, quem posueram super te;“ et tamen illa civitas divinis cumulata bonis tantum abest, ut optime de se merito ac merenti Deo gratiam habens, coelestibus beneficiis ad beatitudinem consequendam, cuius gratia ea acceperat, uteretur, ut ingratissima in parentem Deum, abiecta spe et cogitatione coelestium fructuum, tantum praesenti abundantia luxuriose ac perdite frueretur; quod Ezechiel eodem capite pluribus verbis persecutus est. Quare sunt eodem loco ingrati in Deum homines, qui praebitam sibi ab eo divinitus uberem materiam recte factorum ad vitia, illo permittente, convertunt.

### XIII. Quo modo Scripturae verba intelligenda sint, quae de permissione Dei per verba operationem significantia, loquuntur.

Sed oportet hunc divinae Scripturae morem diligenter attendere, quae Dei permissionem iis interdum verbis significat, quae proprie si accipientur, tanquam actionem in Deo significant. Nam in Exodo<sup>6)</sup> sic est: „Indurabo cor Pha-

<sup>1)</sup> Ps. 5, 7. <sup>2)</sup> Iac. 1, 13. <sup>3)</sup> Luc. 15, 13. <sup>4)</sup> Rom. 7, 10. <sup>5)</sup> Ez. 16, 14. <sup>6)</sup> Ex. 7, 3.

raonis; „et apud Isaiam<sup>1)</sup>: „Excaeca cor populi huius;“ et ad Romanos<sup>2)</sup> scribit Apostolus: „Tradidit illos Deus in passiones ignominiae, et in reprobum sensum.“ Quibus in locis aliquis similibus non id omnino esse actum a Deo, sed permisum, intelligendum est.

*XIV. In hac precationis parte non postulatur, ut prorsus ab omni tentatione immunes simus, sed ne in temptationibus a Deo deseramur.*

His positis non erit difficile scire, quid in hac precationis parte postulemus. Nec vero petimus, ne omnino tentemur; est enim tentatio vita hominis super terram. Est autem ea res utilis et fructuosa hominum generi; nam in temptationibus nos ipsos, id est vires nostras, cognoscimus, quamobrem etiam humiliamur sub potenti manu Dei, viriliterque decertantes expectamus immarcescibilem coronam gloriae: „Nam<sup>3)</sup> et oui certat in agone, non coronatur, nisi legitime certaverit,“ et, ut inquit S. Iacobus<sup>4)</sup>, „Beatus vir, qui suffert temptationem, quoniam, quum probatus fuerit, accipiet coronam vitae, quam repromisit Deus diligentibus se.“ Quod si urgemur nonnunquam hostium temptationibus, magnae nobis erit levationi illa cogitatio, habere nos adiutorem „pontificem<sup>5)</sup>, qui possit compati infirmitatibus nostris, tentatum ipsum per omnia.“ Quid hic igitur petimus? ne divino praesidio deserti temptationibus vel decepti assentiamur, vel cedamus afflitti, ut praestos sit nobis Dei gratia, quae, quum defecerint nos propriae vires, in malis recreet ac reficiat.

*XV. Quo modo a Deo in nostris temptationibus opem implorare debeamus.*

Quare et generatim Dei opem implorare debemus in omnibus temptationibus, et nominatim, quum singulis affligimur, ad precationem confugere oportet; quod a Davide factum legimus pene in unoquoque temptationum genere; nam in mendacio sic precabatur<sup>6)</sup>: „Ne auferas de ore meo verbum veritatis usquequaque;“ in avaritia ad hunc modum<sup>7)</sup>: „Inclina cor meum in testimonia tua, et non in avaritiam.“ In rebus vero inanibus huius vitae, et illecebris cupiditatum hac prece utebatur<sup>8)</sup>: „Averte oculos meos, ne videant vanitatem.“ Ergo postulamus, ne morem geramus cupiditatibus, neve defatigemur in temptationibus sustinendis, ne declinemus de via Domini, ut tam in rebus incommodis quam in prosperis aequitatem animi, constantiamque servemus, et nullam nostri partem

<sup>1)</sup> Is. 6, 10. <sup>2)</sup> Rom. 1, 26. 28. <sup>3)</sup> II. Tim. 2, 5. <sup>4)</sup> Iac. 1, 12. <sup>5)</sup> Hebr. 4, 15  
<sup>6)</sup> Ps. 118, 43. <sup>7)</sup> Ib. 36. <sup>8)</sup> Ib. 37. Deut. 31, 29. Hebr. 12, 13.

Deus sua tutela vacuam relinquat. Petimus denique, ut „Satanam<sup>1)</sup> conterat sub pedibus nostris.“

*XVI. Quomodo de temptatione victoria reportari, et quo auctore illa obtineri possit.*

Reliquum est, ut fidelem populum ad ea parochus cohortetur, quae in hac preicatione maxime cogitare et meditari oporteat; in qua erit illa optima ratio, si, quanta sit hominum infirmitas, intelligentes, viribus nostris diffidamus, et omni spe nostra incolumentis in Dei benignitate collocata, eo freti patrocinio, vel in maximis periculis magnum animum habuerimus; praesertim cogitantes, quam multos hac spe atque hoc animo praeditos ex hiantibus satanae faucibus liberarit Deus. An non Ioseph<sup>2)</sup> undique circumdatum ardentiibus insanae mulieris facibus, e summo erectum periculo, ad gloriam extulit? Non Susannam, a satanae ministris obsessam, tum, quum nihil proprius esset, quam ut nefariis sententiis interficeretur, servavit incolumen? neque mirum; „Erat enim,“ inquit<sup>3)</sup>, „cor eius fiduciam habens in Domino.“ Insignis est laus et gloria Iob, qui de mundo, de carne, de satana triumphavit. Plurima sunt huius generis exempla, quibus parochus diligenter pium populum ad eam spem fiduciamque cohortari debet.

*XVII. Nostri certaminis antesignanus Christus est, socii sancti omnes, quos qui non sequuntur, recordes sunt.*

Cogitent etiam fideles, quem in hostium temptationibus ducem habeant, nempe Christum Dominum, qui victoriam ex illo certamine retulit. Vicit ipse diabolus; est is ille fortior<sup>4)</sup>, qui superveniens fortem superavit armatum, quem et armis nudavit et spoliis. De eius victoria, quam de mundo reportavit, est apud S. Ioannem<sup>5)</sup>: „Confidite, ego vici mundum.“ Et in Apocalypsi<sup>6)</sup> dicitur ipse leo vincens, et exisse „vincens ut vinceret,“ qua in victoria suis etiam cultoribus facultatem vincendi dedit. Est Apostoli ad Hebraeos epistola plena victoriis sanctorum hominum, „qui<sup>7)</sup> per fidem device- runt regna, obturaverunt ora leonum,“ et quae sequuntur. Ex his vero, quae sic acta legimus, eas Victorias cogitatione complectamus, quas quotidie reportant ex intimis et externis daemonum praeliis homines fide, spe et caritate praestantes, quae tam multae sunt tamque insignes, ut, si sub aspectum caderent oculorum, nihil frequentius accidere iudicaremus, nihil glorioius; de quorum hostium clade his verbis scripsit S.

<sup>1)</sup> Rom. 16, 20. <sup>2)</sup> Gen. 39, 7. <sup>3)</sup> Dan. 13, 35. <sup>4)</sup> Mat. 4, 10. Lue. 11, 22. Col.

<sup>5)</sup> Io. 16, 33. <sup>6)</sup> Apoc. 5, 6, 2. <sup>7)</sup> Hebr. 11, 33.

Ioannes<sup>1)</sup>: „Scribo vobis, iuvenes, quoniam fortes estis, et verbum Dei manet in vobis, et vicistis malignum.“

*XVIII. Quomodo diabolus a nobis superari possit.*

Vincitur autem satanas non otio, somno, vino, comeditione, libidine; sed oratione, labore, vigilia, abstinentia, continentia, castitate. „Vigilate et orate,“ inquit<sup>2)</sup>, ut iam diximus, „ut non intretis in tentationem.“ Qui iis armis ad illam pugnam utuntur, in fugam convertunt adversarios; qui<sup>3)</sup> enim resistunt diabolo, is fugiet ab eis. In his tamen sanctorum hominum victoriis, quas diximus, nemo sibi placeat, nemo se efferat insolentius, ut se suis viribus hostiles demum tentationes impetusque sustinere posse confidat. Non est hoc naturae nostrae, non humanae imbecillitatis, sed solius divinae potestatis.

*XIX. Quo modo nobis ad vincendum vires a Deo dentur*

Haec vires, quibus prostrernimus satanae satellites, dantur a Deo; qui ponit, „ut<sup>4)</sup> arcum aereum, brachia“ nostra, cuius beneficio „arcus<sup>5)</sup> fortium superatus est, et infirmi accincti sunt robore;“ qui dat nobis protectionem salutis; cuius nos dextera suscipit; qui<sup>6)</sup> „docet manus nostras ad proelium, et digitos nostros ad bellum,“ ut uni Deo pro victoria sint agendae et habendae gratiae, quo uno et auctore et adiudice vincere possumus; quod fecit Apostolus. Ait enim<sup>7)</sup>: „Deo autem gratias, qui dedit nobis victoriam per Dominum nostrum Iesum Christum.“ Eundem auctorem victoriae praedicat colestis illa vox in Apocalypsi<sup>8)</sup>: „Facta est salus et virtus, et regnum Dei nostri, et potestas Christi eius; quia projectus est accusator fratrum nostrorum, et ipsi vice-rerunt eum propter sanguinem Agni.“ Testatur idem liber Christi Domini partam ex mundo carneque victoriam eo loco<sup>9)</sup>: „Hi cum Agno pugnabunt, et Agnus vincet illos.“ Haec de causa et de modo vincendi.

*XX. Quae sint in spirituali illo certamine victorum praemia.*

Quibus expositis proponent fidei populo parochi a Deo paratas coronas, et constitutam victoribus sempiternam prae-miorum amplitudinem. Quorum ex eadem Apocalypsi divina proferent testimonia<sup>10)</sup>: „Qui vicerit, non laedetur a morte secunda;“ et alio loco<sup>11)</sup>: „Qui vicerit, sic vestietur vestimentis albis, et non delebo nomen eius de libro vitae, et

<sup>1)</sup> I. 10. 2, 14. <sup>2)</sup> Mat. 26, 41. <sup>3)</sup> Iac. 4, 7. <sup>4)</sup> Ps. 17, 35. <sup>5)</sup> I. Reg. 2, 4. <sup>6)</sup> Ps. 143, 1. <sup>7)</sup> I. Cor. 15, 57. <sup>8)</sup> Apoc. 12, 10. 11. <sup>9)</sup> Apoc. 17, 14. <sup>10)</sup> Apoc. 2, 11. <sup>11)</sup> Apoc. 3, 5.

confitebor nomen eius coram Patre meo, et coram angelis eius.“ Et paulo post Deus ipse ac Dominus noster ita loquitur ad Ioannem<sup>1)</sup>: „Qui vicerit, faciam illum columnam in templo Dei mei, et foras non egredietur amplius.“ Tum inquit<sup>2)</sup>: „Qui vicerit, dabo ei sedere mecum in throno meo; sicut et ego vici, et sedi cum Patre meo in throno eius.“ Denique quum Sanctorum gloriam, et perpetuam illam bonorum vim, quibus in coelo fruentur, exposuisset, adiunxit<sup>3)</sup>: „Qui vicerit, possidebit haec.“

## CAPUT XVI.

### **De septima Petitione.**

Sed libera nos a malo.

*I. Nihil continetur superioribus petitionibus, quod ista non includatur.*

Postrema haec petitio est instar omnium, qua Dei Filius divinam hanc orationem conclusit; cuius etiam vim et pondus ostendens, ea usus est orandi clausula, quum e vita migratus, Deum Patrem pro hominum salute deprecaretur<sup>4)</sup>: „Rogo,“ enim, inquit, „ut serves eos a malo.“ Ergo hac precatiōnis formula, quam et praecepto tradidit, et exemplo confirmavit, quasi quadam epitome summatim complexus est vim et rationem ceterarum petitionum. Quum enim id, quod ea prece continetur, impetraverimus, nihil, auctore S. Cypriano,<sup>5)</sup> reliquum est, quod ultra adhuc debeat postulari, quum semel protectionem Dei adversus malum petamus, qua impetrata contra omnia, quae diabolus et mundus operantur, securi stamus et tuti. Quare quum tanti sit haec petitio, quanti diximus, debet parochus in ea fidelibus explicanda summam adhibere diligentiam. Differt autem haec et proxima petitio, quod illa vitationem culpae, hac poenae liberationem postulamus.

*II. Quid nos urgeat, ut hanc precatiōnem coram Domino effundamus.*

Quare non iam monendum est fidelis populus, quantopere et laboret ex incommodis et calamitatibus, et coelestis egeat adiumenti. Nam quot et quantis miseriis proposita sit hominum vita, praeterquam quod et sacri et profani scriptores hoc argumentum sunt copiosissime persecuti, nemo fere est, quin intelligat et suo, et alieno periculo. Persuasum enim est

<sup>1)</sup> Apoc. 3, 12. <sup>2)</sup> v. 21. <sup>3)</sup> Apoc. 21, 7. <sup>4)</sup> Io. 17, 15. <sup>5)</sup> de Orat. Dom. serm. 6.

omnibus, quod exemplum patientiae Iob memoriae prodidit<sup>1)</sup>: „Homo natus de muliere, brevi vivens tempore, repletur multis miseriis; qui quasi flos egreditur, et conteritur, et fugit velut umbra, et nunquam in eodem statu permanet.“ Nec vero ullum praeterire diem, qui propria aliqua molestia aut incommodo notari non possit, testis est illa Christi Domini vox<sup>2)</sup>: „Sufficit diei malitia sua.“ Etsi conditionem humanae vitae declarat ipsius Domini monitum illud, quo crucem quotidie sumi<sup>3)</sup>, seque docuit sequi oportere. Ut igitur quisque sentit, quam laboriosa sit et periculosa haec vivendi ratio: ita facile persuadebitur fideli populo, malorum liberationem a Deo implorandam esse; praesertim quum nulla re magis ad orandum adducantur homines, quam cupiditate, et spe liberationis eorum incommodorum, quibus premuntur, aut quae impendeant. Est enim haec insita ratio in animis hominum, ut in malis statim ad Dei auxilium confugiant. Qua de re est illud scriptum<sup>4)</sup>: „Imple facies eorum ignominia, et quaerent nomen tuum, Domine;“ et<sup>5)</sup>: „multiplicatae sunt infirmitates eorum, postea acceleraverunt.“

*III. Quanam ratione periculorum et calamitatum depulsio a Deo postulanda sit.*

Sed si illud fere sua sponte faciunt homines, ut in periculis et calamitatibus invocent Deum: certe, quo modo id recte facere possint, ab iis, quorum fidei et prudentiae commissa est eorum salus, maxime docendi sunt. Non enim desunt, qui contra Christi Domini iussum praepostero utantur ordine precationis. Nam qui iussit nos ad se confugere<sup>6)</sup> „in die tribulationis,“ idem orationis ordinem nobis praescripsit; voluit enim, ut priusquam precaremur, ut nos liberaret a malo, peteremus, ut nomen Dei sanctificaretur, et adveniret regnum eius, et reliqua postularemus, quibus quasi gradibus quibusdam in hunc locum pervenitur. Sed quidam, si caput, si latus, si pes condoluit, si rei familiaris iacturam faciunt, si minae, si pericula ab inimicis intenduntur, in fame, in bello, in pestilentia, omissis mediis dominicae precationis gradibus, tantum petunt, ut ex illis eripiantur malis. At huic consuetudini repugnat Christi Domini iussum<sup>7)</sup>: „Quaerite primum regnum Dei.“ Itaque, qui recte preces faciunt, quum deprecantur calamitates, incomoda, malorum depulsionem, id referunt ad Dei gloriam. Sic David illi precationi<sup>8)</sup>: „Domine, ne in furore tuo arguas me,“ subiecit rationem, qua

<sup>1)</sup> Iob 14, 1. 2. <sup>2)</sup> Mat. 6, 34. <sup>3)</sup> Luc. 9, 23. <sup>4)</sup> Ps. 82, 17. <sup>5)</sup> Ps. 15, 4. <sup>6)</sup> Ps. 49, 15. <sup>7)</sup> Mat. 6, 33. <sup>8)</sup> Ps. 6, 2. 6.

se Dei gloriae cupidissimum ostendit; inquit enim: „Quoniam non est in morte, qui memor sit tui; in inferno autem quis confitebitur tibi?“ Et idem, quum oraret Deum, sibi ut misericordiam impertiret, subiungit illud<sup>1)</sup>: „Docebo iniquos vias tuas, et impii ad te convertentur.“ Ad hanc orandi salutarem rationem, et ad exemplum Prophetae incitandi sunt fideles auditores, et simul docendi, quantum intersit inter infidelium et Christianorum hominum preces.

*IV. Infideles se liberari a malo, ac Christiani, non perinde petunt.*

Petunt vehementer illi etiam a Deo, ut possint ex morbis vulneribusque convalescere, sibi ut ex urgentibus vel imminentibus malis evadere liceat; sed tamen illius praecipuam spem liberationis ponunt in remediis, natura vel hominum industria comparatis; quin etiam sibi datum a quovis medicamentum, etiam si canticibus, si beneficiis, si daemonum opera confectum sit, sine ulla religione adhibent, modo aliqua valetudinis spes ostendatur. Longe alia ratio est Christianorum, qui in morbis, et in omnibus adversis rebus habent summum per fugium et praesidium salutis Deum, unum illum omnis auctorem boni, et liberatorem suum agnoscent ac venerantur; remediis vero, quae inest ad sanandum vis, insitam a Deo esse pro certo habent, tantumque illa aegrotis prodesse existimant, quantum ipse voluerit Deus. Est enim a Deo data hominum generi medicina, qua morbos sanaret. Hinc est illa Ecclesiastici vox<sup>2)</sup>: „Altissimus creavit de terra medicamenta, et vir prudens non abhorrebit illa.“ Itaque qui Iesu Christo nomen dederunt, non in illis remediis summam spem reponunt recuperandae valetudinis, sed ipsi medicinae auctori Deo maxime confidunt.

*V. Quo modo in morbis soli Deo fidendum sit, qui plurimos a praesentissimis periculis liberavit.*

Quare etiam in divinis literis reprehendantur ii<sup>3)</sup>, qui medicinae fiducia nullum Dei auxilium requirunt; immo vero, qui vitam agunt ex divinis legibus, abstinent omnibus remediis, quaecumque ad curationem a Deo non adhibita esse constet. Quod si etiam eorum usu medicamentorum illis sit explorata spes sanitatis, tamen ab iis ut canticibus et daemonum artificiis abhorrent. Ad id autem fideles cohortari oportet, ut Deo confidant. Ea enim re iussit nos beneficentissimus parens liberationem malorum postulare, ut in eo ipso, quod iussit, spem etiam impetrationis haberemus. Multa sunt in sacris literis huius rei exempla, ut, qui minus rationibus addu-

<sup>1)</sup> Ps. 50, 15. <sup>2)</sup> Eclips. 38, 4. <sup>3)</sup> II. Par. 16, 12. Ier. 46, 11.

cuntur ad bene sperandum, exemplorum multitudine confidere cogantur. Abraham, Iacob, Lot, Ioseph, David sunt in oculis, locupletissimi testes divinae benignitatis. Sacrae novi Testamenti literae tam multos enumerant, qui ex maximis discriminibus erepti sunt piae pondere precationis, ut res exemplorum commemoratione non egeat. Una igitur illa Prophetae sententia contenti erimus, quae vel infirmissimum quemque confirmare potest: „Clamaverunt“ enim, inquit<sup>1)</sup>, „iusti, et Dominus exaudivit eos; et ex omnibus tribulationibus eorum liberavit eos.“

*VI. Quid mali nomine hic intelligatur, et quae huius petitionis sit sententia.*

Sequitur huius vis et ratio petitionis, ut fideles intelligent, non omnino petere nos hoc loco, ut a malis omnibus liberemur. Sunt enim quaedam, quae communiter mala putantur, quae tamen sunt illis fructuosa, qui patiuntur; ut ille „stimulus,“ qui Apostolo<sup>2)</sup> erat adhibitus, ut Dei gratia adiuvante „virtus in infirmitate“ perficeretur. Haec, si cognita sit eorum vis, summa voluptate pios afficiunt; tantum abest, ut a Deo petant, ut auferantur. Quare tantum ea mala deprecamur, quae nullam animae utilitatem afferre possunt; reliqua minime, modo aliquis inde salutaris fructus exsistat.

*VII. Quot et quanta sint malorum genera, a quibus liberari cupimus.*

Omnino igitur huic voci ea subiecta vis est, ut a peccato liberati, a temptationis etiam periculo, ab intimis extensisque malis eripiamur; ut tuni simus ab aqua, ab igne, a fulgure; ne grando noceat frugibus; ne annonae caritate, seditionibus, bello laboremus; petimus a Deo, ut morbos, pestem, vastitatem arceat; vincula, carcерem, exilium, prodiciones, insidias, ceteraque omnia prohibeat incommoda, quibus maxime terreri ac premi solet hominum vita; omnes denique flagitorum et facinorum causas avertat. Neque haec solum, quae omnium consensione mala sunt, deprecamur, sed illa etiam, quae pene omnes bona confitentur, dixitias, honores, valetudinem, robur, hanc ipsam vitam; petimus, inquam, ne ad malum, et ad animae nostrae exitium haec convertantur. Oramus etiam Deum, ne morte opprimamur repentina; ne in nos iram Dei concitemus; ne, quae impios manent, supplicia subeamus; ne igne purgatorii torqueamur; a quo ut alii liberentur, pie et sancte precamur. Hanc petitionem et in missa,

<sup>1)</sup> Gen. 12, 2. — 28, 12. — 14, 12. — 39, 2. I. Reg. 21, 14. Ps. 33, 18. <sup>2)</sup> II. Cor. 12, 7, 9.

et in litaniis sic interpretatur ecclesia, nos videlicet ea praeterita, praesentia, futura mala deprecari.

*VIII. Deus et impendentia mala arcet, et a praesentibus quan-*  
*doque mirabiliter eripit.*

Non uno autem modo Dei nos benignitas eripit a malis; nam impendentes prohibet calamitates, quo modo legimus magnum illum Iacob esse liberatum ab inimicis, quos in illum concitarat Sichimitarum caedes; exstat enim illud<sup>1)</sup>: „Terror Dei invasit omnes per circuitum civitates, et non sunt ausi persecui recentes.“ Et quidem beati omnes, qui cum Christo Domino in coelis regnant, omnibus malis Dei ope liberati sunt; nos autem, qui in hac peregrinatione versamur, ab omnibus incommodis solutos esse minime vult; sed eripit a quibusdam. Etsi sunt instar liberationis malorum omnium ea solatia, quae dat interdum Deus iis, qui rebus premuntur adversis. His se consolabatur Propheta, quem illa dicebat<sup>2)</sup>: „Secundum multitudinem dolorum meorum in corde meo consolationes tuae laetificaverunt animam meam.“ Praeterea a malis homines liberat Deus, quem illos in summum discrimen adductos integros servat et incolumes; quod et pueris illis<sup>3)</sup> in ardorem fornacem coniectis, et Danieli<sup>4)</sup>, contigisse legimus, quem leones nihil laeserunt, quemadmodum neque pueros flamma violavit.

*IX. Diabolus hic malus dicitur, quod mali culpae auctor, et*  
*mali poenae exactor sit.*

Malus vero etiam ex sententia sanctorum Basillii Magni, Chrysostomi et Augustini praecipue dicitur daemon, quod hominum culpae, id est sceleris et peccati, auctor fuit; quo etiam ministro utitur Deus in repetendis poenis a sceleratis et facinorosis; dat enim Deus omne malum hominibus, quod illi peccati causa patiuntur. In quam sententiam loquuntur divinae literae illis verbis<sup>5)</sup>: „Si erit malum in civitate, quod Dominus non fecerit?“ item<sup>6)</sup>: „Ego Dominus, et non est alter, formans lucem, et creans tenebras, faciens pacem, et creans malum.“ Malus quoque dicitur ob eam causam, quod, etsi nihil eum laeserimus, tamen perpetuum bellum nobis infert, et capitali nos insectatur odio. Quod si nobis et fide armatis, et innocentia tectis nocere non potest, tamen nullum finem facit tentandi nos externis malis, et quacumque potest ratione divexandi. Quamobrem Deum precamur, ut nos a malo liberare velit.

<sup>1)</sup> Gen. 35, 5. <sup>2)</sup> Ps. 93, 19. <sup>3)</sup> Dan. 3, 21. <sup>4)</sup> Ib. 6, 22. 14, 39. <sup>5)</sup> Amos 5, 6  
<sup>6)</sup> Is. 45, 6. 7. Deut. 32, 23. III. Reg. 9, 7. Ier. 11, 2.

*X. Cur singulari, non autem multitudinis voce, a malo liberari petamus.*

Dicimus autem „a malo,“ non „a malis,“ ob id, quod mala, quae in nos a proximis proficiuntur, illi assignamus tanquam auctori et impulsori. Quo minus etiam proximis irasci debemus, quin odium et iracundiam in ipsum satanam convertere oportet, a quo homines ad inferendam iniuriam impelluntur. Itaque si te aliqua re laeserit proximus, quum preces facis parenti Deo, pete, ut non modo te liberet a malo, id est, ab iis, quas tibi proximus imponit, iniuriis, sed illum ipsum eripiat proximum ex diaboli manu, cuius impulsu homines in fraudem inducuntur.

*XI. Quo modo in malis affecti esse debeamus, etiam si continuu non liberemur.*

Illud denique sciendum est, si in precibus et votis non liberamur a malis, debere nos quae premant ferre patienter, intelligentes placere divino Numini, ut toleranter ea patiamur. Quare minime nos indignari aut dolere par est, quod preces nostras non audiat Deus; sed omnia ad eius nutum ac voluntatem referre oportet, existimantes id utile, id esse salutare, quod Deo placet, ut ita sit, non autem id, quod secus nobis videatur.

*XII. Quot et quanta commoda tribulationibus ad nos perveniant.*

Postremo docendi sunt pii auditores, dum in hoc vitae curriculo versantur, eos ad omne incommodorum et calamitatum genus non solum aequo, sed etiam gaudenti animo ferendum paratos esse debere. „Omnes“ enim, inquit<sup>1)</sup>, „qui pie volunt vivere in Christo Iesu, persecutionem patientur;“ item<sup>2)</sup>: „Per multas tribulationes oportet nos intrare in regnum Dei;“ rursum<sup>3)</sup>: „Nonne haec oportuit pati Christum, et ita intrare in gloriam suam?“ Non enim aequum est, servum esse maiorem domino suo, sicuti turpe est e sententia S. Bernardi<sup>4)</sup>, membra esse delicate sub spinoso capite. Praeclarum illud est exemplum Uriae propositum ad imitandum, qui adhortante Davide, domi ut se contineret, inquit<sup>5)</sup>: „Arca Dei, et Israel, et Iuda, habitant in papilionibus, et ego ingrediar domum?“ His instructi rationibus ac meditationibus si ad orandum veniemus, illud assequemur, ut si minis undique cincti, malisque circumdati quemadmodum tres illi pueri intacti ab igne, sic nos inviolati servemur: certe,

---

<sup>1)</sup> II. Tim. 3, 12. <sup>2)</sup> Act. 14, 21. <sup>3)</sup> Luc. 24, 26. <sup>4)</sup> Mat. 10, 24. <sup>5)</sup> Luc. 6, 40.  
Ie 15, 20. serm. 5. de omn. sanctis. <sup>6)</sup> II. Reg. 11, 11.

ut Machabaei<sup>1)</sup> , casus adversos constanter ac fortiter feramus. In contumeliis et cruciatibus sacros imitabimur Apostolos<sup>2)</sup>, qui caci verberibus vehementer laetabantur, quod digni habiti essent, qui pro Christo Iesu contumelias paterentur. Sic nos ita comparati, canemus illa summa cum animi voluptate<sup>3)</sup>: „Principes persecuti sunt me gratis, et a verbis tuis formidavit cor meum; lactabor ego super eloquia tua, sicut qui inventi spolia multa.“

## CAPUT XVII.

### De extrema orationis Dominicæ clausula:

A m e n.

#### *I. Quis usus et fructus sit huius particulae.*

Hanc vocem, sicuti est, signaculum orationis dominicæ appellat sanctus Hieronymus<sup>4)</sup> in Commentariis in Matthæum. Quare, ut admonuimus antea fideles de praeparatione, quae adhibenda sit, priusquam aggrediantur ad divinam precatiōnem: sic nunc faciendum duximus, ut clausulae ac finis ipsius precationis causam rationemque cognoscant. Non enim pluris est divinas preces diligenter ordiri, quam religiose absolvere. Sciat igitur fidelis populus, multos esse, et eos uberes fructus, quos ex dominicæ orationis fine percipimus: sed omnium uberrimus ac laetissimus fructus est eorum impetratio, quae postulavimus: de quo supra satis dictum est. Non solum autem consequimur postrema hac parte precationis, ut nostræ preces audiantur, sed quaedam etiam maiora ac praeclriora, quam ut verbis explicari possint.

#### *II. Quanta bona ex oratione ad homines promanant.*

Nam quum orando homines cum Deo colloquantur, ut S. Cyprianus ait<sup>5)</sup>, fit quodam inexplicabili modo oranti divina maiestas propior, quam ceteris, quem praeterea singularibus ornat muneribus; ut, qui pie Deum orant, quodam modo cum iis, qui ad ignem accedunt, comparari possint, qui, si algent, calescunt, si calent, aestuant: sic illi assistentes ad Deum, pro modo pietatis ac fidei ardentes evadunt; inflammatur enim eorum animus ad Dei gloriam, mens illustratur admirabilem in modum, omnino cumulantur divinis muneribus. Est enim illud proditum sanctis literis<sup>6)</sup>: „Praevenisti eum in

<sup>1)</sup> I. Mach. 2, 16. sq. <sup>2)</sup> Act. 5, 40. sq. <sup>3)</sup> Ps. 118, 161. sq. <sup>4)</sup> lib. 1. c. 6. — Eccl. 7, 9. <sup>5)</sup> de orat. dom. <sup>6)</sup> Ps. 20, 4.

benedictionibus dulcedinis.<sup>1)</sup> Exemplo est omnibus magnus ille Moyses<sup>1)</sup>, qui a Dei congressu et colloquio digrediens, divino quodam fulgore collucebat sic, ut Israelitae eius oculos et os intueri non possent. Omnino, qui vehementi illo studio preces faciunt, Dei benignitate ac maiestate admirabiliter perfruuntur. „Mane adstab“, inquit Propheta<sup>2)</sup>, „et videobo; quoniam non Deus volens iniuriam tu es.“ Haec quo magis noscunt homines, eo Deum vehementiori cultu ac pietate venerantur; eo etiam sentiunt iucundius, quam suavis sit Dominus, et quam vere beati sint omnes, qui sperant in eo; tum vero clarissima illa luce circumfusi, quanta sit eorum humilitas, quanta sit Dei maiestas, considerant. Est enim illa sancti Augustini<sup>3)</sup> regula: „Noverim te, noverim me.“ Itaque fit, ut suis viribus diffidentes totos se committant Dei benignitati, minime dubitantes, quin is ipsos paterna illa sua et admirabili caritate complexus, abundantanter iis omnia suppeditet, quae sint ad vitam et salutem necessaria; hinc se ad agendas Deo gratias convertant, quantas animo maximas capere possunt, quantas oratione complecti; quod magnum Davidem fecisse legimus, qui, quum ita prectionem instituisse<sup>4)</sup>: „Salvum me fac ex omnibus persequentibus me,“ sic eam absolvit: „Confitebor Domino secundum iustitiam eius, et psalam nomini Domini altissimi.“

*III. Qua ratione fiat, ut Sanctorum preces, a timore inchoatae, laetitia concludantur.*

Sunt eiusmodi Sanctorum preces innumerabiles, quarum exordium est timoris plenum, clausula spei bonae laetitiaeque referta; sed mirabile est, quam in eo genere eniteant Davidis ipsius precationes. Nam quum metu perturbatus sic orare esset exorsus<sup>5)</sup>: „Multi insurgunt adversum me, multi dicunt animae meae: non est salus ipsi in Deo eius:“ confirmatus aliquando gaudioque perfusus subiunxit paulo post<sup>6)</sup>: „Non timebo millia populi circumdantis me.“ Alio etiam Psalmo, suam quum deplorasset miseriam, ad extremum, Deo confusis, incredibiliter laetatur spe sempiternae beatitudinis<sup>7)</sup>: „In pace in idipsum,“ inquit, „dormiam et requiescam.“ Quid illa<sup>8)</sup>: „Domine ne in furore tuo arguas me, neque in ira tua corripias me?“ quanto cum tremore et pallore Prophetam dixisse credendum est? Contra, quae deinceps sequuntur, quam fidenti et laetanti animo? „Discedite a me,“ inquit<sup>9)</sup>, omnes, qui operamini iniuriam; quoniam exaudivit Dominus

<sup>1)</sup> Ex. 34, 35. II. Cor. 8, 13. <sup>2)</sup> Ps. 5, 5. <sup>3)</sup> Soliloq. I. 2. c. 1. <sup>4)</sup> Ps. 7, 2. 18.  
<sup>5)</sup> Ps. 3, 2. 3. <sup>6)</sup> v. 7. <sup>7)</sup> Ps. 4, 9. <sup>8)</sup> Ps. 6, 2. <sup>9)</sup> v. 9.

vocem fletus mei.“ Quum vero Saulis iram furoremque per timesceret, quam humiliter ac demisse Dei opem implorabat<sup>1)</sup>: „Deus in nomine tuo salvum me fac, et in virtute tua iudica me;“ et tamen hilare ac fidenter in eodem Psalmo subiecit<sup>2)</sup>: „Ecce enim Deus adiuvat me, et Dominus susceptor est animae meae.“ Quare qui se confert ad sacras preces, fide spe que munitus, parentem adeat Deum, ut se id consequi posse, quod ei opus sit, nullo modo diffidat.

*IV. Quo sensu illa vocula „Amen“ in fine hic usurpatur, et in missa sacerdoti pronuncianda reservatur.*

Sunt autem in extremo hoc divinae precationis verbo „Amen“ multa quasi semina quaedam earum rationum cogitationumque, quas diximus. Et quidem adeo frequens fuit haec Hebraea vox in ore Salvatoris; ut Spiritui sancto placuerit, ut in ecclesia Dei recineretur; cui voci illa quodam modo subiecta sententia est: scito, tuas auditas esse preces; habet enim vim respondentis, et illum, qui precibus quod velit impetrarit, cum bona gratia dimittentis Dei. Hanc sententiam perpetua ecclesiae Dei consuetudo comprobavit, quae in sacrificio missae, quum pronunciatur oratio dominica, non rei sacrae ministris, quorum partes sunt illa dicere: „Sed libera nos a malo,“ attribuit hanc vocem „Amen,“ sed ipsi sacerdoti accommodatam reservavit; qui, quum Dei et hominum sit interpres, Deum exoratum esse populo respondet.

*V. Cur in aliis precationibus minister, in hoc vero sacerdos Amen respondeat.*

Nec tamen hic ritus communis est omnium precationum, quippe quum in ceteris ministrorum sit munus respondendi „Amen,“ sed proprius dominicæ orationis. Nam in aliis prectionibus consensum modo desideriumque significat; in hac responsio est, Deum orantis postulationi consensisse.

*VI. Quo modo dictio „Amen“ varie exponatur.*

Ac varie quidem a multis est interpretatum hoc verbum „Amen.“ Septuaginta interpres verterunt „fiat;“ alii rediderunt „vere;“ Aquila „fideliter“ convertit; sed parvi refert, hoc an illo modo sit redditum; modo habere intelligamus eam vim, quam diximus, confirmantis sacerdotis, concessum id esse, quod petebatur; cuius sententiae testis est Apostolus in epistola ad Corinthios: „Quotquot enim,“ inquit<sup>3)</sup>, „promissiones Dei sunt in illo „est;“ ideo et per ipsum Amen Deo ad gloriam nostram.“ Est etiam haec nobis accommo-

<sup>1)</sup> Ps. 53, 3. <sup>2)</sup> v. 6. <sup>3)</sup> II. Cor. 1, 20.

data vox, in qua inest confirmatio quaedam earum petitionum, quas adhuc adhibuimus; quae etiam eos reddit attentos, qui dant operam sacris precibus; fit enim saepe, ut in preicatione distracti homines variis cogitationibus alio traducantur. Immo vero summo studio petimus hac ipsa voce, ut omnia fiant, id est concedantur, quae antea petivimus; vel potius intelligentes nos, iam impetrasse omnia, ac sentientes praesentem vim divini auxilii, illud una cum Propheteta canimus<sup>1)</sup>: „Ecce enim Deus adiuvat me et Dominus susceptor est animae meae.“ Nec est, quod quisquam dubitet, quin et nomine Filii sui, et verbo, quo saepissime is usus est, moveatur Deus, qui semper, ut ait Apostolus<sup>2)</sup>, „exauditus est pro sua reverentia;“<sup>3)</sup> „cuius est regnum, et potestas, et imperium, in saecula saeculorum.“

---

<sup>1)</sup> Pa. 53. 6   <sup>2)</sup> Hebr. 5. 7.   <sup>3)</sup> I. Petr. 4. 11. 5. 11. Iudae 25.

# Praxis Catechismi

seu

Catechismus in singulas anni Dominicas distributus  
et evangeliis accommodatus.

---

## Dominica I. Adventus.

*Erunt signa in sole et luna.* Luc. 21, 25. Hoc evangelium ad argumentum de iudicio generali traducendum est. Quare hic recurrat parochus ad articulum symboli, „Inde venturus est iudicare vivos et mortuos“ p. 63. prout faciendum praecipitur p. 12. Vel secundum aliarum ecclesiarum ritum :

*Ecce rex tuus venit tibi* Mat. 25, 5. Hic opportune tractabit parochus ea, quae de incarnatione, et causis adventus Christi habentur art. 2. et 3. symb. apost. p. 27. 34.

*Invenietis asinam alligatam — solvite.* S. Athanasius ostendit ex hoc loco Apostolis et eorum successoribus factam esse potestatem solvendi eos, qui peccatorum pondere pressi sunt; quare hic populo exponet parochus quae habentur de confessione p. 210. et absolutione p. 200. 216. de potestate remittendi peccata in ecclesia p. 87.

## Dominica secunda.

*Cum audisset Ioannes in vinculis.* Mat. 11, 2. Ioannis interrogatio tam sedula ostendit quanto cum studio curare debeamus, ut de rebus fidei et nos et ii, qui nobis subsunt, rite et a catholicis doctoribus instruamur. Vide quae huic argumento inserviunt initio catechismi usque ad primum symboli articulum.

*In vinculis.* Fides usque ad vincula, immo ad necem usque cum opus est, et a iudice urgemur, profitenda est; nec est satis eam pectore inclusam habere quantumvis rectam et sinceram, ut ostenditur p. 15.

**Dominica tertia.**

*Confessus est, et non negavit.* Io. 1, 20. Ex hoc loco simpliciter verum fateri docemur, nec intermiscere iusiurandum, ut nobis fides adhibeatur. Vide quanto et sub quibus poenis iurare prohibitum in 2. praecepto, p. 282.

*Quid ergo baptizas.* Agendum hic est de ministris baptismi, de quo p. 130. et quomodo sese habeant in dispensatione sacramentorum Christus dominus et minister, quantum ad effectum sacramenti p. 127.

*Cuius ego non sum dignus.* Hic monere parochus debet populum, ut se pro festis natalitiis ad sacram synaxin praepparet, et agere de condigna tanti hospitis susceptione; vide de preparatione ad eucharistiam p. 184.

**Dominica quarta.**

*Anno quintodecimo imperii Tiberii* Luc. 3, 1. Cur hic de principibus mundi fiat mentio eadem ratio afferri potest, quae affertur in art. 4. symb. de Pontio Pilato p. 41.

*Factum est verbum Domini super Ioannem.* Quoniam Ioannes nonnisi a Deo legitime vocatus officium verbi Dei prae-dicandi exercuit, ideo hic de legitima vocatione ministrorum ecclesiae parochus disseret, ut habetur de sacram. ordinis p. 237. legitimosque eos ministros non esse dicet, qui missi non sunt, uti est in praefatione p. 7.

*In deserto.* Hic de probitate et morum integritate ministrorum verbi Dei, qui sunt sacerdotes, agatur p. 250. et de castitate, quae eis indicitur, ut hab. p. 244.

*Praedicans baptismum poenitentiae.* Quomodo adulti, qui baptismum suspicere debent, affecti esse debeant, et praeteritae eos vitae poenitere, traditur p. 136, quomodo hic baptismus Ioannis repeti debuit p. 131.

*Parate viam Domini.* Hic de preparatione ad eucharistiam, de qua in superiori dominica, et de necessaria mandatorum Dei observantia, de qua p. 271. 279.

**In die nativitatis Domini.**

*Peperit primogenitum filium suum.* Luc. 2, 7. Expli-cetur art. symboli „Natus ex Maria virgine,“ qui est huius loci maxime proprius, de quo p. 38.

*In principio erat verbum.* Io. 1, 1. Quoniam hic locus, dum agitur de aeterna Christi generatione, adducitur p. 32. hinc parochus petet huius loci expositionem.

*Et verbum caro factum est.* Hic exponatur mysterium incarnationis prout habetur p. 34.

*Gloriam quasi unigeniti.* Quomodo hic unigenitus sit etiam frater noster, vid. p. 376.

**Dominica infra octavam Nativitatis.**

*Et tuam ipsius animam pertransibit gladius.* Luc. 2, 35. Ex hac Simeonis praedicatione ansam sumere poterit parochus explicandi, cur Deus fideles iam baptizatos, quos filios habet carissimos, non eximat ab incommodis vitae huius; vid. p. 241. et quo confugiendum tunc sit; vid. p. 358.

*Non recedebat a templo.* De privata et publica oratione habes p. 367. Quomodo ad orationem et ieumum et eleemosyna iungenda sint p. 370. et quomodo ista tria conducant ad satisfactionem peccatorum p. 227.

**In circumcisione Domini.**

*Ut circumcidetur puer.* Luc. 2, 21. Quoniam circumcisioni successit baptismus, hic in genere dici poterit de vi et efficientia sacramentorum novae legis supra antiquae legis sacramenta, ut hab. p. 119.

*Vocatum est nomen eius Iesus.* Quam convenienter hoc nomen inditum fuerit Christo, et quare, vid. p. 29. Observandum hic est etiam infantibus nunc in baptismo nomen esse imponendum; cuius rei quaenam sit ratio, et quale nomen imponi debeat, habes p. 149. Denique cum impositio nominis sit una ex ceremoniis in baptismo usitatis, hic de baptismi ceremoniis et ritibus apta concio haberi poterit; vid. p. 146.

**In die Epiphaniae.**

*Vidimus enim stellam eius.* Mat. 2, 2. Quoniam non inepte per hanc stellam philosophica de Deo scientia potest intelligi, sicut per responsum sacerdotum fidei lumen, non male hic adaptari poterunt quae de differentia sapientiae christianaæ a philosophica notitia habentur p. 16.

*Et procidentes adoraverunt eum.* Mat. 2, 11. Hic de adoratione Dei, quae latra dicitur, et simul de veneratione sanctorum, quae dulia nominatur, agatur; vid. expos. decal. p. 272; agi etiam potest de eucharistiae adoratione et veneratione; nam si eundem Christum, quem magi adoraverunt, praesentem in eucharistia agnoscimus et confitemur, ut disertis verbis probatur p. 170. si pii esse volumus, cur non aequa ac magi adorabimus? vid. p. 161.

**Dominica infra octavam Epiphaniae.**

*Secundum consuetudinem diei festi.* Luc. 2, 42. De observatione dierum festorum, lege p. 296.

*Et erat subditus illis. De officio liberorum erga parentes, vide p. 305.*

### Dominica II. post Epiphaniam.

*Nuptiae factae sunt. Io. 2, 1. De sacramento matrimonii vide p. 256.*

*Hoc fecit Iesus initium signorum. Haec conversio aquae in vinum valet plurimum ad confirmandos rudiores in fide transsubstantiationis, quae fit in s. altaris sacramento; de qua vide p. 177.*

### Dominica III. p. Epiph.

*Ecce leprosus veniens. Mat. 8, 2. Per lepram haeresim significari dicunt patres. Qui vero sunt censendi haeretici, et qui a castris ecclesiae, ut olim leprosi eiiciendi habentur p. 73. 76.*

*Vade, ostende te sacerdoti. De honore sacerdotibus Domini et ecclesiae praefectis exhibendo, vide p. 307.*

*Vade, ostende te sacerdoti. Longe excellentiorem virtutem nostris sacerdotibus tributam docet S. Chrysost. lib. 3. de sacerd., quam mosaicis, quod illi oblatis sibi leprosos non mundarent, sed mundatos tantum esse declararent; nostri vero hominem peccati lepra maculatum, dum absolutionis beneficium rite praeparato impendunt, vere emundant et perfectae sanitati restituunt. Hic de potestate clavium sacerdotibus concessa, ut habetur p. 200.*

### Dominica IV. p. Epiph.

*Ascendente Iesu in naviculam. Mat. 8, 23. Inter multa, quae ecclesiam repreäsentant, est navicula illa seu arca Noe, de qua p. 76. Hic ergo de ecclesia catholica et notis quibus internoscitur, parochus agere poterit, prout habetur p. 77.*

*Domine salva nos, perimus. Quoniam nullum est tempus in quo ita hominum vita, quam in propinquuo animae exitu periclitetur; ideo parochus ex hoc loco hortari poterit suos, ut cum mortis dies instabit, ad Deum maxime recurrent, et extremae unctionis sacramentum accipient, de quo p. 229.*

*Qualis est hic, quia venti et mare obediunt ei. Quomodo creaturae omnes eum, quem a Deo ab initio acceperunt, cursum teneant homine dempto, vide p. 384.*

### Dominica V. p. Epiph.

*Et inimicus homo superseminavit zizania. Mat. 13, 25. In ecclesia duo sunt hominum genera, bonorum, qui tritici nomine designantur; improborum nomine zizaniorum, vide p. 76. Vel per zizania intelliguntur odia atque rixae, quos pater dis-*

sensionis diabolus seminare conatur in agro filiorum pacis, cuius morbi remedium habes p. 385.

*Inimicus homo hoc fecit.* De odio daemonum in nos, et ad tentandum audacia et perversitate, vide p. 420. et ut omnis mali culpe auctor, male vero poenae sit exactor, vide p. 421.

#### Dominica VI. p. Epiph.

*Simile est regnum coelorum grano sinapis.* Mat. 13, 31. Quoniam iuxta doctores per granum sinapis fides intelligitur, hic tractanda sunt, quae de eius necessitate habentur p. 13. et quomodo scrutanda non sint ea, quae fide credenda propounduntur p. 15. et eius excellentia, et quantum differat de Deo sapientia a philosophica divinarum rerum notitia, p. 16.

*Cum autem creverit.* Fidem augeri posse, vide p. 367.

*Iterum simile regnum coelorum fermento.* Hanc mulierem ecclesiam interpretantur, quae in doctrina fidei auctorum, per fermentum designata, errare non posse traditur p. 76. 82.

*Donec fermentatum est totum.* Hic de communione sanctorum et meritorum participatione explicari possunt, quae sunt p. 83.

#### Dominica in Septuages.

*Simile est regnum coelorum patrifamilias.* Mat. 20, 1. Hic paterfamilias est Deus, qui cur pater dicatur, habes p. 19. 370.

*Receperunt ipsi singulos denarios.* Denarii nomine colestis beatitudo designatur, quam hic paterfamilias alacriter et sincere in vinea sua, id est in cultura mandatorum divinorum et borantibus praestat. De hoc vitae aeternae denario lege p. 101. 265. 271. 383. Huius vero beatitudinis consequendae certam viam, ac rationem habes p. 352. 389. Item exhortatio ad colendam hanc vineam mandatorum illustris habetur p. 266.

*Singulos denarios.* In coelo tamen varietas est mercedis et gloriae, pro ratione laboris et affectus, quo quis operatur, p. 97. 105.

#### Dominica in Sexages.

*Exiit qui seminat.* Luc. 8, 5. Semen hoc in terram sparsum est verbum Dei exponente Domino, de quo vide p. 406. et quomodo sit audiendum vide praefat.

*Venit diabolus.* De daemonis conatu et impugnatione habes p. 420.

*Et a sollicitudinibus et divitiis.* Quantum divitiae et effrenes rerum temporalium cupiditates impedianc huius divini seminis fructum, habes p. 351.

**Dominica in Quinquages.**

*Tradetur enim gentibus.* Luc. 18, 32. Ut Christi milites eius crucem tamquam vexillum sui ducis contuentes ad arma poenitentiae sumenda instimulentur, ideo hoc evangelium ineunte quadragesima legitur, quod passionis dominicae summam complectitur, quo loco non importune exponetur, quae de passione Domini fuse traduntur p. 42.

*Caecus quidam sedebat iuxta viam.* Hic caecus genus humanum denotat, de cuius post peccatum statumisero vide p. 392.

*Iesu fili David miserere mei.* Hic quomodo Deum aliter oremus ac sanctos ex hac formula demonstrabis, ut habes p. 363. Porro si angustiis, aut tribulationibus premimur, aut re aliqua indigemus, ad Dominum cum hoc caeco nobis recurrentum est, precibusque sollicitandus Deus, ut nobis adsit. Vide de necessitate et utilitate orationis p. 354.

*Quid tibi vis faciam.* Hic causas, ob quas clementissimus Deus vult a nobis rogari, etiam si sciat, quibus rebus indigeamus, ex p. 356. proferes.

**Feria IV. cinerum.**

*Cum autem ieunatis.* Mat. 6, 16. Cum quadragesimae ieuniunum eo nomine sit institutum, ut totius anni peccata hac quasi solemnii multa redimeremus, hodie excitari fidelis populus debebit ad poenitentiam amplectendam, de cuius necessitate scribitur p. 208. docere quibus gradibus ad poenitentiam licet ascendere, p. 197. et quibus operum generibus pro peccatis satisfacere possimus, p. 225.

*Nolite thesaurezare vobis thesauros in terra.* Vide adversus eos qui opes congerere student p. 327.

*Thesaurizate vobis thesauros in coelo.* Quoniam parochi frequenter fidelem populum ad eleemosynas pauperibus erogandas exitare debent, hic studiose istud praestabunt ex his quae habentur p. 332.

**Dominica prima Quadragesimae.**

*Ut tentaretur a diabolo.* Mat. 4, 1. Cum sit tentatio vita hominis super terram (Iob 7, 1.) hic de tentatione agendum; de generibus temptationum; ad quid permittantur homines tentari; quibus armis temptationibus resistendum, et cetera huiusmodi, quae habentur p. 420.

*Non in solo pane vivit homo.* De pane spirituali, de quo hic agit Christus, vide p. 407.

*Angelis suis Deus mandavit.* De angelorum custodia erga homines vide p. 371.

*Deum adorabis.* De adoratione Dei, quae fide, spe et caritate perficitur, vide p. 272.

### Dominica II. Quadrag.

*Assumisit Iesus Petrum.* Mat. 17, 1. Hic afferri possunt ea, quae de loco et tempore, quo homines ad divina contemplanda aptiores sunt, habentur, p. 270.

*Bonum est nos hic esse.* Hic tractari possunt, quae de summa eorum dignitate, qui Deo obediunt, habentur p. 393. vel de intimis hominum sanctorum gaudiis, p. 406. Poterunt etiam parochi de duodecimo articulo hic habere sermonem, de quo p. 99.

*Hic est filius meus dilectus.* Hic de aeterna filii generatione latissimus sese offert dicendi campus, de qua p. 31.

### Dominica III. Quadrag.

*Erat Iesus eiiciens daemonium.* Luc. 11, 14. Daemonis proprium est eum, quem possidet, reddere mutum, id est, a peccatorum confessione revocare. Sed tamen non est alia ratio eiiciendi daemonis, quam ut linguam solvas ad detegendum coram sacerdote peccatum, vide quae de confessione habentur p. 210.

*Omne regnum in seipsum divisum desolabitur.* Ecclesia est Christi regnum, ut habetur p. 386. Id autem ut in seipsum non sit divisum, unum esse necesse est, unde hic de unitate ecclesiae agendum est ex p. 78.

*Revertar in domum meam.* De relabentium in peccata gravitate, p. 46. 418. Et quid post confessionem agendum, p. 226.

*Tunc assumit alios septem.* Hic locus p. 421. inducitur ad probandum non unum tantum daemonem, sed plures etiam interdum hominem tentare; patet autem ex hoc loco daemonem acrius eos tentare, qui ab eo defecerunt, ut est p. 419.

*Beatus venter, qui te portavit.* Glorificatione beatae Mariae virginis hoc evangelium concluditur, de qua habes p. 36. 363.

### Dominica IV. Quadrag.

*Unde ememus panes?* Io. 6, 5. Hic apte explicari poterit illa petitio dominicae orationis „Panem nostrum quotidianum da nobis,” p. 399. Notandum praeterea, quod panis iste etiam vim habebat sedandi sitim, ut docent doctores. Ita et panis eucharistiae laicis pro calice est; lege de communione sub una specie p. 189.

*Hoc autem dicebat tentans eum.* Quomodo Deus hominem tentet, vide p. 422.

*Distribuit discubentibus.* Christus non distribuit, sed

dedit apostolis, et illi distribuerunt turbae (Mat. 14, 19.). Sic a mundi initio per patriarchas et prophetas, et postea per apostolos eorumque successores Deus verbum suum et sacramenta subministrat, ut habetur p. 171 sq. Christus tamen est, qui haec omnia praecipue efficit, p. 116.

*Hic est vere propheta.* De gratiarum actione vide p. 357  
Cf. Dom. VI. post Pent.

#### Dominica Passionis.

*Quis ex vobis arguet me de peccato.* Io. 8, 46. Innocentia Christi in hodierno evangelio convenienter profertur in medium, ut in promtu sit nobis causa dominicae passionis, quam hodie repraesentare incipit ecclesia, nimirum non propter illius delicta, sed nostra; de causis passionis Christi habes, p. 45.

*Si veritatem dico vobis.* Hic a mendacio cavere docebatur, de quo multa p. 341.

*Qui ex Deo est, verba Dei audit.* De verbo Dei audiendo p. 9. 406.

*Nonne bene dicimus nos, quia Samaritanus es?* Ex hoc loco parochus ansam poterit accipere ad excitandos suos ad iniurias condonandas, qua de re multa habentur p. 362. 414.

*Sed honorifico patrem, et vos inhonorastis me.* Christus saepe et a multis graviter inhonoratur, sed ab iis maxime, qui eius verbum vel male interpretando, vel ad vana convertendo polluant, de quo p. 291.

*Tulerunt ergo lapides.* Ex hoc loco perspici potest et tempus et genus mortis a Christo delectum fuisse, qua de re p. 43.

#### Dominica Palmarum.

Vide: Dominica prima Adventus Nro. 2 et 3. Ceterum quoniam ad eucharistiam percipiendam ex pracepto ecclesiae eo tempore omnes discretione praediti obligantur, ideo ex his evangelii verbis „Ecce rex tuus venit tibi“ ad eius sumptionem fideles hortari poterit parochus ex his, quae habentur p. 160. Et quoniam parentes ut plurimum negligentissimi sunt ad liberos suos ad eucharistiae perceptionem praestandos, ideo eis maxime inculcabitur quidquid de aetate, qua pueri ad eam percipiendam tenentur, habetur p. 188.

*In die sancto parasceves.* Hoc die quoniam solemnis de mysterio passionis Christi concio haberi solet, ideo praeter ea, quae in expositione art. 4. symboli habentur p. 41. haec insuper hoc die tractari posse videntur: de singulari amore, quo Deus genus humanum prosecutus est, cum illud morte unigeniti filii sui redimere voluerit, de quo p. 374. de primi pa-

rentis lapsu et miseriis, quae illum consequutae sunt, de quibus p. 27. 385. quomodo ex passione Christi omnis remissio peccatorum emanarit, de quo p. 110. 408. et proinde omnia sacramenta ex hac Christi passione virtutem acceperint, ut est p. 89. 119. de sacrificio Christi, de quo p. 192. denique quomodo nulli unquam patuit, sed nec patere quidem potest aditus ad regnum coelorum sine hac redemtionis humanae per Christum fide, ut est p. 27. idque esse summam et cardinem totius christianaee religionis, scire Iesum Christum, et hunc crucifixum, ut habetur p. 9.

#### **Dominica Paschae.**

*Surrexit, non est hic.* Marc. 16, 6. De resurrectione Domini exponetur art. symboli „Tertia die resurrexit a mortuis“ p. 52.

#### **Feria secunda Pasch.**

*Duo ex discipulis ibant.* Luc. 24, 13. Quoniam fieri vix potuit, ut parochus omnia, quae ad resurrectionem Christi pertinent, pridie explicuerit, ideo hoc die poterit ea, quae praetermisit ex eo loco repetere.

*Oportuit pati Christum.* Hic locus est proprius causas exponendi, ob quas necesse fuit Christum resurgere, quae habentur p. 55. et exemplo Christi fideles hortandi, ut omni studio incumbant, ut coelesti regno potiantur, quod habetur p. 389. et de commodis tribulationis, p. 375. 432.

*Accepit panem.* Hoc loco probetur utramque eucharistiae speciem laicis necessario non exhibendam, de quo multa p. 188.

#### **Feria III. Pasch.**

*Stetit Jesus in medio discipulorum.* Luc. 24, 36. Hic de quatuor dotibus corporis gloriosi agi potest, ut habetur p. 97.

*Pax vobis.* Quoniam regnum Dei, teste Apostolo, pax est et gaudium in Spiritu sancto, hic quale sit regnum Christi in pios tractari potest, ut habetur p. 389.

*Praedicari in nomine eius poenitentiam.* Quomodo poenitentiae praedicatio a Christo Apostolis iniuncta sit, ex hoc ipso loco probatur p. 86. Unde potest tam ex expositione artic. de remissione peccatorum, quam ex his, quae de sacramento poenitentiae hic habentur, longissimam habere concionem.

#### **Dominica I. post Pasch.**

*Cum sero esset die illa.* Io. 20, 9. Christi resurrectionis exemplar quam maxime stabilire necesse fuit, ut pariter nostra stabiliretur; quibus autem tum scripturis, tum rationibus nostra stabiiliatur resurrectio, vide p. 91.

*Una sabbatorum*, quid sit, vide p. 297.

*Quorum remiseritis peccata*. Io. 20, 23. De potestate clavium sacerdotibus concessa, p. 87. 239.

*Mitte digitum tuum in loca clavorum*. Qualia futura sunt corpora post resurrectionem, et cur Christus et martyres cicatrices retinebunt, habes p. 97.

#### Dominica II. post Pasch.

*Ego sum pastor bonus*. Io. 10, 11. Pastorum nomine comprehenduntur non solum episcopi et animarum rectores, sed etiam reges, magistratus, parentes et magistri. Quid vero pastores eiusmodi ovibus debeant et quid vicissim oves pastribus, habes p. 7. 304.

*Et fiet unus ovile et unus pastor*. Hic de unitate ecclesiae, de qua p. 79. uno quoque universalis ecclesiae pastore divo Petro, et Petri successore, romano Pontifice, de quo p. 78. 248.

*Mercenarius, qui non est pastor*, vide p. 238.

#### Dominica III. post Pasch.

*Modicum et non videbitis me*. Io. 16, 16. Efficax consolationis genus, dum temporarius moeror pro Christo suscep-tus, aeternis gaudiis compensatur; vide quae de vita aeterna habentur p. 102.

*Vos vero contristabimini*. Quare perversi minus, pii vero acrius a daemonibus infestentur, et proinde illi gaudeant, isti vero tristentur, vide p. 420.

*Tristitia vestra vertetur in gaudium*. Spe futurorum bonorum quo modo alaci et constanti animo adversa omnia tolerare debeamus, vide p. 101. et cur Deus sinat affligi bonos, p. 424.

#### Dominica IV. post Pasch.

*Si enim non abiero, paracletus non veniet*. Io. 16, 7. De Spiritu sancto, deque admirandis eius affectibus et donis, habes p. 67.

*Arguet mundum de peccato*. Spiritus sancti proprium munus est, corda et compunctionem movere, et peccantem intrinsecus arguere. Quae autem contritio vera sit, quasque res ea habere debeat, vide p. 203. Huc etiam referri possunt ea, quae de peccatis, quae remitti non possunt, habentur p. 202.

#### Dominica V. post Pasch.

*Si quid petieritis Patrem in nomine meo*. Io. 16, 23. De oratione et eius adiunctis hic proprius est dicendi locus, de qua p. 353.

*Usquemodo non petistis quidquam.* Hic proprie de modo, quo Deum per Christum orare debemus, de quo p. 353. Hic etiam locus adducitur ad probandum in nomine Iesu Christi orandum esse.

#### In festo Ascensionis Domini.

*Assumptus est in coelum.* Marc. 16, 19. Hoc in loco art. symb. qui de ascensione est, explicabitur, ut habetur p. 58.

#### Dominica post Ascensionem Dom.

*Cum autem venerit Paracletus, qui a Patre procedit.* Io. 15, 26. Hic de processione Spiritus sancti a Patre et Filio, ex p. 71.

*Ut omnis qui vos interficit.* Io. 16, 2. Hic praeceptum decalogi „Non occides“ exponi poterit, de quo p. 311.

*Arbitretur se obsequium praestare.* De omnibus adversis et calamitatibus huius vitae idem iudicandum est, quod de his, quae Christi causa patimur, nempe eas esse magnum Dei in nos benevolentiae signum, ut habetur p. 224.

#### In festo Pentecost.

*Si quis diligit me, sermonem meum servabit.* Io. 14, 23. Spiritus sanctus ideo creditibus datur, ut sermonem Dei, qui decalogo comprehenditur, servare possint; ad quam rem ut promtiores sint, afferat parochus quae habentur initio explicationis decalogi p. 264. vel quoniam hic locus adducitur ad probandum Dei mandata non esse impossibilia, ideo de hac re aget ex p. 267. Vel hodie exponet quae traduntur de confirmationis sacramento p. 150. quando quidem tali die Apostolos a Spiritu sancto confirmatos fuisse docent patres.

#### Feria II. post Pentec.

*Sic enim Deus dilexit mundum.* Io. 3, 16. Hic locus proprius est ad ea populo exponenda, quae de eximia caritate coelestis Patris in genus humanum in creatione et gubernatione demonstrata; sed multo magis in redemptione habentur p. 39. 371.

*Ut omnis qui credit in eum, non pereat.* Hic quo modo fides in Christum omnibus hominibus ab omni aevo necessaria fuerit, docendum est ex p. 27.

*Qui credit in eum non iudicatur.* De verbo „credere“ habes p. 15. quae hic accommodare poteris; ex qua etiam dicendi forma Filium Dei vere Deum esse demonstrabis ex p. 31. 40.

*Quia non credit in nomine unigeniti Filii.* Quo modo Dei Filius sit unigenitus, poteris declarare ex his, quae ha-

bentur p. 32. et contra qua ratione hic unigenitus fratres habeat, p. 31. 377.

### Feria III. post Pent.

*Qui non intrat per ostium.* Io. 10, 1. Hic explicentur, quae de legitima ordinatione ministrorum ecclesiae habentur p. 237. de legitimo ministro sacramenti ordinis, p. 248.

*Et oves vocem eius audiunt.* De obedientia et honore, qui debetur episcopis et sacerdotibus agitur p. 307.

*Alienum autem non sequuntur.* Haereticorum ministros non esse sequendos, vide p. 7. qui autem eos sequuntur, non oves sed hoedi sunt, p. 419.

### In festo SS. Trinitatis.

*Data est mihi omnis potestas.* Mat. 28, 18. Hic explicanda sunt quae de regno Christi in pios, et ratione, qua regnat in suis fidelibus, habentur, p. 386. de regno etiam gloriae eiusdem, p. 387. item de potestate ipsius in sacramentis tam instituendis quam conferendis, p. 116. et de potestate item clavum eiusdem qua remittuntur peccata p. 119. 200.

*Baptizantes eos.* Hic locus adducitur ad probandum, quo tempore baptismus obligare cooperit, p. 129. et ideo de necessitate eiusdem, et praesertim in infantibus, ea proferri possunt quae habentur p. 134.

*In nomine Patris et Filii et Spiritus sancti.* Hic de materia et forma baptismi, quae sunt p. 124. accurate agendum est. Hic etiam de ss. trinitatis mysterio poterit agi, de quo p. 20. docebunt autem praesertim vulgus imperitum sanctissimam trinitatem pingi et formari non posse, atque adeo, si quando pingatur, illam picturam proprietates quasdam illius exprimere, ut habetur p. 277.

*Docentes eos servare quaecumque mandavi.* Hic de necessitate et possibilitate legis divinae proferrentur, quae habentur p. 267.

### In eadem Dominica.

*Estote ergo misericordes.* Luc. 6, 36. Ut Christus nobis condonet prius condonare ipsi debemus iis, a quibus laesi fuerimus. Vide explicationem illius petitionis: „Dimitte nobis debita nostra“ p. 408.

*Date et dabitur vobis.* Hic de communicandis cum proximiis huius vitae subsidiis produci possunt quae habentur p. 405. vel de eleemosynis, p. 370.

*Hypocrita eiice primum trabem.* De hypocritis, quorum orationes Dominus reiicit, habes p. 369.

**In festo Corporis Christi.**

*Caro enim mea vere est cibus.* Io. 6, 56. De Eucharistiae sacramento p. 160.

**Dominica II. post Pent.**

*Homo quidam fecit coenam.* Luc. 14, 16. Coenae nomine, quae sub finem diei sumitur, coelestis gloria nobis significatur, quam hic paterfamilias in ipsa vitae clausula beatis donabit; in hoc argumentum vide quae ponuntur p. 100. Vel coenae nomine cum Paulo I. Cor. 11, 20. intelligitur Christi corpus in sacramento altaris, de quo vide p. 160.

*Et coeperunt omnes simul excusare.* Quoniam omnes hae excusationes ex mala concupiscentia proveniunt, ideo hic adversus concupiscentias pravas agendum erit ex p. 346. simulque miseria nostra ob oculos ponenda, qui ea respuimus, quae salutaria nobis sunt, rebus autem perniciosis nos addicimus, ut hi fecerunt, p. 360. 392.

*Villam emi.* Vide in superlos et ambitiosos, qui per hunc designantur, quae habentur p. 351. 365.

*Iuga bonum emi quinque.* Vide in avaros p. 332.

*Uxorem duxi* Hic detestanda libido, et commendanda continentia et castitas, quae aditum nobis ad celorum regnum facilem praebet, vide p. 321.

**Dominica III. post Pent.**

*Gaudium erit in celo super uno peccatore.* Luc. 15, 7. Inter cetera, quae ad poenitentiam agendam peccatorem existimare debent, est ista coelitum laetitia, qua perfuruuntur ob peccatoris conversionem; plura habes p. 86. 195. 430.

**Dominica IV. post Pent.**

*Cum turbae irruerent, ut audirent verbum.* Luc. 5, 1. Vide exhortationem ad audiendum diligenter verbum Dei, p. 7. et quo modo pro captu cuiusque tradenda sit doctrina evangelii p. 10. idque praesertim diebus festis audiendum p. 299.

*Ascendens in navem, quae erat Simonis.* Petri navem non alterius ex Apostolis ingressus est Christus, ut hoc suo facto insinuaret Petrum cum successoribus caput esse et principem pastorum ecclesiae; vide p. 78. 248.

*Exi a me Domine.* Qui ad sacram synaxim accedunt, hoc exemplo, et Centurionis, agnoscant esse se tanti hospitis praesentia indignissimos; vide quae de praeparatione eucharistiae traduntur p. 184.

**Dominica V. post Pent.**

*Dictum est antiquis: Non occides.* Mat. 5, 33. Huius loci erit hoc decalogi praeceptum exponere, prout habetur p. 311.

*Dico vobis: omnis qui irascitur.* Haec verba exposta vide: p. 314.

*Dictum est antiquis: Non moechaberis.* Exponatur hoc praeceptum, de quo habetur, p. 318.

**Dominica VI. post Pent.**

*Misereor super turbam.* Marc. 8, 2. Poterit parochus ea huc proferre, quae de paterna Dei circa homines cura habentur, p. 374.

*Si dimisero eos ieiunos deficient.* Hic de imbecillitate hominum, qui nullum opus Deo gratum sine adiumento Dei possunt instituere, agendum est, ut habetur, p. 392.

**Dominica VII. post Pent.**

*Attendite a falsis prophetis.* Mat. 7, 15. Hic cavendum praecipitur ab haereticis; quis vero censendus sit haereticus habes p. 77. Quomodo autem hi, cum in ecclesia non sint, ab ea puniri possint, habes ibid. et p. 82. Quibus autem artibus hi falsi prophetae utantur ad impia sua dogmata diffundenda, habes p. 8.

*In ignem mittetur.* De hoc igne infernali, p. 66.

*Qui facit voluntatem patris mei.* Haec sententia est velut methodus brevissima, docens qua ratione ad regnum coelorum pervenire possimus; quare quicumque cupimus illud adipisci, hanc sententiam pree oculis habere debemus, vide p. 394. et deinceps ubi tertia petitio „Fiat voluntas tua sicut in coelo et in terra“ explicatur.

**Dominica VIII. post Pent.**

*Redde rationem villicationis tuae.* Luc. 16, 2. De ratione reddenda, cum unusquisque migrat e vita, vide p. 63.

*Facite vobis amicos de mamona.* Ideo divites a Deo bonis cumulantur, ut pauperibus ea erogent, p. 408. Hic ad eleemosynas suos poterit exhortari parochus, prout est p. 332. Hic etiam locus pro intercessione sanctorum facilit, de qua p. 274.

**Dominica IX. post Pent.**

*Flevit super illam.* Luc. 19, 41. Flet Christus, ut nos flere doceat. Quomodo in poenitudine erratorum sint adhibendae lacrymae, et quam diligenter procurandae, habes p. 206. ubi de contritione agitur.

*Quia si cognovisses.* Summa est status nostri miseria. nostram miseriam non agnoscere, vide p. 391.

*Quia venient dies in te, et circumdabunt te. Ierusalem in exemplum ponitur eius hominis, qui multis a Deo beneficiis ornatus, male eis in sui perniciem abutitur, vide p. 422.*

**Dominica X. post Pent.**

*Haec apud se orabat. Luc. 18, 11. Quibus virtutibus oratio debeat esse comitata, ut Deo placeat, et ab eo exaudiatur, vide p. 367.*

*Deus propitius esto mihi peccatori.* Hoc veri poenitentis exemplum inter alia proponitur p. 417. Quare cum istius, tum aliorum exemplo, qui habentur ibidem et p. 209. ad veram poenitentiam fideles excitentur. Est praeterea exemplum eorum, qui cum peccatores sint, Deum orant et exaudiuntur, p. 358. Denique quanta humilitate ad Deum precaturi accedere debeamus hic demonstratur, p. 366.

*Qui se exaltat, humiliabitur.* Christi humilitatis exemplum maximum pondus habet ad nostram superbiam deprimentam, p. 39.

**Dominica XI. post Pent.**

*Et deprecabantur eum. Marc. 7, 32. Istorum exemplo, qui Christum pro surdo et muto ad eum adducto, ut sanaretur, interpellant, monemur pro aliis orare; quo modo vero id faciendum, et pro quibus orandum, habes p. 361.*

*Misit digitos in auriculas eius.* Christi exemplo, pueris in baptismo aures, oculi, pectus, humeri signo crucis recte insigniuntur. Vide de his et aliis baptismi ceremoniis et earum significazione p. 145.

*Suspiciens in coelum ingemuit.* Cum Deus sit ubique, potius in coelum quam alio oculos convertamus, et cur in coelis esse dicatur, p. 378. Praeterea quoniam sacrae literae nos surdos et caecos, et omnibus membris captos saepe appellant, ut habetur, p. 411. hic de malis, quae peccatum invehit, ut ibidem habetur, disserere parochus commode poterit.

**Dominica XII. post Pent.**

*Diliges Dominum Deum tuum. Luc. 10, 27. Propontur, quae habentur initio explicationis decalogi p. 265. usque ad secundum praeceptum. Cf. Dom. XVII. p. Pent.*

*Homo quidam descendebat a Ierusalem in Iericho.* Hominis huius ita miserabiliter a latronibus vulnerati nomine doctores intelligent humanam naturam post Adae lapsum, quae, quot, qualia et quanta vulnera acceperit, habes p. 30. 385. 391. 401.

*Samaritanus autem infundens oleum.* Hic de sacramentis agat parochus, quae a nostro Samaritano, id est a

Christo instituta sunt, tamquam remedia humanae naturae, per Adae lapsum inficta, ut habetur p. 112.

*Curam illius habe.* Nota genus humanum et ecclesiam uni homini a Christo commissam, qua de re vide p. 78. 248.

*Quis horum videtur fuisse proximus.* Ex hoc loco quis sit proximus explicatur p. 336.

#### Dominica XIII. post Pent.

*Iesu praceptor miserere nostri.* Luc. 17, 13. De nomine Iesu vide p. 29.

*Ite ostendite vos sacerdotibus.* Cf. Dom. II. post Epiph. vide praeterea p. 212. ubi hic locus adducitur. Quomodo item beneficio contritionis peccata remittantur, ex hoc loco probatur, p. 209. quae tamen confessionem requirit, ut habetur p. 210.

#### Dominica XIV. post Pent.

*Ne solliciti sitis animae vestrae.* Mat. 6, 25. Quantum immoderata sollicitudo congerendarum opum, ceteraque cupiditates animae saluti obsint, vide p. 348. et huius morbi medium habes p. 351.

*Scit pater vester.* Etiamsi Deus sciat desideria nostra et indigentiam, cur ei preces porrigamus, p. 356.

*Quaerite primum regnum Dei.* De iis quae petenda sunt et quo ordine, habetur p. 360. 379. Porro hic commode secunda petitio dominicae orationis tota explicabitur, ut habetur p. 383.

*Et haec omnia adiicientur vobis.* Quatenus temporalia petenda, p. 400.

#### Dominica XV. post Pent.

*Et resedit, qui erat mortuus.* Luc. 7, 15. Si hic mortuus et quidam alii sint revocati ad vitam, quomodo intelligendum quod Christus primus omnium resurrexerit, vide p. 53. Hic tractari poterit art. symboli de carnis resurrectione, p. 91.

#### Dominica XVI. post Pent.

*Si licet sabbato curare.* Luc. 14, 3. De sanctificatione dierum festorum, et a quibus tunc abstinendum quidve agendum sit, habes p. 293.

*Cum invitatus fueris.* Hic locus est cohortandi christianos omnes, ne alii aliis se preferant, ut est p. 377. neve ambitiosi sint honorumque cupiditores, ut est p. 39.

#### Dominica XVII. post Pent.

*Diliges Dominum Deum tuum.* Mat. 22, 37. Cf. Dom. XII. post Pent.

*Quid vobis videtur de Christo.* Christus quomodo sit Davidis filius, vide p. 29. Quomodo item non sit filius David ratione divinitatis, habes p. 32.

**Dominica XVIII. post Pent.**

*Videns autem Jesus fidem eorum.* Mat. 9, 2. Ecce quantum fide aliena moveatur Deus ad aliquod donum alteri non modo non petenti, sed ne cogitanti quidem, impertendum. Hinc fit ut in baptismo infantes regenerationis fiant participes, non quia mentis suae ascensione credant, sed quia susceptorum vel parentum, si fideles fuerint, sin minus, ecclesiae catholicae fide muniantur, p. 135. et de patrinis, p. 131.

*Remittuntur tibi peccata tua.* Christum hominem ex hoc loco probatur primum omnium potestatem remittendorum peccatorum habuisse, p. 89. Porro dum sacerdos iurisdictionem habens ordinariam vel delegatam, rite poenitenti peccata remittit, non minus absolvitur quam hic paralyticus, quantum est ex parte sacramenti. De forma absolutionis habes p. 200.

*Hic blasphemat.* De blasphemia habetur p. 291. de iuramento p. 284.

**Dominica XIX. post Pent.**

*Fecit nuptias filio suo.* Mat. 22, 2. Quibus de causis vir et mulier coniungi debeant, vide p. 255. et quae sponsae magis sunt quaerendae p. 256. et de mutuis viri et mulieris officiis, p. 261. et quod Deum orandi causa certis temporibus a matrimonii officio abstinere debeant, p. 264. item de tribus matrimonii bonis, p. 260.

*Contumeliis affectos occiderunt.* De contumelia, detractione, murmuratione ceterisque vitiis, quibus proximus laeditur, vide p. 338.

*Non habens vestem nuptialem.* Hanc vestem designat vestis candida, vel sudariolum, quod baptizatis datur, de quo p. 149.

*Mittite in tenebras exteriores.* De sententia et poena damnatorum p. 66.

**Dominica XX. post Pent.**

*Erat quidam regulus, cuius filius infirmabatur.* Io. 4, 16. Unde tot miseriae et adversitates, et quae quotque illae sint p. 385. 401. Quo in malis et rebus adversis confugiendum p. 426. 428. Hic exponi poterit ultima dominicae orationis petitio: „sed libera nos a malo,“ p. 427.

**Dominica XXI. post Pent.**

*Redde quod debes.* Mat. 18, 28. Restitutio poenitenti est necessaria antequam absolvatur, quia „non dimittitur pecca-

tum, nisi restituatur ablatum, " secundum August. vide p. 327  
Item de furto, rapina, usuris et aliis rerum usurpationibus, p. 328.

*Si non remiseritis.* Hic exponatur petitio orationis dominicae: „dimitte nobis debita nostra“ p. 408.

#### Dominica XXII. post Pent.

*Magister scimus quia verax es.* Mat. 22, 16. Genus assentationis pessimum, quae ad proximi calamitatem et perniciem adhibetur. De adulacione habes p. 339. De mendacio vide p. 337.

*Reddite quae sunt Caesaris Caesaris.* Vide quae debentur principibus et superioribus in potestate constitutis, p. 307.

#### Dominica XXIII. post Pent.

*Ecce princeps unus accessit.* Mat. 9, 18. Hic de differentia, qua infideles et christiani a morbis liberari cupiunt, de qua p. 429. et quomodo in morbis ad Deum sit recurendum, p. 429.

*Filia mea modo defuncta est.* Hic de morte et novissimis de quibus saepe ad populum agendum esse praecipitur p. 65. 229.

*Si tetigero tantum fimbriam.* Hic de reliquiis Sanctorum, de cultu et veneratione earum aget parochus ex p. 275.

*Et cum venisset Jesus in domum.* Hic de ratione iuvandi mortuos per sacrificium missae et orationes, de qua p. 194. 362.

#### Dominica XXIV. post Pent.

*Cum ergo videritis abominationem.* Mat. 24, 15. Hic de signis praecedentibus diem iudicii agendum est, de quibus, p. 65.

*Orate autem, ne fiat.* Hic locus ad probandum temporalia a Deo peti posse inducitur p. 400. unde de hoc argumento parochi etiam agere poterunt, de quo p. 356. agitur.

*Sed propter electos breviabuntur.* Hic de daemonum potestate poterit agi, qui, quantum possunt, et quamdiu volunt, homines tentare non possunt, ut habetur p. 421.

## INDEX CATECHISMI.

### A.

Abbatibus administratio minorum ordinum interdum est permissa, 248.  
Abrahæ peregrinatio, 269.  
Abrahæ siuus, 50.  
Abrenunciant satanae baptizandi, et cur, 147.  
Absolutionis forma, 200.  
Absolutio peccatorum poenitentiae est effectus, 210.  
Absolutio quando peccatoribus deneganda, 220.  
Absolvendi potestas quibus data, 217.  
Absolvendi qui sint, 220.  
Accidentia in Eucharistia sacramento manent sine subiecto, 180.  
Accusatores quo pacto non recte suo fungantur officio, 341.  
Actiones Deo gratas sine adiumento divisionis gratiae suscipere non possumus, 388.  
Actio gratiarum erga Deum quomodo fiat in petitione de facienda Dei voluntate, 398.  
Actio gratiarum est una de partibus orationis, 357.  
Adam cibo indigebat in statu innocentiae ad reficiendas vires, 401.  
Adam eiusque posteri fructu arboris vitae immortales permanissent, 401.  
Adami et Christi comparatio, 38.  
Adam in paradiſo uulla molestia affectus fuisset, 401.  
Adam in paradiſo voluptatis otiosus non erat futurus, ib.  
Adami necessitates in nostræ multum inter se differunt, ib.  
Adami posteritas fructu vitaliſ arboris privata et horribili sententia damnata, ib.  
Adam sibi posterisque suis donum iustitiae originalis amisit, ib.  
Adam si non peccasset, multis rebus, quibus nos indigemus, non iudicuisse, ib.  
Adoratio triplex, 272.  
Adulterii detestatio, 319.  
Adulterii interdictio omne impunitatis et impudicitiae genus, quo corpus polluitur, prohibetur, 320.  
Adulterii interdictio quæ peccata prohibeantur, ib.  
Adulterio intima animi libido prohibetur, 321.  
Adulterium insignem turpitudinis notam inurit, 322.

Adulterium quare prohibitum, 320.  
Adulterium quid, ib.  
Adulterorum supplicia et damna, 322.  
Advocati tempore necessitatis pauperibus gratis debent patrocinari, 341.  
Advocatorum alia officia, ib.  
Affectus carnis ita domitor habere, ut omnino non existentur, non est in hominibus etiam iustificati potestate, 385.  
Affinitas patrinorum cum quibus contrahatur, 132.  
Agnoscendi peccati via, 412.  
Amen cur in sacrificio missae reservetur sacerdoti pronuntiandum, 435.  
Amen quid significet, ib.  
Amici amico periculose aegrotanti quomo perniciose assententur, 339.  
Amor Dei erga homines maxime in redemptione ostensus, 374.  
Angeli ab ortu sui initio gratia praediti; sapientia et potentia ornati, 24.  
Angelica salutatio est actio gratiarum, 363.  
Angelica salutatione Deus laudatur, ib.  
Angelicae salutioni adiunxit ecclesia preces et imploratiōnem B. Virginis, ib.  
Angeli non ut Deus adorantur, 273.  
Angeli quare humana specie effingantur, 277.  
Angeli quare Virtutes dicti, 25.  
Angelorum creatio, 24.  
Angelorum custodia erga homines, 371.  
Angelorum obediētia erga Deum, 397.  
Angelorum opera quoq[ue] maximis periculis liberarum, 273.  
Angelorum opera, quanta Deus humano generi beneficia contulerit, 372.  
Angelorum plurimi ex coelestibus sedibus deturbati, 25.  
Angelorum potestas qualis, 24.  
Angelorum scientia qualis, ib.  
Angelos esse invocandos et colendos ex Scripturis demonstratur, 273.  
Angelum custodem singuli habent, 371.  
Angelus multa docuit Tobiam de ratione matrimonii, 255.  
Anima Christi nunquam divinitatem amat, 43.  
Anima Christi simulatque creata est, omnis gratiae plenitudine praedita est, 36.  
Anima Christi cruciatus in utraque sui parte sensit, 41.  
Anima Christi re et praesentia ad inferos descendit, 51.

Anima Christi, descendens ad inferos, communicavit meritum passionis animabus patrum, 51.  
 Anima duabus aliis ad coelum pervenit, 358.  
 Animae piorum ante Christi mortem in sinum Abrahae defererantur, 52.  
 Animae praeter naturam perpetuo separantur a corpore, 93.  
 Anima est immortalis, 91.  
 Animantia omnia praeter hominem in eo statu permaneserunt, in quo creata sunt, 391.  
 Anima, quae peccaverit, quomodo mori dicatur, et ob peccatum puniatur, 281.  
 Anima separata a corpore propensionem habet ad corpus, 93.  
 Apostoli a Domino compositionem christi misericorditerunt, 153.  
 Apostoli caeremoniarum institutores, 145.  
 Apostoli quare a Christo dati, 7. 18.  
 Apostoli Symbolum in duodecim articulos distinctum componerunt; et quare, 14.  
 Apostolis autoritas a Christo data, ib.  
 Appetere Deum a principio homini datum, 391.  
 Appetitionibus corruptae naturae etiam reclamantibus et aversantibus, voluntas remittiendi iniurias sufficit, 416.  
 Appetitus proprii boni rebus omnibus in generatur, 391.  
 Aqua vid. Baptismus, 121.  
 Archiepiscopi partes quae sint, 247.  
 Artibus malis quae acquiruntur, nostra non sunt, 326.  
 Articuli fidei, Primus, p. 15. Secundus p. 27. Tertius 34. Quartus 40. Quintus 49. Sextus 57. Septimus 62. Octavus 67. Nonus 73. Decimus 86. Undecimus 91. Duodecimus 99.  
 Articuli quare singulae Symboli sententiae sint dictae, 14.  
 Articulus de Ascensione Christi eius maiestatem et gloriam declarat, 58.  
 Ascedeunt Christus in coelum sedet ad dexteram Patris; et quomodo intelligatur, ib.  
 Ascendit Christus, ut homo, corpore et anima in coelos, ib.  
 Ascensio Christi est tanquam finis, ad quem cetera mysteria referuntur, 60.  
 Ascensionis Christi cause, 59.  
 Ascensione Christi, quae beneficia nobis donentur, 60.  
 Assentatio, vitium tetterrimum, 339.  
 Assentatores saepissime vitio detrectationis peccant, ib.  
 Avari reprehenduntur, 348.

**B.**

Baptismia aquae, quare Chrisma addatur, 125.  
 Baptismi aqua, quae in sacro fonte conservatur, non est sacramentum, 123.  
 Baptismi aqua quando vim sanctificandi acceperit, 128.  
 Baptismi caeremoniae, 145.  
 Baptismi cognitio maxime necessaria, 121.  
 Baptismi doctrina, quare et quo tempore parochis tradenda sit, ib.  
 Baptismi effectus praecipuis, 140.  
 Baptismi figurae et prophetiae, 124.

Baptismi forma, 126.  
 Baptismi fructus, 142.  
 Baptismi lege, quo tempore homines teneri cooperint, 129.  
 Baptismi materia, 124.  
 Baptismi ministri, et eorum ordo, 130.  
 Baptismi nomen, quid denotet, 122.  
 Baptismi sacramentalis definitio, 123.  
 Baptismi sacramento omne peccatum condonatur, 138.  
 Baptismi sacramentum cum conditione non est sine discrimine adhibendum, 144.  
 Baptismi sacramentum in quanta veneratio habendum, 129.  
 Baptismi sacramentum pueris dandum, 134.  
 Baptismum iterari sacrilegium est, 144.  
 Baptismus a Christo Domino institutus, et quando, 128.  
 Baptismus adultis quando sit statim conferendum, 136.  
 Baptismus characterem imprimit, 143.  
 Baptismus coeli aditum patefacit, 145.  
 Baptismus ignis, 124.  
 Baptismus necessarius ad salutem, 134.  
 Baptismus pignus est nostrae redemptio- nis, 374.  
 Baptismus tribus modis confici potest, 128.  
 Ad Baptismi aquam consecrandam certi dies expectantur, 146.  
 Ad Baptismi gratiam assequendam fides est necessaria, 137.  
 In Baptismo caput ablueundum, 128.  
 In Baptismo Christi tota Trinitas appa- ruit, et cur, 129.  
 In Baptismo unica, an trina ablutione fiat, nihil refert, 128.  
 In Baptismo verba simul cum ablutione proferenda, ib.  
 Per Baptismum Christo incorporamus, 143.  
 Per Baptismum civiles poenae non remittuntur, 140.  
 Post Baptismum, cur aegre virtutem exerceamus, 143.  
 Post Baptismum, quare nou restituamur in statum naturae integræ, 141.  
 Baptizabant Apostoli in nomine Iesu et cur, 127.  
 Baptizandi, cur interrogandi sint an ve- lint baptizari, 136.  
 Baptizandi, cur mox in ecclesiam non admittantur, 146.  
 Baptizandi fidei suae professionem faciunt, 148.  
 Baptizandi sunt quam primum parvuli, 135.  
 Baptizandi, quando amentes et dormientes, 137.  
 Baptizandis, quae nomina imponenda, 149.  
 Baptizandum peccatorum poenitentia oportet, 137.  
 Baptizandum suspicere, quibus non li- ceat, 131.  
 Baptizare sacerdotes praesente etiam episco- scope possunt, 130.  
 Baptizantur pueri in fidem parentum et ecclesiae, 135.  
 In baptizandis adultis, quae ratio ser- vanda, ib.  
 Beatus vita æternae nomine designata, et cur, 100.  
 Beatus æterna nunquam desinit, ib..

Beatitudo aeterna incomprehensibilis est, 101.  
 Beatitudinis aeternae causa et descriptio, 102.  
 Beatorum gloria et praemia, ib.  
 Bella intestina hominis, 419.  
 Bellum sceleratis est cum Deo, 411.  
 Benedictio Dei operibus nostris necessaria, 401.  
 Benignitas Dei nos a malis eripit, 431.  
 Bestias occidere et edere licet, 311.  
 Blasphemare nomen Dei et Sanctorum detestabile scelus, 291.  
 Bona humanae vitae quare petenda, 402.  
 Bona humanae vitae ad bona divina nos dirigunt, ib.  
 Bona temporalia a Deo peti possunt, ib.  
 Bona temporalia, quo modo petenda, ib.

## C.

Carnalis nequitia quae sit, 418.  
 Castitas etiam coniugibus convenit, 321.  
 Castitas recte potentibus non negatur, 324.  
 Castitatis media, 321.  
 Catechismi necessitas et ratio, 8.  
 Cereus in baptismo, quid significet, 149.  
 Character, trium sacramentorum effectus, 120.  
 Character, quid praestet, ib.  
 Charitas proximi ex Dei caritate oritur, 303.  
 Charitatis praecpta duo, ib.  
 Charitatis officia, 315.  
 Chrisma in baptismo cur adhibeatur, 148.  
 Chrisma materia Confirmationis consecratio conficitur, 153.  
 Chrisma quomodo conficiatur, ib.  
 Christiana philosophia et seculni sapientia, in quo differant, 16.  
 Christiani alli alii praeferre se non debent, 376.  
 Christiani cur Deum patrem nostrum invocemus, 374.  
 Christiani in omnibus calamitatibus Deum habent perfugium, 377.  
 Christiani non de se solum, sed etiam de aliis solliciti esse debent, 403.  
 Christiani nunquam cogitare debent, Denm in ipsorum oblivionem venire, 375.  
 Christiani qua ratione Christi fratres censeantur, 376.  
 Christiani quare sancti dicantur, 80.  
 Christianorum summa dignitas, 378.  
 Christianorum unus spiritualis ortus, et una nobilitas, et unus pater, ib.  
 Christianus, quantum Christo debeat, 38.  
 Christi adventus duplex, 62.  
 Christi causa libenter stultitiae fama subeunda, 396.  
 Christi corpus nunquam anima et divinitate caruit, 36.  
 Christi divinitas nunquam a corpore separata, 44.  
 Christi nomen, quid significet, 80.  
 Christi passionis mysterium Dei potentiam et benignitatem maxime ostendit, 408.  
 Christi passio peccatorum veniam nobis meruit, ib.  
 Christi regnum spirituale, 31.  
 Christi sanguine scelerata nostra explanatur, 45, 89.

Christi sanguinis triplex effectus, 169.  
 Christi tria in ecclesiam insignia beneficia, 62.  
 Christus a diversis naturis diversas proprietates accepit, 32.  
 Christus a Davide originem traxit secundum carnem, 37.  
 Christus ecclesiae caput invisible, 79.  
 Christus frater noster, 376.  
 Christus imitandus in referenda nostra voluntate ad voluntatem Dei, 396.  
 Christus non est dicendus filius Dei adoptione, sed natura, 37.  
 Christus pro peccatoribus passus est, 46.  
 Christus, quare Dominus noster dicens, 32.  
 Christus, quare secundus Adam appellatus, 38.  
 Christus, quomodo in nobis regnet, 337.  
 Christus sacramentorum omnium anctor, 181.  
 Christus verus animae panis, 407.  
 Cibus multiplex animae, ib.  
 Cibus multiplex et delicatus non est postulandus a Deo, 403.  
 Circumstantiae peccatorum sunt confitentes, 215.  
 Clavibus ecclesiae aditus in coelum appetitur, 210.  
 Clavium dignitas et amplitudo, 87.  
 Clavium potestas est in ecclesia, 86.  
 Clerici nomen unde deductum, 241.  
 Clericorum corona, ib.  
 Colere deos alienos, qui dicantur, 276.  
 Communio, quid significet, 161.  
 Communio praeparationem desiderat, 184.  
 Communio sub una specie, 188.  
 Communicaturus, qualis esse debeat, 185.  
 Communicandum omnibus est, idque saepe, 187.  
 Concilio audienda, 300.  
 Concupiscentia non est aliena uxor, 349.  
 Concupiscentia, quid significet, 346.  
 Concupiscentia primorum parentum peccato depravata, 347.  
 Concupiscentia moderata quasdam aferit utilitates, ib.  
 Concupiscentia quare a S. Panlo peccatum dicta, 318.  
 Concupiscentia perpetua in membris latitat, 346.  
 Concupiscentia prava, stirps malorum omnium, 344.  
 Concupiscentia rerum alienarum et alienas uxoris, quo modo differant, ib.  
 Concupiscentia incommoda et remedia, 351.  
 Confessarius, qualem se praebere debeat era poenitentem, 219.  
 Confessarius peccata in confessione auditam manifestare non debet, 218.  
 Confessarius quis eligendus, 218.  
 Confessio a Christo instituta, 212.  
 Confessio contritionem perficit, 210.  
 Confessio, quare instituta, 212.  
 Confessio, quid significet, ib.  
 Confessio, qualis esse debeat, 216.  
 Confessio per intermissionem fieri nequit, 217.  
 Confessionis necessitas, 212, 215.  
 Confessionis utilitas, 213.

Confessionis figura, 212.  
 Confessionis iteratio necessaria, 217.  
 Confessionis minister, ib.  
 Confessionem quando facere oporteat, 214.  
 In Confessione omnia scelera capitalia accusanda sunt, ib.  
 In confessione praeparatio est necessaria, 220.  
 Confidere oportet in officio precandi, 366.  
 Confirmationis sacramentum, 150.  
 Confirmationis nomen, ib. 158.  
 Confirmationis sacramentum a Baptismo maxime disiunctum, 151.  
 Confirmationis sacramentum Christus instituit, 152.  
 Confirmationis materia, 153.  
 Confirmationis forma, 154.  
 Confirmationis minister, 155.  
 Confirmationi patrini adhibendi, ib.  
 Confirmationis sacramento affinitas contrahitur, ib.  
 Confirmatio, quam aetatem desideret, 157.  
 Confirmatio necessaria sit, an non, 156.  
 Confirmandis de peccatis dolendum est, 157.  
 Confirmandis confitendum est ante, ib.  
 Confirmatio novam gratiam tribuit, ib.  
 Confirmationis effectus, ib.  
 Confirmatio iterari non potest, 159.  
 Confirmationis caeremoniae et ritus, ib.  
 Confirmationis tempus, ib.  
 Consilia evangelica sequi nemo obligatur; ea tamen contemnens peccat, 290.  
 Contritionis significatio et nomina, 204.  
 Contritionis vis et efficacia, 209.  
 Contrito ad singula peccata mortalia pertinere debet, 207.  
 Contritio, quomodo excitanda, 209.  
 Contritio vera, quid desideret, 207.  
 Creatio Dei omnipotentia nititur, 23.  
 Creationis causa, ib.  
 Creatio Angelorum, 24.  
 Creatio hominis, 25.  
 Creator omnium Deus, ib.  
 Creatio Deus omnia conservat, 26.  
 Creatio omnibus Trinitatis personis communis, 23.  
 Creatura nova in Christo, quae sit intelligenda, 138, 267.  
 Credendum esse Deo, 16.  
 Quid primo credendum, 15.  
 Credere, quis dicatur, ib.  
 Crucis supplicium cur Christus subierit, 41.  
 Cultus diel festi, quare institutus, 300.  
 Cultus divini cupidi esse debemus, 280.  
 Cultus externus Deo adhibendus praecipit, 299.  
 Cultus sabbati, quo tempore sublatus sit, 295, 298.  
 Cupiditas vitiosa, quare prohibetur, 347.  
 Cupiditates propriae etiam lustis adversantur, 394.

## D.

Daemones eos maxime tentant qui ab eis defecerunt, 421.  
 Daemones in exitu animae, quomodo nobis insidentur, 235.  
 Daemones non singulis sed pluris quandoque unum hominem impugnant, 420.

Daemones, quos non oppugnant, et quos maxime infestent, 421.  
 Daemones perpetuum bellum nobiscum gerunt, ib.  
 Daemonis astuta et doli, 396.  
 Daemones, quo modo a nobis vincantur, 426.  
 Daemonum odium in genus humanum, 235.  
 Daemon vis alligata, 421.  
 Daemon, cur malus dicatur, 431.  
 Daemon est peccati auctor, 432.  
 Daemoni assignanda sunt omnia mala, quibus a proximis afficiuntur, ib.  
 Debita, quae dimitti postulemus, 413.  
 Debita, quare dicantur nostra, 414.  
 Decalogus quid significet, 264.  
 Descendere ad inferos, cur Christus voluerit, 51.  
 Descensu ad inferos nihil Christi dignitatē detractum est, ib.  
 Desideria piorum exaudit Deus, 254.  
 Detractionis quantum sit vitium, 338.  
 Detractoribus aures praebere, peccatum est, ib.  
 Dei amor erga homines in redemptione ostensus, 374.  
 Dei benignitas et misericordia erga homines, 372.  
 Dei benignitas nullis hominum iniuriis exhaustur, 373.  
 Dei nomen creaturis cur aliquando tributatur, 18.  
 Dei bonitas superat eiusdem iustitiam, 281.  
 Dei nome quo modo sit intelligendum et honorandum, 381.  
 Dei nomen, sanctificatione non egens, quo modo sanctificari petamus, 380.  
 Dei potentia et providentia, 372.  
 Dei opera omnia bona, 398.  
 Dei voluntatem, quare maxime colamus, ib.  
 Dei viae investigabiles, ib.  
 Ad Dei gloriam omnia ad usus vitae necessaria sunt referenda, 400.  
 Deus unus est, 18.  
 Deus poenitere dicitur, 196.  
 Deus solus remittit peccata auctoritate propria, 88.-  
 Deus omnium et speciatim omnium Christianorum pater, 19.  
 Deus omnipotens est, 21.  
 Deus, cur pater dicatur, 370.  
 Deus, et non Sancti, sacrificio honoratur, 192.  
 Deus, legis auctor, 265.  
 Deus, quare fortis in Decal. dicatur, 279.  
 Deus peccati auctor non est, 423.  
 Deus, quare zelotes appellatus, 280.  
 Deus, quibus modis laudandus, 283.  
 Deus primus diligendus, deinde parentes, 301.  
 Deus hominum non obliviscitur, 373.  
 Deus, quare castiget, quos amat, 375.  
 Deus omnium Deus est, 377.  
 Deus ubique est, 378.  
 Deus, quare in coelis esse dicatur, ib.  
 Deus, quo modo amandus, 380.  
 A Deo quid primum petendum, ib.  
 Deo servire regnare est, 394.  
 Deus non ad otium et inertiam nos vacavit, 390.  
 Deus nunquam nos deserit, ib.

Deus nisi gratiam suam nobis largitur,  
salvi fieri non possumus, 330.  
Deus nobis melius consultit, quam nos  
optare possumus, ib.  
Deus ad peccata poenitentibus condonanda  
promptus est, 412.  
Deus beneficentissimus parens, ib.  
Deus, quo modo suos tentet tentarique  
sinat, 422.  
Deus negat propitiis, quae concedit ira-  
tus, 354.  
Deus, cur rogari velit, cum, quibus ege-  
amus, sciat, 356.  
Deus vires concedit ad satanam vincen-  
dum, 425.  
Deus non vult, nos ab omniibus incom-  
modis solutos esse, 430.  
Deus, solatii largitor, 431.  
Deus uitur daemone ministro in poenis  
malorum repetendis, ib.  
Diabolose homines peccando addicunt, 410.  
Diabolus, cur mundi princeps dicatur, ib.  
Diabolus proprium, ut homines tente, 422.  
Diabolus crudeliter dominatur, 410.  
Diabolus, quibus modis ad tentandum  
utatur, 420, 431.  
Diei Dominiæ institutio, 298.  
Dies Domini, quis sit, 62.  
Divitiae non amandæ, 360.  
Divites opes suas a Deo acceperunt, et  
quare, 408.  
Divortio matrimonium nou disrupitur,  
259.  
Dominus in octavo præcepto quid signifi-  
cat, 318.  
Dubitare in orando non debemus, 366.

## E.

Ecclesiæ nomen quid significet, 74.  
Ecclesiæ alia nomina, 75.  
Ecclesiæ militans et triumphans, ib.  
Ecclesiæ bonos et malos continent, 76.  
Ecclesiæ figure et similitudines, 82.  
Ab Ecclesiæ, quinam excludantur, 77.  
Ecclesiæ Catholicae proprietates et præ-  
rogatiæ, 78.  
Ecclesiæ caput visible Pontif. Rom., ib.  
Ecclesiæ veræ a falsa dignoscendae cer-  
tissima regula, 81.  
Ecclesiæ non potest errare, 82.  
Ecclesiæ universalem omnes tenere de-  
bet, qui saltem consequi cupunt, ib.  
Ecclesiæ credere ad fidei articulos per-  
tiuet, ib.  
Ecclesiæ auctor Deus, 83.  
Ecclesiæ auctoritas, ib.  
Ecclesiæ maiestas propter Eucharistiam,  
174.  
Ecclesiæ catholicae agnitione nomen Dei  
sanctificatur, 382.  
Eleemosynæ necessitas, 331.  
Eleemosynam ut faciamus cobortatio, ib.  
Eleemosyna orationi addenda, 370.  
Eleemosyna fructus, 417.  
Episcopi administratio, 247.  
Episcopus tantum ordines confert, 218.  
Episcopi quo modo honorandi, 307.  
Eucharistia institutio, 160.  
Eucharistiae plura nomina, 161.

Eucharistiam post cibum et potum sumere  
non licet, 162.  
Eucharistia vere est ex septem Sacramen-  
tis, ib.  
In Eucharistia adoramus corpus et san-  
guinem Christi, 163.  
Eucharistiae a ceteris sacramentis diffe-  
rentia, ib.  
Eucharistiae sacramentum perfectum fa-  
cit materie consecratio, 164.  
Eucharistia est unum tantum sacra-  
mentum et non plura, ib.  
Eucharistiae significatio triplex, ib.  
Eucharistiae materia duplex, 163.  
Eucharistia ut pane azymo conficiatur con-  
veniens est, non tam nec necessarium, 165.  
In Eucharistia, cur aqua vino admisce-  
tur, 166.  
In Eucharistia, quid significet panis et  
vinum, 167.  
Eucharistiae forma, ib.  
Eucharistia verum Christi corpus, verus-  
que sanguis continctur, ib.  
Eucharistia non est sigillum tantum cor-  
poris Christi, 171.  
In Euchar. totus Christus adest, 175.  
In Euchar. quae sint ex concomititia, ib.  
Eucharistia cur post consecrationem pa-  
nis nominetur, 178.  
Eucharistiae species externa, 179.  
Eucharistia fons omnium gratiarum, 181.  
Eucharistia, quo modo gratiam tribuat, ib.  
Eucharistiae commoda et utilitates, ib.  
Euchar. omnium sacramentorum finis, ib.  
Eucharistiae figura est manna, 182.  
Eucharistiae sumendas tres modi, 183.  
Eucharistiae sumendas causa aliquot dies  
ab uxoribus abstinendum, 186.  
Eucharistiam priusquam accipiamus, con-  
fessione nos et leiuio praeparare de-  
bemus, ib.  
Eucharistiam saepius sumamus necesse  
est, ib.  
Eucharistia quotidie anima est alenda, 187.  
Eucharistia, quare infantibus et amenti-  
bus non datur, 188.  
Eucharistiam laicis sub utraque specie  
sumere non licet, ib.  
Eucharistiam conficiendi potestatem soll  
sacerdotibus habent, 189.  
Eucharistia sacrificium est, 190.  
Eucharistia victimæ Deo gratissima, ib.  
Eucharistiae sacrificium quando institu-  
tum, 191.  
Eucharistiae figure et oracula, 192.  
Eucharistia inexplicabile caritatis pignus,  
407.  
Eucharistia, quare panis noster, et panis  
quotidianus dicatur, ib.  
Executiones Sanctorum in Scripturis sunt  
praedictiones, 362.  
Exitus petitionum nostrarum Deo est per-  
mittendus, 432.  
Exorcismus in Baptismo, 147.  
Extrema unctione, 229.

## F.

Falsum testimonium elusque damua, 337.  
Falsum testimonium exhibere nunquam  
non nefas est, ib.

Falsum testimonium contra se dicere non icet, 336.  
Falso testimonio adnumeratur mendacium, 337.  
Felicitas aeterna, 100.  
Felicitas aeterna est incomprehensibiliis, 101.  
Felicitas, in quo consistat, 102.  
Festorum dierum praeceptum, 293.  
Festi dies, cur instituti, 298.  
Festis diebus quid Christianis agendum, ib.  
Fidei definitio, necessitas et gradus, 15.  
Fides redemptionis ad salutem semper necessaria fuit, 31.  
Fides veterum et nostra eadem, 28.  
Fides poenitentiam antecedere debet, 197.  
Fides necessaria in oratione, 366.  
Fides ad iustificationem necessaria, 13.  
Fidei cur duodecim sint articuli, ib.  
Fidei Christianae excellentia, 16.  
Fides in Matrimonio quid significet, 260.  
Fiducia in oratione unde veniat, 366.  
Fiduciam in orando iuvat nomen Patris, 371.  
Fiducia, qua re iuvetur, 367.  
Figure concept, et nativitatis Christi, 38.  
Figure crucis Christi, 42.  
Filius Dei, 31.  
Formula orandi diversa ad Deum et ad Sanctos, 364.  
Fornicatio quid, et quae eiusdem species, 320.  
Frugalitati consulendum, 332.  
Furti nomen, 328.  
Furti variae species et genera, ib.  
Furtum, quam grave scelus, 327.  
Furto ablata sunt restituenda, ib.  
Furtum facit, qui foeneratur, 329.  
Furti excusatio nulla, 333.  
Furto Dei nomen dedecoratur, ib.  
De furto, quod praeceptum est, in eo maxima Dei benignitas conspicitur, 325.  
De furto praeceptum duas habet partes, ib.

**G.**

Gaudia Sanctorum, 407.  
Gloria Sanctorum, 101.  
Gloria Dei, quomodo in oratione petatur, 387.  
Gloria quid, ib.  
Gradus ad orationem in ecclesia, 361.  
Gratia, quid, 142. 386.  
Gratia Dei plerumque excidimus, 143.  
Gratia Dei conversionem praecedens, 387.  
Gratia Christi, quo modo augeatur, 225.  
Gratia ex Eucharistia, 181.  
Gratiae, quae sint toti ecclesiae communenes, 85.  
Gratiarum actio, 370.

**H.**

Haeresis, quam iate serpserit, 8.  
Haereticis adhaerentes damnantur, 406.  
Haereticoli diaboli sunt ministri, 422.  
Haereticorum artificia, 8.  
Haereticus, quis sit, 73.  
Hebraeorum populum, quare Deus elegerit, 269.  
Hebraeos gravissima servitute premi, cur Deus promiserit, eorumque liberatio ab Aegyptiis, 270.

Homicidium prohibens praeceptum auditum est iucundum, et duo continet, 311.  
Homicidii quo sint rei, quot non sint, 312.  
Homicidium casuale, quando peccat, 313.  
Homicidium sui ipsius est interdictum, ib.  
Homicidium peccatum est nefarium, 314.  
Homicidii voluntas peccatum est, ib.  
Homo ad imaginem Dei formatus, 25.  
Hominis prima ruina, 27.  
Homo Dei beneficio immortalis, 25.  
Homo, quid debeat Deo, 357.  
Homo peccato quae bona amiserit, 392.  
Homo pueris comparatur et aegris, ib.  
Homo iustificatus concupiscentiam retinuit, 394.  
Homo post Adami peccatum, qua maiestate condemnatus, 401.  
Homo omnis peccator, 409.  
Homo victim sibi per se comparare nequit, 405.  
Hominis instabilitas, 385.  
Homo imbecillitate sua peccatum sine Dei auxilio vitare nequit, 397.  
Hominis insacia et imbecillitas, 419.  
Hominis labor, ni Deus favet inanis, 402.  
Honor Dei habendus, 283.  
Honore, quid sit, 304.  
Honordi sunt patres, ib.  
Honori mortis parentibus tribuendus, 307.  
Praeceptum de honorandis parentibus explicitatur, 302.  
Hostium humani generis artes, 420.  
Humiliter regnum Dei petendum, 418.  
Hypocritarum oratio, 368.

**I.**

Ieiunium orationi sociandum, 370.  
Iesum filium Dei credentes, quam utilitatem capiant, 27.  
Iesus, Dei filius, si nos potuit Deo reconciliare, ib.  
Iesus nomen, 29.  
Iesus rex, sacerdos et propheta supremus, 30.  
Iesus Dei filius et Deus verus, 31.  
Imagines pingere quatenus prohibitum, 276.  
Imagines Angelorum cur fiant, 277.  
Imaginum utilitas, 278.  
Impiorum poena duplex, damni et sensus, 66.  
Incarnationis verbi, quanti facienda, 35.  
Incaronationis mysterium non una persona confecit, 36.  
Incaronatio quare Spiritui sancto tribuitur, 35.  
Incaronationis myster. pie recoendum, 37.  
Incommoda aequo animo ferenda, 432.  
Infelicitas hominis quo modo cognoscatur, 385.  
Inferorum nominis significatio Vid. Descendere, 51.  
Ingratitudine hominum erga Deum, 423.  
Inhumanitas in egenos fugienda, 365.  
Inimicorum dilectio commendatur, 316.  
Inimicos qui diligunt sunt Dei filii, 415.  
Inimicis non est irascendum, 431.  
Inimicis non parcentes quid a Deo petere debeant, 416.  
Inimici invisibilis, quae sint, 420.  
Injuriae remittendae et obliiscendae, 415. 417.

Invocatione Deus honoratur, 291.  
 Irasci peccatum est, 314.  
 Iudicium Christi futurum et eius signa, 65.  
 Iudices venales rapinas committunt, 329.  
 Iudicium peccata, 337.  
 Iudicia forensia quomodo administranda, 340.  
 Iurandi lex, quae iubeat, et prohibeat, 283.  
 Iurandi frequens usus vituperandus, 284.  
 Iurare, quid, et quare institutum, 285.  
 Iurare per creaturas licet, ib.  
 Iuranti, quae sint consideranda, 287.  
 Iurare cur liceat, 288.  
 Iurando quis pecet, 290.  
 Iurandi praeceptio, cur minae additae, ib.  
 Iurisdictio unde sit, 217.  
 Ius naturale quid sit, 265.  
 Ius naturae violent, qui inimici non par-  
 cunt, 415.  
 Iusiusrandum assertorium et promissorium, 286.  
 Iusiusrandum quo modo se habere debeat,  
 et quo modo non, ib.  
 Iustificati mentem sanat Dei gratia, non  
 carnem, 394.  
 Iustificari nequit, qui non paratus est ad  
 omnia praecelta observanda, 268.  
 Iustificatio infinitae Dei potentiae opus, 88.  
 Iustificatio fit per sacramenta, 111.  
 Iustitia originalis, quae a Deo data sit, 25.  
 Iustitia iuramenti comes, 287.

**L.**

Labore manuum ea quaerenda, quae pau-  
 peribus tribuamus, 332.  
 Lacrymae in Poenitentia optandae, 206.  
 Lex naturae a lege scripta non diversa, 265.  
 Lex decalogi non nova, 266.  
 Legis iussa non difficilia, et cur, ib.  
 Lex quantum sit Dei beneficium, ib.  
 Lex, cur eo loco et tempore data, 270.  
 Legi obtemperandum, 267.  
 Legis observanda fructus, 268.  
 Legis servandae modus et ratio, 282.  
 Legum divinarum et humanarum diffe-  
 rentia, 346.  
 Lex divina speculum, ib.  
 Libellorum famosorum auctores damnan-  
 tur, 339.  
 Libellus repudii etc., 260.  
 Liberum arbitrium homini datum, 25.  
 Lingue vitium frequentissimum, 335.  
 Loquacitas in orando absit, 308.  
 Loquacitas vitanda, 342.  
 Lucrorum honestorum tranquillitas, 404.  
 Luminis divini effectus, 15.

**M.**

Magistrations honor et obedientia debe-  
 tur, 307.  
 Mala patientes ad Deum configimus, 430.  
 Mala, quibus liberari petamus, et quibus  
 non petamus liberari, ib.  
 Malis ubi non liberamur, quid agamus, 432.  
 Mala, quibus a proximis afficimur, dae-  
 moni assignanda, ib.  
 Mala animae et corporis deprecanda, 430.  
 Maria Dei et hominis mater, 37.  
 Maria semper Virgo, ib.  
 Mariae Spiritus S. affuit, ib.

Maria cum Eva collata eiusque ortus, 33.  
 Mariæ dignitas et benignitas, 363.  
 Mariti officia, 261.  
 Matrimonii nomen, 252.  
 Matrimonium inire, qui nequeant, ib.  
 Matrimonii vis et natura, ib.  
 Matrimonium consensu efficitur, 253.  
 Matrimonii obligatio qualis, 254.  
 Matrimonium, quo modo contrahatur, 253.  
 Matrimonii duplex ratio, 254.  
 Matrimonium, ut est officium naturae, a  
 Deo institutum, 258.  
 Matrimonium indissolubile, 259.  
 Matrimonium, quare institutum, 256.  
 Matrimonii sacramentalis natura, 257.  
 Matrimonium, quid significet, ib.  
 Matrimonium sacramentum est, et a Chri-  
 sto institutum, 257.  
 Matrimonii gratia et praestantia, 261.  
 Matrimonium duorum tantum coniunctio,  
 258.  
 Matrimonii bona tria, 260.  
 Matrimonia clandestina nec vera, nec rata  
 esse possunt, 262.  
 Matrimonii impedimenta tradenda, 263.  
 Matrimonium contrahentes, quo modo af-  
 fecti esse debeant, ib.  
 Matrimonium contracturis parentum con-  
 sensus requirendus, ib.  
 Matrimonii usus, ib.  
 Matrimonio interdum orandi causa absti-  
 rendum, 264.  
 Medicamenta a Deo hominibus data, 429.  
 In Medicina quo modo spes ponenda, ib.  
 Mendacium, quid sit, 335.  
 Mendacium nefas, 337.  
 Mendacii turpitude, 341.  
 Mendacium, quam noxiun silt, 342.  
 Mendacii pater daemon, ib.  
 Mendacium non excusandum, 343.  
 Mendacio non studendum, ib.  
 Mereri possumus cum divina gratia vitam  
 aeternam, 225.  
 Meretur oratio nostra exaudiri per e-  
 ritu Christi, 369.  
 Meritum nostrum ex divina gratia ortum  
 habet, 225.  
 Meritorum praemia, 105.  
 Meritum operum nostrorum ex merito pas-  
 sionis Christi pendet, 225.  
 Meritorum communicatio in Ecclesia, 84.  
 Miseria hominis in hac vita, 335, 392.  
 Misericordia humanae causa potissima, 335.  
 Misericordia humanae per pecc. originale, 391.  
 Missae sacrificium, 191.  
 Missae sacrif. pro mortuis offertur, 194.  
 Missae sacrif. propitiatorium, 193.  
 Missae omnes communiones dicendae, 194.  
 Missae ritus, ib.  
 Moechia prohibita, 319.  
 Moechia, quare post homicidium prohl-  
 beatur, ib.  
 Moechiae praeceptum, quibus verbis tra-  
 cendum, ib.  
 Mortem in ligno crucis, en Christus per-  
 pessus sit, 41.  
 Mortem Christi parochi saepe exponere  
 debent, 42.  
 Mortem Christus vere snaque sponte sus-  
 tinxit, ib.  
 Mulier, quare ex viri latere formata, 261

## N.

- Nativitas Christi duplex non fecit duos filios, 32.  
 Nequitia carnis et spiritus, 420.  
 Nomina, quare imponenda baptizatis, 149.  
 Nominis divino, quo modo verus honor attribuatur, 283.  
 Nomen Dei, cur a gentibus blasphemetur, 382.  
 Nomen Dei sanctum et terrible sanctificatione non eget, 381.  
 Novissimorum commemoratione saepe est facienda, 229.

## O.

- Obedire omnia debent divinae voluntati, 399.  
 Observatio legis necessaria ad salutem, 267.  
 Obrectationis vitium, 338.  
 Obrectatorum genera, ib.  
 Odiūm Dei maximum est omnium peccatorum, 281.  
 Odiūm in proximos, quam sit noxium, 316.  
 Odiūm daēmonū in nos infinitum, 420.  
 Opera sine fide Deo grata non sunt, 225.  
 Opera propter scelerā nostra inanita sunt, 392.  
 Opera nostra ex Christi gratia merentur, 226.  
 Operibus nostris vitam aeternam consequimur, 225.  
 Operibus Dei regnum comparatur, 390.  
 Opus gratum Deo porficere per nos nequimus, 225.  
 Orandus primo Deus, deinde Sancti, 361.  
 Orandi optimus modus, 358. 368.  
 Pro quibus orandum, 361.  
 Orandum in nomine Christi, 369.  
 Orando Deum honoramus, 354.  
 Oranti divina maiestas fit proprior, 433.  
 Orare quare alii pro aliis debeamus, 377. 414.  
 Orandi ratio bona et mala, 399.  
 Orandi fructus, 433.  
 Orationis gradus, 358.  
 Orationis necessitas, 333.  
 Orationis utilitas et fructus, 354.  
 Oratio pia a Deo exauditur, 355.  
 Oratio est coeli clavis, ib.  
 Orationis partes, 357.  
 Orationis assiduitas, 356.  
 Oratio, quae non exaudiatur, 355.  
 Oratio pro impensis facienda, 362.  
 Orationis humilitas, 365.  
 Orationis praeparatio 364.  
 Oratio mentalis, 368.  
 Oratio publica et privata, ib.  
 Oratio dominica, 370.  
 Orationis initium timoria plenum, finis exultatio, 434.  
 Ordo quid, 240.  
 Ex Ordinis sacramento omnia alia sacramenta pendent, 237.  
 Ordinis dignitas, 238.  
 Ordinandi quales sint, ib.  
 Ordines septem, qui sint, 241.  
 Ordinis minister, 248.  
 Praeparatio ad Ordinem, ib.  
 Ordo, quibus non conferendus, 250.  
 Ordo gratiam conferit, ib.  
 Ordo characterem imprimit, ib.

Originalis iustitiae donum, 25.  
 Originale peccatum, 27.

## P.

- Panis nomen, 402.  
 Panis quotidians, 404.  
 Panis spiritualls, 406.  
 Panis nobis petendus, 404.  
 Panis noster Christus est, 407.  
 Parentes honorandi, 301.  
 Parentum officia, 310.  
 Passionis Christi causa, fructus etc., 45.  
 Pastorum auctoritas et officia, 7.  
 Pater, cur Deus vocetur, 19.  
 Patris nomine qui vocentur, 304.  
 Pater omnium Deus, 371.  
 Patriarchae, quot, et eorum gradus, 247.  
 Patrini, 181.  
 Patronūm causa aliquis officia, 341.  
 Peccatum Adami eiusque poenae ad nos transierunt, 27.  
 Peccata quaedam remitti non posse, quo modo intelligendum, 202.  
 Peccata capitalia confitenda, 214.  
 Peccata in ecclesia remittuntur, 86.  
 Peccata poenitentibus Deus remittit, 412.  
 Peccata, quare debita vocentur, 413.  
 Peccata sine Dei auxilio vitare non possumus, 297.  
 Peccati culpi remissa, poena non remittitur, 222.  
 Ad peccati veniam tria requiruntur, 409.  
 Peccati veniam postulans, quo modo affectus esse debat, 417.  
 Peccati pestis teterima, 413.  
 Peccati turpitudine, 411.  
 Peccato Deus offenditur, 412.  
 Peccatorum veniam petentes, excusationibus ne utamur, 409.  
 Peierare, 289.  
 Perjurii supplicia, 290.  
 Personae divinae, 20.  
 Peter, quid primum debeamus, 380.  
 Petenda quae sint, 360.  
 Petatio omissis ad coelestia dirigenda, 380.  
 Petitionis ordo, ib.  
 Petitionibus cur non semper Deus indulget, 355.  
 Peter non debemus, ut omnino tentacionibus vacemus, 424.  
 Petero non debemus, ut ab omnibus malis simus liberi, 429.  
 Petitorum officium, 341.  
 Petrus primatum tenuit etc., 78.  
 Poenitentia diu carere non debemus, 195.  
 Poenitentiae significatio, ib.  
 Poenitere quomodo Deus possit, 196.  
 Poenitentiam quae attinent, 195—228.  
 Pontifex Rom. pater orbis terrarum, Christi vicarius etc., 248.  
 Pontificis Rom. dignitas, 79.  
 Potestas ecclesiastica duplex, 239.  
 Praecepta Mosaica pendent ex Decalogo, 265.  
 Praeceptum primum Decalogi, 271.  
 Praeceptorum ordo, 272—352.  
 Praecepta Decalogi duabus tabulis incisa, et quare, 302.  
 Praedicatio verbi divini nunquam est intermittenda, ea que nobis fidem acquirit, 6.

Praedicantium auctoritas, 7.  
Praemia victoribus proposita, 426.  
Praesidia ad salutem, 390.  
Precatio Dominica singulis diebus facienda, 406.  
Precatio totius nomine ecclesiae facienda, 416.  
Preces assidue facienda, 369.  
Preces fidelium et infidelium, 429.  
Vid. Oratio et Orare.  
Pretium Christi crucis, 413.  
Prophetarum falsi, 7.  
Prophetarum oracula de Ecclesia, 73.  
Providentia Dei, 371. 386. 402.  
Proximus, quis sit, 336.  
Pudicitia et continentia colenda, 321.  
Purgatorium, 50.

**R.**

Rapinae peccatum et genera, 328.  
Raptiores, qui dicendi, ib.  
Regnum Dei et Christi, 383—390.  
Reliquiarum virtus, 275.  
Remedia animae, 417.  
Remedia morbi, 429.  
Romissio peccatorum in ecclesia, eiusdem ratio et conditiones, 86.  
Remissa culpa non semper remittitur poena, 222.  
Restitutio, 228. 330.  
Resurrecio Christi, 52.  
Resurrecio hominum, 91.  
Romana Ecclesia omnium mater, 78.  
Romanae Eccles. desertores damnantur, 77.

**S.**

Sabbatum colendum, eiusque institutio etc., 295.  
Sacerdoti soli facultatem habent s. Eucharistiam conficiendi, 189.  
Sacerdotibus ad victimum necessaria suppeditanda, 307.  
Reliqua de Sacerdotibus et Sacerdotio vid. in sing. quaest., 237—250.  
Sacramentum quid sit, 106.  
Sacramentum et Sacrificium in quo differant, 191.  
Sacrificium, quibus offeratur etc., 192.  
Salis in Baptismo usus, 147.  
Saliva in Baptismo usus, ib.  
Sanctorum communio, 33.  
Sanctorum invocatio, 364.  
Sanctorum veneratio, 274.  
Sanctorum imagines, 278.  
Satanas ausus et machinae, 420.  
Satisfactionis doctrina, 225—229.  
Seclerati in ecclesia participatione meritorum non gaudent, 85.  
Schismatici damnantur, 77.  
Sepultura Christi, 44.  
Servorum non concupiscendum, 349.  
Servire Deo est regnare, 395. 398.  
Signa a Deo in V. et N. T. instituta, 109.  
Signa quae dicantur, 110.

Spes in Deo collocanda, 397.  
Spiritualis nequitia, 420.  
Spiritus S. nostrorum orationum auctor, 367.  
Spiritus S. Vid. de hoc art., 67—73.  
Superbia Deum offendit, 365.  
Symboli necessitas etc., 16.

**T.**

Tentare, quid sit, 422.  
Tentare Deum, ib.  
Tentatio in hac vita triplex, ib.  
Terrae creatio, 25.  
Testes et Testimonium, 340.  
Vido Falsum testim. etc.  
Tonsura, 241.  
Transubstantiatio, 177.  
Tribulationum commoda, 432.  
Trinitatis opera ad extra sunt indivisa, 72.  
Trinitas in Baptismo cur apparuit, 123.

**U.**

Uncio Extrema, 229—236.  
Usura, quid sit, 329.  
Uxor una sit, 259.  
Uxoris officia, 267.


**V.**

Vasa sacra quis tangere possit, 190.  
Verbum Dei quo modo dedecoretur, 291.  
Verba pastorum tanquam Dei verba accipienda, 7.  
Verba inter omnia signa maximam vim habent, 114.  
Verbi incarnatio, 35.  
Verbum Dei cibus est animae, 406.  
Verum semper confitendum est, 341.  
Vestis candida in Baptismo, 149.  
Vicarius Christus reliquit, 78.  
Victoria contra diabolum quo modo paretur, 425.  
Vigilae tentationes vincunt, ib.  
Viri officium erga uxorem, 261.  
Virginitas matrimonio praestantior, 255.  
Vita aeterna, 99.  
Vita, quantum bonum sit, quantisque malis obnoxium, 100.  
Vita hominis tentatio, 424.  
Vita et salus nostra ex Deo pendet, 405.  
Vocationem suam quisque sequatur, 399.  
Voluntas Dei ut fiat, quare potamus, 391.  
Voluntas Dei, ut fiat, qui maxime petere debeant, 395.  
Voluntatem suam Christus ad Patris voluntatem retulit, 397.  
Voluntas Dei ubique innotescat et servetur, ib.  
Voluntas Dei, quare maxime colenda, 396.  
Voluntas Dei summa ratio, 398.  
Voluntate Dei omnia eveniunt, ib.  
Votum non servans perjurus est, 290.

**Z.**

Zelus, quis Deo tribuendus, 280.

Typis Instit Librar. pridem G. J. Manz in Ratisbonen.



**Verlagsanstalt vorm. G. J. Manz in Regensburg.**

## **Canones et decreta**

sacrosancti oecumenici Concilii tridentini sub Paulo III., Julio III. et Pio IV. Pontificibus maximis. Cum additamentis et indicibus amplissimis. Quibus in appendice accedunt decreta et canones concilii vaticani a. ss. D. n. Pio P. P. IX. die 8. Decembris 1869 aperti. Cum permissu reverendissimi ordinariatus archiepiscopalis Bambergensis. 1 M. 50 Pf.

## **Canones et decreta**

sacrosancti oecumenici Concilii tridentini sub Paulo III., Julio III. et Pio IV. Pontificibus maximis. Cum additamentis et indicibus ad conc. trident. spectantibus. Auch unter dem Titel: Beschlüsse und Glaubensregeln des hochheiligen allgemeinen Concils zu Trient unter den Päpsten Paul III., Julius III und Pius IV. Mit Sachregister und Bullen, welche das Concil betreffen. Lateinisch und deutsch. (Herausgegeben von Dr. V. Loch.) — 2 M.

## **Decreta et canones**

sacrosancti et oecumenici Concilii Vaticani a. SS. D. N. Pio P. IX. Die 8. Decembris 1869 aperti. 45 Pf.

## **Decreta et canones**

sacrosancti et oecumenici Concilii vaticani a. SS. D. N. Pio IX. Die 8. Decembris 1869 aperti. Auch unter dem Titel: Beschlüsse und Glaubensregeln des hochheiligen und allgemeinen Vaticanischen Concils, eröffnet von Seiner Heiligkeit dem Papste Pius IX. am 8. December 1869. Mit Genehmigung des Hochwürd. Capitel-Vicars des Erzbistums Bamberg. 90 Pf.

• P. J. P. Gury S. J..

## **casus conscientiae in praecipuas quae- stiones theologiae moralis.**


Editio in Germania prima. 1 M. 50 Pf.

## **Katechismus n. d. Beschlusse des Concils von Trient**

für die Pfarrer auf Befehl des Papstes Pius V. und Clemens XIII. herausgegeben. Uebersetzt nach der zu Rom i. J. d. H. 1855 veröfentlichten Ausgabe. Mit Sachregister. Mit Genehmigung des hochw. Ordinariates Bamberg. Stereotyp.-Ausgabe. 1 M. 80 Pf.



88-B7230



GETTY CENTER LIBRARY



3 3125 00775 9364

